

白氏长庆集

白居易

文硕阁

wenshuoge.com

目录

关于我们	4
御制读白居易诗率题	6
提要	7
卷一	8
卷二	20
卷三	30
卷四	36
卷五	43
卷六	51
卷七	60
卷八	69
卷九	78
卷十	86
卷十一	97
卷十二	106
卷十三	114
卷十四	127
卷十五	140
卷十六	153
卷十七	167
卷十八	181
卷十九	192
卷二十	205
卷二十一	218
卷二十二	228
卷二十三	239
卷二十四	252
卷二十五	265
卷二十六	277
卷二十七	288
卷二十八	299
卷二十九	312
卷三十	321
卷三十一	329
卷三十二	341
卷三十三	351

卷三十四		364
卷三十五		375
卷三十六		387
卷三十七		401
卷三十八		409
卷三十九		415
卷四十		420
卷四十一		425
卷四十二		430
卷四十三		435
卷四十四		440
卷四十五		445
卷四十六		451
卷四十七		456
卷四十八		463
卷四十九		469
卷五十		476
卷五十一		482
卷五十二		491
卷五十三		499
卷五十四		507
卷五十五		515
卷五十六		523
卷五十七		535
卷五十八		548
卷五十九		554
卷六十		562
卷六十一		567
卷六十二		572
卷六十三		581
卷六十四		590
卷六十五		598
卷六十六		607
卷六十七		616
卷六十八		625
卷六十九		634
卷七十		641
卷七十一		650

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

御制读白居易诗率题

御制读白居易诗率题

立意为平易虞人不知叟千载诵其诗而叟亦知否

提要

钦定四库全书 集部二

白氏长庆集 别集类一【唐】

提要

【臣】等谨案白氏长庆集七十一卷唐白居易撰居易有六帖已着録案钱曾读书敏求记称所见宋刻居易集两本皆题为白氏文集不名长庆集汪立名校刻香山诗集亦谓宝历以後之诗不应概题曰长庆今考居易尝自写其集分置僧寺据所自记太和九年置东林寺者二千九百六十四首勒成六十卷开成元年置于圣善寺者三千二百五十五首勒成六十五卷开成四年置于苏州南禅院者凡三千四百八十七首勒为六十七卷皆题曰白氏文集开成五年置于香山寺者凡八百首合为十卷则别题曰洛中集惟长庆四年元稹作白氏长庆集序称尽徵其文手自排纂成五十卷二千九百九十一首又称明年当改元长庆讫于是因号曰白氏长庆集则长庆一集特穆宗甲辰以前之作曾及立名所辨不为无据然唐志载白氏长庆集七十五卷宋志亦载白氏长庆集七十一卷而白氏文集之名转不着録又高斯得耻堂存稿有白氏长庆集序宋人目錄传于今者晁公武读书志尤袤遂初堂书目陈振孙书録解题亦均作白氏长庆集则谓宋刻必作白氏文集亦未尽然况元稹之序本为长庆集作而圣善寺文集记中载有居易自注称元相公先作集序并目錄一卷在外则长庆集序已移并开成新作之目錄知宝历以後之诗文均编为续集袭其旧名矣未可遽以总题长庆为非也其卷帙之数晁公武谓前集五十卷後集二十卷续集五卷今亡三卷则当有七十二卷陈振孙为七十一卷之外又有外集一卷亦当有七十二卷而所标总数乃皆仍为七十一卷与今本合则其故不可得详至彭叔夏文苑英华辨证谓集中进士策问第二道俗本妄有所增又冯班才调集评亦称每卷首古调律诗格诗之目为重刻改窜则今所行本已迥非当日之旧矣乾隆四十四年九月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

卷一

钦定四库全书

白氏长庆集卷一

唐白居易撰

讽谕一【古调诗五言凡六十五首】

贺雨

皇帝嗣宝历元和三年冬自冬及春暮不雨旱熯熯【持中切】上心念下民惧岁成灾凶遂下罪已诏殷勤制万邦帝曰予一人继天承祖宗忧勤不遑宁夙夜心忡忡元年诛刘辟一举靖巴邛二年戮李錡不战安江东顾惟眇眇德遽有巍巍功或者天降沴无乃敝予躬上思答天戒下思致时邕莫如率其身慈和与俭?乃命罢进献乃命赈饥穷宥死降五刑责已寛三农宫女出宣徽廐马减飞龙庶政靡不举皆出自宸衷奔腾道路人伛偻田野翁欢呼相告报感泣涕沾胸顺人人心悦先天天意从诏下才七日和气生冲融凝爲油油云散作习习风昼夜三日雨凄凄复蒙蒙万心春熙熙百谷青芃芃【蒲红切】人变愁爲喜岁易俭爲丰乃知王者心忧乐与衆同皇天与后土所感无不通冠佩何锵锵将相及王公蹈舞呼万岁列贺明庭中小臣诚愚陋职忝金銮宫稽首再三拜一言献天聪君以明爲圣臣以直爲忠敢贺有其始亦愿有其终

读张籍古乐府

张君何爲者业文三十春犹工乐府诗举代少其伦爲诗意如何六义互铺陈风雅比兴外未尝着空文读君学仙诗可讽放佚君读君董公诗可诲贪暴臣读君商女诗可感悍妇仁读君勤齐诗可劝薄夫敦上可裨教化舒之济万民下可理情性卷之善一身始从青衿岁迨此白髮新日夜秉笔吟心苦力亦勤时无采诗官委弃如泥尘恐君百岁後灭没人无闻愿藏中秘书百代不湮沦愿播内乐府时得闻至尊言者志之苗行者文之根所以读君诗亦知君爲人如何欲五十官小身贱贫病眼街西住无人行到门

哭孔戡

洛阳谁不死戡死闻长安我是知戡者闻之涕泫然戡佐山东军非义不可干拂衣向西来其道直如弦从事得如此人人以爲难人言明明代合置在朝端或望居谏司有事戡必言或望居宪府有邪戡必弹惜哉两不谐没齿爲闲官竟不得一日謇謇立君前形骸随衆人敛葬北

邛山平生刚肠内直气归其闲【居顔切】贤者爲生民生死悬在天谓天不爱人胡爲生其贤谓天果爱民胡爲夺其年茫茫元化中谁执如此权

凶宅

长安多大宅列在街西东往往朱门内房廊相对空泉鸣松桂枝狐藏兰菊?苍苔黄叶地日暮多旋风前主爲将相得罪窜巴庸後主爲公卿寢疾歿其中连延四五主殃祸继相踵自从十年来不利主人翁风雨坏檐隙蛇鼠穿墙墉人疑不敢买日毁土木功嗟嗟俗人心甚矣其愚蒙但恐灾将至不思祸所从我今题此诗欲悟迷者胸凡爲大官人年禄多高崇权重持难久位高势易穷骄者物之盈老者数之终四者如寇盗日夜来相攻假使居吉土孰能保其躬因小以明大借家可谕邦【叶逋蒙切】周秦宅崤函其宅非不同一兴八百年一死望夷宫寄语家与国人凶非宅凶

梦仙

人有梦仙者梦身升上清坐乘一白鹤前引双红旗羽衣忽飘飘玉鸾俄铮铮半空直下视人世尘冥冥渐失乡国处才分山水形东海一片白列岳五点青须臾羣仙来相引朝玉京安期羡门辈列侍如公卿仰谒玉皇帝稽首前致诚帝言汝仙才努力勿自轻却後十五年期汝不死庭再拜受斯言既寤喜且惊秘之不敢泄誓志居岩扃【涓营切】恩爱舍骨肉饮食断羶腥朝飧云母散夜吸沆【何党切】漈【奚介切】精空山三十载日望輜軿迎前期过已久鸾鹤无来声齿髮日衰白耳目减聪明一朝同物化身与粪壤并神仙信有之俗力非可营苟无金骨相不列丹台名徒传辟谷法虚受烧丹经只自取勤苦百年终不成悲哉梦仙人一梦误一生

观刈麦【时爲盩厔县尉○盩音周厔音质】

田家少闲月五月人倍忙夜来南风起小麦覆陇黄妇姑荷簞食童稚携壶浆相随饷田去丁壮在南冈足蒸暑土气背灼炎天光力尽不知热但惜夏日长复有贫妇人抱子在其傍右手秉遗穗左臂悬敝筐听其相顾言闻者爲悲伤家田输税尽拾此充饥腸今我何功德曾不事农桑吏禄三百石岁晏有余粮念此私自愧尽日不能忘

题海图屏风【元和已丑年作】

海水无风时波涛安悠悠鳞介无小大遂性各沉浮突兀海底鳌首冠三神丘钓网不能制其来非一秋或者不量力谓兹鳌可求鼃【旁谜切】属【兴计切】牵不动纶絶沈其钩一鳌既顿颌诸鳌齐掉头白涛与黑浪呼吸绕咽喉喷风激飞廉鼓波怒阳侯鲸鲵得其便张口欲吞舟万里无活鳞百川多倒流遂使江汉水朝宗意亦休苍然屏风上此画良有由

羸骏

骅骝失其主羸饿无人牧向风嘶一声莽苍黄河曲蹋冰水畔立卧雪塚间宿岁暮田野空寒
草不满腹岂无市骏者尽是凡人目相马失於瘦遂遗千里足村中何扰扰有吏徵刍粟输彼
军廩中化作弩骀肉

废琴

丝桐合爲琴中有太古声古声淡无味不称今人情玉徽光彩灭朱弦尘土生废弃来已久遗
音尚泠泠不辞爲君弹纵弹人不听何物使之然羌笛与秦箏

李都尉古劒

古劒寒黯黯铸来几千秋白光纳日月紫气排斗牛有客借一观爱之不敢求湛然玉匣中秋
水澄不流至宝有本性精刚无与俦可使寸寸折不能绕指柔愿快直士心将断佞臣头不愿
报小怨夜半刺私讐劝君慎所用无作神兵羞

云居寺孤桐

一株青玉立千叶緑云委亭亭五丈余高意犹未已山僧年九十清浄老不死自云手种时一
颗【苦果切】青桐子直从萌芽拔高自毫末始四面无附枝中心有通理寄言立身者孤直
当如此

京兆府新栽莲【时爲盩厔县尉趋府作】

污沟贮浊水水上叶田田我来一长叹知是东溪莲下有清泥污馨香无复全上有红尘扑顔
色不得鲜物性犹如此人事亦宜然托根非其所不如遭弃捐【干权切】昔在溪中日花叶
媚清涟今来不得地顛【音樵】顛【音萃】府门前

月夜登阁避暑

旱久炎气甚中人若燔烧清风隐何处草树不动摇何以避暑气无如出尘嚣行行都门外佛
阁正迢嶢清凉近高生烦热委静销开襟当轩坐神泰意飘飘回看归路傍禾黍尽枯焦独善
诚有计将何救旱苗

初授拾遗

奉诏登左掖束带参朝议何言初命卑且脱风尘吏杜甫陈子昂才名括天地当时非不遇尚
无过斯位况子蹇薄者宠至不自意惊近白日光慙非青云器天子方从谏朝廷无忌讳岂不
思匪躬适遇时无事受命已旬月饱食随班次谏纸忽盈箱对之终自愧

赠元稹

自我从宦游七年在长安所得惟元君乃知定交难岂无山上苗径寸无岁寒岂无要津水咫尺有波澜之子异於是久处誓不谖【音萱】无波古井水有节秋竹竿一爲同心友三及芳岁阑花下鞍马游雪中杯酒欢衡门相逢迎不具带与冠春风日高睡秋月夜深看不爲同登科不爲同署官所合在方寸心源无异端

哭刘敦质

小树两株栢新土三尺坟苍苍白露草此地哭刘君哭君岂无辞辞云君子人如何天不吊穷悴至终身愚者多贵寿贤者独贱迍龙亢彼无悔螻屈此不伸哭罢持此辞吾将诘羲文

答友问

大圭廉不割利劒用不缺当其斩马时良玉不如铁置铁在洪炉铁消易如雪良玉同其中三日烧不热君疑才与德咏此知优劣

杂兴三首

楚王多内宠倾国选嫔妃又爱从禽乐驰骋每相随锦鞬【哥讴切】臂花隼罗袂控金羁遂习宫中女皆如马上儿色禽合爲荒刑政两已衰【思谁切】云梦春仍猎章华夜不归东风二月天春鴈正离离美人挟银镒一发叠双飞飞鸿惊断行敛翅避蛾眉君王顾之笑弓箭生光辉回眸语君曰昔闻庄王时有一愚夫人其名曰樊姬不有此游乐三载断鲜肥

越国政初荒越天旱不已风日燥水田水涸尘飞起国中新下令官渠禁流水流水不入田壅入王宫里余波养鱼鸟倒影浮楼雉澹灏九折池萦回十余里四月芰荷发越王日游嬉左右好风来香动芙蓉蘩但爱芙蓉香义种芙蓉子不念阊门外千里稻苗死

吴王心日侈服玩尽奇瓌【音回又姑回切】身卧翠羽帐手持红玉杯冠垂明月珠带束通天犀行动自矜顾数步一徘徊小人知所好怀宝四方来奸邪得藉手从此幸门开古称国之宝谷米与贤才今看君王眼视之如尘埃伍员谏已死浮屍去不回姑苏台下草麋鹿闇生麕

宿紫阁山北村

晨游紫阁峯暮宿山下村村老见予喜爲予开一樽举杯未及饮暴卒来入门紫衣挟刀斧草草十余人夺我席上酒掣我盘中殮主人退後立敛手反如宾中庭有奇树种来三十春主人惜不得持斧断其根口称采造家身属神策军主人慎勿语中尉正承恩

读汉书

禾黍与稂莠雨来同日滋桃李与荆棘霜降同夜萎草木既区别荣枯那等夷茫茫天地意无乃太无私小人与君子用置各有宜奈何西汉末忠邪并信之不然尽信忠早絶邪臣窥不然尽信邪早使忠臣知优游两不断盛业日已衰痛矣萧京辈终令陷祸机【萧望之京房等】每读元成纪愤愤令人悲寄言爲国者不得学天时寄言爲臣者可以鉴於斯

赠樊着作

阳城爲谏议以正事其君其手如屈轶举必指佞臣卒使不仁者不得秉国钧元稹爲御史以直立其身其心如肺石动必达穷民东川八十家冤愤一言伸刘辟肆乱心杀人正纷纷其嫂曰庾氏弃絶不爲亲从史萌逆节隐心潜负恩其佐曰孔戡舍去不爲宾凡此士与女其道天下闻常恐国史上但记凤与麟贤者不爲名彰教乃敦每惜若人辈身死名亦沦君爲着作郎职废志空存虽有良史才直笔无所申何不自着书实録彼善人编爲一家言以备史阙文

蜀路石妇

道傍一石妇无记亦无铭传是此乡女爲妇孝且贞十五嫁邑人十六夫征行夫行二十载妇独守孤茆其夫有父母老病不安宁其妇执妇道一一如礼经晨昏问起居恭顺发心诚药饵自调节膳羞必甘馨夫行竟不归妇德转光明後人高其节刻石像妇形俨然整衣巾若立在闺庭似见舅姑礼如闻环佩声至今爲妇者见此孝心生不比山头石空有望夫名

折劒头

拾得折劒头不知折之由一握青虵尾数寸碧峯头疑是斩鲸鲵不然刺蛟虬缺落泥土中委弃无人收我有鄙介性好刚不好柔勿轻直折劒犹胜曲全钩

登乐游园望

独上乐游园四望天日曛东北何靄靄宫阙入烟云爱此高处立忽如遗垢氛耳目暂清旷怀抱郁不伸下视十二街绿树间红尘车马徒满眼不见心所亲孔生死洛阳元九谪荆门可怜南北路高盖者何人

酬元九对新栽竹有怀见寄【顷有赠元九诗云有节秋竹竿故元感之因重见寄】

昔我十年前与君始相识曾将秋竹竿比君孤且直中心一以合外事纷无极共保秋竹心风霜侵不得始嫌梧桐树秋至先改色不爱杨柳枝春来软无力怜君别我後见竹长相忆长欲在眼前故栽庭户侧分首今何处君南我在北吟我赠君诗对之心惻惻

感鹤

鹤有不羣者飞飞在野田饥不啄腐鼠渴不饮盗泉贞姿自耿介杂鸟何翩翩【呼渊切】同游不同志如此十余年一兴嗜慾念遂爲矰缴牵委质小池内争食羣鸡前不惟怀稻粱兼亦竞腥羶不惟恋主人兼亦狎乌鸢物心不可知天性有时迁一饱尚如此况乘大夫轩

春雪

元和岁在卯六年春二月月晦寒食天天陰夜飞雪连宵复竟日浩浩殊未歇大似落鷺毛密如飘玉屑寒销春茫【上声】苍【上声】气变风凜冽上林草尽没曲江水复结红乾杏花死绿冻杨枝折所怜物性伤非惜年芳絶上天有时令四序平分别寒燠苟反常物性皆夭阏【阿葛切】我观圣人意鲁史有其说或记水不冰或书霜不杀上将儆政教下以防灾孽兹雪今如何信美非时节

高仆射

富贵人所爱圣人去其泰所以致仕年着在礼经内玄元亦有训知止则不殆二疎独能行遗迹东门外清风久销歇迨此向千载斯人古亦稀何况今之代遑遑名利客白首千百辈唯有高仆射七十悬车盖我年虽未老岁月亦云迈预恐毫及时贪荣不能退中心私自傲何以爲我戒故作仆射诗书之於大带

白牡丹【和钱学士作】

城中看花客旦暮走营营素华人不顾亦占牡丹名闭在深寺中车马无来声唯有钱学士尽日绕?行怜此皓然质无人自芳馨衆嫌我独赏移植在中庭留景夜不暝迎光曙先明对之心亦静虚白相向生唐昌玉蘂花攀翫衆所争折来比顔色一种如瑶琼彼因稀见贵此以多爲轻始知无正色爱恶随人情岂惟花独尔理与人事并君看入眼者紫艷与红英

赠内

生爲同室亲死爲同穴尘他人尚相勉而况我与君黔娄固穷士妻贤忘其贫冀缺一农夫妻敬俨如宾陶潜不营生翟氏自?薪梁鸿不肯仕孟光甘布裙君虽不读书此事耳亦闻至此千载後传是何如人人生未死间不能忘其身所须者衣食不过饱与温蔬食足充饥何必膏粱珍繒絮足御寒何必锦绣文君家有貽训清白遗子孙我亦贞苦士与君新结?庶保贫与素偕老同欣欣

寄唐生

贾谊哭时事阮籍哭路岐唐生今亦哭异代同其悲唐生者何人五十寒且饥不悲口无食不悲身无衣所悲忠与义悲甚则哭之太尉击贼日【段太尉以笏击朱泚】尚书叱盗时【顔尚书叱李希烈】大夫死凶寇【陆大夫爲衆兵所害】谏议谪蛮夷【杨谏议左迁道州】

每见如此事声发涕辄随往往闻其风俗士犹或非怜君头半白其志竟不衰我亦君之徒郁郁何所爲不能发声哭转作乐府诗篇篇无空文句句必尽规功高虞人箴痛甚骚人辞非求宫律高不务文字奇惟歌生民病愿得天子知未得天子知甘受时人嗤药良气味苦琴淡音声稀不惧权豪怒亦任亲朋讥人竟无奈何呼作狂男儿每逢羣盗息或遇云雾披但自高声歌庶几天听卑歌哭虽异名所感则同归寄君三十章与君爲哭词

伤唐衢二首

自我心存道外物少能逼常排伤心事不爲长叹息忽闻唐衢死不觉动顔色悲端从东来触我心惻惻伊昔未相知偶游滑台侧同宿李翱家一言如旧识酒酣出送我风雪黄河北日西并马头语别至昏黑君归向东郑我来游上国交心不交面从此重相忆怜君儒家子不得诗书力五十着青衫试官无禄食遗文仅千首六义无差忒散在京洛间何人爲收拾

忆昨元和初忝备谏官位是时兵革後生民正憔悴但伤民病痛不识时忌讳遂作秦中吟一吟悲一事贵人皆怪怒闲人亦非訾天高未及闻荆棘生满地惟有唐衢见知我平生志一读兴叹嗟再吟垂涕泗因和三十韵手题远缄寄致吾陈杜闲赏爱非常意此人无复见此诗犹可贵今日开篋看蠹鱼损文字不知何处葬欲问先歔歔终去哭坟前还君一掬泪【陈杜谓子昂与甫也此诗犹可贵谓唐衢诗也】

问友

种兰不种艾兰生艾亦生根菱相交长茎叶相附荣香茎与臭叶日夜俱长大锄艾恐伤兰溉兰恐滋艾兰亦未能溉艾亦未能除沈吟意不决问君欲何如

悲哉行

悲哉爲儒者力学不知疲读书眼欲闇秉笔手生胝【音支】十上方一第成名常苦迟纵有宦达者两鬓已成丝可怜少壮日适在穷贱时丈夫老且病焉用富贵爲沈沈朱门宅中有乳臭儿状貌如妇人光明膏粱肌手不把书卷身不撰【胡惯切】戎衣二十袭封爵门承勲戚资春来日日出服御何轻肥朝从博徒饮暮有娼楼期平封还酒债堆金选蛾眉声色狗马外其余一无知山苗与涧松地势随高卑古来无奈何非君独伤悲

紫藤

藤花紫蒙茸藤叶青扶疎谁谓好顔色而爲害有余下如蛇屈盘上若绳萦紆可怜中间树束縛成枯株柔蔓不自胜嫋嫋挂空虚岂知纏树木千夫力不如先柔後爲害有似谀佞徒附着君权势君迷不肯诛又如妖妇人绸缪蛊其夫奇邪坏人室夫惑不能除寄言邦与家所慎在其初毫末不早辨滋蔓信难图愿以藤爲戒铭之於座隅

放鷹

十月鷹出籠草枯雉兔肥下韝【哥讴切】随指顾百擲无一遺鷹翅疾如風鷹爪利如錐本爲鳥所設今爲人所資孰能使之然有術甚易知取其向背性制在飢飽時不可使長飽不可使長飢飢則力不足飽則背人飛乘飢縱搏击未飽須繫維所以爪翅功而人坐收之聖明馭英雄其術亦如斯鄙語不可弃吾聞諸獵師

慈烏夜啼

慈烏失其母啞啞【倚下切】吐哀音晝夜不飛去經年守故林夜夜半啼聞者爲沾襟聲中如告訴未盡反哺心百鳥豈無母爾獨哀怨深應是母慈重使爾悲不任昔有吳起者母歿喪不臨嗟哉斯徒輩其心不如禽慈烏復慈烏鳥中之曾參

鷺詩示劉叟【并序】

叟有愛子背叟逃去叟甚悲念之叟少年亦嘗如是故作鷺詩以諭之

梁上有雙鷺翩翩雄與雌銜泥兩椽間一巢生四兒四兒晝夜長索食聲孜孜青蟲不易捕黃口無飽期觜爪雖欲敝心力不知疲須臾十來往猶恐巢中飢辛勤三十日母瘦雛漸肥喃喃教言語一一刷毛衣一旦羽翼成引上庭樹枝舉翅不回顧隨風四散飛雌雄空中鳴聲盡呼不歸却入空巢里啁啾終夜悲鷺鷺爾勿悲爾當返自思思爾爲雛日高飛背母時當時父母念今日爾應知

采地黃者

麥死春不雨禾損秋早霜歲晏無口食田中采地黃采之將何用持以易餼糧凌晨荷鋤去薄暮不盈筐携來朱門家賣與白面郎與君啖肥馬可使照地光愿易馬殘粟救此苦飢腸

初入太行路

天冷日不光太行峯蒼莽嘗聞此中險今我方獨往馬蹄凍且滑羊腸不可上若比世路難猶自平於掌

鄧魴張徹落第

古琴無俗韻奏罷無人听寒松無妖花枝下无人行春風十二街軒騎不暫停奔車看牡丹走馬听秦箏衆目悅芳艷松獨守其貞衆耳喜鄭卫琴亦不改聲怀哉二夫子念此无自轻

送王处士

王门岂无酒侯门岂无肉主人贵且骄待客礼不足望尘而拜者朝夕走碌碌王生独拂衣遐举如云鹄宁归白云外饮水卧空谷不能随衆人敛手低眉目扣门与我别沽酒留君宿好去采薇人终南山正绿

村居苦寒

八年十二月五日雪纷纷竹柏皆冻死况彼无农民回观村闾间十室八九贫北风利如劒布絮不蔽身唯烧蒿棘火愁坐夜待晨乃知大寒岁农者尤苦辛顾我当此日草堂深掩门褐裘覆絺【申之切】被坐卧有余温幸免饥冻苦又无壠亩勤念彼深可愧自问是何人

纳粟

有吏夜扣门高声催纳粟家人不待晓塲上张灯烛扬簸净如珠一车三十斛犹忧纳不中鞭责及童仆昔余谬从事内愧才不足连授四命官坐尸十年禄常闻古人语损益周必复今日谅甘心还他太仓谷

薛中丞

百人无一直百直无一遇借问遇者谁正人行得路中丞薛存诚守直心甚固皇明烛如日再使秉王度奸豪与佞巧非不憎且惧直道渐光明邪谋难盖覆每因匪躬节知有匡时具张爲坠网纲倚作颓檐柱悠哉上天意报施纷回互自古已冥茫从今犹不渝岂与小人意昏然同好恶不然君子人何反如朝露裴相昨已夭薛君今又去以我惜贤心五年如旦暮况闻善人命长短系运数今我一涕零岂爲中丞故

秋池二首

前池秋始半弃物多摧坏欲暮槿先萎未霜荷已败默然有所感可以从兹诫本不种松筠早凋何足怪凿池贮秋水中育苹与芰天旱水暗消塌然委空地有似泛泛者附丽权与贵一旦恩势移相随共憔悴

夏旱

太陰不离毕太岁仍在午旱日与炎风枯焦我田亩金石欲销铄况兹禾与黍嗷嗷万族中唯农最辛苦悯然望岁者出门何所覩但见棘与茨萝生徧塲圃恶苗承沴【音戾】气欣然得其所感此因问天可能长不雨

谕友

昨夜霜一降杀君庭中槐乾叶不待黄索索飞下来怜君感物节晨起步前阶临风蹋叶立半

日顏色衰西望長安城歌鐘十二街何人不歡樂君獨心悠哉白日頭上走朱顏鏡中頽平生
青雲心銷化成死灰我今贈一言勝飲酒千杯其言雖甚鄙可破悒悒懷朱門有勲貴陋巷有
顏回窮通各有命不系才不才推此自裕裕不必待安排

丘中有一士二首【命首句爲題】

丘中有一士不知其姓名面色不忧苦血氣常和平每選隙地居不謁要路行舉動无尤悔物
莫与之爭藜藿不充腸布褐不蔽形終歲守窮餓而无嗟嘆聲豈是愛貧賤深知時俗情勿矜
羅弋巧鸞鶴在冥冥

丘中有一士守道歲月深行披帶索衣坐拍无弦琴不飲濁泉水不息曲木陰所逢苟非義糞
土千黃金鄉人化其風薰如蘭在林智愚与強弱不忍相欺侵我欲訪其人將行復沈吟何必
見其面但在學其心

新制布裘

桂布白似雪吳綿軟於雲布重綿且厚爲裘有余溫朝拥坐至暮夜覆眠達晨誰知嚴冬月支
體暖如春中夕忽有念抚裘起逡巡丈夫貴兼濟豈獨善一身安得萬里裘蓋裹周四垠穩暖
皆如我天下无寒人

杏園中棗樹

人言百果中唯棗凡且鄙皮皴【七倫切】似龜手葉小如鼠耳胡爲不自知生花此園里豈
宜遇攀翫幸免遭傷毀二月曲江頭雜英紅旖旎棗亦在其間如嫫【莫胡切】對西子東風
不擇木吹煦長未已眼看欲合抱得盡生生理寄言游春客乞君一回視君愛繞指柔從君憐
柳杞君求悅目艷不敢爭桃李君若作大車輪軸材須此

蝦蟇【和张十六】

嘉魚荐宗廟靈龜貢邦家應龍能致雨潤我百谷芽蠹蠹水族中无用者蝦蟇【謨加切】形
穉肌肉腥出沒於泥沙六月七月交時雨正滂沱蝦蟇得其志快乐无以加地既蕃其生使之
族类多天又与其聲得以相誼譁豈惟玉池上汚君清冷波何獨瑤瑟前亂君鹿鳴歌常恐飛
上天跳躍随姮娥往往蝕明月遣君无奈何

寄隱者

賣藥向都城行憩青門樹道逢馳騷者色有非常懼親族走相送欲別不敢住私怪問道傍何
人復何故云是右丞相當國握樞務祿厚食萬錢恩深日三顧昨日延英對今日崖州去由來
君臣間寵辱在朝暮青青東郊草中有歸山路歸去卧雲人謀身計非誤

放鱼【自此後诗到江州作】

晓日提竹篮家僮买春蔬青青芹蕨下叠卧双白鱼无声但呀呀以气相煦濡倾篮泻地上拨刺长尺余岂唯刀机忧坐见蝼蚁图脱泉虽已久得水犹可苏放之小池中且用救乾枯小池窄狭动尾触四隅一时幸苟活久远将何如怜其不得所移放於南湖南湖连西江好去勿踟蹰施恩即望报吾非斯人徒不须泥沙底辛苦覓明珠

文柏牀

陵上有老柏柯叶寒苍苍朝爲风烟树暮爲宴寝牀以其多奇文宜升君子堂刮削露节目拂拭生辉光元班状狸首素质如截肪【敷邦切】虽充悦日翫终乏周身防华彩诚可爱生理苦已伤方知自残者爲有好文章

浔阳三题【并序】

庐山多桂树湓浦多修竹东林寺有白莲花皆植物之贞劲秀异者虽宫囿省寺中未必能尽有夫物以多爲贱故南方人不贵重之至有蒸爨其桂剪弃其竹白眼於莲花者予惜其不生於北土也因赋三题以唁之

庐山桂

偃蹇月中桂结根依青天天风绕月起吹子下人间飘零委何处乃落匡庐山生爲石上桂叶如剪碧鲜枝干日长大根荄日牢坚不归天上月空老山中年庐山去咸阳道里三四千无人爲移植得入上林园不及红花树长栽温室前

湓浦竹

浔阳十月天天气仍温燠有霜不杀草有风不落木玄冥气力薄草木冬犹绿谁肯湓浦头回眼看修竹其有顾盼者持刀斩且束剖劈青琅玕家家盖墙屋吾闻汾晋间竹少重如玉胡爲取轻贱生此西江曲

东林寺白莲

东林北塘水湛湛见底清中生白芙蓉菡萏三百茎白日发光彩清飈散芳馨泄香银囊破泻露玉盘倾我慙尘埃眼见此琼瑶英乃知红莲花虚得清净名夏萼敷未歇秋房结才成夜深衆僧寢独起绕池行欲收一颗子寄向长安城但恐出山去人间种不生

大水

浔阳郊郭间大水岁一至间阎半漂荡城堞多倾坠苍茫生海色渺漫连空翠风卷白波翻日
煎红浪沸工商彻屋去牛马登山避况当率税时颇害农桑事独有佣舟子鼓枻生意气不知
万人灾自覓锥刀利吾无奈尔何尔非久得志九月霜降後水涸爲平地

白氏长庆集卷一

卷二

钦定四库全书

白氏长庆集卷二

唐白居易撰

讽谕二【古调诗五言凡五十八首】

续古诗十首

戚戚复戚戚送君远行役行役非中原海外黄沙碛伶俜独居妾迢递长征客君望功名归妾忧生死隔谁家无夫何人不离拆所恨薄命身嫁迟别日迫妾身有存歿妾心无改易生爲闺中妇死作山头石

掩泪别乡里飘飏将远行茫茫绿野中春尽孤客情驱马上丘陇高低路不平风吹棠梨花啼鸟时一声古墓何代人不知姓与名化作路傍土年年春草生感彼忽自悟今我何营营

朝采山上薇暮采山上薇岁晏薇亦尽饥来何所爲坐饮白石水手把青松枝击节独长謡其声清且悲枥马非不肥所苦常絳维豢豕非不饱所忧竟爲牺行行歌此曲以慰常苦饥

雨露长纖草山苗高入云风雪折劲木涧松摧爲薪风摧此何意雨长彼何因百丈涧底死寸茎山上春可怜苦节士感此涕盈巾

窈窕双鬟女容德俱如玉昼居不踰闕夜行常秉烛气如含露兰心如贯霜竹宜当备嫔御胡爲守幽独无媒不得选年忽过三六岁暮望汉宫谁在黄金屋邯郸进娼女能唱黄花曲一曲称君心恩荣连九族

栖栖远方士读书三十年业成无知已徒步来入关长安多王侯英俊竞攀援幸随衆宾末得厕门馆间东阁有旨酒中堂有管弦何爲向隅客对此不开顔富贵无是非主人终日欢贫贱多悔尤客子终夜叹归去复归去故乡贫亦安

凉风飘嘉树日夜减芳华下有感秋妇攀条苦悲嗟我本幽闲女结髮事豪家豪家多婢仆内颇骄奢良人近封侯出入鸣玉珂自从富贵来恩薄谗言多豕妇独守礼羣妾互奇衰【音斜】但信言有玷不察心无瑕容光未销歇欢爱忽蹉跎何意掌上玉化爲眼中砂盈盈一尺水浩浩千丈河勿言小大异随分有风波闺房犹复尔邦国当如何

心亦无所迫身亦无所拘何爲腸中气郁郁不得舒不舒良有以同心久离居五年不见面三年不得书念此令人老抱膝坐长吁岂无盈樽酒非君谁与娱

揽衣出门行游观遶林渠澹澹春水暖东风生绿蒲上有和鸣鴈下有掉尾鱼飞沈一何乐鳞羽各有徒而我方独处不与之子俱顾彼自伤已禽鱼之不如出游欲遣忧孰知忧有余

春旦日初出曈曈耀晨辉草木照未远浮云已蔽之天地黯以晦当午如昏时虽有东南风力微不能吹中园何所有满地青青葵阳光委云上倾心欲何依

秦中吟十首【并序】

贞元元和之际予在长安闻见之间有足悲者因直歌其事命爲秦中吟

议婚

天下无正声悦耳即爲娱人间无正色悦目即爲姝顔色非相远贫富则有殊贫爲时所弃富爲时所趋红楼富家女金缕绣罗襦见人不敛手娇痴二八初母兄未开口已嫁不须與绿窗贫家女寂寞二十余荆钗不直钱衣上无真珠几回人欲聘临日又踟蹰主人会良媒置酒满玉壶四座且勿饮听我歌两途富家女易嫁嫁早轻其夫贫家女难嫁嫁晚孝於姑闻君欲娶妇娶妇意何如

重赋

厚地植桑麻所要济生民生民理布帛所求活一身身外充征赋上以奉君亲国家定两税本意在爱人厥初防其淫明敕内外臣税外加一物皆以枉法论奈何岁月久贪吏得因循浚我以求宠敛索无冬春织绢未成疋纁丝未盈斤里胥迫我纳不许慙逡巡岁暮天地闭陰风生破村夜深烟火尽霰雪白纷纷幼者形不蔽老者体无温悲喘与寒气并入鼻中辛昨日输残税因窺官库门繒帛如山积丝絮如云屯号爲羨余物随月献至尊夺我身上暖买尔眼前恩进入琼林库岁久化爲尘

伤宅

谁家起甲第朱门大道边丰屋中栊比高墙外回环累累六七堂栋宇相连延一堂费百万郁郁起青烟洞房温且清寒暑不能干高堂虚且迴坐卧见南山绕廊紫藤架夹砌红药栏攀枝摘櫻桃带花移牡丹主人此中坐十载爲大官厨有臭败肉库有贯朽钱谁能将我语问尔骨肉间岂无穷贱者忍不救饥寒如何奉一身直欲保千年不见马家宅今作奉诚园

伤友【又云伤苦节士】

陋巷孤寒士出门苦栖栖虽云志气在岂免颜色低平生同门友通籍在金闺曩者胶漆契迹来云雨睽正逢下朝归轩骑五门西是时天久陰三日雨凄凄蹇驴避路立肥马当风嘶回头忘相识占道上沙堤昔年洛阳社贫贱相提携今日长安道对面隔云泥近日多如此非君独惨凄死生不变者唯闻任与黎【任公孙黎逢】

不致仕

七十而致仕礼法有明文何乃贪荣者斯言如不闻可怜八九十齿堕双眸昏朝露贪名利夕阳忧子孙挂冠顾翠綬悬车惜朱轮金章腰不胜伛偻入君门谁不爱富贵谁不恋君恩年高须告老名遂合退身少时共嗤诮晚岁多因循贤哉汉二疎彼独是何人寂寞东门路无人继去尘

立碑

勲德既下衰文章亦陵夷但见山中石立作路旁碑铭勲悉太公叙德皆仲尼复以多爲贵千言直万赀爲文彼何人想见下笔时但欲愚者悦不思贤者嗤岂独贤者嗤仍传後代疑古石苍苔字安知是愧词我闻望江县麴令抚惇嫠【麴令名信陵】在官有仁政名不闻京师身歿欲归葬百姓遮路岐攀辕不得去留葬此江湄至今道其名男女涕皆垂无人立碑碣唯有邑人知

轻肥

意气骄满路鞍马光照尘借问何爲者人称是内臣朱绂皆大夫紫绶或将军夸赴军中宴走马去如云罽毼溢九醞水陆罗八珍果擘洞庭橘脍切天池鳞食饱心自若酒酣气益振是岁江南旱衢州人食人

五弦

清歌且罢唱红袂亦停舞赵叟抱五弦宛转当胸抚大声麓若散飒飒【悉合切又音立】风和雨小声细欲絶切切鬼神语又如鹊报喜转作猿啼苦十指无定音顛倒宫徵羽坐客闻此声形神若无主行客闻此声驻足不能举嗟嗟俗人耳好今不好古所以绿窗琴日日生尘土

歌舞

秦城岁云暮大雪满皇州雪中退朝者朱紫尽公侯贵有风雪兴富无饥寒忧所营唯第宅所务在追游朱门车马客红烛歌舞楼欢酣促密坐醉暖脱重裘秋官爲主人廷尉居上头日中爲一乐夜半不能休岂知閹【无分切】乡狱中有冻死囚

买花

帝城春欲暮喧喧车马度
共道牡丹时相随买花去
贵贱无常价酬直看花数
灼灼百朵红戈戈五束素
上张幄幕庇旁织笆篱
护水洒复泥封移来色如故
家家习爲俗人人迷不悟
有一田舍翁偶来买花处
低头独长叹此叹无人喻
一?深色花十户中人赋

赠友五首【并序】

吾友有王佐之才者以致君济人爲已任识者深许之因赠是诗以广其志云

一年十二月每月有常令君出臣奉行谓之握金镜
由兹六气顺以遂万物性时令一反常生灵受其病
周汉德下衰王风始不竞又从斩晁错诸侯益强盛
百里不同禁四时自爲政盛夏兴土功方春斲人命
谁能救其失待君佐邦柄戕戕象魏门悬法彝伦正

银生楚山曲金生鄱溪滨南人弃农业求之多苦辛
披砂复凿石矻矻无冬春手足尽皴【七伦切】
胝爱利不爱身畚田既慵斫稻田亦懒耘相携作游手
皆道求金银毕竟金与银何殊泥与尘且非衣食物不济饥寒人
弃本以趋末日富而岁贫所以先圣王弃藏不爲珍谁能反古风
待君秉国钧捐金复抵璧勿使劳生民

私家无钱罐平地无铜山胡爲秋夏税岁岁输铜钱
钱力日已重农力日已殫贱柴粟与麦贱贸丝与绵
岁暮衣食尽焉得无饥寒吾闻国之初有制垂不刊
佣必算丁口租必计桑田不求土所无不强人所难
量入以爲出上足下亦安兵兴一变法兵息遂不还
使我农桑人顛顛畎亩间谁能革此弊待君秉利权
复彼租庸法令如贞观年

京师四方则王化之本根长吏久於政然後风教敦
如何尹京者迁次不遽巡请君屈指数十年十五人
科条日相矫吏力亦已勤寬猛政不一民心安得淳
九州雍爲首羣牧之所遵天下率如此何以安吾民
谁能变此法待君赞丝纶慎择循良吏令其长子孙

三十男有室二十女有归近代多离乱婚姻多过期
嫁娶既不早生育常苦迟儿女未成人父母已衰羸
凡人贵達日多在长大时欲报亲不待孝心无所施
哀哉三牲养少得及庭闱惜哉万鍾粟多用饱妻儿
谁能正?礼待君张国维庶使孝子心皆无风树悲

寓意诗五首

豫樟生深山七年而後知挺高二百尺本末皆十围
天子建明堂此材独中规匠人执斤墨采度将有期
孟冬草木枯烈火燎山陂疾风吹猛焰从根烧到枝
养材三十年方成栋梁姿一朝爲灰烬柯叶无子遗
地虽生尔材天不与尔时不如粪土英犹有人掇之已矣
勿重陈重陈令人悲不悲焚烧苦但悲采用迟

赫赫京内史炎炎中书郎昨传徵拜日恩赐颇殊常
貂冠水苍玉紫绶黄金章佩服身未暖已闻窜遐荒
亲戚不得别吞声泣路傍宾客亦已散门前雀罗张
富贵来不久倏如瓦沟霜权势

去尤速譬若石火光不如守贫贱贫贱可久长传语宦游子且来归故乡

促织不成章提壶但闻声嗟哉虫与鸟无实有虚名与君定交日久要如弟兄何以示诚信白水指爲盟云雨一爲别飞沈两难并君爲得风鹏我爲失水鲸音信日已疎恩分日已轻穷通尚如此何况死与生乃知择交难须有知人明莫将山上松结托水上萍

翩翩两元鸟本是同巢燕分飞来几时秋夏炎凉变一宿蓬荜庐一栖明光殿偶因衔泥处复得重相见彼矜杏梁贵此嗟茅栋贱眼看秋社至两处俱难恋所托各暂时胡爲相叹美

婆娑园中树根株大合围蠹尔树间虫形质一何微孰谓虫之微虫蠹已无期孰谓树之大花叶有衰时花衰夏未实叶病秋先萎树心半爲土观者安得知借问虫何在在身不在枝借问虫何食食心不食皮岂无啄木鸟觜长将何爲

读史五首

楚怀放灵均国政亦荒淫彷徨未忍决遶泽行悲吟汉文疑贾生谪置湘之陰是时刑方措此去难爲心士生一代间谁不有浮沈良时真可惜乱世何足钦乃知汨罗恨未抵长沙深

祸患如棼丝其来无端绪马迁下蚕室嵇康就囹圄抱冤志气屈忍耻形神沮当被戮辱时奋飞无翅羽商山有黄绮潁川有巢许何不从之游超然离网罟山林少羈鞅世路多艰阻寄谢伐檀人慎勿嗟穷处

汉日大将军少爲乞食子秦时故列侯老作鋤瓜士春华何曄?园中发桃李秋风忽萧条堂上生荆杞深谷变爲岸桑田成海水势去未须悲时来何足喜寄言荣枯者反复殊未已

含沙射人影虽病人不知巧言构人罪至死人不疑掇蜂杀爱子掩鼻戮宠姬弘恭陷萧望赵高谋李斯陰德既必报陰祸岂虚施人事虽可罔天道终难欺明则有刑辟幽则有神祇苟免勿私喜鬼得而诛之

季子憔悴时妇见不下机买臣负薪日妻亦弃如遗一朝黄金多佩印衣锦归去妻不敢视妇嫂强依依富贵家人重贫贱妻子欺奈何贫富间可移亲爱志遂使中人心汲汲求富贵又令下人力各竞锥刀利随分归舍来一取妻孥意

和答诗十首【并序】

五年春微之从东台来不数日又左转爲江陵士曹掾诏下日会予下内直归而微之已即路邂逅相遇於街衢中自永寿寺南抵新昌里北得马上话别语不过相勉保方寸外形骸而已因不暇及他是夕足下次于山北寺仆职役不得去命季弟送行且奉新诗一轴致於执事凡二十章率有比兴淫文艳韵无一字焉意者欲足下在途讽读且以遣日时消忧懣又有以张

直气而扶壮心也及足下到江陵寄在路所爲诗十七章凡五六千言言有爲章有旨迨于宫律体裁皆得作者风发緘开卷且喜且怪仆思牛僧孺戒不能示他人唯与杓直拒非及樊宗师辈三四人时一吟读心甚贵重然窃思之岂仆所奉者二十章遽能开足下聪明使之然耶抑又不知足下是行也天将屈足下之道激足下之心使感时发愤而臻於此耶若两不然者何立意措辞与足下前时诗如此之相远也仆既羨足下诗又怜足下心尽欲引狂简而和之属直宿拘牵居无暇日故不即时如意旬月来多乞病假假中稍闲且摘卷中尤者继成十章亦不下三千言其间所见同者固不能自异异者亦不能强同同者谓之和平异者谓之答并别录和梦游春诗一章各附与本篇之末余未和者亦续致之顷者在科试间尝与足下同笔砚每下笔时辄相顾共患其意太切而理太周故理太周则辞繁意太切则言激然与足下爲文所长在於此所病亦在於此足下来序果有辞犯文繁之说今仆所和者犹前病也待与足下相见日各引所作稍删其繁而晦其义焉余具书白

和思归乐

山中不栖鸟夜半声嚶嚶似道思归乐行人掩泣听皆疑此山路迁客多南征忧愤气不散结化爲精灵我谓此山鸟本不因人生人心自怀土想作思归鸣孟尝平居时娱耳琴泠泠雍门一言感未奏泪沾纓魏武铜雀妓日与欢乐并一旦西陵望欲歌先涕零峡猿亦何意陇水复何情爲入愁人耳皆爲腸断声请看元侍御亦宿此邮亭因听思归鸟神气独安宁问君何以然道胜心自平虽爲南迁客如在长安城云得此道来何虑亦何营穷达有前定忧喜无交争所以事君日持宪立大庭虽有回天力挠之终不倾况始三十余年少有直名心中志气大眼前爵禄轻君恩若雨露君威若雷霆退不苟免难进不曲求荣在火辨玉性经霜识松贞展禽任三黜灵均长独醒获戾自东洛贬官向南荆再拜辞阙下长揖别公卿荆州又非远驿路半月程汉水照天碧楚山插云青江陵橘似珠宜城酒如???【徐盈切】谁谓谴谪去未妨游赏行人生百岁内天地暂寓形太仓一稊米大海一浮萍身委逍遥篇心付头陀经尚达死生观宁爲宠辱惊中怀苟有主外物安能萦任意思归乐声声啼到明

和阳城驿

商山阳城驿中有叹者谁云是元监察江陵谪去时忽见此驿名良久涕欲垂何故阳道州名姓同於斯怜君一寸心宠辱誓不移疾恶若巷伯好贤如缙衣沈吟不能去意者欲改爲改爲避贤驿大署於门楣荆人爱羊祜户曹改爲辞一字不忍道况兼姓呼之因题八百言言直文甚奇诗成寄与我铿若金和丝上言阳公行友悌无等夷骨肉同衾裯至死不相离次言阳公迹夏邑始栖迟乡人化其风少长皆孝慈次言阳公道终日对酒卮兄弟笑相顾醉貌红怡怡次言阳公节謇謇居谏司誓心除国蠹决死犯天威终言阳公命左迁天一涯道州炎瘴地身不得生归一一皆实录事事无子遗凡是爲善者闻之惻然悲道州既已矣往者不可追何世无其人来者亦可思愿以君子文告彼大乐师附於雅歌末奏之白玉墀天子闻此章教化如法施直谏从如流佞臣恶如疵宰相闻此章政柄端正持进贤不知倦去邪勿复疑宪臣闻此章不敢怀依违谏官闻此章不忍纵诡随然後告史氏旧史有前规若作阳公传欲令後世知不劳叙世家不用费文辞但使国史上全录元稹诗

答桐花

山木多蓊郁兹桐独亭亭叶重碧云片花簇紫霞英是时三月天春暖山雨晴夜色向月浅闇香随风轻行者多商贾居者悉黎氓无人解赏爱有客独屏营手攀花枝立足蹋花影行生怜不得所死欲扬其声截爲天子琴刻作古人形云待我成器荐之於穆清诚是君子心恐非草木情胡爲爱其华而反伤其生老龟被刳肠不如无神灵雄鸡自断尾不愿为牺牲况此好顏色花紫叶青青宜遂天地性忍加刀斧刑我思五丁力拔入九重城当正殿栽花叶生光晶上对月中桂下覆堦前萸泛拂香炉烟隐映斧藻屏为君布緑陰当暑?轩楹沈沈緑满地桃李不敢争爲君发清韵风来如叩琼泠泠声满耳郑卫不足听受君封植力不独吐芬馨助君行春令开花应晴明受君雨露恩不独含芳荣戒君无戏言剪叶封弟兄受君岁月功不独资生成爲君长高枝凤凰上头鸣一鸣君万岁壽如山不倾再鸣万人泰泰阶爲之平如何有此用幽滞在岩壑【涓茨切】岁月不尔驻孤芳坐凋零请向桐枝上爲余题姓名待余有势力移尔献丹庭

和大觜乌

乌者种有二名同性不同觜小者慈孝觜大者贪庸觜大命又长生来十余冬物老顏色变头毛白茸茸飞来庭树上初但惊儿童老巫生奸计与乌意潜通云是非凡鸟遥见起敬恭千岁乃一出喜贺主人翁祥瑞来白日神灵占知风陰作北斗使能爲人吉凶此乌所止家家产日夜丰上以致寿考下可宜田农主人富家子身老心童蒙随巫拜复祝妇姑亦相从杀鸡荐其肉敬若禋六宗乌喜张大觜飞接在虚空乌既饱羶腥巫亦飧甘浓乌巫互相利不复两西东日日营巢窟稍稍近房栊虽生八九子谁辨其雌雄羣雏又长成衆觜逞残凶探巢吞燕卵入族啄蚕虫岂无乘秋隼羈絆委高墉但食乌残肉无施搏击功亦有能言鸚鵡碧觜距红暫曾說乌罪囚闭在深笼青青窗前柳郁郁井上桐贪乌占栖息慈乌独不容慈乌尔奚爲来往何憧憧晓去先晨鼓暮归後昏钟辛苦尘土间飞啄禾黍?得食将母哺饥腸不自充主人憎慈乌命子削弹弓弦续会稽竹丸铸荆山铜慈乌求母食飞下尔庭中数粒未入口一丸已中胸仰天号一声似欲诉苍穹反哺日未足非是惜微躬谁能持此冤一爲问化工胡然大觜乌竟得天年终

答四皓庙

天下有道见无道卷怀之此乃圣人语吾闻诸仲尼矫矫四先生同稟希世资随时有显晦秉道无磷缁秦皇肆暴虐二世遭乱离先生相随去商岭采紫芝君看秦狱中戮辱者李斯刘项争天下谋臣竟悦随先生如鸾鹤出入冥冥飞君看齐鼎中焦烂者酈其子房得沛公自谓相遇迟八难掉舌枢三畧役心机辛苦十数年昼夜形神疲竟杂霸者道徒称帝者师子房尔则能此非吾所宜汉高之季年嬖宠鍾所私豕嫡欲废夺骨肉相忧疑岂无子房口口舌无所施亦有陈平心心计将何爲皓皓四先生高冠危映眉从容下南山顾盼入东闱前瞻惠太子左右生羽仪却顾戚夫人楚舞无光辉心不画一计口不吐一词闇定天下本遂安刘氏危子房吾则能此非尔所知先生道既光太子礼甚卑安车留不住功成弃如遗如彼旱天云一雨百

谷滋泽则在天下云复归希夷勿高巢与由勿尚吕与伊巢由往不返伊吕去不归岂如四先生出处两逶迤何必长隐逸何必长济时由来圣人道无朕不可窥卷之不盈握舒之亘八陲先生道甚明夫子犹或非愿子辨其惑爲予吟此诗

和雉媒

吟君雉媒什一晒复一叹和之一何晚今日乃成篇岂唯鸟有之抑亦人复然张陈刎颈交竟以势不完至今不平气塞絶泚【旨而切】水源赵襄骨肉亲亦以利相残至今不善名高於磨笄山况此笼中雉志在饮啄间稻?暂入口性已随人迁身苦亦自忘同族何足言但恨爲媒拙不足以自全劝君今日後养鸟养青鸾青鸾一失侣至死守孤单劝君今日後结客结任安主人宾客去独住在门阑

和松树

亭亭山上松一一生朝阳森耸上参天柯条百尺长漠漠尘中槐两两夹康庄婆娑低覆地枝干亦寻常八月白露降槐叶次第黄岁暮满山雪松色郁青苍彼如君子心秉操贯冰霜此如小人面变态随炎凉共知松胜槐诚欲栽道傍粪土种瑶草瑶草终不芳尚可以斧斤伐之爲栋梁杀身获其所爲君构明堂不然终天年老死在南冈不愿亚枝叶低随槐树行

答箭镞

矢人职司忧爲箭恐不精精在利其镞错磨锋镞成插以青竹箝【古旱切】羽之赤鴈翎勿言分寸铁爲用乃长兵闻有狗盗者昼伏夜潜行摩弓拭箭镞夜射不待明一盗既流血百犬同吠声狺狺嗥不已主人爲之惊盗心憎主人主人不知情反责镞太利矢人获罪名寄言控弦者愿君少留听何不向西射西天有狼星何不向东射东海有长鲸不然学仁贵三矢平虏廷不然学仲连一发下燕城胡爲射小盗此用无乃轻徒沾一点血虚污箭头腥

和古社

废村多年树生在古社隈爲作妖狐窟心空身未摧妖狐变美女社树成楼台黄昏行人过见者心徘徊饥鵂竟不捉老犬反爲媒岁媚少年客十去九不回昨夜云雨合烈风驱迅雷风拔树根出雷劈社坛开飞电化爲火妖狐烧作灰天明至其所清旷无氛埃旧地葺村落新田辟荒莱始知天降火不必常爲灾勿谓神默默勿谓天恢恢勿喜犬不捕勿夸鵂不猜寄言狐媚者天火有时来

和分水岭

高岭峻棱棱细泉流亶亶势分合不得东西随所委悠悠草蔓底溅溅石罅里分流来几年昼夜两如此朝宗远不及去海三千里浸润小无功山苗长旱死紫紵用无所奔迫流不已唯作

呜咽声夜入行人耳有源殊不竭无坎终难至同出而异流君看何所似有似骨肉亲派别从兹始又似势利交波澜相背起所以赠君诗将君何所比不比山上泉比君井中水

有木诗八首【并序】

余尝读汉书列传见佞顺嫖【於检切】嬖【於何切】图身忘国如张禹辈者见惑上蛊下交乱君亲如江充辈者见?狠跋扈壅君树党如梁冀辈者见色仁行违先德後贼如王莽辈者又见外状恢弘中无实用者又见附离权势随之覆亡者其初皆有动人之才足以惑衆媚主莫不合於始而败於终也因引风人骚人之兴赋有木八章不独讽前人亦儆後代尔

有木名弱柳结根近清池风烟借顔色雨露助华滋戕戕白雪花嫋嫋青丝枝渐密阴自庇转高梢四垂截枝扶为杖软弱不自持折条用樊圃柔脆非其宜为树信可翫论材何所施可惜金堤地栽之徒尔为

有木名櫻桃得地早滋茂叶密独承日花繁偏受露迎风闇摇动引鸟潜来去鸟啄子难成风来枝莫住低软易攀翫佳人屡?顾色求桃李饶心向松筠妬好是映墙花本非当轩树所以姓萧人曾为伐櫻赋

有木秋不凋青青在江北谓为洞庭橘美人自移植上受顾盼恩下勤浇溉力实成乃是枳臭苦不堪食物有似是者真伪何由识美人默无言对之长叹息中含害物意外矫凌霜色仍向枝叶间潜生刺如棘

有木名杜梨阴森覆丘壑心蠹已空朽根深尚盘薄媚狐言语巧妖鸟声音恶凭此为巢穴往来互栖托四傍五六本枝叶相交错借问因何生秋风吹子落为长社坛下无人敢芟【师衔切】斫几度野火来风回烧不着有木香苒苒山头生一蕝【方伐切】主人不知名移种近轩闥爱其有芳味因以调羹羹前後曾饮者十人无一活岂徒悔封植兼亦误采掇试问识药人始知名野葛年深已滋蔓刀斧不可伐何时猛风来为我连枝拔有木名水怪远望青童童根株非劲挺柯叶多蒙笼彩翠色如柏鳞皴【七伦切】皮似松为同松柏类得列嘉树中枝弱不胜雪势高常惧风雪压低还举风吹西复东柔芳甚杨柳早落先梧桐惟有一堪赏中心无蠹虫有木名凌霄擢秀非孤标偶依一株树遂抽百尺条托根附树身开花寄树梢自谓得其势无因有动摇一旦树摧倒独立暂飘飏疾风从东起吹折不终朝朝为拂云花暮为委地樵寄言立身者勿学柔弱苗

有木名丹桂四时香馥馥花团夜雪明叶剪春云绿风影清似水霜枝冷如玉独占小山幽不容凡鸟宿匠人爱芳直裁截为厦屋干细力未成用之君自速重任虽大过直心终不曲纵非梁栋材犹胜寻常木

叹鲁二首

季桓心岂忠其富过周公阳货道岂正其权执国命由来富与权不系才与贤所托得其地虽愚亦获安彘肥因粪壤鼠稳依社坛虫兽尚如此岂谓无因缘

展禽胡为者直道竟三黜顔子何如人屡空聊过日皆怀王佐道不践陪臣秩自古无奈何命为时所屈有如草木分天各与其一荔枝非名花牡丹无甘实

反鲍明远白头吟

炎炎者烈火营营者小蝇火不热贞玉蝇不点清水此苟无所受彼莫能相仍乃知物性中各有能不能古称怨恨死则人有所惩淫或应可在道未为弘譬如蝮鷃徒啾啾啁【音卓】龙鹏宜当委之去寥廓高飞腾岂能泥尘下区区酬怨憎胡为坐自苦吞悲仍抚膺

青塚

上有饥鴈号下有枯蓬走茫茫边雪里一掬沙培塿传是昭君墓埋闭蛾眉久凝脂化为泥铅黛复何有时有阴怨气常生坟左右鬱郁如苦雾不随骨销朽妇人无他才荣枯系妍否何乃明妃命独悬画工手丹青一诖误白黑相纷紜【纠同】遂使君眼中西施作嫫母同侪倾宠幸异类为配偶祸福安可知美顔不如丑何言一时事可戒千年後特报後來姝不须倚眉首无辞插荆钗嫁作贫家妇不见青塚上行人为浇酒

杂感

君子防悔尤贤人戒行藏嫌疑远瓜李言动慎毫芒立教固如此抚事有非常为君持所感仰面问苍苍犬啮桃树根李树反见伤老龟烹不烂延祸及枯桑城门自焚蕪池鱼罹其殃阳货肆凶?仲尼畏於匡鲁酒薄如水邯鄲【音寒丹】开战塲伯禽鞭见血过失由成王都尉身降虏宫刑加子长吕安兄不道都市杀嵇康斯人死已久其事甚昭彰是非不由已祸患安可防使我千载後涕泗满衣裳

白氏长庆集卷二

卷三

<集部,别集类,汉至五代,白氏长庆集>

钦定四库全书

白氏长庆集卷三

唐白居易撰

讽谕三【新乐府并序 凡二十首元和四年为左拾遗时作】

序曰凡九千二百五十二言断为五十篇篇无定句句无定字繫於意不繫於文首句标其目卒章显其志诗三百之义也其辞质而径欲见之者易谕也其言直而切欲闻之者深诚也其事核而实使采之者传信也其体顺而肆可以播於乐章歌曲也总而言之为君为臣为民为物为事而作不为文而作也

七德舞 美拨乱陈王业也【武德中天子始作秦王破陈乐以歌太宗之功业贞观初太宗重制破陈乐舞图诏魏徵虞世南等为之歌词名七德舞自龙朔已後诏郊庙享宴皆先奏之】

七德舞七德歌传自武德至元和元和小臣白居易观舞听歌知乐意乐终稽首陈其事太宗十八举义兵白旄黄钺定两京擒充戮窦四海清二十有四功业成二十有九即帝位三十有五致太平功成理定何神速速在推心置人腹亡卒遗骸散帛收【贞观初诏天下阵死骸骨致祭瘞埋之寻又散帛以求之也】饥人卖子分金赎【贞观五年大饥人有鬻男女者诏出御府金帛尽赎之还其父母】魏徵梦见天子泣【魏徵疾亟太宗梦与徵别既寤流涕是夕徵卒故御亲制碑云昔殷宗得良弼於梦中今朕失贤臣於觉後】张谨哀闻辰日哭【张公谨卒太宗为之举哀有司奏日在辰陰阳所忌不可哭上曰君臣义重父子之情也情发於中安知辰日遂哭之】怨女三千放出宫【太宗常谓侍臣曰妇人幽闭深宫情实可愍今将出之任求伉俪於是令左丞戴胄给事中杜正伦於掖庭宫西门拣出数千人尽放归】死囚四百来归狱【贞观六年亲録囚徒死罪者三百九十放出归家令明年秋来就刑应期毕至诏悉原之】剪须烧药赐功臣李积呜咽思杀身【李积常疾医云得龙须烧灰方可疗之太宗自剪须烧灰赐之服讫而愈积叩头泣涕而谢】含血吮疮抚战士思摩奋呼乞効死【李思摩尝中矢太宗亲为吮血】不独善战善乘时以心感人人心归尔来一百九十载天下至今歌舞之歌七德舞七德圣人有作垂无极岂徒耀神武岂徒夸圣文太宗意在陈王业王业艰难示子孙

法曲歌 美列圣正华声也

法曲法曲歌大定积德重熙有余庆永徽之人舞而咏【永徽之时有贞观之遗风故高宗制一戎大定乐曲也】法曲法曲舞霓裳政和世理音洋洋开元之人乐且康【霓裳羽衣曲起於开元盛於天宝也】法曲法曲歌堂堂堂之庆垂无疆中宗肃宗复鸿业唐祚中兴万万叶【永隆元年太常丞李嗣贞善审音律能知兴衰云近者乐府有堂堂之音唐祚再兴之兆】法曲法曲合夷歌夷声邪乱华声和以乱干和天宝末明年胡尘犯宫阙【法曲虽似失雅音盖诸夏之声也故历朝行焉玄宗虽雅好度曲然未尝使蕃汉杂奏天宝十三载始诏诸道调法曲与胡部新声合作识者深异之明年冬而安禄山反也】乃知法曲本华风苟能审音与政通一从胡曲相参错不辨兴衰与哀乐愿求牙旷正华音不令夷夏相交侵

二王後 明祖宗之意也

二王後彼何人介公嚮【户圭切】公为国宾周武隋文之子孙古人有言天下者非是一人之天下周亡天下传于隋隋人失之唐得之唐兴十叶岁二百介公嚮公世为客明堂太庙朝享时引居宾位备威仪备威仪助郊祭高祖太宗之遗制不独兴灭国不独继絶世欲令嗣位守文君亡国子孙取为戒

海漫漫 戒求仙也

海漫漫直下无底傍无边云涛烟浪最深处人传中有三神山山上多生不死药服之羽化为天仙秦皇汉武信此语方士年年采药去蓬莱今古但闻名烟水茫茫无觅处海漫漫风浩浩眼穿不见蓬莱岛不见蓬莱不敢归童男傭【音惯】女舟中老徐福文成多诳诞上元太一虚祈祷君看骊山顶上茂陵头毕竟悲风吹蔓草何况玄元圣祖五千言不言药不言仙不言白日昇青天立部伎 刺雅乐之替也【太常选坐部伎无性识者退入立部伎又选立部伎絶无性识者退入雅乐部则雅声可知矣】

立部伎鼓笛諠舞双剑跳七丸嫋巨索掉长竿太常部伎有等级堂上者坐堂下立堂上坐部笙歌清堂下立部鼓笛鸣笙歌一曲衆侧耳鼓笛万曲无人听立部贱坐部贵坐部退为立部伎击鼓吹笙和杂戏立部又退何所任始就乐悬操雅音雅音替坏一至此长令尔辈调宫徵圆丘后土郊祀时言将此乐感神只欲望凤来百兽舞何异北辕将适楚工师愚贱安足云太常三卿尔何人

华原磬 刺乐工非其人也【天宝中始废泗滨磬用华原石代之询诸磬人则曰故老云泗滨磬下调之不能和得华原石考之乃和由是不改】

华原磬华原磬古人不听今人听泗滨石泗滨石今人不击古人击今人古人何不同用之舍之由乐工乐工虽在耳如壁不分清浊即爲聋梨园弟子调律吕知有新声不如古古称浮磬出泗滨立辩致死声感人宫悬一听华原石君心遂忘封疆臣果然胡寇从燕起武臣少肯封疆死始知乐与时政通岂听铿锵而已矣磬襄入海去不归长安市儿爲乐师华原磬与泗滨石清浊两声谁得知

上阳白髮人 愍怨旷也【天宝五载已後杨贵妃专宠後宫人无复进幸矣六宫有美色者辄置别所上阳是其一也贞元中尚存焉】

上阳人红颜闇老白髮新綠衣监使守宫门一闭上阳多少春玄宗末岁初选入入时十六今六十同时采择百余人零落年深残此身忆昔吞悲别亲族扶入车中不教哭皆云入内便承恩脸似芙蓉臂似玉未容君王得见面已被杨妃遥侧目妬令潛配上阳宫一生遂向空房宿宿空房秋夜长夜长无寐天不明耿耿残灯背壁影萧萧暗雨打窗声春日迟日迟独坐天难暮宫鶯百啭愁厌闻梁燕双栖老休妬鶯归燕去长悄然春往秋来不记年唯向深宫望明月东西四五百回圆今日宫中年最老大家遥赐尚书号小头鞋履窄衣裳青黛点眉眉细长外人不见见应笑天宝末年时世粧上阳人苦最多少亦苦老亦苦少苦老苦两如何君不见昔时吕尚美人赋【天宝末有密未艷色者当时号为花鸟使吕尚献美人赋以讽之】又不见今日上阳白髮歌

胡旋女 戒近习也【天宝末康居国献之】

胡旋女胡旋女心应弦手应鼓弦鼓一声双袖举回雪飘飏转蓬舞左旋右转不知疲千匝万周无已时人闲物类无可比奔车轮缓旋风迟曲终再拜谢天子天子爲之微啓齿胡旋女出康居徙劳东来万里余中原自有胡旋者鬪妙争能尔不如天宝季年时欲变臣妾人人学圆转中有太眞外禄山二人最道能胡旋梨花园中册作妃金鸡障下养爲儿禄山胡旋迷君眼兵过黄河疑未反贵妃胡旋惑君心死弃马嵬念更深从兹地轴天维转五十年来制不禁胡旋女莫空舞数唱此歌悟明主

新丰折臂翁 戒边功也

新丰老翁八十八头鬓眉须皆似雪玄孙扶向店前行左臂凭肩右臂折问翁臂折来几年兼问致折何因缘翁云贯属新丰县生逢圣代无征战惯听梨园歌管声不识旗枪与弓箭无何天宝大徵兵户有三丁点一丁点得驱将何处去五月万里云南行闻道云南有泸水椒花落时瘴烟起大军徒涉水如汤未过十人二三死村南村北哭声哀儿别爷娘夫别妻皆云前後征蛮者千万人行无一回是时翁年二十四兵部牒中有名字夜深不敢使人知偷将大石鎚折臂张弓簸旗俱不堪从兹始免征云南骨碎筋伤非不苦且图拣退归乡土此臂折来六十年一肢虽废一身全至今风雨陰寒夜直到天明痛不眠痛不眠终不悔且喜老身今独在不然当时泸水头身死魂飞骨不收应作云雨望乡鬼万人塚上哭呦呦【云南有万人塚即鲜于仲通李宓曾覆军之所今塚犹存】老人言君听取君不闻开元宰相宋开府不赏边功防黠武【开元初突厥数寇边时天武军牙将郝灵佺出使因引特勒回鹘部落斩突厥默啜献首于阙下自谓有不世之功时宋璟爲相以天子年少好武恐徼功者生心痛抑其党逾年始授郎将灵佺遂恸哭呕血而死】又不闻天宝宰相杨国忠欲求恩幸立边功边功未立生人怨请问新丰折臂翁【天宝末杨国忠爲相重构阁罗凤之役募人讨之前後二十余万衆发去无返者又捉人连枷赴役天下怨哭人不聊生故禄山得乘人心而盗天下元和初而折臂翁犹存因备歌之】太行路 借夫妇以讽君臣之不终也

太行之路能摧车若比君心是坦途巫峡之水能覆舟若比君心是安流君心好恶苦不常好生毛羽恶生疮与君结发未五载岂期牛女爲参商古称色衰相弃背当时美人犹怨悔何况如今鸾镜中妾颜未改君心改爲君薰衣裳君闻兰麝不馨香爲君盛容饰君看珠翠无颜色行路难难重陈人生莫作妇人身百年苦乐由他人行路难难於山险於水不独人闲夫与妻近代君臣亦如此君不见左纳言右纳史朝承恩暮赐死行路难不在水不在山只在人情反覆闲

司天台 引古以儆今也

司天台仰观俯察天人际羲和死来职事废官不求贤空取艺昔闻西汉元成闲上陵下替谪见天北辰微闇少光色四星煌煌如火赤耀芒动角射三台上台半灭中台坼是时非无太史官眼见心知不敢言明朝趋入明光殿唯奏庆云寿星见天文时变两如斯九重天子不得知不得知安用台高百尺爲

捕蝗 刺长吏也

捕蝗捕蝗谁家子天热日长饥欲死兴元兵後伤陰阳和气蛊蠹化爲蝗始自两河及三辅荐食如蚕飞似雨雨飞蚕食千里间不见青苗空赤土河南长吏言忧农课人昼夜捕蝗虫是时粟斗钱三百蝗虫之价与粟同捕蝗捕蝗竟何利徒使饥人重劳费一虫虽死百虫来岂将人力定天灾我闻古之良吏有善政以政驱蝗蝗出境又闻贞观之初道欲昌文皇仰天吞一蝗一人有庆兆民赖是岁虽蝗不爲害【贞观二年太宗吞蝗虫事见贞观实录】昆明春水满思王泽之广被也【贞元中始涨泛】

昆明春昆明春春池岸古春流新影浸南山青滟潏波沉西日红瀛沦往年因旱灵池竭龟尾曳涂鱼煦沫诏开分水注恩波千介万鳞同日活今来净渌水照天游鱼鱗鱗莲田田洲香杜若抽心短沙暖鸳鸯铺翅眠动植飞沉皆遂性皇泽如春无不被渔者仍丰网罟资贫人久获菰蒲利诏以昆明近帝城宦家不得收其征菰蒲无租鱼无税近水之人感君惠感君惠独何人吾闻率土皆王民远民何疎近何亲愿推此惠及天下无远无近同欣欣吴兴山中罢茗鄱阳坑里休封银天涯地角无禁利熙熙同似昆明春

城盐州 美圣谟而诮边将也【贞元岁壬申特诏城之】

城盐州城盐州城在五原原上头蕃东节度鉢闾布忽见新城当要路金乌飞传赞普闻建牙传箭集羣臣君臣赧【音称】面有忧色皆言勿谓唐无人自筑盐州十余载左衽氍毹不犯塞昼牧牛羊夜捉生长去新城百里外诸边急警劳戍人唯此一道无烟尘灵夏潜安谁复辨秦原闇通何处见鄜州驿路好马来长安药肆黄蓍贱城盐州城盐州未城天子忧德宗按图自定计非关将略与庙谋吾闻高宗中宗世北虏猖狂最难制韩公创筑受降城三城鼎峙屯汉兵东西亘絶数千里耳冷不闻胡马声如今边将非无策心笑韩公筑城壁相看养寇爲身谋各握强兵固恩泽愿分今日边将恩褒赠韩公封子孙谁能将此盐州曲翻作歌词闻至

尊

道州民 美臣遇明主也

道州民多侏儒长者不过三尺余市作矮奴年进送号爲道州任土贡任土贡宁若斯不闻使人生别离老翁哭孙母哭儿一自阳城来守郡不进矮奴频诏问城云臣按六典书任土贡有不贡无道州水土所生者只有矮民无矮奴吾君感悟玺书下岁贡矮奴宜悉罢道州民老者幼者何欣欣父子兄弟始相保从此得作良人身道州民民到于今受其赐欲说使君先下泪仍恐儿孙忘使君生男多以阳爲字

驯犀 感爲政之难终也【贞元丙子岁南海进驯犀诏纳苑中至十三年冬大寒驯犀死矣】

驯犀驯犀通天犀躯貌骇人角骇鸡海蛮闻有明天子驱犀乘传来万里一朝得谒大明宫欢呼拜舞自论功五年驯养始堪献六译语言方得通上嘉人兽俱来远蛮馆四方犀入苑?以瑶葛鑱以金故乡迢递君门深海鸟不知钟鼓乐池鱼空结江湖心驯犀生处南方热秋无白露冬无雪一入上林三四年又逢今岁苦寒月饮水卧霰苦蜷局角骨冻伤鳞甲蹢驯犀死蛮儿啼向阙再三颜色低奏乞生归本国去恐身冻死似驯犀君不见建中初驯象生还放林邑【建中元年诏尽出苑中驯象放归南方也】君不见贞元末驯犀冻死蛮儿泣所嗟建中异贞元象生犀死何足言

五弦弹 恶郑之夺雅也

五弦弹五弦弹听者倾耳心寥寥赵璧知君入骨爱五弦一一爲君调第一第二弦索索秋风拂松疎韵落第三第四弦泠泠夜鹤忆子笼中鸣第五弦声最掩抑陇水冻咽流不得五弦并奏君试听凄凄切切复铮铮铁击珊瑚一两曲水写玉盘千万声杀声入耳肤血寒惨气中人肌骨酸曲终声尽欲半日四坐相对愁无言座中有一远方士唧唧咨咨声不已自叹今朝初得闻始知孤负平生耳唯忧赵璧白发生老死人闲无此声远方士尔听五弦信爲美吾闻正始之音不如是正始之音其若何朱弦疎越清庙歌一弹一唱再三叹曲淡节稀声不多融融曳曳召元气听之不觉心平和人情重今多贱古古琴有弦人不抚更从赵璧艺成来二十五弦不如五

蛮子朝 刺将骄而相备位也

蛮子朝泛皮?兮度绳桥来自崙【音髓】州道路遥入界先经蜀川过蜀将收功先表贺臣闻云南六诏蛮东连?柯西连蕃六诏星居初鎖碎合爲一诏渐强大开元皇帝虽圣神唯蛮倔强不来宾鲜于仲通六万卒征蛮一阵全军没至今西洱【音二】河?边箭孔刀痕满枯骨【天宝十三载鲜于仲通统兵六万讨云南王合罗凤于西洱河全军覆歿也】谁知今日慕华风不劳一人蛮自通诚由陛下休明德亦赖微臣诱谕功德宗省表知如此笑令中使迎蛮子蛮子导从者谁何摩挲俗羽双隈伽清平官持赤藤杖大将军系金呿【丘加切】嗟【咨邪切】

】异牟寻男寻合劝特敕召对延英殿上心贵在怀远蛮引临玉座近天颜冕旒不垂亲劳俸
赐衣赐食移时对移时对不可得大臣相看有羡色可怜宰相拖紫佩金章朝日唯闻对一刻

骠国乐 欲王化之先迹後远也【贞元十七年来献之】

骠国乐骠国乐出自大海西南角雍羌之子舒难陀来献南音奉正朔德宗立仗御紫庭
不塞爲尔听玉螺一吹椎?笳铜鼓一击文身踊珠缨炫转星宿摇花鬘【音慢髮饰也】抖擞
龙虵动曲终王子啓圣人臣父愿爲唐外臣左右欢呼何翕习至尊德广之所及须臾百辟诣
合门俯伏拜表贺至尊伏见骠人献新乐请书国史传子孙时有击壤老农父暗测君心闲独
语闻君政化甚圣明欲感人心致太平感人在近不在远太平由实非由声观身理国国可济
君如心兮民如体体生疾苦心惨凄民得和平君恺悌贞元之民若未安骠乐虽闻君不欢贞
元之民苟无病骠乐不来君亦圣骠乐骠乐徒喧喧不如闻此芻蕘言

缚戎人 達穷民之情也

缚戎人缚戎人口穿面破驱入秦天子矜怜不忍杀诏徙东南吴与越黄衣小使録姓名领出
长安乘通行身被金疮面多瘡扶病徒行日一驿朝飡饥渴费杯盘夜卧腥臊污牀席忽逢江
水忆交河垂手齐声呜咽歌其中一虏语诸虏尔苦非多我苦多同伴行人因借问欲说喉中
气愤愤自云乡管本凉原大历年中没落蕃一落蕃中四十载身着皮裘系毛带唯许正朝服
汉仪敛衣整巾潛泪垂誓心密定归乡计不使蕃中妻子知【有李如暹者蓬子将军之子也
尝没蕃中自云蕃法唯正岁一日许唐人之没蕃者服唐衣冠由是悲不自胜遂密定归计也
】暗思自有残筋骨更恐年衰归不得蕃候严兵鸟不飞脱身冒死奔逃归昼伏宵行经大漠
云陰月黑风沙恶惊藏青塚寒草疎偷度黄河夜水薄忽闻汉军鼙鼓声路傍走出再拜迎游
骑不聽能汉语将军遂缚作蕃生配向东南卑湿地定无存恤空防备念此吞声仰诉天若爲
辛苦度残年凉原乡井不得见胡地妻儿虚弃捐没蕃被囚思汉土归汉被劫爲蕃虏早知如
此悔归来两地宁如一处苦缚戎人戎人之中我苦辛自古此冤应未有汉心汉语吐蕃身

白氏长庆集卷三

卷四

钦定四库全书

白氏长庆集卷四

唐白居易撰

讽谕四【新乐府三十首】

骊宫高 美天子重惜人之财力也

高高骊山上有宫朱楼紫殿三四重迟迟兮春日玉螮暖兮温泉溢嫋嫋兮秋风山蝉鸣兮宫树红翠华不来岁月久墙有衣兮瓦有松吾君在位已五载何不一幸於其中西去都门几多地吾君不游深有意一人出兮不容易六宫从兮百司备八十一车千万骑朝有宴饮暮有赐中人之产数百家未足充君一日费吾君修己人不知不自逸兮不自嬉吾君爱人人不识不伤财兮不伤力骊宫高兮高入云君之来兮为一身君之不来兮为千万人

百链镜 辨皇王鉴也

百链镜熔范非常规日辰处所灵且祇江心波上舟中铸五月五日日午时琼粉金膏磨莹已化为一片秋潭水镜成将献蓬莱宫扬州长吏手自封人间臣妾不合照背有九五飞天龙人人呼为天子镜我有一言闻太宗太宗常以人为镜鉴古鉴今不鉴容四海安危居掌内百王治乱悬其中乃知天子别有镜不是扬州百链铜

青石 激忠烈也

青石出自蓝田山兼车运载来长安工人磨琢欲何用石不能言我代言不愿作人家墓前神道碣坟土未乾名已灭不愿作官家道傍德政碑不镌实录镌虚辞愿为颜氏段氏碑雕镂太尉与太师刻此两片坚贞质状彼二人忠烈姿义心若石屹不转死节名流确不移如观奋击朱泚日似见叱呵希烈时各於其上题名諡一置高山一沉水陵谷虽迁碑独存骨化为尘名不死长使不忠不烈臣观碑改节慕为人慕为人劝事君

两朱阁 刺佛寺寢多也

两朱阁南北相对起借问何人家贞元双帝子帝子吹箫双得仙五云飘飏飞上天第宅亭台不将去化为佛寺在人间粧阁伎楼何寂静柳似舞腰池似镜花落黄昏悄悄时不闻歌吹闻

钟磬寺门敕榜金字书尼院佛庭寬有余青苔明月多闲地比屋疲人无处居忆昨平阳宅初置吞并平人几家地仙去双双作梵宫渐恐人间尽为寺

西凉伎 刺封疆之臣也

西凉伎假面胡人假狮子刻木为头丝作尾金镀眼睛银帖齿奋迅毛衣摆双耳如从流沙来万里紫髯深目两胡儿鼓舞跳梁前致辞应似凉州未陷日安西都护进来时须臾云得新消息安西路絕归不得泣向狮子涕双垂凉州陷没知不知狮子回头向西望哀吼一声观者悲贞元边将爱此曲醉坐笑看看不足享宾犒士宴三军狮子胡儿长在目有一征夫年七十见弄凉州低面泣泣罢敛手白将军主忧臣辱昔所闻自从天宝兵戈起犬戎日夜吞西鄙凉州陷来四十年河陇侵将七千里平时安西万里疆今日边防在凤翔【平时开远门外立堠云去安西九千九百里以示戍人不为万里行其实就盈数也今蕃汉使往来悉在陇州交易】缘边空屯十万卒饱食温衣闲过日遗民肠断在凉州将卒相看无意收天子每思常痛惜将军欲说合慙羞奈何仍看西凉伎取笑资欢无所愧纵无智力未能收忍取西凉弄为戏

八骏图 戒奇物惩佚游也

穆王八骏天马驹後人爱之写为图背如龙兮颈如象骨竦筋高肌肉壮日行万里速如飞穆王独乘何所之四荒八极蹋欲遍三十二蹄无歇时属车轴折趣不及黄屋草生弃若遗瑶池西赴王母宴七庙经年不亲荐璧台南与盛姬游明堂不复朝诸侯白云黄竹歌声动一人荒乐万人愁周从后稷至文武积德累功世勤苦岂知才及四代孙心轻王业如灰土由来尤物不在大能荡君心则为害文帝却之不肯乘千里马去汉道兴穆王得之不为戒八骏驹来周室坏至今此物世称珍不知房星之精下为害八骏图君莫爱

涧底松 念寒儒也

有松百尺大十围生在涧底寒且卑涧深山险人路絕老死不逢工度之天子明堂欠梁木此求彼有两不知谁谕苍苍造物意但与之材不与地金张世禄原宪贫牛衣寒贱貂蝉贵貂蝉与牛衣高下虽有殊高者未必贤下者未必愚君不见沉沉海底生珊瑚历历天上种白榆

牡丹芳 美天子忧农也

牡丹芳牡丹芳黄金蕊绽红玉房千片赤英霞烂烂百枝绦点灯煌煌照地初开锦绣段当风不结兰麝裳仙人琪树白无色王母桃花小不香晓露轻盈泛紫艳朝阳照耀生红光红紫二色间深浅向背万态随低昂映叶多情隐羞面卧丛无力含醉粧低娇笑容疑掩口凝思怨人如断肠穠姿贵彩信奇絕杂卉乱花无比方石竹金钱何细碎芙蓉芍药苦寻常遂使王公与卿士游花冠盖日相望庾车软轡贵公主香衫细马豪家郎卫公宅静闭东院西明寺深开北廊戏蝶双舞看人久残鶯一声春日长共愁日照芳难驻仍张帷幕垂陰凉花开花落二十日一城之人皆若狂三代以还文胜质人心重华不重实重华直至牡丹芳其来有渐非今日元

和天子忧农桑恤下动天天降祥去岁嘉禾生九穗田中寂寞无人至今年瑞麦分两岐君心独喜无人知无人知可叹息我愿暂求造化力减却牡丹妖艳色少回卿士爱花心同似吾君忧稼穡

红线毯 忧蚕桑之费也

红线毯【吐敢切】择蠶繰丝清水煮拣丝练线红蓝染染为红线红於蓝织作披香殿上毯披香殿广十丈余红线织成可殿铺彩丝茸茸香拂拂线软花虚不胜物美人蹋上歌舞来罗袜绣鞋随步没太原毯涩毳缕硬蜀都褥薄锦花冷不如此毯温且柔年年十月来宣州宣城太守加样织自谓为臣能竭力百夫同担进宫中线厚丝多卷不得宣城太守知不知一丈毯千两丝地不知寒人要暖少夺人衣作地衣【贞元中宣州进开样加丝毯】

杜陵叟 伤农夫之困也

杜陵叟杜陵居岁种薄田一顷余三月无雨旱风起麦苗不秀多黄死九月降霜秋早寒禾穗未熟皆青乾长吏明知不申破急敛暴徵求考课典桑卖地纳官租明年衣食将何如剥我身上帛夺我口中粟虐人害物即豺狼何必钩爪锯牙食人肉不知何人奏皇帝帝心恻隐知八弊白麻纸上书德音京畿尽放今年税昨日里胥方到门手持尺牒榜乡村十家租税九家毕虚受吾君蠲免恩

缭绫 念女工之劳也

缭【连条切】绫缭绫何所似不似罗绡与纨绮应似天台山上明月前四十五尺瀑布泉中有文章又奇絶地铺白烟花簇雪织者何人衣者谁越溪寒女汉宫姬去年中使宣口敕天上取样人间织织为云外秋鴈行染作江南春水色广裁衫袖长制裙金斗熨波刀剪纹异彩奇文相隐映转侧看花看不定昭阳舞人恩正深春衣一对直千金汗沾粉污不再着曳土踏泥无惜心缭绫织成费工绩莫比寻常缁与帛丝细繰多女手疼扎扎千声不盈尺昭阳殿里歌舞人若见织时应也惜

卖炭翁 苦官市也

卖炭翁伐薪烧炭南山中满面尘灰烟火色两鬓苍苍十指黑卖炭得钱何所营身上衣裳口中食可怜身上衣正单心忧炭贱愿天寒夜来城外一尺雪晓驾炭车辗冰辙牛困人饥日已高市南门外泥中歇翩翩两骑来是谁黄衣使者白衫儿手把文章口称敕回车叱牛牵向北一车炭重千余斤官使驱将惜不得半疋红纱一丈绫繫向牛头充炭直

母别子 刺新闻旧也

母别子子别母白日无光哭声苦关西骠骑大将军去年破虏新策勳敕赐金钱二百万洛阳

迎得如花人新人迎来旧人弃掌上莲花眼中刺迎新弃旧未足悲悲在君家留两儿一始扶行一始坐坐啼行哭牵人衣以汝夫妇新嫵婉使我母子生别离不知林中乌与鹊母不失鸛雄伴雌应似园中桃李树花落随风子在枝新人新人听我语洛阳无限红楼女但愿将军重立功更有新人胜於汝

陰山道 疾贪虏也

陰山道陰山道纔遘敦肥水泉好每至戎人送马时道傍千里无纖草草尽泉枯马病羸飞龙但印骨与皮五十疋縑易一疋縑去马来无了日养无所用去非宜每岁死伤十六七縑丝不足女工苦疎织短截充足数藕丝蛛网三尺余回鶻诉称无用处咸安公主号可敦远为可汗频奏论元和二年下新敕内出金帛酬马直仍诏江淮马价縑从此不令疎短织合罗将军呼万岁捧授金银与縑彩谁知黠虏启贪心明年马多来一倍縑渐好马渐多陰山虏奈尔何

时世粧 倣戒也

时世粧时世粧出自城中传四方时世流行无远近【思哉切】不施朱面无粉乌膏注唇唇似泥双眉画作八字低妍媸黑白失本态粧成尽似含悲啼圆鬟无鬟堆髻样斜红不晕【音运】赭面状昔闻披发伊川中辛有见之知有戎元和粧梳君记取髻堆面赭非华风

李夫人 鑒嬖惑也

汉武帝初丧李夫人夫人病时不肯别死後留得生前恩君恩不尽念未已甘泉殿里令写真丹青写出竟何益不言不笑愁杀人又令方士合灵药玉釜煎鍊金炉焚九华帐深夜悄悄反魂香降夫人魂夫人之魂在何许香烟引到焚香处既来何苦不须臾缥缈悠扬还灭去去何速兮来何迟是耶非耶两不知翠蛾髣髴平生貌不似昭阳寝疾时魂之不来君心苦魂之来兮君亦悲背灯隔帐不得语安用暂来还见违伤心不独汉武帝自古及今皆若斯君不见穆王三日哭重璧台前伤盛姬又不见泰陵一掬泪马嵬坡下念杨妃纵令妍姿艳质化为土此恨长在无销期生亦惑死亦惑尤物惑人忘不得人非木石皆有情不如不遇倾城色

陵园妾 怜幽闭也

陵园妾顔色如花命如叶命如叶薄将奈何一奉寝宫年月多年月多时光换春愁秋思知何限青丝发落丛鬟疎红玉肤销繫裙縵【莫晏切】忆昔宫中被妒猜因谗得罪配陵来老母啼呼【丑忍切】车别中官监送鎖门回山宫一闭无开日此身未死不令出松门到晓月徘徊柏城尽日风萧瑟松门柏城幽闭深闻蝉听燕感光陰眼看菊蕊重阳泪手把梨花寒食心把花掩泪无人见緑芜墙遶青苔院四季徒支粧粉钱三朝不识君王面遥想六宫奉至尊宣徽雪液浴堂春雨露之恩不及者犹闻不啻三千人我尔君恩何厚薄愿令轮转直陵园三岁一来均苦乐

盐商妇 恶幸人也

盐商妇多金帛不事田农与蚕绩南北东西不失家风水为乡?作宅本是扬州小家女嫁得西江大商客绿鬟溜去金钗多皓腕肥来银钏窄前呼苍头後叱婢问尔因何得如此婿作盐商十五年不属州县属天子每年盐利入官时少入官家多入私官家利薄私家厚盐铁尚书远不知何况江头鱼米贱红鲙黄橙香稻饭饱食浓粧倚桄桹楼两朵红颧花欲绽盐商妇有幸嫁盐商终朝美饭食终岁好衣裳好衣美食来何处亦须慙愧桑弘羊桑弘羊死已久不独汉时今亦有

杏为梁 刺居处奢也

杏为梁桂为柱何人堂室李开府碧砌红轩色未乾去年身没今移主高其墙大其门谁家宅第卢将军素泥朱板光未灭今岁官收别赐人开府之堂将军宅造未成时头已白逆旅重居逆旅中心是主人身是客更有愚夫念身後心虽甚长计非久穷奢极丽越规模付子传孙令保守莫教门外过客闻抚掌回头笑杀君君不见马家宅尚犹存宅门题作奉诚园君不见魏家宅属他人诏赎赐还五代孙【元和四年诏特以官钱赎魏徵胜业坊中旧宅以还其孙用樊忠谏】俭存奢失今在目安用高墙围大屋

井底引银瓶 止淫奔也

井底引银瓶银瓶欲上丝绳絶石上磨玉簪玉簪欲成中央折瓶沉簪折知奈何似妾今朝与君别忆昔在家为女时人言举动有殊姿婣娟两鬓秋蝉翼宛转双蛾远山色笑随戏伴後园中此时与君未相识妾弄青梅凭短墙君骑白马傍垂杨墙头马上遥相顾一见知君即断肠知君断肠共君语君指南山松柏树感君松柏化为心闇合双鬟逐君去到君家舍五六年君家大人频有言聘则为妻奔是妾不堪主祀奉苹蘩终知君家不可住其奈出门无去处岂无父母在高堂亦有亲情满故乡潜来更不通消息今日悲羞归不得为君一日恩悞妾百年身寄言痴小人家女慎勿将身轻许人

官牛 讽执政也

官牛官牛驾官车漕水岸边般载沙一石沙几斤重朝载暮载将何用载向五门官道西绿槐陰下铺沙堤昨来新拜右丞相恐怕泥涂污马蹄右丞相马蹄蹋沙虽净洁牛领牵车欲流血右丞相但能济人治国调陰阳官牛领穿亦无妨

紫毫笔 讥失职也

紫毫笔尖如锥兮利如刀江南石上有老兔吃竹饮泉生紫毫宣城之人采为笔千万毛中选一毫毫虽轻功甚重管勒工名充岁贡君兮臣兮勿轻用勿轻用将何如愿赐东西府御史愿颁左右台起居握管趋入黄金阙抽毫立在白玉除臣有奸邪正衙奏君有动言直笔书起居

郎侍御史尔知紫毫不易致每岁宣城进笔时紫毫之价如金贵慎勿空将弹失仪慎勿空将
録制词

隋堤柳 悯亡国也

隋堤柳岁久年深尽衰朽风飘飘兮雨萧萧三株两株汴河口老枝病叶愁杀人曾经大业年中春大业年中炀天子种柳成行夹流水西自黄河东至淮緑陰一千三百里大业末年春暮月柳色如烟絮如雪南幸江都恣佚游应将此柳繫龙舟紫髯郎将护锦?青蛾御史直迷楼海内财力此时竭舟中歌笑何日休上荒下困势不久宗社之危如缀旒炀天子自言福祚长无穷岂知皇子封鄴【户圭切】公龙舟未过彭城合义旗已入长安宫萧墙祸生人事变晏驾不得归秦中土坟数尺何处葬吴公台下多悲风二百年来汴河路沙草和烟朝复暮後王何以鑒前王请看隋堤亡国树

草茫茫 惩厚葬也

草茫茫土苍苍苍苍茫茫在何处骊山脚下秦皇墓墓中下涸三重泉当时自以为深固下流水银象江海上缀珠光作乌兔别为天地於其间拟将富贵随身去一朝盗掘坟陵破龙椁神堂三月火可怜宝玉归人间暂借泉中买身祸奢者狼藉俭者安一凶一吉在眼前凭君回首向南望汉文葬在灞陵原

古塚狐 戒艳色也

古塚狐妖且老化为妇人顔色好头变云鬟面变粧大尾曳作长红裳徐徐行傍荒村路日欲暮时人静处或歌或舞或悲啼翠眉不举花钿低忽然一笑千万态见者十人八九迷假色迷人犹若是真色迷人应过此彼真此假俱迷人人心恶假贵重真狐假女妖害犹浅一朝一夕迷人眼女为狐媚害却深日增月长溺人心何况褒姒之色善蛊惑能丧人家覆人国君看为害浅深间岂将假色同真色

黑潭龙 疾贪吏也

黑潭水深色如墨传有神龙人不识潭上架屋官立祠龙不能神人神之丰凶水旱与疾疫乡里皆言龙所为家家养豚漉清酒朝祈暮赛依巫口神之来兮风飘飘纸钱动兮锦伞摇神去兮风亦静香火灭兮盃盘冷肉堆潭岸石酒泼庙前草不知龙神享几多林鼠山狐长醉饱狐何幸豚何辜年年杀豚将餵狐狐假神龙食豚尽九重泉底龙无知

天可度 恶诈人也

天可度地可量唯有人心不可防但见丹诚赤如血谁知伪言巧似簧劝君掩鼻君莫掩使君夫妇为参商劝君掇蜂君莫掇使君父子为豺狼海底鱼兮天上鸟高可射兮深可钓唯有人

心相对时咫尺之间不能料君不见李义府之辈笑欣欣笑中有刀潜杀人陰阳神变皆可测
不测人闲笑是瞋

秦吉了 哀冤民也

秦吉了出南中彩毛青黑花颈红耳聪心慧舌端巧鸟语人言无不通昨日长爪鸢今日大觜
乌鸢捎乳燕一窠覆乌啄母鸡双眼枯鸡号堕地燕惊去然後拾卵攫其雏岂无鷗与鸛唳【
音素】中肉饱不肯搏亦有鸢鹤羣闲立扬高如不闻秦吉了人云尔是能言鸟岂不见鸡燕
之冤苦吾闻凤凰百鸟主尔竟不为凤凰之前致一言安用噪噪闲言语

鷗九剑 思决壅也

欧冶子死千年後精灵闇授张鷗【於加切】九鷗九剑铸吴山中天与日时神借功金铁腾
精火翻焰踊跃求为镞鋌剑剑成未试十余年有客持金买一观谁知闭匣长思用三尺青蛇
不肯蟠客有心剑无口客代剑言告鷗九君勿矜我玉可切君勿夸我钟可刺不如持我决浮
云无令漫漫蔽白日为君使无私之光及万物蛰虫昭苏萌草出

采诗官 监前王乱亡之由也

采诗官采诗听謠导人言言者无罪闻者诫下流上通上下泰周灭秦兴至隋氏十代采诗官
不置郊庙歌登讚君美乐府艳调悦君意若求讽谕规刺言万句千章无一字不是章句无规
刺渐及朝廷絶讽议诤臣杜口为冗员諫鼓高县作虚器一人负展常端默百辟入门皆自媚
夕郎所贺皆德音春官每奏唯祥瑞君之堂兮千里远君之门兮九重闭君耳唯闻堂上言君
眼不见门前事贪吏害民无所忌奸臣蔽君无所畏君不见厉王胡亥之末年羣臣有利君无
利君兮君兮愿听此欲开壅蔽達人情先向歌诗求讽刺

白氏长庆集卷四

卷五

钦定四库全书

白氏长庆卷五

唐白居易撰

闲适一【古调诗凡五十三首】

常乐里闲居偶题十六韵兼寄刘十五公舆王十一一起吕二灵吕四颀崔十八玄亮元九稹刘三十二敦质张十五仲元时为校书郎

帝都名利场鸡鸣无安居独有懒慢者日高头未梳工拙性不同进退迹遂殊幸逢太平代天子好文儒小才难大用典校在秘书三旬初入省因得养顽疎茅屋四五间一马二仆夫俸钱万六千月给亦有余既无衣食牵亦少人事拘遂使少年心日日常晏如勿言无知已躁静各有徒兰台七八人出处与之俱旬时阻谈笑旦夕望轩车谁能雠校闲解带卧吾庐窗前有竹翫门外有酒沽何以待君子数竿对一壶

答元八宗简同游曲江後明日见赠

长安千万人出门各有营唯我与夫子信马悠悠行行到曲江头反照草树明南山好颜色病客有心情水禽翻白羽风荷嫋翠茎何必沧浪去即此可濯缨时景不重来赏心难再并坐愁红尘里夕鼓冬冬声归来经一宿世虑稍复生赖闻瑶华唱再得尘襟清

感时

朝见日上天暮见日入地不觉明镜中忽年三十四勿言身未老冉冉行将至白髮虽未生朱顔已先悴人生讵几何在世犹如寄虽有七十期十人无一二今我犹未晤往往不适意胡为方寸闲不贮浩然气贫贱非不恶道在何足避富贵非不爱时来当自至所以达人心外物不能累唯当饮美酒终日陶陶醉斯言胜金玉佩之无失坠

首夏同诸校正游开元观因宿翫月

我与二三子策名在京师官小无职事闲於为客时沉沉道观中心赏期在兹到门车马回入院巾杖随清和四月初树木正华滋风清寒叶影鸟恋残花枝向夕天又晴东南余霞披置酒西廊下待月盃行迟须臾金魄生若与吾徒期光华一照耀殿角相参差终夜清景前笑歌不

知疲长安名利地此兴几人知

永崇里观居

季夏中气候烦暑自此收萧飒风雨天蝉声暮啾啾永崇里巷静华阳观院幽轩车不到处满地槐花秋年光忽冉冉世事本悠悠何必待衰老然後悟浮休真隐岂长远至道在冥搜身虽世界住心与虚无游朝饥有疏食夜寒有布裘幸免冻与馁此外复何求寡慾虽少病乐天心不忧何以明吾志周易在床头

早送举人入试

夙驾送举人东方犹未明自谓出太早已有车马行骑火高低影街鼓参差声可怜早朝者相看意气生日出尘埃飞羣动互营营营营各何求无非利与名而我常晏起虚住长安城春深官又满日有归山情

招王质夫【自此後诗为盩厔时作】

濯足云水客折腰簪笏身闲迹相背十里别经旬忽因乘逸兴莫惜访嚣尘窗前故栽竹与君为主人只役骆口因与王质夫同游秋山偶题三韵

石拥百泉合云破千峰开平生烟霞侣此地重徘徊今日勤王意一半为山来

见萧侍御忆旧山草堂诗因和以寄

琢玉以为架缀珠以为笼玉架绊野鹤珠笼锁冥鸿鸿思云外天鹤忆松上风珠玉信为美鸟不恋其中台中萧侍御心与鸿鹤同晚起慵冠豸闲行厌避骢昨见忆山诗诗思浩无穷归梦杳何处旧居茫水东秋闲杉桂林春老芝术丛白云别山後离抱常忡忡衣绣非不荣持宪非不雄所乐不在此怅望草堂空

病假中南亭闲望

欹枕不视事两日门掩关始知吏役身不病不得闲闲意不在远小亭方丈间西檐竹梢上坐见太白山遥愧峯上云对此尘中颜

仙游寺独宿

沙鹤上堦立潭月当户开此中留我宿两夜不能回幸与静境遇喜无归侣催从今独游後不拟共人来

前亭凉夜

露簟色似玉风幌影如波坐愁树叶落中庭明月多

官舍小亭闲望

风竹散清韵烟槐凝绿姿日高人吏去闲坐在茅茨葛衣御时暑蔬饭疗朝饥持此聊自足心力少营为亭上独吟罢眼前无事时数峯太白雪一卷陶潜诗人心各自是我是良在兹回谢争名客甘从君所嗤

早秋独夜

井梧凉叶动隣杵秋声发独向檐下眠觉来半牀月

听弹古淥水【琴曲名】

闻君古淥水使我心和平欲识慢流意为听疎泛声西窗竹陰下竟日有余清

松斋自题【时为翰林学士】

非老亦非少年过三纪余非贱亦非贵朝登一命初才小分易足心寛体长舒充肠皆美食容膝即安居况此松斋下一琴数帙书书不求甚解琴聊以自娛夜直入君门晚归卧吾庐形骸委顺动方寸付空虚持此将过日自然多晏如昏昏复默默非智亦非愚

冬夜与钱员外同直禁中

夜深草诏罢霜月凄凜凜欲卧暖残盃灯前相对饮连铺青縑被对置通中枕髣髴百余宵与君同此寝

和钱员外禁中夙兴见示

窗白星汉曙牕暖灯火余坐卷朱里幕看封紫泥书宵宵鍾漏尽曈曈霞景初楼台红照耀松竹青扶疎君爱此时好回头特谓余不知上清界晓景复何如

夏日独直寄萧侍御

宪台文法地翰林清切司鷹猜课野鹤驥德责山麋课责虽不同同归非所宜是以方寸内忽忽闇相思夏日独上直日长何所为澹然无他念虚静是吾师形委有事牵心与无事期中臆一以旷外累都若遗地贵身不觉意闲境来随但对松与竹如在山中时情性聊自适吟咏偶

成诗此意非夫子余人多不知

松声【修竹里张家宅南亭作】

月好好独坐双松在前轩西南微风来潜入枝叶闲萧寥发为声半夜明月前寒山飒飒雨秋
琴泠泠弦一闻涤炎暑再听破昏烦竟夕遂不寐心体俱翛然南陌车马动西隣歌吹繁谁知
兹檐下满耳不为喧

禁中

门严九重静窗幽一室闲好是修心处何必在深山

赠吴丹

巧者力苦劳智者心苦忧爱君无巧智终岁闲悠悠尝登御史府亦佐东诸侯手操紃谬简心
运决胜筹宦途似风水君心如虚舟泛然而不有进退得自由今来脱豸冠时往侍龙楼官曹
称心静居处随迹幽冬负南檐日支体甚温柔夏卧北窗风枕席如凉秋南山入舍下酒瓮在
牀头人闲有闲地何必隐林丘顾我愚且昧劳生殊未休一入金门直星霜三四周主恩信难
报近地徒久留终当乞闲官退与夫子游

初除户曹喜而言志

诏授户曹掾捧诏感君恩感恩非为己禄养及吾亲弟兄俱簪笏新妇俨衣巾罗列高堂下拜
庆正纷纷俸钱四五万月可奉晨昏廩禄二百石岁可盈仓囷喧喧车马来贺客满我门不以
我为贪知我家内贫置酒延贺客客容亦欢欣笑云今日後不复忧空樽答云如君言愿君少
逡巡我有平生志醉後为君陈人生百岁期七十有几人浮荣及虚位皆是身之宾唯有衣与
食此事粗关身苟免饥寒外余物尽浮云

秋居书怀

门前少宾客堦下多松竹秋景下西墙凉风入东屋有琴慵不弄有书闲不读尽日方寸中澹
然无所欲何须广居处不用多积蓄丈室可容身斗储可充腹况无治道术坐受官家禄不种
一株桑不锄一陇谷终朝饱饭飡卒岁丰衣服持此知愧心自然易为足

禁中晓卧因怀王起居

迟迟禁漏尽悄悄冥鷄喧夜雨槐花落微凉卧北轩曙灯残未灭风帘闲自翻每得一静境思
与故人言

养拙

铁柔不为剑木曲不为辕今我亦如此愚蒙不及门甘心谢名利灭迹归丘园坐卧茅茨中但对琴与樽身去纆锁累耳辞朝市喧逍遥无所为时窥五千言无忧乐性场寡慾清心源始知不才者可以探道根

寄李十建

外事牵我形外物诱我情李君别来久徧恹从中生忆昨访君时立马扣柴荆有时君未起稚子喜先迎连步笑出门衣翻冠或倾扫堦苔纹绿拂榻藤陰清家酝及春熟园葵乘露烹看山东亭坐待月南原行门静唯鸟语坊远少鼓声相对尽日言不及利与名分手来几时明月三四盈别时残花落及此新蝉鸣芳岁忽已晚离抱怅未平岂不思命驾吏职坐相縈前时君有期访我来山城心赏久云阻言约无自轻相去幸非远走马一日程

旅次华州赠袁右丞

渭水绿溶溶华山青崇崇山水一何丽君子在其中才与世会合物随诚感通德星降人福时雨助岁功化行人无讼囹圄千日空政顺气亦和黍稷三年丰客自帝城来驱马出关东爱此一郡人如见太古风方今天子心忧人正忡忡安得天下守尽得如袁公

酬杨九弘贞长安病中见寄

伏枕君寂寂折腰我营营所嗟经时别相去一宿程携手昨何时昆明春水平离郡来几日太白夏云生之子未得意贫病客帝城贫坚志士节病长高人情隐几自恬淡闭门无送迎龙卧心有待鹤瘦貌弥清清机发为文投我如振琼何以慰饥渴捧之吟一声

禁中偶直梦游仙游寺

西轩草诏暇松竹声寂寂月出清风来忽是山中夕因成西南梦梦作游仙客觉闻宫漏声犹谓山泉滴

赠王山人

闻君减寝食日听神仙说闇待非常人潜求长生诀言长本对短未离生死辙假使得长生才能胜夭折松树千年朽槿花一日歇毕竟共虚空何须夸岁月彭生徒自异生死终无别不如学无生无生即无灭

秋山

久病旷心赏今朝一登山山秋云物冷称我清羸颜白石卧可枕青萝行可攀意中如有得尽
日不欲还人生无几何如寄天地间心有千载忧身无一日闲何时解尘网此地来掩关

赠能七伦

涧松高百寻四时寒森森临风有清韵向日无曲阴如何时俗人但赏桃李林岂不知坚贞芳
馨诱其心能生学为文气高功亦深手中一百篇句句披沙金苦节二十年无人振陆沉今我
尚贫贱徒为尔知音

题杨隐士西亭

静得亭上境远谐尘外踪凭轩东南望鸟灭山重重竹露冷烦襟杉风清病容曠然宜贞趣道
与心相逢即此可遗世何必蓬壶峯

题赠郑秘书徵君石沟溪隐居【郑生常隐天台徵起而仕今复谢病隐於此】

郑君得自然虚白生心胷吸彼沆【何党切】？【奚介切】精凝为冰雪容大君贞元初求贤
致时雍蒲轮入翠微迎下天台峯赤城别松乔黄合交夔龙俛仰受三命从容辞九重出笼鹤
翩翩归林凤啾啾在火辨良玉经霜识贞松新居寄楚山山碧溪溶溶丹竈烧烟爚黄精花丰
茸蕙帐夜琴淡桂樽春酒浓时人不到处苔石无尘踪我今何为者趋世身龙鍾不向林壑访
无由朝市逢终当解尘纓卜筑来相从

及第後归覲留别诸同年

十年常苦学一上谬成名擢第未为贵贺亲方始荣时辈六七人送我出帝城轩车动行色丝
管举离声得意减别恨半酣轻远程翩翩马蹄疾春日归乡情

清夜琴兴

月出鸟栖尽寂然坐空林是时心境闲可以弹素琴清冷由木性恬淡随人心心积和平气木
应正始音响余羣动息曲罢秋夜深正声感元化天地清沉沉

效陶潜体诗十六首【并序】

余退居渭上杜门不出时属多雨无以自娱会家酝新熟雨中独饮往往酣醉终日不醒懒放
之心弥觉自得故得於此而有以忘於彼者因咏陶渊明诗适与意会遂徬其体成十六篇醉
中狂言醒辄自哂然知我者亦无隐焉

不动者厚地不息者高天无穷者日月长在者山川松栢与龟鹤其壽皆千年嗟嗟羣物中而

人独不然早出向朝市暮已归下泉形质及壽命危脆若浮烟尧舜与周孔古来称圣贤借问今何在一去亦不还我无不死药万万随化迁所未定知者修短迟速间幸及身健日当歌一樽前何必待人劝持此自为欢

翳翳踰月陰沉沉连日雨开帘望天色黄云暗如土行潦毁我墉疾风坏我宇蓬蒿生庭院泥涂失场圃村深絕宾客窗晦无俦侣尽日不下牀跳鼃时入户出门无所往入室还独处不以酒自娱块然与谁语

朝饮一盃酒冥心合元化兀然无所思日高尚闲卧暮读一卷书会意如嘉话欣然有所遇夜深犹独坐又得琴上趣安弦有余暇复多诗中狂下笔不能罢唯兹三四事特用度昼夜所以陰雨中经旬不出舍始悟独住人心安时亦过

东家采桑妇雨来苦愁悲族蚕北堂前雨冷不成丝西家荷锄叟雨来亦怨咨种豆南山下雨多落为箕而我独何幸酝酒本无期及此多雨日正遇新熟时开瓶浮樽中玉液黄金脂持觥已可悦欢尝有余滋一酌发好容再酌开愁眉速进四五酌酣畅入四肢忽然遗我物谁复分是非是时连夕雨酩酊无所知人心苦颠倒反为忧者嗤

朝亦独醉歌暮亦独醉睡未尽一壶酒已成三独醉勿言饮太少且喜欢易致一盃复两盃多不过三四便得心中适尽忘身外事更复强一盃陶然遗万累一饮一石者徒以多为贵及其酩酊时与我亦无异笑谢多饮者酒钱徒自费

天秋无片云地静无纖尘团团新晴月林下生白轮忆昨陰霖天连连三四旬赖逢家醪熟不觉过朝昏私言雨霁後可以罢余樽及对新月色不醉亦愁人牀头残酒榼欲尽味弥淳携置南檐下举酌自殷勤清光入盃杓白露生衣巾乃知陰与晴安可无此君我有乐府诗成来人未闻今宵醉有兴狂咏惊四邻独赏犹复尔何况有交亲

中秋三五夜明月在前轩临觴忽不饮忆我平生欢我有同心人邈邈崔与钱我有忘形友迢迢李与元或飞青云上或落江湖闲与我不相见于今三四年我无缩地术君非驭风仙安得明月下四人来晤言良夜信难得佳期杳无缘明月又不住渐下西南天岂无他时会惜此清景前

家酝饮已尽村中无酒沽坐愁今夜醒其奈秋怀何有客忽叩门言语一何佳云是南村叟挈榼来相过且喜樽不燥安问少与多重阳虽已过篱菊有残花欢来苦昼短不觉夕阳斜老人忽遽起且待新月华客去有余趣竟夕独酣歌

原生衣百结颜子食一簞欢然乐其志有以忘饥寒今我何人哉德不比先贤衣食幸相属胡为不自安况兹清渭曲居处安且闲榆柳百余树茅茨数十间寒负檐下日热濯涧底泉日出犹未起日入已复眠西风满村巷清凉八月天但有鸡犬声不闻车马喧时倾一樽酒坐望东南山稚侄初学步牵衣戏我前即此自可乐庶几颜与原

湛湛樽中酒有功不自伐不伐人不知我今代其说良将临大敌前驱千万卒一箠投河饮赴死心如一壮士磨匕首勇愤气咆 一酣忘报讎四体如无骨东海杀孝妇天旱踰年月一酌酹其?通宵雨不歇咸阳秦狱气冤痛结为物千岁不肯散一沃亦销失况兹儿女恨及彼幽忧疾快饮无不消如霜得春日方知趣蘖灵万物无与匹

烟霞隔玄圃风波限瀛洲我岂不欲往大海路阻修神仙但闻说灵药不可求长生无得者举世如蜉蝣逝者不重回存者难久留踟蹰未死闲何苦怀百忧念此忽内热坐看成白头举盃还独饮顾影自献酬心与口相约未醉勿言休今朝不尽醉知有明朝不不见郭门外累累坟与丘明月愁杀人黄蒿风飏飏死者若有知悔不秉烛游

吾闻浔阳郡昔有陶徵君受酒不爱名忧醒不忧贫尝为彭泽令在官才八旬愀然忽不乐挂印着公门口吟归去来头戴漉酒巾人吏留不得直入故山云归来五柳下还以酒养真人间荣与利摆落如泥尘先生去已久纸墨有遗文篇篇劝我饮此外无所云我从老大来窃慕其为人其他不可及且傴醉昏昏

楚王疑忠臣江南放屈平晋朝轻高士林下弃刘伶一人常独醉一人常独醒醒者多苦志醉者多欢情欢情信独善苦志竟何成兀傲瓮闲卧憔悴泽畔行彼忧而此乐道理甚分明愿君且饮酒勿思身後名

有一燕赵士言貌甚奇瓌日日酒家去脱衣典数盃问君何落魄云仆生草莱地寒命且薄徒抱王佐才岂无济时策君门乏良媒三献寝不报迟迟空手回亦有同门生先升青云梯贵贱交道絶朱门扣不开及归种禾黍三岁旱为灾入山烧黄白一旦化为灰蹉跎五十余生世苦不偕处处去不得却归酒中来

南巷有贵人高盖驷马车我问何所苦四十垂白须答云君不知位重多忧虞北里有寒士瓮牖绳为枢出扶桑梨杖入卧蜗牛庐散贱无忧患心安体亦舒东邻有富翁藏货徧五都东京收粟帛西市鬻金珠朝营暮计算昼夜不安居西舍有贫者匹妇配匹夫布裙行赁舂短【音树】褐坐佣书以此求口食一饱欣有余贵贱与贫富高下虽有殊忧乐与利害彼此不相踰是以达人观万化同一途但未知生死胜负两何如迟疑未知闲且以酒为娱

济水澄而洁河水浑而黄交流列四渎清浊不相伤太公战牧野伯夷饿首阳同时号贤圣进退不相妨谓天不爱民胡为生稻粱谓天果爱民胡为生豺狼谓神福善人孔圣竟栖遑谓神祸淫人?秦终霸王颜回与黄宪何辜早夭亡蝮蛇与鸩鸟何得壽延长物理不可测神道亦难量举头仰问天天色但苍苍唯当多种黍日醉手中觞

白氏长庆集卷五

卷六

钦定四库全书

白氏长庆集卷六

唐白居易撰

闲适二【古调诗五言凡四十八首】

自题写真【时为翰林学士】

我貌不自识李放写我真静观神与骨合是山中人蒲柳质易朽麋鹿心难驯何事赤墀上五年为侍臣况多刚狷性难与世同尘不惟非贵相但恐生祸因宜当早罢去收取云泉身

遣怀【自此後诗在渭村作】

寓心身体中寓性方寸内此身是外物何足苦忧爱况有假饰者华簪及高盖此又踈於身复在外物外操之多惴栗失之又悲悔乃知名与利得丧俱为害颓然环堵客萝蕙为巾带自得此道来身穷心甚泰

渭上偶钓

渭水如镜色中有鲤与鲂偶持一竿竹悬钓在其傍微风吹钓丝嫋嫋十尺长身虽对鱼坐心在无何乡昔有白头人亦钓此渭阳钓人不钓鱼七十得文王况我垂钓意人鱼亦兼忘无机两不得但弄秋水光兴尽钓亦罢归来饮我觞

隐几

身适忘四支心适忘是非既适又忘适不知吾是谁百体如槁木兀然无所知方寸如死灰寂然无所思今日复明日身心忽两遗行年三十九岁暮日斜时四十心不动吾今其庶几

春眠

新浴肢体畅独寝神魄安况因夜深坐遂成日高眠春被薄亦暖朝窗深更闲却忘人闲事似得枕上仙至适无梦想大和难名言全胜彭泽醉欲敌曹溪禅何物呼我觉伯劳声关关起来妻子笑生计春茫然

闲居

空腹一盞粥饥食有余味南檐半牀日暖卧因成睡绵袍拥两膝竹几支双臂从旦直至昏身心无一事心足即为富身闲乃当贵富贵在此中何必居高位君看裴相国金紫光照地心苦头尽白才年四十四乃知高盖车乘者多忧畏

夏日

东牕晓无热北户凉有风尽日坐复卧不离一室中中心本无系亦与出门同

适意二首

十年为旅客常有饥寒愁三年作谏官复多尸素羞有酒不暇饮有山不得游岂无平生志拘牵不自由一朝归渭上泛如不系舟置心世事外无喜亦无忧终日一蔬食终年一布裘寒来弥懒放数日一梳头朝睡足始起夜酌醉即休人心不过适适外复何求

早岁从旅游颇谙时俗意中年忝班列备见朝廷事作客诚已难为臣尤不易况予方且介举动多忤累直道速我尤诡遇非吾志胷中十年内消尽浩然气自从反田亩顿觉无忧愧蟠木用难施浮云心易遂悠悠身与世从此两相弃

首夏病闲

我生来几时万有四千日自省於其闲非忧即有疾老去虑渐息年来病初愈忽喜身与心泰然两无苦况兹孟夏月清和好时节微风吹袂衣不寒复不热移榻树陰下竟日何所为或饮一瓯茗或吟两句诗内无忧患迫外无职役羈此日不自适何时是适时

晚春沽酒

百花落如雪两鬓垂作丝春去有来日我老无少时人生待富贵为乐常苦迟不如贫贱日随分开愁眉卖我所乘马典我旧朝衣尽将沽酒饮酩酊步行归名姓日隐晦形骸日变衰醉卧黄公肆人知我是谁

兰若寓居

名宦老慵求退身安草野家园病懒归寄居在兰若薜衣换簪组藜杖代车马行止辄自由甚觉身潇洒晨游南坞上夜息东庵下人间千万事无有关心者

麴生访宿

西斋寂已暮叩门声橐橐知是君宿来自掩尘埃席村家何所有茶果迎来客贫静似僧居竹林依四壁厨灯斜影出檐雨余声滴不是爱闲人肯来同此夕

闻庾七左降因咏所怀

我病居渭北君老谪巴东相悲一长叹薄命与君同既叹还自哂哂叹两未终後心谙前意所见何迷蒙人生大块闲如鸿毛在风或飘青云上或落泥涂中袞服相天下傥来非我通布衣委草莽偶去非吾穷外物不可必中怀须自空无令怏怏气留滞在心胸

答卜者

病眼昏似夜衰鬓如秋除却须衣食平生百事休知君善易者问我决疑不卜非他故人闲无所求

归田三首

人生何所欲所欲唯两端中人爱富贵高士慕神仙神仙须有藉富贵亦在天莫恋长安道莫寻方丈山西京尘浩浩东海浪漫漫金门不可入琪树何由攀不如归山下如法种春田

种田意已决决意复何如卖马买犊使徒步归田庐迎春治耒耜候雨辟菑畲策杖田头立躬亲课仆夫吾闻老农言为稼慎在初所施不卤莽所报必有余上求奉皇税下望备家储安得放慵惰拱手而曳耜学农未为鄙亲友勿笑余更待明年後自拟执犁锄

三十为近臣腰间鸣佩玉四十为野夫田中学鋤谷何言十年内变化如此速此理固是常穷通相倚伏为鱼有深水为鸟有高木何必守一方窘然自牵束化吾足为马吾因以行陆化吾手为弹吾因以求肉形骸为异物委顺心犹足幸得且归农安知不为福况吾行欲老譬【匹灭切】若风中烛孰能俄顷闲将心系荣辱

秋游原上

七月行已半早凉天气清清晨起巾栉徐步出柴荆露杖筇竹冷风襟越蕉轻闲携弟侄辈同上秋原行新枣未全赤晚瓜有余馨依依田家叟设此相逢迎自我到此村往来白髮生村中相识久老幼皆有情留连向暮归树树风蝉鸣是时新雨足禾黍夹道青见此令人饱何必待西成

九日登西原宴望【同诸兄弟作】

病爱枕席凉日高眠未辍弟兄呼我起今日重阳节起登西原望怀抱同一豁移座就菊丛飢【音高】酒前罗列虽无丝与管歌笑随情发白日未及倾颜酡耳已热酒酣四向望六合何

空濶天地自久长斯人几时活请看原下村村人死不歇一村四十家哭葬无虚月指此各相勉良辰且欢悦

寄同病者

三十生二毛早衰为沉痾四十官七品拙宦非由他面颜日枯槁时命日蹉跎岂独我如此圣贤无奈何回观亲旧中举目尤可嗟或有终老者沉贱如泥沙或有始壮者飘忽如风花穷饿与天促不如我者多以此反自慰常得心平和寄言同病者回叹且为歌

游蓝田山卜居

脱置腰下组摆落心中尘行歌望山去意似归乡人朝蹋玉峯下暮寻蓝水滨拟求幽僻地安置疎慵身本性便山寺应须旁悟真

村雪夜坐

南窗背灯坐风散闇纷纷寂寞深村夜残鴈雪中闻

东园翫菊

少年昨已去芳岁今又阑如何寂寞意复此荒凉园园中独立久日淡风露寒秋蔬尽芜没好树亦凋残唯有数丛菊新开篱落闲携觴聊就酌为尔一留连忆我少小日易为兴所牵见酒无时节未饮心欣然近从年长来渐觉取乐难常恐更衰老强饮亦无欢顾谓尔菊花後时何独鲜诚知不为我借尔暂开颜

观稼

世役不我牵身心常自若晚出看田亩闲行旁村落累累绕场稼啧啧羣飞雀年丰岂独人禽鸟声亦乐田翁逢我喜默起具杯杓敛手笑相延社酒有残酌愧兹勤且敬藜杖为淹泊言动任天真未觉农人恶停盃问生事夫种妻儿获筋力苦疲劳衣食常单薄自慙禄仕者曾不营农作饱食无所劳何殊卫人鹤

闻哭者

昨日南邻哭哭声一何苦云是妻哭夫夫年二十五今朝北里哭哭声又何切云是母哭儿儿年十七八四邻尚如此天下多夭折乃知浮世人少得垂白髮余今过四十念彼聊自悦从此明镜中不嫌头似雪

新构亭台示诸弟侄

平台高数尺台上筑茅茨东西疏二牖南北开两扉芦帘前後卷竹簟当中施清冷白石枕疏凉黄葛衣开襟向风坐夏日如秋时笑傲颇有趣窥临不知疲东牕对华山三峯碧参差南檐当渭水卧见云帆飞仰摘枝上果俯折畦中葵足以充饥渴何必慕甘肥况有好羣从旦夕相追随

自吟拙什因有所怀

懒病每多暇暇来何所为未能抛笔砚时作一篇诗诗成淡无味多被衆人嗤上怪落声韵下嫌拙言词时时自吟咏吟罢有所思苏州及彭泽与我不同时此外复谁爱唯有元微之谪向江陵府三年作判司相去二千里诗成远不知

东坡秋意寄元八

寥落野陂畔独行思有余秋荷病叶上白露大如珠忽忆同赏地曲江南北隅秋池少游客唯我与君俱啼蛩隐红蓼瘦马蹋青芜当时与今日俱是暮秋初节物苦相似时景亦无余唯有人分散经年不得书

闲居

深闭竹闲扉静扫松下地独啸晚风前何人知此意看山尽日坐枕帙移时睡谁能从我游使君心无事

咏拙

所禀有巧拙不可改者性所赋有厚薄不可移者命我性拙且蠢【书容切】我命薄且屯问我何以知所知良有因亦曾举两足学人蹋红尘从兹知性拙不解转如轮亦曾奋六翮高飞到青云从兹知命薄摧落不逡巡慕贵而厌贱乐富而恶贫同此天地闲我岂异於人性命苟如此反则成苦辛以此自安分虽穷每欣欣葺茅为我庐编蓬为我门缝布作袍被种谷充盘飧静读古人书闲钓清渭滨优哉复游哉聊以终吾身

咏慵

有官慵不选有田慵不农屋穿慵不葺衣裂慵不缝有酒慵不酌无异樽长空有琴慵不弹亦与无弦同家人告饭尽欲炊慵不舂亲朋寄书至欲读慵开封尝闻嵇叔夜一生在慵中弹琴复锻链比我未为慵

冬夜

家贫亲爱散身病交游罢眼前无一人独掩村斋卧冷落灯火闇离披帘幕破策策窗户前又

闻新雪下长年渐省睡夜半起端坐不学坐忘心寂寞安可过兀然身寄世浩然心委化如此
来四年一千三百夜

村中留李三固言宿

平生早游宦不道无亲故如我与君心相知应有数春明门前别金氏陂中遇村酒两三盃相
留寒日暮勿嫌村酒薄聊酌论心素请君少踟蹰系马门前树明年身若健便拟江湖去他日
纵相思知君无覓处後会既茫茫今宵君且住

友人夜访

檐闲清风簾松下明月盃幽意正如此况乃故人来

游悟贞寺诗【一百三十韵】

元和九年秋八月月上弦我游悟贞寺寺在王顺山去山四五里先闻水潺湲自兹舍车马始
步蓝溪湾手拄青竹杖足蹋白石滩渐怪耳目旷不闻人世喧山下望山上初疑不可攀谁知
中有路盘折通岩巔一息幡竿下再休石龕边龕闲长丈余门户无扃关仰窥不见人石髮垂
若鬢惊出白蝙蝠双飞如雪翻回首寺门望青崖夹朱轩如擘山腹开置寺於其闲入门无平
地地窄虚空寛房廊与台殿高下随峯峦岩?无撮土树木多瘦坚根株抱石长屈曲虫蛇蟠松
桂乱无行四时郁芊芊【音千】枝梢嫋青翠韵若风中弦日月光不透绿陰相交延幽鸟时
一声闻之似寒蝉首憩宾位亭就坐未及安须臾开北户万里明豁然拂檐虹霏微遶栋云回
旋赤日间白雨陰晴同一川野绿簇草树眼界吞秦原渭水细不见汉陵小於拳却顾来时路
萦纡映朱栏历历上山人一一遥可观前对多宝塔风铎鸣四端栾栌与户牖恰恰金碧繁云
昔伽叶佛此地坐涅槃至今铁鉢在当?手迹穿西开玉像殿白佛森比肩抖擞尘埃衣礼拜冰
雪颜叠霜为袈裟贯电为华鬘【音瞞】逼观疑鬼功其迹非雕镌次登观音堂未到闻栴檀
上塔脱双履敛足升瑶筵六楹排玉镜四座敷金钿黑夜自光明不待灯烛然衆宝互低昂碧
佩珊瑚幡风来似天乐相触声珊珊白珠垂露凝赤珠滴血殷点缀佛髻上合为七宝冠双瓶
白琉璃色若秋水寒隔瓶见舍利圆转如金丹玉笛何代物天人施只园吹如秋鹤声可以降
灵仙是时秋方中三五月正圆宝堂豁三门金魄当其前月与宝相射晶光争鲜妍照人心骨
冷竟夕不欲眠晓寻南塔路乱竹低婵娟林幽不逢人寒蝶飞翩翩山果不识名离离夹道蕃
足以疗饥乏摘尝味甘酸道南蓝谷神紫伞白纸钱若岁有水旱诏使修苹蘩以地清淨故献
奠无羶羶危石叠四五 嵬欹且刳造物者何意堆在岩东偏冷滑无人迹苔点如花牋我来
登上头下临不测渊目眩手足掉不敢低头看风从石上生薄人而上搏衣服似羽翮开张欲
飞翥 三面峯峯尖刀劒攢悠悠白云过决开露青天西北日落时夕晖红团团千里翠屏
外走下丹砂丸东南月上时夜气清漫漫百丈碧潭?写出黄金盘蓝水色似蓝日夜长潺潺周
迴绕山转下视如青环或铺为慢流或激为奔湍弘澄最深处浮出蛟龙涎侧身入其中悬磴
犹险难扞萝蹋樛木下逐饮涧猿雪迸起白鹭锦跳惊红鱣【音鱣】歇定方盥漱濯去支体
烦浅深皆洞彻可照脑与肝但爱清见?欲寻不知源东崖饶怪石积甃苍琅玕温润发於外其

间韞璊璠卞和死已久良玉多弃捐或时泄光彩夜与星月连中顶最高峯挂天青玉竿

【音罔令】上不得岂我能攀援上有白莲池紫葩覆清澜闻名不可到处所非人寰又有一片石大如方尺瓢插在半壁上其下万仞悬云有过去师坐得无生禅号为定心石长老世所传却上谒仙祠蔓草生绵绵昔闻王氏子羽化升上玄其西晒药台犹对芝术田时复明月夜上闻黄鹤言回寻画龙堂二叟须髮班想见听法时欢喜礼印坛复归泉窟下化作龙蜿【营员切】蜒【夷然切】阶前石孔在欲雨生白烟往有写经僧身净心精专感彼云外鸽羣飞千翩翩来添砚中水去吸岩下泉一日三往复时节长不????【苦坚切】经成号圣僧弟子名扬难诵此莲花偈数满百亿千身坏口不坏舌根如红莲颅骨今不见石函尚存焉粉壁有吴画笔彩依旧鲜素屏有褚书墨色如新乾名境与异迹周览无不殫一游五昼夜欲返仍盘桓我本山人误为时网牵牵率使读书推挽令劬官既登文字科又忝谏诤员倔直不合时无益同素餐以此自慙惕戚戚常寡欢无成心力尽未老形骸残今来脱簪组始觉离忧患及为山水游弥得纵疎顽野麋断羈絆行走无拘挛池鱼放入海一往何时还身着居士衣手把南华篇终来此山住永谢区中缘我今四十余从此终身闲若以七十期犹得三十年

酬张十八访宿见赠

昔我为近臣君常稀到门今我官职冷唯君来往频我受狷介性立为顽拙身平生虽寡合合即无缁磷况君秉高义富贵视如云五侯三相家眼冷不见君问其所与游独言韩舍人其次即及我我愧非其伦胡为谬相爱岁晚逾勤勤落然颓檐下一语夜达晨牀单食味薄亦不嫌我贫日高上马去相顾犹逡巡长安久无雨日赤风昏昏怜君将病眼为我犯埃尘远从延康里来访曲江滨所重君子道不独愧相亲

朝归书寄元八

进入阁前拜退就廊下食归来昭国里人卧马歇鞍却睡至日午起坐心浩然况当好时节雨後清和天柿树绿陰合王家庭院宽瓶中鄠县酒墙上终南山独眠仍独坐开襟当风前禅僧与诗客次第来相看要语连夜语须眠终日眠除非奉朝谒此外无别牵年长身且健官贫心甚安幸无急病痛不至苦饥寒自此聊以适外缘不能干唯为静者信难为动者言台中元待御早晚作郎官未作郎官际无人相伴闲

酬吴七见寄

曲江有病者寻常多掩关又闻马死来不出身更闲闻有送书者自起出门看素缄署丹字中有琼瑶篇口吟耳自听当暑忽翛然似漱寒玉冰如闻商风弦首章叹时节末句思笑言懒慢不相访隔街如隔山尝闻陶潜语心远地自偏君住安邑里左右车徒喧竹药闭深院琴樽开小轩谁知市南地转作壶中天君本上清人名在石堂闲不知有何过谪作人间仙常恐岁月满飘然归紫烟莫忘蜉蝣内进士有同年

昭国闲居

贫闲日高起门巷昼寂寂时暑放朝参天陰少人客槐花满田地仅絶人行迹独在一牀眠清
凉风雨夕勿嫌坊曲远近即多牵役勿嫌禄俸薄厚即多忧责平生尚恬旷老大宜安适何以
养吾真官闲居处僻

喜陈兄至

黄鸟啼欲歇青梅结半成坐怜春物尽起入东园行携觴懒独酌忽闻叩门声闲人犹喜至何
况是陈兄从容尽日语稠叠长年情勿轻一杯酒可以话平生

赠杓直

世路重位禄栖栖者孔宣人情爱年壽夭死者颜渊二人如何人不奈命与天我今信多幸抚
已愧前贤已年四十四又为五品官况兹知足外别有所安焉早年以身代直赴逍遥篇近岁
将心地回向南宗禅外顺世间法内脱区中缘进不厌朝市退不恋人寰自吾得此心投足无
不安体非道引适意无江湖闲有兴或饮酒无事多掩关寂静夜深坐安稳日高眠秋不苦长
夜春不惜流年委形老小外忘怀生死闲昨日共君语与余心膺然此道不可道因君聊强言

寄张十八

饥止一簋饭渴止一壶浆出入止一马寝兴止一牀此外无长物於我有若亡胡然不知足名
利心遑遑念兹弥懒放积习遂为常经旬不出门竟日不下堂同病者张生贫僻住延康慵中
每相忆此意未能忘迢迢青槐街相去八九坊秋来未相见应有新诗章早晚来同宿天气转
清凉

题玉泉寺

湛湛玉泉色悠悠浮云身闲心对定水清淨两无尘手把青筇杖头戴白纶巾兴尽下山去知
我是谁人

朝回游城南

朝退马未困秋初日犹长回轡城南去郊野正清凉水竹夹小径萦回绕川?仰看晚山色俯弄
秋泉光青松系我马白石为我牀常时簪组累此日和身忘旦随鷓鴣末暮游鸥鹤傍机心一
以尽两处不乱行谁辨心与迹非行亦非藏

舟行江州路上作

帆影日渐高闲眠犹未起起问鼓枻人已行三十里船头有行竈炊稻烹红鲤饱食起婆娑?漱
秋江水平生沧浪意一旦来游此何况不失家舟中载妻子

湓浦早冬

浔阳孟冬月草木未全衰
祗祗长安陌凉风八月时
日西湓水曲独行吟旧诗
蓼花始零落蒲叶稍离披
但作城中想何异曲江池

江州雪

新雪满前山初晴好天气
日西骑马出忽有京都意
城柳方缀花檐冰才结穗
须臾风日暖处处皆飘坠
行吟赏未足坐叹销何易
犹胜岭南看纷纷不到地

白氏长庆集卷六

卷七

钦定四库全书

白氏长庆集卷七

唐白居易撰

闲适三【古调诗五言凡五十八首】

题浔阳楼【自此後诗江州司马时作】

常爱陶彭泽文思何高玄又怪韦江州诗情亦清闲今朝登此楼有以知其然大江寒见匡山青倚天深夜湓浦月平旦鑪峯烟清辉与灵气日夕供文篇我无二人才孰为来其间因高偶成句俯仰愧江山

访陶公旧宅【并序】

予夙慕陶渊明为人往岁渭川闲居常有徇陶潜诗十六首今游庐山经柴桑过栗里思其人访其宅不能默默又题此诗云

垢尘不污玉灵凤不啄羶呜呼陶靖节生彼晋宋闲心实有所守口终不能言永惟孤竹子拂衣首阳山夷齐各一身穷饿未为难先生有五男与之同饥寒肠中食不充身上衣不完连徵竟不起斯可谓真贤我生君之後相去五百年每读五柳传目想心拳拳昔常咏遗风着为十六篇今来访故宅森若君在前不慕樽有酒不慕琴无弦慕君遗荣利老死此丘园柴桑古村落栗里旧山川不见篱下菊但余墟中烟子孙虽无闻族氏犹未迁每逢姓陶人使我心依然

北亭

庐宫山下州湓浦沙边宅宅北倚高冈迢迢数千尺上有青青竹竹闲多白石茅亭居上头豁达门四辟前楹卷帘箔北牖施牀席江风万里来吹我凉淅淅日高公府归巾笏随手掷脱衣恣搔首坐卧任所适时倾一盃酒旷望湖天夕口咏独酌谣目送归飞翮慙无出尘操未免折腰役偶获此闲居谬似高人迹

游湓水

四月未全热麦凉江风秋湖山处处好最爱湓水头湓水从东来一派入江流可怜似紫带中

有随风舟命酒一临泛舍鞍扬棹讴放迴岸傍马去逐波闲鸥烟浪始渺渺风襟亦悠悠初疑上河汉中若寻瀛洲汀树绿拂池沙草芳未休青萝与紫葛枝蔓垂相樛繄纚步平岸回头望江州城雉映水见隐隐如蜃楼日入意未尽将归复少留到官行半岁今日方一游此地来何暮可以写吾忧

答故人

故人对酒叹叹我在天涯见我昔荣遇念我今蹉跎问我为司马官意复如何答云且勿叹听我为君歌我本蓬蒿人鄙贱剧泥沙读书未百卷信口嘲风花自从筮仕来禄命三登科顾慙虚劣姿所得亦已多散员足庇身薄俸可资家省分辄自愧岂为不遇耶烦君对杯酒为我一咨嗟

官舍内新凿小池

帘下开小池盈盈水方积中?铺白沙四隅甃青石勿言不深广但足幽人适泛灏微雨朝泓澄明月夕岂无大江外波浪连天白未如牀席闲方丈深盈尺清浅可狎弄昏烦聊漱涤最爱晓暝时一片秋天碧

宿简寂观

岩白云尚屯林红叶初陨秋光引闲步不知身远近夕投灵洞宿卧觉尘机泯名利心既忘市朝梦亦尽暂来尚如此况乃终身隐何以疗夜饥一匙云母粉

读谢灵运诗

吾闻达士道穷通顺冥数通乃朝廷来穷即江湖去谢公才廓落与世不相遇壮志郁不用须有所泄处泄为山水诗逸韵谐奇趣大必笼天海细不遗草树岂惟翫景物亦欲摅心素往往即事中未能忘兴谕因知康乐作不独在章句

北亭独宿

悄悄壁下牀纱笼耿残烛夜半独眠觉疑在僧房宿

约心

黑鬓丝雪侵青袍尘土涴【乌卧切】兀兀复腾腾江城一上佐朝就高斋上薰然负暄卧晚下小池前澹然临水坐已约终身心长如今日过

晚望

江城高角动沙洲夕鸟还独坐高亭上西南望远山

早春

雪消水又释景和风复喧满庭田地湿荠叶生墙根官舍悄无事日西斜掩门不开庄老卷欲与何人言

春寝

何处春暄来微和生血气气薰肌骨畅东窗一昏睡是时正月晦假日无公事烂熯不能休日午将及未缅思少健日甘寝常自恣一从衰疾来枕上无此味

睡起宴坐

後亭昼眠足起坐春景暮新觉眼犹昏无思心正住淡寂归一性虚闲遗万虑了然此时心无物可譬喻本是无有乡亦名不用处行禅与坐忘同归无异路【道书云无何有之乡禅经云不用处二者殊名而同归】

咏怀

尽日松下坐有时池畔行行立与坐卧中怀澹无营不觉流年过亦任白髮生不为世所薄安得遂闲情

春游西林寺

下马西林寺翛然进轻策朝为公府吏暮作灵山客二月匡庐北冰雪始消释阳丛抽茗芽陰窠泄泉脉熙熙风土暖蔼蔼云岚积散作万壑春凝为一气碧身闲易澹泊官散无牵迫缅彼十八人古今同此适【昔远宗雷等十八贤同隐于西林寺】是年淮寇起处处兴兵革智士劳思谋戎臣苦征役独有不才者山中弄泉石

出山吟

朝咏游仙诗暮歌采薇曲卧云坐白石山中十五宿行随出洞水回别缘岩竹早晚重来游心期瑶草绿

岁暮

已任时命去亦从岁月除中心一调伏外累尽空虚名宦意已矣林泉计何如拟近东林寺溪边结一庐

闻早莺

日出眠未起屋头闻早莺忽如上林晓万年枝上鸣忆为近臣时秉笔直承明春深视草暇旦暮闻此声今闻在何处寂寞浔阳城鸟声信如一分别在人情不作天涯意岂殊禁中听

栽杉

劲叶森利剑孤茎挺端标才高四五尺势若干青霄移栽东窗前爱尔寒不凋病夫卧相对日夕闲萧萧昨为山中树今为檐下条虽然遇赏翫无乃近尘嚣犹胜涧谷中埋没随众樵不见郁郁松委质山上苗

过李生

芊芊小蒲叶短南湖春水生子近湖边住静境称高情我为郡司马散拙无所营使君知性野衙退任闲行行携小榼去逢花辄独倾半酣到子舍下马扣柴荆何以引我步绕篱竹万茎何以醒我酒吴音吟一声须臾进野饭饭稻茹芹英白瓯青竹筴俭洁无羶腥欲去复徘徊夕鸦已飞鸣何当从游此待君湖水平

咏意

常闻南华经巧劳智忧愁不如无能者饱食但遨游平生爱慕道今日近此流自来浔阳郡四序忽已周不分物黑白但与时沉浮朝飧夕安寝用是为身谋此外即闲放时寻山水幽春游慧远寺秋上庾公楼或吟诗一章或饮茶一瓯身心一无繫浩浩如虚舟富贵亦有苦苦在心危忧贫贱亦有乐乐在身自由

食笋

此州乃竹乡春笋满山谷山夫折盈抱抱来早市鬻物以多为贱双钱易一束置之炊甑中与饭同时熟紫箨拆故锦素肌擘新玉每食遂加飧经旬不思肉久为京洛客此味常不足且食勿踟蹰南风吹作竹

游石门涧

石门无旧径披榛访遗迹时逢山水秋清辉如古昔常闻慧远辈题诗此岩壁云覆莓苔封苍然无处觅萧疎野生竹崩剥多年石自从东晋後无复人游历独有秋涧声潺湲空旦夕

招东邻

小榼二升酒新簟六尺牀能来夜话否池畔欲秋凉

题元十八溪亭【亭在庐山东南五老峯下】

怪君不喜仕又游烟霞里今日到幽居了然知所以宿君石溪亭潺湲声满耳饮君螺盃酒醉卧不能起见君五老峯益悔居城市爱君三男儿始叹身无子余方鑪峯下结室为居士山北与山东往来从此始

香鑪峯下新置草堂即事咏怀题於石上

香鑪峯北面遗爱寺西偏白石何凿凿清流亦潺潺有松数十株有竹千余竿松张翠伞盖竹倚青琅玕其下无人居悠哉多岁年有时聚猿鸟终日空风烟时有沉冥子姓白字乐天平生无所好见此心依然如获终老地忽乎不知还架岩结茅宇斲壑开茶园何以洗我耳屋头飞落泉何以洗我眼砌下生白莲左手携一壺右手挈五弦傲然意自足箕踞於其闲兴酣仰天歌歌中聊寄言言我本野夫误为世网牵时来昔捧日老去今归山倦鸟得茂树涸鱼反清源舍此欲焉往人闲多险难

草堂前开一池养鱼种荷日有幽趣

淙淙【徂红切】三峡水浩浩万顷陂未如新塘上微风动涟漪小萍加泛泛初蒲正离离红鲤二三寸白莲八九枝遶水欲成径护堤方插篱已被山中客呼作白家池

白云期【黄石岩下作】

三十气太壮胸中多是非六十身太老四体不支持四十至五十正是退闲时年长识命分心慵少营为见酒兴犹在登山力未衰吾年幸当此且与白云期

登香鑪峯

迢迢香鑪峯心存耳目想终年牵物役今日方一往攀萝蹋危石手足劳俯仰同游三四人两人不敢上上到峯之顶目眩心怳怳高低有万寻濶狭无数丈不穷视听界焉识宇宙广江水细如绳湓城小於掌纷吾何屑屑未能脱尘鞅归去思自嗟低头入蚁壤

答崔侍郎钱舍人书问因继以诗

旦暮两蔬食日中一闲眠便是了一日如此已三年心不择时适足不拣地安穷通与远近一贯无两端常见今之人其心或不然在劳则念息处静已思喧如是用身心无乃自伤残坐输烦恼使安得形神全吾有二道友藹藹崔与钱同飞青云路独堕黄泥泉岁暮物万变故情何不迁应为平生心与我同一源帝乡远於日美人高在天谁谓万里别常若在目前泥泉乐者鱼云路游者鸞勿言云泥异同在逍遥闲因君问心地书後偶成篇慎勿说向人人多笑此言

烹葵

昨卧不夕食今起乃朝炊贫厨何所有炊稻烹秋葵红粒香复软绿英滑且肥饥来止於饱饱後复何思忆昔荣遇日迨今穷退时今亦不冻馁昔亦无余资口既不减食身亦不减衣抚心私自问何者是荣衰勿学常人意其闲分是非

小池二首

昼倦前斋热晚爱小池清映林余景没近水微凉生坐把蒲葵扇闲吟三两声

有意不在大湛湛方丈余荷侧泻清露萍开见游鱼每一临此坐忆归青溪居

闭关

我心忘世久世亦不我干遂成一无事因得长掩关掩关来几时髣髴二三年着书已盈帙生子欲能言始悟身易老复悲世多艰回顾趋时者役役尘壤闲岁暮竟何得不如且安闲

弄龟罗

有侄始六岁字之为阿龟有女生三年其名曰罗儿一始学笑语一能诵歌诗朝戏抱我足夜眠枕我衣汝生何其晚我年行已衰物情小可念人意老多慈酒美竟须坏月圆终有亏亦如恩爱缘乃是忧恼资举世同此累吾安能去之

截树

种树当前轩树高柯叶繁惜哉远山色隐此蒙笼闲一朝持斧斤手自截其端万叶落头上千峯来面前忽似决云雾豁达覩青天又如所念人久别一欸颜始有清风至稍见飞鸟还开怀东南望目远心辽然人各有偏好物莫能两全岂不爱柔条不如见青山

望江楼上作

江畔百尺楼楼前千里道凭高望平远亦足舒怀抱驿路使憧憧关防兵草草及兹多事日尤觉闲人好我年过不惑休退诚非早从此拂尘衣归山未为老

题座隅

手不任执殳【尚朱切】肩不能荷锄量力揆所用曾不敌一夫幸因笔砚功得升仕进途历官凡五六禄俸及妻孥左右有兼仆出入有单车自奉虽不厚亦不至饥劬若有人及此傍观为何如虽贤亦为幸况我鄙且愚伯夷古贤人鲁山亦其徒时哉无奈何俱化为饿殍【音夫

元鲁山山居阻水食絕而终】念彼益自愧不敢忘斯须平生荣利心破灭无遗余犹恐尘妄起题此於座隅

昔与微之在朝日因蓄休退之心迨今十年沦落老大追寻前约且结後期

往子为御史伊余忝拾遗皆逢盛明代俱登清近司予繫玉为佩子曳绣为衣从容香烟下同侍白玉墀朝见宠者辱暮见安者危纷纷无退者相顾令人悲宦情君早厌世事我深知常於荣显日已约林泉期况今各流落身病齿髮衰不作卧云计携手欲何之待君女嫁後及我官满时稍无骨肉累粗有渔樵资岁晚青山路白首期同归

垂钓

临水一长啸忽思十年初三登甲乙第一入承明庐浮生多变化外事有盈虚今来伴江叟沙头坐钓鱼

晚燕

百鸟乳雏毕秋燕独蹉跎去社日已近衔泥意如何不悟时节晚徒施工用多人闲事亦尔不独燕营窠

赎鸡

清晨临江望水禽正誼繁鳬鴈与鸥鹭游扬戏朝瞰【音吞】适有鬻鸡者挈之来远村飞鸣彼何乐窘束此何冤喔喔十四雏罩缚同一樊足伤金距蹢头抢花冠翻经宿费饮啄日高诣屠门迟迴未死闲饥渴欲相吞常慕古人道仁信及鱼豚见兹生惻隐赎放双竹园开笼解索时鸡鸡听我言与尔镪三百小惠何足论莫学衔环雀崎岖谩报恩

秋日怀杓直【时杓直出牧澧州】

晚来天色好独出江边步忆与李舍人曲江相近往常云遇清景必约同幽趣若不访我来还须觅君去开眉笑相见把手期何处西寺老胡僧南园乱松树携持小酒榼吟咏新诗句同出复同归从朝直至暮风雨忽消散江山眇回互浔阳与潯阳相望空云雾心期自乖旷时景还如故今日郡斋中秋光谁共度

食後

食罢一觉睡起来两瓯茶举头看日影已复西南斜乐人惜日促忧人厌年除无忧无乐者长短任生涯

齐物二首

青松高百尺绿蕙低数寸同生大块闲长短各有分长者不可退短者不可进若用此理推穷通两无闷椿壽八千春槿花不经宿中闲复何有冉冉孤生竹竹身三年老竹色四时绿虽谢椿有余犹胜槿不足

山下宿

独到山下宿静向月中行何处水边碓夜舂云母声

题旧写真图

我昔三十六写貌在丹青我今四十六衰頽卧江城岂比十年老曾与衆苦并一照旧图画无复昔仪形影默相顾如弟对老兄况使他人见能不昧平生義和鞭日走不为我少停形骸属日月老去何足惊所恨凌烟阁不得画功名

闲居

肺病不饮酒眼昏不读书端然无所作身意闲有余鸡栖篱落晚雪映林木疎幽独已云极何必山中居

对酒示行简

今旦一樽酒欢畅何怡怡此乐从中来他人安得知兄弟唯二人远别恒苦悲今春自巴峡万里平安归复有双幼妹笄年未结褵【邻溪切】昨日嫁娶毕良人皆可依忧念两消释如刀断羈縻身轻心无繫忽欲凌空飞人生苟有累食肉常如饥我心既无苦饮水亦可肥行简劝尔酒停盃听我辞不叹乡国远不嫌官禄微但愿我与尔终老不相离

咏怀

冉牛与颜渊卞和与马迁或罹天六极或被人刑残顾我信为幸百骸且完全五十不为夭吾今欠数年知分心自足委顺身常安故虽穷退日而无戚戚颜昔有荣先生从事於其闲今我不量力举心欲攀援穷通不由已欢戚不由天命即无奈何心可使泰然且务由已者省躬谅非难勿问由天者天高难与言

夜琴

蜀琴木性实楚丝音韵清调慢弹且缓夜深十数声入耳淡无味愜心潜有情自弄还自罢亦不要人听

山中独吟

人各有一癖我癖在章句万缘皆已消此病独未去每逢美风景或对好亲故高声咏一篇恍若与神遇自为江上客半在山中住有时新诗成独上东岩路身倚白石崖手攀青桂树狂吟惊林壑猿鸟皆窥覩恐为世所嗤故就无人处

达理二首

何物壮不老何时穷不通如彼音与律宛转旋为宫我命独何薄多悴而少丰当壮已先衰暂泰还长穷我无奈命何委顺以待终命无奈我何方寸如虚空瞢然与化俱混然与俗同谁能坐此苦齟齬於其中

舒姑化为泉牛哀病作虎或柳生肘闲或男变为女鸟兽及水木本不与民伍胡然生变迁不待死归土百骸是已物尚不能为主况彼时命闲倚伏何足数时来不可遏命去焉能取唯当养浩然吾闻达人语

湖亭晚望残水

湖上秋沆【呼决切】寥湖边晚萧瑟登亭望湖水水缩湖?出清渟得早霜明灭浮残日流注随地势洼【乌瓜切】坳【於交切】无定质泓澄白龙卧宛转青蛇屈破镜折剑头光芒又非一久为山水客见尽幽奇物及来湖亭望此状难谈悉乃知天地闲胜事殊未毕

郭虚舟相访

朝暖就南轩暮寒归後屋晚酌一两盃夜碁三数局寒灰埋暗火晓焰凝残烛不嫌贫冷人时来同一宿白氏长庆集卷七

卷八

<集部,别集类,汉至五代,白氏长庆集>

钦定四库全书

白氏长庆集卷八

唐白居易撰

闲适四【古调诗五言凡五十七首】

长庆二年七月自中书舍人出守杭州路次蓝溪作【自此後诗俱赴杭州时作】

太原一男子自顾庸且鄙老逢不次恩洗拔出泥滓既居可言地愿助朝廷理伏合三上章
戇愚不称旨圣人存大体优贷容不死凤诏停舍人鱼书除刺史冥怀齐宠辱委顺随行止
我自得此心于兹十年矣余杭乃名郡郡郭临江泛【详子切】已想海门山潮声来入耳
昔予贞元末羁旅曾游此甚觉太守尊亦谙鱼酒美因生江海兴每羡沧浪水尚拟拂衣行
况今兼禄仕青山峯峦接白日烟尘起东道既不通改辕遂南指自秦穷楚越浩荡五千里
闻有贤主人而多好山水是行颇为惬所历良可纪策马渡蓝溪胜游从此始

初出城留别

朝从紫禁归暮出青门去勿言城东陌便是江南路扬鞭簇车马挥手辞亲故我生本无乡心
安是归处

过骆山人野居小池【骆生弃官居此二十余年】

茅覆环堵亭泉添方丈沼红芳照水荷白颈观鱼鸟拳石苔苍翠尺波烟杳眇但问有意无
勿论池大小门前车马路奔走无昏晓名利驱人心贤愚同扰扰善哉骆处士安置身心了何乃
独多君丘园居者少

宿清源寺

往谪浔阳去夜憩朝溪曲今为钱塘行重经兹寺宿尔来几何岁溪草二八绿不见旧房僧
苍然新树木虚空走日月世界迁陵谷我生寄其间孰能逃倚伏随缘又南去好住东廊竹

宿蓝溪对月

昨夜凤池头今夜蓝溪口明月本无心行人自回首
新秋松影下半夜钟声後清影不宜昏聊将茶代酒
自秦望赴五松驿马上偶睡睡觉成吟

长途发已久前馆行未至体倦目已昏瞤【克盍切】
然遂成睡右袂尚垂鞭左手暂委辔忽觉问仆夫才行百步
地形神分处所迟速相乖异马上几多时梦中无限事诚哉
达人语百龄同一寐

邓州路中作

萧萧谁家村秋梨叶半拆漠漠谁家园秋韭花初白
路逢故里物使我嗟行役不归渭北村又作江南客
去乡徒自苦济世终无益自问波上萍何如涧中石

朱藤杖紫骢马吟

拄上山之上骑下山之下江州去日朱藤杖忠州归日紫骢马
天生二物济我穷我生合是栖栖者

桐树馆重题

堦前下马时梁上题诗处惨澹病使君萧疎老松树
自嗟还自哂又向杭州去

过紫霞兰若

我爱此山头及此三登历紫霞旧精舍寥落空泉石
朝市日喧隘云林长悄寂犹存住寺僧肯有归山客

感旧纱?【?即故李侍郎所赠】

昔君乌纱?赠我白头翁?今在顶上君已归泉中物故犹堪用
人亡不可逢岐山今夜月坟树正秋风

思竹窗

不忆西省松不忆南宫菊【西省大院有松南宫本厅有菊】
惟忆新昌堂萧萧北窗竹窗闲枕簟在来後何人宿

马上作

处世非不遇荣身颇有余勲为上柱国爵乃朝大夫自问有何才两入承明庐又问有何政再驾朱轮车矧予东山人自性朴且疎弹琴复有酒但慕嵇阮徒闇被乡里荐误上贤能书一列朝士籍遂为世网拘高有罨缴忧下有陷穽虞每觉宇宙窄未尝心体舒蹉跎二十年颌下生白须何言左迁去尚获专城居杭州五千里往若投渊鱼虽未脱簪组且来泛江湖吴中多诗人亦不少酒沽高声咏篇什大笑飞杯盂五十未全老尚可且欢娱用兹送日月君以为何如秋风起江上白日落路隅回首语五马去矣勿踟蹰

秋蝶

秋花紫蒙蒙秋蝶黄茸茸【而中切】花低蝶新小飞戏丛西东日暮凉风来纷纷花落丛夜深白露冷蝶已死丛中朝生夕已死气类各相从不见千年鹤多栖百丈松

登商山最高顶

高高此山顶四望唯烟云下有一条路通达楚与秦或名诱其心或利牵其身乘者与负者来去何纷纭我亦斯人徒未能出嚣尘七年三往复何得笑他人

枯桑

道傍老枯树枯来非一朝皮黄外尚活心黑中先焦有似多忧者非因外火烧

山路偶兴

筋力未全衰仆马不至弱又多山水趣心赏非寂寞扪萝上烟岭蹋石穿云壑谷鸟晚仍啼洞花秋不落提笼复携榼遇胜时停泊泉憩茶数瓯岚行酒一酌独吟还独笑此兴殊未恶假使在城时终年有何乐

山雉

五步一啄草十步一饮水适性遂其生时哉山梁雉梁上无罨缴梁下无鹰鸇雌雄与羣雏皆得终天年嗟嗟笼下鸡及彼池中雁既有稻粱恩必有牺牲患

初下汉江舟中作寄两省给舍

秋水淅红粒朝烟烹白鳞一食饱至夜一卧安达晨晨无朝谒劳夜无直宿勤不知两掖客何似扁舟人尚想到郡日且称守土臣犹须副忧寄恤隐安疲民葢年底报政三年当退身终使沧浪水濯吾纓上尘

自蜀江至洞庭湖口有感而作

江从西南来浩浩无旦夕长波逐若泻连山凿如劈千年不壅溃万姓无垫溺不尔民为鱼大哉禹之绩导岷【弥邻切】既艰远距海无咫尺胡为不訖功湖水斯委积洞庭与青草大小两相敌混合万丈深森【渺同】茫千里白每岁秋夏时浩大吞七泽水族窟穴多农人土地窄我今尚嗟叹禹岂不爱惜邈未究其由想古观遗迹疑此苗人顽恃嶮不终役帝亦无奈何留患与今昔水流天地内如身有血脉滞则为疽疣治之在鍼石安得禹复生为唐水官伯手提倚天剑重来亲指画疏河似剪纸决壅如裂帛渗作膏腴田蹋平鱼鼈宅龙宫变间里水府生禾麦坐添百万户书我司徒籍

初领郡政衙退登东楼作【自此後诗到杭州後作】

鰥惇心所念简牍手自操何言符竹贵未免州县劳赖是余杭郡台榭遶官曹凌晨亲政事向晚恣游遨山冷微有雪波平未生涛水心如镜面千里无纖毫直下江最濶近东楼更高烦襟与滞念一望皆遁逃

清调吟

索索风戒寒沉沉日藏耀劝君饮浊醪听我吟清调芳节变穷陰朝光成夕照与君生此世不合长年少今晨从此游明日安能料若不结跏禪即须开口笑

狂歌词

明月照君席白露沾我衣劝君酒杯满听我狂歌词五十已後衰二十已前痴昼夜又分半其闲几何时生前不欢乐死後有余资焉用黄墟下珠衾玉匣为

郡亭

平旦起视事亭午卧掩关除亲簿领外多在琴书前况有虚白亭坐见海门山潮来一凭槛宾至一开筵终朝对云水有时听管弦持此聊过日非忙亦非闲山林太寂寞朝阙空喧烦唯兹郡合内器静得中闲

咏怀

昔为凤合郎今为二千石自觉不如今人言不如昔昔虽居近密终日多忧惕有诗不敢吟有酒不敢吃今虽在疎远竟岁无牵役饱食坐终朝长歌醉通夕人生百年内疾速如过隙先务身安闲次要心欢适事有得而失物有损而益所以见道人观心不观迹

立春後五日

立春後五日春态分婀娜【乌可切】娜【奴可切】白日斜渐长碧云低欲堕残冰拆玉片新

萼排红颗遇物尽欣欣爱春非独我迎芳後园立就暖前檐坐还有惆怅心欲别红炉火

郡中即事

漫漫潮初平熙熙春日空阔远江山清明好天气外有适意物中无系心事数篇对竹吟一杯望云醉行携杖扶力卧读书取睡久养病形骸深谙闲气味遥思九城陌扰扰趋名利今朝是双日朝谒多轩骑宠者防悔尤权者怀忧畏为报高车盖恐非真富贵

郡斋暇日辱常州陈郎中使君早春晚坐水西馆书事诗十六韵见寄亦以十六韵酬之

新年多暇日晏起褰帘坐睡足心更慵日高头未裹徐倾下药酒稍爇煎茶火谁伴寂寥身无弦琴在左遥思毘陵官春深物婀娜波拂黄柳梢风摇白梅朵衙门排晓戟铃合开朝锁太守水西来朱衣垂素舸【贾我切】良辰不易得佳会无由果五马正相望双鱼忽前堕鱼中获瑰宝持翫何磊砢【郎果切】一百六十言字字灵珠颗【苦果切】上申心欵曲下叙时轍【苦紺切】轲【口我切】才富不如君道孤还似我敢辞官远慢且贵身安妥勿复问荣枯冥心无不可

官舍

高树换新叶陰陰覆地隅何言太守宅有似幽人居太守卧其下闲慵两有余起尝一瓿茗行读一卷书早梅结青实残樱落红珠稚女弄庭果嬉戏【一作?】牵人裾是日晚弥静巢禽下相呼啧啧护儿鹄哑哑母子乌岂唯云鸟尔吾亦引吾雏

吾雏

吾雏字阿罗阿罗才七龄嗟吾不才子怜尔无弟兄抚养虽骄騃性识颇聪明学母画眉样効吾咏诗声我齿今欲堕汝齿昨始生我头髮尽落汝顶髻初成老幼不相待父衰汝孩婴缅想古人心慈爱亦不轻蔡邕念文姬于公叹缙綦敢求得汝力但未忘父情

题小桥前新竹招客

鴈齿小红桥垂檐低白屋桥前何所有苒苒新生竹皮开拆褐锦节露抽青玉筠翠如可餐粉霜不忍触闲吟声未已幽翫心难足管领好风烟轻欺凡草木谁能有月夜伴我林中宿为君倾一杯狂歌竹枝曲

病中逢秋招客夜酌

不见诗酒客卧来半月余合和新药草寻捡旧方书晚霁烟景度早凉牕户虚雪生衰鬢久秋入病心初卧簟蕲竹冷风襟邛葛疎夜来身校健小饮复何如

食饱

食饱拂枕卧睡足起闻吟浅酌一杯酒缓弹数声琴既可畅情性亦足傲光陰谁知名利尽无复长安心严十八郎中在郡日改制东南楼因名清辉未立标榜徵归郎署予既到郡性爱楼居宴游其闲颇有幽致聊成十韵兼戏寄严

严郎制兹楼立名曰清辉未及署花榜遽徵还粉闱去来三四年尘土登者稀今春新太守洒扫施帘帟院柳烟婀娜檐花雪霏微看山倚前户待月阐东扉碧窗戛瑶瑟朱阑飘舞衣烧香卷幕坐风燕双双飞君作不得住我来幸因依始知天地闲灵境有所归

南亭对酒送春

含桃实已落蔷薇花尚薰冉冉三月尽晚莺城上闻独持一杯酒南亭送残春半酣忽长歌歌中何所云云我五十余未是苦老人刺史二千石亦不为贱贫天下三品官多老於我身同年登第者零落无一分亲故半为鬼僮仆多见孙念此聊自解逢酒且欢欣

翫新庭树因咏所怀

霭霭四月初新树叶成陰动摇风景丽盖覆庭院深下有无事人竟日此幽寻岂唯翫时物亦可开烦襟时与道人语或听诗客吟度春足芳色入夜多鸣禽偶得幽闲境遂忘尘俗心始知真隐者不必在山林

仲夏斋戒月

仲夏斋戒月三旬断腥羶自觉心骨爽行起身翩翩始知絶粒人四体更轻便初能脱病患久必成神仙御寇驭冷风赤松游紫烟常疑此说谬今乃知其然我年过半百气衰神不全已垂两鬓丝难补三丹田但减荤血味稍结清淨缘脱巾且修养聊以终天年

除官去未闲

除官去未闲半月恣游讨朝寻霞外寺暮宿波上岛新树少於松平湖半连草跻攀有次第赏翫无昏早有时骑马醉兀兀冥天造穷通与生死其奈吾怀抱江山信为美齿髮行将老在郡诚未厌归乡去亦好

三年为刺史二首

三年为刺史无政在人口唯向郡城中题诗十余首慙非甘棠咏岂有人思否

三年为刺史饮水复食蕡唯向天竺山取得两片石此抵有千金无乃伤清白

别萱桂

使君竟不住萱桂徒栽种桂有留人名萱无忘忧用不如江畔月步步来相送

自余杭归宿淮口作

为郡已多暇犹少勤吏职罢郡更安闲无所劳心力舟行明月下夜泊清淮北岂止吾一身举家同燕息三年请禄俸颇有余衣食乃至僮仆间皆无冻馁色行行弄云水步步近乡国妻子在我前琴书在我侧此外吾不知於焉心自得

舟中李山人访宿

日暮舟悄悄烟生水沉沉何以延宿客夜酒与秋琴来客道门子来自松高岑轩轩举云貌豁豁开清襟得意言语断入玄滋味深默然相顾哂心适而忘心

洛下卜居

三年典郡归所得非金帛天竺石两片华亭鹤一只饮啄供稻粱包裹用茵席诚知是劳费其奈心爱惜远从余杭郭同到洛阳陌下担拂云根开笼展霜翮贞姿不可杂高性宜其适遂就无尘坊仍求有水宅东南得幽境树老寒泉碧池畔多竹阴门前少人迹未请中庶禄且脱双骖易【买履道宅价不足因以两马偿之】岂独为身谋安吾鹤与石

洛中偶作【自此後在东都作】

五年职翰林四年莅浚阳一年巴郡守半年南宫郎二年直纶合三年刺史堂凡此十五载有诗千余章境兴周万象土风备四方独无洛中作能不心悵悵【鲁堂切】今为春官长始来游此乡徘徊伊涧上睥睨嵩少傍遇物辄一咏一咏倾一觞笔下成释憾卷中同补亡往往顾自哂眼昏鬓苍苍不知老将至犹自放诗狂

赠苏少府

籍甚二十年今日方款顔相送嵩洛下论心杯酒间何为懒出入府寮多闭关苍髮彼此老白日寻常闲朝欲携手出暮思联骑还何当挈一榼同宿龙门山

移家入新宅

移家入新宅罢郡有余资既可避燥湿复免忧寒饥疾平未还假官闲得分司幸有俸禄在而无职役羁清旦盥漱毕开轩卷帘帟家人及鸡犬随我亦熙熙取兴不过酒放情或作诗何必苦修道此即是无为外累信已遣中怀时有思有思一何远默坐低双眉十载囚窜客万里征

戍儿春朝鑊笼鸟冬夜支牀龟驿马走四蹄痛酸无歇期磴【鱼贯切磨也】牛封两目昏闭
何人知谁能脱放去四散任所之各得适其性如吾今日时

琴

置琴曲几上慵坐但含情何烦故挥弄风弦自有声

鹤

人各有所好物固无常宜谁谓尔能舞不如闲立时

自咏

夜镜隐白髮朝酒发红颜可怜假年少自笑须臾闲朱砂贱如土不解烧为丹玄鬓化为雪未
闻休得官咄哉个丈夫心性何堕顽但遇诗与酒便忘寝与餐高声发一吟似得诗中仙引满
饮一杯尽忘身外缘昔有醉先生席地而幕天于今居处在许我当中眠眠罢又一酌酌罢又
一篇回面顾妻子生计方落然诚知此事非又过知非年岂不欲自改改即心不安且向安处
去其余皆老闲

林下闲步寄皇甫庶子

扶杖起病初策马力未任既懒出门去亦无客来寻以此遂成闲闲步遶园林天晓烟景淡树
寒鸟雀深一酌池上酒数声竹闲吟寄言东曹长当知幽独心

晏起

鸟鸣庭树上日照屋檐时老去慵转极寒来起犹迟厚薄被适性高低枕得宜神安体稳暖此
味何人知睡足仰头坐兀然无所思如未凿七窍若都遗四肢缅想长安客早朝霜满衣彼此
各自适不知谁是非

池畔二首

结构池西廊疏理池东树此意人不知欲为待月处持刀【古火切】密竹竹少风来多此
意人不会欲令池有波

春葺新居

江州司马日忠州刺史时栽松满後院种柳?前墀彼皆非吾土栽种尚忘疲况兹是我宅葺艺
固其宜平旦领仆使乘春亲指挥移花夹暖室徙竹覆寒池池水变绿色池劳动清辉寻芳弄

水坐尽日心熙熙一物苟可适万缘都若遗设如宅门外有事吾不知

赠言

捧簋献千金彼金何足道临觞赠一言此言真可宝流光我已晚适意君不早况君春风面柔
促如芳草二十方长成三十向衰老镜中桃李色不得十年好胡为坐脉脉不肯倾怀抱

泛春池

白苹湘渚曲绿筱【先了切】剡溪口各在天一涯信美非吾有何如此庭内水竹交左右霜
竹百千竿烟波六七亩泓澄动堦砌淡泞【支吕切】映户牖蛇皮细有纹镜面清无垢主人
过桥来双童扶一叟恐污清冷波尘缨先抖擞波上一叶舟舟中一樽酒酒开舟不系去去随
所偶或遶蒲浦前或泊桃岛後未拨落杯花低冲拂面柳半酣迷所在倚榜兀回首不知此何
处复是人寰否谁知始疏凿几主相传受杨家去云远田氏将非久天与爱水人终焉落吾手
【此池始杨常侍开凿中闲田氏为主予今有之蒲浦桃岛皆池上所有】

白氏长庆集卷八

卷九

钦定四库全书

白氏长庆集卷九

唐白居易撰

感伤一【古调诗五言凡五十五首】

西明寺牡丹花时忆元九

前年题名处今日看花来一作芸香吏三见牡丹开岂独花堪惜方知老闇催何况寻花伴东都去未迴讵知红芳侧春尽思悠哉

伤杨弘贞

顔子昔短命仲尼惜其贤杨生亦好学不幸复徒然【一作今复然】谁识天地意独与龟鹤【一作蛇】年

权摄昭应早秋书事寄元拾遗兼呈李司录

夏闰秋候早七月风骚骚渭川烟景晚骊山宫殿高丹殿子司谏赤县我徒劳相去半日程不得同游邀到官来十日览镜生二毛可怜趋走吏尘土满青袍邮传拥两驿簿书堆六曹为问纲纪掾何必使铅刀

新栽竹

佐邑意不适闭门秋草生何以娱野性种竹百余茎见此溪上色忆得山中情有时公事暇尽日遶栏行勿言根未固勿言陰未成已觉庭宇内稍稍有余清最爱近牕卧秋风枝有声

秋霖中过尹纵之仙游山居

惨惨八月暮连连三日霖邑居尚愁寂况乃在山林林下有志士苦学惜光陰岁晚千万虑并入方寸心岩鸟共旅宿草虫伴愁吟秋天牀席冷雨夜灯火深怜君寂寞意携酒一相寻

寄江南兄弟

分散骨肉恋趋驰名利牵一奔尘埃马一泛风波船忽忆分手时惘然秋风前别来朝复夕积日成七年花落城中池春深江上天登楼东南望鸟灭烟苍然相去复几许道里近三千平地犹难见况乃隔山川

曲江早秋【三年作】

秋波红蓼水夕照青芜?独信马蹄行曲江池四畔早凉晴後至残暑暝来散方喜炎燠清复嗟时节换我年三十六冉冉昏复旦人壽七十稀七十新过半且当对酒笑勿起临风叹

寄题盤屋厅前双松【两松自仙游山移植县厅】

忆昨为吏日折腰多苦辛归家不自适无计慰心神手栽两树松聊以当嘉宾春来日一往生意渐欣欣清韵度秋在绿茸随日新始怜涧?色不忆城中春有时昼掩关双影对一身尽日不寂寞意中如三人忽奉宣室诏徵为文苑臣闲来一惆怅长似别交亲早知烟翠前攀翫不遽巡悔从白云里移尔落嚣尘

翰林院中感秋怀王质夫【王居仙游山】

何处感时节新蝉禁中闻宫槐有秋意风夕花纷纷寄迹鸳鹭行归心鸥鹤羣唯有王居士知予忆白云何日仙游寺潭前秋见君

禁中月

海上明月出禁中清夜长东南楼殿白稍稍上官墙淨落金塘水明浮玉砌霜不比人间见尘土污清光

赠卖松者

一束苍苍色如从涧?来斲掘经几日枝叶满尘埃不买非他意城中无地栽

初见白髮

白髮生一茎朝来明镜里勿言一茎少满头从此始青山方远别黄绶初从仕未料容鬓间蹉跎忽如此

别元九後咏所怀

零落桐叶雨萧条槿花风悠悠早秋意生此幽闲中况与故人别中怀正无惊【徂红切乐也】勿云不相送心到青门东相知岂在多但问同不同同心一人去坐觉长安空

禁中秋宿

风翻朱里幕雨冷通中枕耿耿背斜灯秋牀一人寝

早秋曲江感怀

离离暑云散嫋嫋凉风起池上秋又来荷花半成子朱顏易消歇白日无穷已人壽不如山年
光急於水青芜与红蓼岁岁秋相似去岁此悲秋今我复来此

寄元九

身为近密拘心为名检缚月夜与花时少逢杯酒乐唯有元夫子闲来同一酌把手或酣歌展
眉时笑谑今春除御史前月之东洛别来未开顏尘埃满樽杓蕙风晚香尽槐雨余花落秋意
一萧条离容两寂寞况随白日老共负青山约谁识相念心羈鷹与笼鹤

春暮寄元九

梨花结成实燕卵化为雏时物又若此道情复何如但觉日月促不嗟年岁徂浮生都是梦老
小亦何殊唯与故人别江陵初谪居时时一相见此意未全除

早梳头

夜沐早梳头牕明秋镜晓飒然握中髮一沐知一少年事渐蹉跎世缘方缴绕不学空门法老
病何由了未得无生心白头亦为夭

出关路

山川函谷路尘土游子顏萧条去国意秋风生故关

别舍弟後月夜

悄悄初别夜去住两盘桓行子孤灯店居人明月轩平生共贫苦未必日成欢及此暂为别怀
抱已忧烦况是庭叶尽复思山路寒如何为不念马瘦衣裳单

新丰路逢故人

尘土长路晚风烟废宫秋相逢立马语尽日此桥头知君不得意郁郁来西游惆怅新丰店何
人识马周

金銓子晬日【晬将遂切子生一岁曰晬】

行年欲四十有女曰金銓生来始周岁学坐未能言慙非达者怀未免俗情怜从此累身外徒云慰目前若无夭折患则有?嫁牵使我归山计应迟十五年

青龙寺早夏

尘埃经小雨地高倚长坡日西寺门外景气含清和闲有老僧立静无凡客过残鷲意思尽新叶陰凉多春去来几日夏云忽蹉跎朝朝感时节年鬓闇蹉跎胡为恋朝市不去归烟萝青山寸步地自问心如何

秋题牡丹丛

晚丛白露夕衰叶凉风朝红艳久已歇碧芳今亦销幽人坐相对心事共萧条

劝酒寄元九

薤叶有朝露槿枝无宿花君今亦如此促促生有涯既不逐禅僧林下学楞伽又不随道士山中炼丹砂百年夜分半一岁春无多何不饮美酒胡然自悲嗟俗号消愁药神速无以加一杯驱世虑两杯反天和三杯即酩酊或笑任狂歌陶陶复兀兀吾孰知其他况在名利途平生有风波深心藏?弄巧言织网罗举目非不见不醉欲如何

曲江感秋【五年作】

沙草新雨地岸柳凉风枝三年感秋意并在曲江池早蝉已嘹【连条切】唳【力至切】晚荷复离披前秋去秋思一一生此时昔人三十二秋兴已云悲我今欲四十秋怀亦可知岁月不虚设此身随日衰闇老不自觉直到鬓成丝

酬张太祝晚秋卧病见寄

高才淹礼寺短羽翔禁林西街居处远北阙官曹深君病不来访我忙难往寻差池终日别寥落经年心露湿绿芜地月寒红树陰况兹独愁夕闻彼相思吟上言欢笑阻下嗟时岁侵容衰晚臆镜思苦秋弦琴一章锦绣段八韵琼瑶音何以报珍重慙无双南金

立秋日曲江忆元九

下马柳陰下独上堤上行故人千万里新蝉三两声城中曲江水江上江陵城两地新秋思应同此日情

早朝贺雪寄陈山人

长安盈尺雪早朝贺君喜将赴银台门始出新昌里上堤马蹄滑中路蜡烛死十里向北行寒风吹破耳待漏午门外候对三殿里须鬓冻生冰衣裳冷如水忽思仙游谷闇谢陈居士暖覆褐裘眠日高应未起

初与元九别後忽梦见之及寤而书适至兼寄桐花诗怅然感怀因以此寄【元九初谪江陵】

永壽寺中语新昌坊北分归来数行泪悲事不悲君悠悠蓝田路自去无消息计君食宿程已过商山北昨夜云四散千里同月色晓来梦见君应是君相忆梦中握君手问君意何如君言苦相忆无人可寄书觉来未及说叩门声冬冬言是商州使送君书一封枕上忽惊起颠倒着衣裳开缄见手札一纸十三行上论迁谪心下说离别肠心肠都未尽不暇叙炎凉云作此书夜夜宿商州东独对孤灯坐阳城山馆中夜深作书毕山月向西斜月前何所有一树紫桐花桐花半落时复道正相思殷勤书背後兼寄桐花诗桐花诗八韵思绪一何深以我今朝意忆君此夜心一章一遍读一句十回吟珍重八十字字字化为金

和元九悼往【感旧蚊?作】

美人别君去自去无处寻旧物零落尽此情安可任唯有襌【胡结切】纱幌尘埃日夜侵馨香与颜色不似旧时深透影灯耿耿笼光月沉沉中有孤眠客秋凉生夜衾旧宅牡丹院新坟松柏林梦中咸阳泪觉後江陵心含此隔年恨发为中夜吟无论君自感闻者欲沾巾

重到渭上旧居

旧居清渭曲开门当蔡渡十年方一还几欲迷归路追思昔日行感伤故游处插柳作高林种桃成老树因惊成人者尽是旧童孺试问旧老人半为遶村墓浮生同过客前後递来去白日如弄珠出入光不住人物日改变举目悲所遇回念念我身安得不衰暮朱顏销不歇白髮生无数唯有山门外三峰色如故

白髮

白髮知时节闇与我有期今朝日阳里梳落数茎丝家人不惯见悯默为我悲我云何足怪此意尔不知凡人年三十外壮中已衰但思寝食味已减二十时况我年四十本来形貌羸书魔昏两眼酒病沉四肢亲爱日零落在者仍别离身心久如此白髮生已迟由来生老死三病长相随除却念无生人间无药治

秋日

池残寥落水牕下悠扬日嫋嫋秋风多槐花半成实下有独立人年来四十一

将之饶州江浦夜泊

明月满深浦愁人独卧舟烦冤寢不得夏夜长於秋苦乏衣食资远为江海游光陰坐迟暮乡国行阻修身病向鄱阳家贫寄徐州前事与後事岂堪心并忧忧来起长望但见江水流云树靄苍苍烟波淡悠悠故园迷处所一望堪白头

思归【时初为校书郎】

养无晨昏膳隐无伏牕资遂求及亲禄僂俛来京师薄俸未及亲别家已经时冬积温席恋春违采兰期夏至一陰生稍稍夕漏迟块然抱愁者长夜独先知悠悠乡关路梦去身不随坐惜时节变蝉鸣槐花枝

冀城北原作

野色何莽苍【去声】秋声亦萧疎风吹黄埃起落日驱征车何代此开国封疆百里余古今不相待朝市无常居昔人城邑中今变为丘墟昔人墓田中今化为里闾废兴相催迫日月互居诸世变无遗风焉能知其初行人千载後怀古空踟蹰

客路感秋寄明准上人

日暮天地冷雨霁山河清长风从西来草木凝秋声已感岁倏忽复伤物凋零孰能不憯凄天时牵人情借问空门子何法易修行使我忘得心不教烦恼生

游襄阳怀孟浩然

楚山碧岩岩汉水碧汤汤秀气结成象孟氏之文章今我讽遗文思人至其乡清风无人继日暮空襄阳南望鹿门山藹若有余芳旧隐不知处云深树苍苍

秋暮西归途中书情

耿耿旅灯下愁多常少眠思乡贵早发发在鷄鸣前九月草木落平芜连远山秋陰和曙色万木苍苍然去秋偶东游今秋始西旋马瘦衣裳破别家来二年忆归复愁归归无一囊钱心虽非兰膏安得不自然

秋怀

月出照北堂光华满堦墀凉风从西至草木日夜衰桐柳减绿陰?兰消碧滋感物私自念我心

亦如之安得长少壮盛衰迫天时人生如石火为乐长苦迟

别杨颖士卢克柔殷尧藩

倦鸟暮归林浮云晴归山独有行路子悠悠不知还人生苦营营终日羣动闲所务虽不同同
归於不闲扁舟来楚乡足马往秦关离忧绕心曲宛转如循环且持一杯酒聊以开愁颜

题赠定光上人

二十身出家四十心离尘得径入大道乘此不退轮一坐十五年林下秋复春春花与秋气不
感无情人我来如有悟潜以心照身误落闻见中忧喜伤形神安得遗耳目冥然反天真

只役骆口驿喜萧侍御书至兼覩新诗吟讽通宵因寄八韵【时为盩厔尉】

日暮心无憀【连条切】吏役正营营忽惊芳信至复与新诗并是时天无云山馆有月明月
下读数遍风前吟一声一吟三四叹声尽有余清雅哉君子文咏性不咏情使我灵府中鄙悵
不得生始知听韶濩可使心和平

酬李少府曹长官舍见赠

低腰复敛手心体不遑安一落风尘下始知为吏难公事与日长宦情随岁阑惆怅青袍袖芸
香无半残赖有李夫子此怀聊自宽两心如止水彼此无波澜往往簿书暇相劝强为欢白马
晚蹋雪绿觞春煖寒恋月夜同宿爱山晴共看野性自相近不是为同官

留别

秋凉卷朝簟春煖撤夜衾虽是无情物欲别尚沉吟况与有情别别随情浅深二年欢笑意一
旦东西心独留诚可念同行力不任前事讵能料後期凉难寻唯有潺湲泪不惜共沾衿

晓别

晓鼓声已半离筵坐难久请君断肠歌送我和泪酒月落欲明前马嘶初别後浩浩闇尘中何
由见回首

北园

北园东风起杂花次第开心知须臾落一日三四来花下岂无酒欲酌复迟迴所思眇千里谁
劝我一杯惜栳李花【花细而繁色艷而黯亦花中之有思者速衰易落故惜之耳】

树小花鲜妍香繁条软弱高低二三尺重叠千万萼朝艳霏霏夕凋纷漠漠辞枝朱粉细覆地红绡薄由来好颜色常苦易销铄不见蓂【鲁堂切】荡花狂风吹不落

照镜

皎皎青铜镜班班白丝鬓岂复更藏年实年君不信

新秋

西风飘一叶庭前飒已凉风池明月水衰莲白露房其奈江南夜緜緜自此长

夜雨

早蛩啼复歇残灯灭又明隔窗知夜雨芭蕉先有声

秋江送客

秋鸿次第过哀猿朝夕闻是日孤舟客此地亦离羣蒙蒙润衣雨漠漠冒帆云不醉浔阳酒烟波愁杀人感逝寄远【寄通州严侍御果州崔员外沔州李舍人凤州李郎中】

昨日闻甲死今朝闻乙死知识三分中二分化为鬼逝者不复见悲哉长已矣存者今如何去我皆万里平生知心者屈指能有几通果沔凤州眇然四君子相思俱老大浮世如流水应叹旧交游凋零日如此何当一杯酒开眼笑相视

秋月

夜初色苍然夜深光浩然稍转西廊下渐满南牕前况是绿芜地复兹清露天落叶声策策惊鸟影翩翩栖禽尚不稳愁人安可眠

白氏长庆集卷九

卷十

钦定四库全书

白氏长庆集卷十

唐白居易撰

感伤二【古调诗五言凡七十八首】

朱陈村

徐州古丰县有村曰朱陈去县百余里桑麻青氛氲机梭声札札牛驴走纭纭女汲涧中水男采山上薪县远官事少山深人俗淳有财不行商有丁不入军家家守村业头白不出门生为陈村民死为陈村尘田中老与幼相见何欣欣一村唯两姓世世为婚姻【其村唯朱陈二姓而已】亲疎居有族少长游有羣黄鸡与白酒欢会不隔旬生者不远别嫁娶先近邻死者不远葬坟墓多遶村既安生与死不苦形与神所以多壽考往往见玄孙我生礼义乡多少小孤且贫徒学辨是非祇自取辛勤世法贵名教士人重冠婚以此自桎梏信为大谬人十岁解读书十五能属文二十举秀才三十为谏臣下有妻子累上有君亲恩承家与事国望此不肖身忆昨旅游初迨今十五春孤舟三适楚羸马四经秦昼行有饥色夜寝无安?东西不暂住来往若浮云离乱失故乡骨肉多散分江南与江北各有平生亲平生终日别近者隔年闻朝忧卧至暮夕哭坐达晨悲苦烧心曲愁霜侵髻根一生苦如此长羡陈村民

读邓鲂诗

尘架多文集偶取一卷披未及看姓名疑是陶潜诗看名知是君惻惻令我悲诗人多蹇厄近日诚有之京兆杜子美犹得一拾遗襄阳孟浩然亦闻髯成丝嗟君两不如三十在布衣擢第禄不及新婚妻未归少年无疾患湫【苦盍切】死於路岐天不与爵壽唯与好文词此理勿复道巧历不能推

寄元九

晨鸡才发声夕雀俄敛翼昼夜往来疾如出入息非徒改年貌渐觉无心力自念因念君俱为老所逼君年虽校少顛顚谪南国三年不放归炎瘴消颜色山无杀草霜水有含沙蜮健否远不知书多隔年得愿君少愁苦我亦加飡食各保金石躯以慰长相忆

秋夕

叶声落如雨月色白似霜夜深方独卧谁为拂尘牀

夜雨

我有所念人隔在远远乡我有所感事结在深深肠乡远去不得无日不瞻望肠深解不得无夕不思量况此残灯夜独宿在空堂秋天殊未晓风雨正苍苍不学头陀法前心安可忘

秋霁

金木不相待炎凉雨中变林晴有残蝉巢冷无留燕沉吟卷长簟怆恻收团扇向夕稍无泥闲步青苔院月出砧动家家捣秋练独对多病妻不能理针线冬衣殊未制夏服行将绽何以迎早秋一盃聊自劝

叹老三首

晨兴照青镜形影两寂寞少年辞我去白髮随梳落万化成於渐渐衰看不觉但恐镜中顔今朝老於昨人年少满百不得长欢乐谁谓天地心千龄与龟鹤吾闻善医者今古称扁鹊万病皆可治唯无治老药

我有一握髮梳理何稠直昔似玄云光今如素丝色匣中有旧镜欲照先叹息自从头白来不欲明磨拭鶚头与鹤颈至老常如墨独有人髻毛不得终身黑

前年种桃核今岁成花树去岁新婴儿今年已学步但惊物长成不觉身衰暮去矣欲何如少年留不住因书今日意徧寄诸亲故壮岁不欢娱长年当悔悟

送兄弟回雪夜

日晦云气黄东北风切切时从村南还新与兄弟别离襟泪犹湿迴马嘶未歇欲归一室坐天陰多无月夜长火消尽岁暮雨凝结寂寞满炉灰飘零上堦雪对雪画寒灰残灯明复灭灰死如我心雪白如我髮所遇皆如此顷刻堪愁絶迴念入坐忘转忧作禅悦平生洗心法正为今宵设

溪中早春

南山雪未尽陰岭留残白西涧冰已消春溜含新碧东风来几日蛰动萌草拆潜知阳和功一日不虚掷爱此天气煖来拂溪边石一坐欲忘归暮禽声啧啧蓬蒿隔桑枣隐映烟火夕归来问夜飡家人烹荠麦

同友人寻涧花

闻有涧?花赏得村中酒与君来校迟已逢摇落後临觴有遗恨怅望空溪口记取花发时期君重携手我生日日老春色年年有且作来岁期未知身健否

登村东古塚

高低古时塚上有牛羊道独立最高头悠哉此怀抱回头向村望但见荒田草村人不爱花多种栗与枣自来此村住不觉风光好花少莺亦稀年年春闇老

梦裴相公

五年生死隔一夕?梦通梦中如往日同直金銮宫髣髴金紫色分明冰玉容勤勤相眷意亦与平生同既寤知是梦惘然情未终追想当时事何殊昨夜中自我学心法万缘成一空今朝为君子流泪一沾膺

昼寝

坐整白单衣起穿黄草屨朝飡盥漱毕徐下堦前步暑风微变候昼刻渐加数院静地陰陰鸟鸣新叶树独行还独卧夏景殊未暮不作午时眠日长安可度

别行简【时行简辟卢坦剑南东川府】

漠漠病眼花星星愁髯雪筋骸已衰惫形影仍分诀梓州二千里剑门五六月岂是远行时火云烧栈热何言巾上泪乃是肠中血念此早归来莫作经年别

观儿戏

韶【田聊切】龀【初谨切】七八岁绮紈三四儿弄尘复鬪草尽日乐嬉嬉堂上长年客髯闲新有丝一看竹马戏每忆童騃时童騃饶戏乐老大多忧悲静念彼与此不知谁是痴

叹常生

西村常氏子卧疾不须臾前旬犹访我今日忽云徂时我病多暇与之同野居园林青藹藹相去数里余村邻无好客所遇唯农夫之子如何者往还犹胜无于今亦已矣可为一长吁

寄元九

一病经四年亲朋书信断穷通各易交自笑知何晚元君在荆楚去日唯云远彼独倡何人心如石不转忧我贫病身书来唯劝勉上言少愁苦下道加飡饭怜君为谪吏穷薄家贫徧三寄衣食资数盈二十万岂是贪衣食感君心纒纒念我口中食分君身上暖不因身病久不因命

多蹇平生亲友心岂得知深浅

以镜赠别

人言似明月我道胜明月明月非不明一年十二缺岂如玉匣里如水常清彻月破天闥时圆明独不歇我慙貌丑老绕鬓班班雪不如赠少年回照青丝髮因君千里去持此将为别

城上对月期友人不至

古人惜昼短劝令秉烛游况此迢迢夜明月满西楼复有樽中酒置在城上头期君君不至人月两悠悠照水烟波白照人肌髮秋清光正如此不醉即须愁

念金銮子二首

衰病四十身娇痴三岁女非男犹胜无慰情时一抚一朝舍我去?影无处所况念天札时呕哑初学语始知骨肉爱乃是忧悲聚唯思未有前以理遣伤苦忘怀日已久三度移寒暑今日一伤心因逢旧乳母

与尔为父子八十有六旬忽然又不见还来三四春形质本非实气聚偶成身恩爱元是妄缘合暂为亲念兹庶有悟聊用遣悲辛暂将理自夺不是忘情人

对酒

人生一百岁通计三万日何况百岁人人间百无一贤愚共零落贵贱同埋没东岱前後?北邙新旧骨复闻药误者为爱长生术又有忧死者为贪政事笔药误不得老忧死非因疾谁言人最灵知得不知失何如会亲友饮此杯中物能沃烦虑消能陶真性出所以刘阮辈终年醉兀兀

渭村雨归

渭水寒渐落离离蒲稗【薄卖切】苗闲傍沙边立看人刈芻苕近水风景冷晴明犹寂寥复兹夕陰起野思重萧条萧条独归路暮雨湿村桥

谕怀

黑头日已白白面日已黑人生未死闲变化何终极常言在已者莫若形与色一朝改变来止遏不能得况彼身外事悠悠通与塞

喜友至留宿

村中少宾客柴门多不开忽闻车马至云是故人来况值风雨夕愁心正悠哉愿君且同宿尽此手中杯人生开口笑百年都几回

西原晚望

花菊引闲行行上西原路原上晚无人因高聊四顾南阡有烟火北陌连墟墓村邻何萧条近者犹百步吾庐在其下寂寞风日暮门外转枯蓬篱根伏寒兔故园汴水下离乱不堪去近岁始移家飘然此村住新屋五六闲古槐八九树便是衰病身此生终老处

感镜

美人与我别留镜在匣中自从花颜去秋水无芙蓉经年不开匣红尘覆青铜今朝一拂拭自顾顛顛容照罢重惆怅背後双盘龙

村居卧病三首

戚戚抱羸病悠悠度朝暮夏木才结陰秋兰已含露前日巢中卵化为雏飞去昨日穴中虫蜕【输芮切】为蝉上树四时未尝歇一物不暂住唯有病客心沉然独如故新秋久病客起步村南道尽日不逢人虫声徧荒草西风吹白露野绿秋仍早草木犹未伤先伤我怀抱朱颜与玄鬓强健几时好况为忧病侵不得依年老

种黍三十亩雨来苗渐大种薤二十畦秋来欲堪刈望黍作冬酒留薤为春菜荒村百物无待此养衰瘵葺庐备陰雨补褐防寒岁病身知几时且作明年计

沐浴

经年不沐浴尘垢满肌肤今朝一澡濯衰瘦颇有余老色头鬓白病形肢体虚衣寬有?带髮少不胜梳自问今年几春秋四十初四十已如此七十复何如

栽松二首

小松未盈尺心爱手自移苍然澗?色云湿烟霏霏栽植我年晚长成君性迟如何过四十种此数寸枝得见成陰否人生七十稀

爱君抱晚节怜君含直文欲得朝朝见堦前故种君知君死则已不死会凌云

病中友人相访

卧久不记日南窗昏复昏萧条草檐下寒雀朝夕闻强扶床前杖起向庭中行偶逢故人至便

当一逢迎移榻就斜日披裘倚前楹闲谈胜服药稍觉有心情

自觉二首

四十未为老忧伤早衰恶前岁二毛生今年一齿落形骸日损耗心事同萧索夜寝与朝飧其间味亦薄同岁崔舍人容光方灼灼始知年与貌衰盛随忧乐畏老老转逼忧病病弥缚不畏复不忧是除老病药

朝哭心所爱暮哭心所亲亲爱零落尽安用身独存几许平生欢无限骨肉恩结为肠闲痛聚作鼻头辛悲来四肢缓泣尽双眸昏所以年四十心如七十人我闻浮图教中有解脱门置心为止水视身如浮云抖擞垢秽衣度脱生死轮胡为恋此苦不去犹逡巡回念发弘愿愿此见在身但受过去报不结将来因誓以智慧水永洗烦恼尘不将恩爱子更种悲忧根

夜雨有念

以道治心气终岁得晏然何乃戚戚意忽来风雨天既非慕荣显又不恤饥寒胡为悄不乐抱膝残灯前形影闇相问心默对以言骨肉能几人各在天一端吾兄寄宿州吾弟客东川南北五千里吾身在中间欲去病未能欲住心不安有如波上舟此缚而彼牵自我向道来于今六七年链成不二性消尽万千缘唯有恩爱火往往犹熬煎岂是药无効病多难尽蠲

寄杨六【杨摄万年县尉予为赞善大夫】

青宫官冷静赤县事繁剧一闲复一忙动作经时隔清觞久未酌白日顿虚掷念此忽踟蹰悄然心不适岂无旧交结久别或迁易亦有新往还相见多形迹唯君於我分坚久如金石何况老大来人情重婚戚会稀岁月急此事真可惜几回开口笑便到髭须白公门苦鞅掌尽日无闲隙犹冀乘暝来静言同一夕

送春

三月三十日春归日复暮惆怅问春风明朝应不住送春曲江上眷眷东西顾但见扑水花纷纷不知数人生似行客两足无停步日日进前程前程几多路兵刀与水火尽可违之去唯有老到来人间无避处感时良为已独倚池南树今日送春心心如别亲故

哭李三

去年渭水曲秋时访我来今年常乐里春日哭君回哭君仰问天天意安在哉若必夺其壽何如不与才落然身後事妻病女婴孩

别李十一後重寄【自此後诗在江州路上作】

秋日正萧条驱车出蓬荜回望青门道目极心郁郁岂独恋乡土非关慕簪绂所怆别李君平生同道术俱承金马诏联秉谏臣笔共上青云梯中途一相失江湖我方往朝廷君不出?带与华簪相逢是何日

初出蓝田路作

停骖问前路路在秋云里苍苍县南道去途从此始絶顶忽盘上衆山皆下视下视千万峯峯头如浪起朝经韩公坂夕次蓝桥水浔阳仅四千始行七十里人烦马蹄踣劳苦已如此

仙娥峯下作

我为东南行始登商山道商山无数峯最爱仙娥好参差树若挿匝【遏合切】匝云如抱渴望寒玉泉香闻紫芝草青崖屏削碧白石床铺缟向无如此物安足留四皓感彼私自问归山何不早可能尘土中还随衆人老

微雨夜行

漠漠秋云起悄悄夜寒生但觉衣裳湿无点亦无声

再到襄阳访问旧居

昔到襄阳日髭髯初有髭今过襄阳日髭鬢半成丝旧游都是梦乍到忽如归东郭蓬蒿宅荒凉今属谁故知多零落间井亦迁移独有秋江水烟波似旧时

寄微之三首

江州望通州天涯与地末有山万丈高有江千里濶间之以云雾飞鸟不可越谁知千古险为我二人设通州君初到郁郁愁如结江州我方去迢迢行未歇道路日乖隔音信日断絶因风欲寄语地远声不彻生当复相逢死当从此别

君游襄阳日我在长安住君今在通州我过襄阳去襄阳九里郭楼雉连云树顾此稍依依是君旧游处苍茫蒹葭水中有浔阳路此去更相思江西少亲故

去国日已远喜逢物似人如何含此意江上坐思君有如河岳气相合方氛氲狂风吹中絶两处成孤云风迴终有时云合岂无因努力各自爱穷通我尔身【喜逢一作稀逢】

舟中雨夜

江云闇悠悠江风冷修修夜雨滴舫背风浪打船头船中有病客左降向江州

夜闻歌者【宿鄂州】

夜泊鹦鹉洲秋江月澄彻邻船有歌者发调堪愁絶歌罢继以泣 泣声通复咽寻声见其人有
妇顔如雪独倚帆檣立娉婷十七八夜泪如真珠双双堕明月借问谁家妇歌泣何凄切一问
一沾襟?眉终不说

江楼闻砧【江州作】

江人授衣晚十月始闻砧一夕高楼月万里故园心

宿东林寺

经窗灯焰短僧炉火气深索落庐山夜风雪宿东林

忆洛下故园【时淮汝寇戎未灭】

浔阳迁谪地洛阳离乱年烟尘三川上炎瘴九江边乡心坐如此秋风仍飒然

赠别崔五

朝送南去客暮迎北来宾孰云当大路少遇心所亲劳者念息肩热者思濯身何如独愁日忽
见平生人平生已不浅是日重殷勤问从何处来及此江亭春江天春多陰夜月隔重云移樽
树闲饮灯照花纷纷一会不易得余事何足云明旦又分手今夕且欢忻

春晚寄微之

三月江水阔悠悠桃花波年芳与心事此地两蹉跎南国方谴谪中原正兵戈眼前故人少头
上白髮多通州更迢递春尽复如何

渐老

今朝复明日不觉年齿暮白髮逐梳落朱顔辞镜去当春颇愁寂对酒寡欢趣遇境多怆辛逢
人益敦故形质属天地推迁从不住所怪少年心销磨落何处

送幼史

淮右寇未散江西岁再徂故里干戈地行人风雪途此时与尔别江畔立踟蹰

夜雪

已讶衾枕冷复见窗户明夜深知雪重时闻折竹声

寄行简

郁郁眉多敛默默口寡言岂是愿如此举目谁与欢去春尔西征从事巴蜀间今春我南谪抱疾江海壖【而缘切】相去六千里地絶天邈然十书九不达何以开忧颜渴人多梦饮饥人多梦飡春来梦何处合眼到东川

首夏

孟夏百物滋动植一时好麋鹿乐深林虫蛇喜丰草翔禽爱密叶游鳞悦新藻天和遗漏处而我独枯槁一身在天末骨肉皆远道旧国无来人寇戎尘浩浩沉忧竟何益只自劳怀抱不如放身心冥然任天造浔阳多美酒可使杯不燥湔鱼贱如泥烹炙无昏早朝饭山下寺暮醉湖中岛何必归故乡兹焉可终老

孟夏思渭村旧居寄舍弟

啧啧雀引雏稍稍笋成竹时物感人情思我故乡曲故园渭水上十载事樵牧手种榆柳成陰陰覆墙屋兔隐豆苗肥鸟鸣桑椹熟前年当此时与尔同游瞩诗书课弟侄农圃资童仆日暮麦登场天晴蚕拆簇弄泉南涧坐待月东亭宿兴发饮数杯闷来棋一局一朝忽分散万里仍羁束井鲋思反泉笼莺悔出谷九江地卑湿四月天炎燠苦雨初入梅瘴云稍含毒泥秧水畦稻灰种畚田粟已讶殊岁时人嗟异风俗闲登郡楼望日落江山绿归雁拂乡心平湖断人目殊方我漂泊旧里君幽独何时同一瓢饮水心亦足

早蝉

六月初七日江头蝉始鸣石楠深叶里薄暮两三声一催衰鬓色再动故园情西风殊未起秋思先秋生忆昔在东掖宫槐花下听今朝无限思云树遶湓城

感情

中庭晒服翫忽见故乡履昔赠我者谁东隣婣娟子因思赠时语时用结终始永愿如履綦双行复双止自吾谪江郡漂荡三千里为感长情人提携同到此今朝一惆怅反覆看未已人只履犹双何曾得相侣可嗟复可惜锦表绣为里况经梅雨来色黯花草死

南湖晚秋

八月白露降湖中水方老旦夕秋风多衰荷半倾倒手攀青枫树足蹋黄芦草惨淡老容颜零落秋怀抱有兄在淮楚有弟在蜀道万里何时来烟波白浩浩

郡厅有树晚荣早凋人不识名因题其上

浔阳郡厅後有树不知名秋先梧桐落春後桃李荣五月始萌动八月已凋零左右皆松桂四时郁青青岂量雨露恩沾濡不均平荣枯各有分天地本无情而我亦相类早衰向晚成形骸少多病三十不丰盈毛髯早改变四十白髭生谁教两萧索相对此江城

感秋怀微之

叶下湖有波秋风此时至谁知濩落心先纳萧条气推移感时岁漂泊思同志昔为烟霞侣今作泥涂吏白鸥毛羽弱青凤文章异各闭一笼中岁晚同顛顛

因沐感髮寄朗上人二首

年长身转慵百事无所欲乃至头上髮经年方一沐沐稀髮苦落一沐仍半秃短髮经霜蓬老面辞春木强年过犹近衰相来何速应是烦恼多心焦血不足

渐少不满把渐短不盈尺况兹短少中日夜落复白既无神仙术何除老死籍只有解脱门能度衰苦厄掩镜望东寺降心谢禅客衰白何足言剃落犹不惜

早蝉

月出先照山风生先动水亦如早蝉声先入闲人耳一闻愁意结再听乡心起渭上新蝉声先听浑相似衡门有谁听日暮槐花里

苦热喜凉

经时苦炎热心体但烦倦白日一何长清秋不可见岁功成者去天数极则变潜知寒燠闲迁次如乘传火云忽朝敛金风俄夕扇簟枕遂清凉筋骸稍康健因思望月侣好卜迎秋宴竟夜无客来引杯还自劝

早秋晚望兼呈韦侍郎

九???绕孤城城高生远思人烟半在船野水多於地穿霞日脚直驱雁风头利去国来几时江上秋三至夫君亦沦落此地同漂寄惘然向隅心摧颓触笼翅且谋眼前计莫问胷中事浔阳酒甚浓相劝时时醉

司马宅

雨径绿芜合霜园红叶多萧条司马宅门巷无人过唯对大江水秋风朝夕波

司马厅独宿

荒凉满庭草偃亚侵檐竹府吏下厅帘家僮开被幙数声城上漏一点窗前烛官曹冷似冰谁
屑来同宿

梦与李七庾三十三同访元九

夜梦归长安见我故亲友损之在我左顺之在我右云是二月天春风出携手同过靖安里下
马寻元九元九正独坐见我笑开口还指西院花仍开北亭酒如言各有故侣惜欢难久神合
俄顷闲神离欠伸後觉来疑在侧求索无所有残灯影闪墙斜月光穿牖天明西北望万里君
知否老去无见期踟蹰搔白首

秋槿

风露飒已冷天色亦黄昏中庭有槿花荣落同一晨秋开已寂寞夕殒何纷纷正怜少颜色复
叹不逡巡感此因念彼怀哉聊一陈男儿老富贵女子晚婚姻头白始得志色衰方事人後时
不获已安得如青春

荅元郎中杨员外喜乌见寄【四十四字成】

南宫鸳鸯地何忽乌来止故人锦帐郎闻乌笑相视疑乌报消息望我归乡里我归应待乌头
白慙愧元郎误欢喜

白氏长庆集卷十

卷十一

<集部,别集类,汉至五代,白氏长庆集>

钦定四库全书

白氏长庆集卷十一

唐白居易撰

感伤三【古体词 五言五十三首】

初入峡有感

上有万仞山下有千丈水苍苍两崖间阔狭容一苇瞿塘呀【牛加切】直泻灩澦屹中峙未夜黑岩昏无风白浪起大石如刀剑小石如牙齿一步不可行况千三百里【自峡州至忠州艰险相继凡一千三百里】苒蒨【如灼切】竹箴【音念】敲危楫师趾一跌无完舟吾生系於此常闻仗忠信蛮貊可行矣自古漂流人岂尽非君子况吾时与命蹇舛不足恃常恐不才身复作无名死

过昭君村【村在归州东北四十里】

灵珠产无种彩云出无根亦如彼姝子生此遐陋村至丽物难掩遽选入君门独美衆所嫉终弃出塞垣唯此希代色岂无一顾恩事排势须去不得由至尊白黑既可变丹青何足论竟埋代北骨不返巴东魂惨淡晚云水依稀旧乡园妍姿化已久但有村名存村中有遗老指点为我言不取往者戒恐贻来者冤至今村女面烧灼成瘢痕

自江州至忠州

前在浔阳日已叹宾朋寡忽忽抱忧怀出门无处写今来转深僻穷峡巔山下五月断行舟灩堆正如马巴人类猿狖【尤救切】矍铄满山野敢望见交亲喜逢似人者

初到忠州登东楼寄万州杨八使君

山束邑居窄峡牵气候偏林峦少平地雾雨多阴天隐隐煮盐火漠漠烧畚【牛居切】烟赖此东楼夕风月时翛然凭轩望所思目断心涓涓背春有去鴈上水无来船我怀巴东守乃是关西贤平生已不浅流落重相怜水梗漂万里笼禽囚五年新恩同雨露远郡邻山川书信虽

往复封疆徒接连其如美人面欲见杳无缘

郡中

乡路音信断山城日月迟欲知州近远堦前摘荔枝

西楼夜

悄悄复悄悄城隅隐林杪山郭灯火稀峡天星汉少年光东流水生计南枝鸟月没光沈沈西楼殊未晓

东楼晓

脉脉复脉脉东楼无宿客城闍云雾多峡深田地窄宵灯尚留焰晨禽初展翮欲知山高低不见东方白

寄王质夫

忆始识君时爱君世缘薄我亦吏王畿不为名利着【直畧切】春寻仙游洞秋上云居阁楼观水潺潺【钮山切】龙潭花漠漠吟诗石上坐引酒泉边酌因话出处心心期老岩壑忽从风雨别遂被簪纓缚君作出山云我为入笼鹤笼深鹤憔悴山远云飘泊去处虽不同同负平生约今来各何在老去随所托我守巴南城君佐征西幕年颜渐衰飒【悉合切】生计仍萧索方含去国愁且美从军乐【音洛】旧游疑是梦往事思如昨相忆春又深故山花正落

南宾郡斋即事寄杨万州

山上巴子城山下巴江水中有穷独人强名为刺史时时窃自哂刺史岂如是仓粟餽家人黄缣裹妻子【忠州刺史已下悉以畚田粟给禄食黄绢充俸】莓苔翳冠带雾雨霾【音埋雨土蒙茂也】楼雉衙鼓暮复朝郡斋卧还起回首望南浦亦在烟波里而我复何嗟夫君犹滞此

招萧处士

峡内岂无人所逢非所思门前亦有客相对不相知仰望但云树俯顾惟妻儿寢食起居外端然无所为东郊萧处士聊可与开眉能饮满杯酒善吟长句诗庭前吏散後江畔路乾时请君携竹杖一赴郡斋期

庭槐

南方饶竹树唯有青槐稀十种七八死纵活亦支离何此郡庭下一株独华滋蒙蒙碧烟叶嫋嫋黄花枝我家渭水上此树荫前墀忽向天涯见忆在故园时人生有情感遇物牵所思树木犹复尔况见旧亲知

送客回晚兴

城上云雾开沙头风浪定参差乱山出淡泞平江净行客舟已远居人酒初醒嫋嫋秋竹梢巴蝉声似磬

东楼竹

潇洒城东楼遶楼多修竹森然一万竿白粉封青玉卷帘睡初觉敲枕看未足影转色入楼牀席生浮緑空城絶宾客向夕弥幽独楼上夜不归此君留我宿

九日登巴台

黍香酒初熟菊暖花未开闲听竹枝曲浅酌茱萸杯去年重阳日漂泊湓城隈今岁重阳日萧条巴子台旅髩寻已白乡书久不来临觴一搔首座客亦徘徊

东城寻春

老色日上面欢情日去心今既不如昔後当不如今今犹未甚衰每事力可任花时仍爱出酒後尚能吟但恐如此兴亦随日消沈东城春欲老勉强一来寻

江上送客

江花已萎絶江草已消歇远客何处归孤舟今日发杜鹃声似哭湘竹斑如血共是多感人仍为此中别

桐花

春令有常候清明桐始发何此巴峡中桐花开十月岂伊物理变信是土宜别地气反寒暄天时倒生杀草木坚强物所稟固难夺风候一参差荣枯遂乖刺【郎达切】况吾北人性不耐【乃带切】南方热强羸寿夭间安得依时节

早祭风伯因怀李十一舍人

远郡虽褊陋时祀奉朝经夙兴祭风伯天气晓冥冥导骑与从吏引我出东墀【涓荧切】水雾重如雨山火高於星忽忆早朝日与君趋紫庭步登龙尾道却望终南青一别身向老所思

心未宁至今想在耳玉音尚玲玲

花下对酒二首

蔼蔼江气春南宾闰正月梅樱与桃杏次第城上发红房烂簇火素艳纷团雪香惜委风飘愁牵压枝折楼中老太守头上新白发冷淡病心情暄和好时节故园音信断远郡亲宾绝欲问花前樽依然为谁设

引手攀红樱红樱落似霰【先见切】仰首看白日白日委如箭年芳与时景顷刻犹衰变况是血肉身安能长强健人心苦迷执慕贵忧贫贱愁色常在眉欢容不上面况吾头半白把镜非不见何必花下杯更待他人劝

不二门

两眼日将闇四肢渐衰瘦束带臃【以证切】昔围穿衣妨【去声】宽袖流年似江水奔注无昏昼志气与形骸安得长依旧亦曾登玉陛举措多纰【篇夷切】缪至今金阙籍名姓独遗漏亦曾烧大药消息乖火候至今残丹砂烧乾不成就行藏事两失忧忧心交鬭化作顛顛翁抛身在荒陋坐看老病逼须得医王救唯有不二门其间无夭寿

我身

我身何所似似彼孤生蓬秋霜剪根断浩浩随长风昔於秦雍间今落巴蛮中昔为意气郎今作寂寞翁外貌虽寂寞中怀颇冲融赋命有厚薄委心任穷通通当为大鹏举翅摩苍穹穷则为鷓鴣一枝足自容苟知此道者身穷心不穷

哭王质夫

仙游寺前别别来十年余生别犹怏怏死别复何如客从梓潼来道君死不虚惊疑心未信欲哭复踟踟踟踟寝门侧声发泪亦俱衣上今日泪篋中前月书怜君古人风重有君子儒篇咏陶谢辈风襟嵇阮徒出身既蹇屯生世仍须臾诚知天至高安得不一呼江南有毒蟒江北有妖狐皆享千年寿多於王质夫不知彼何德不识此何辜

东坡种花二首

持钱买花树城东坡上栽但购有花者不限桃杏梅百果参杂种千枝次第开天时有早晚地力无高低红者霞艳艳白者雪皑皑【鱼开切】游蜂逐不去好鸟亦栖来前有长流水下有小平台时拂台上石一举风前杯花枝荫我头花蕊【如累切俗作蕊】落我怀独酌复独咏不觉月平西巴俗不爱花竟春无人来唯此醉太守尽日不能回东坡春向暮树木今何如漠漠花落尽翳翳叶生初每日领童仆荷鋤仍决渠剗【楚简切】土壅其本引泉溉其枯小树

低数尺大树长丈余封植未几时高下齐扶疎养树既如此养民亦何殊将欲茂枝叶必先救根株云何救根株劝农均赋租云何茂枝叶省事宽刑书移此为郡政庶几毗俗苏

登城东古台

迢迢东郊上有土青崔嵬不知何代物疑是巴王台巴歌久无声巴宫没黄埃靡靡春草合牛羊缘四隈我来一登眺目极心悠哉始见江山势峰叠水环回凭高视听旷向远胷襟开唯有故园念时时东北来

哭诸故人因寄元九

昨日哭寝门今日哭寝门借问所哭谁无非故交亲伟卿既长往质夫亦幽沦屈指数年世收涕自思身彼皆少於我先为泉下人我今头半白焉得身久存好怀元郎中相识二十春昔见君生子今闻君抱孙存者尽老大逝者已成尘早晚升平宅开眉一见君

郡中春宴因赠诸客

仆本儒家子待诏金马门忝尘亲近地孤负圣明恩一旦奉优诏万里牧远人可怜岛夷帅自称为使君身骑牂牁马口食涂江鳞闇淡绯衫故斓斑白发新是时岁二月玉历布春分颁条示皇泽命宴及良辰冉冉趋府吏蚩蚩聚州民有如蛰虫鸟亦应天地春薰草席铺坐藤枝酒注樽中庭无平地高下随所陈蚩鼓声坎坎巴女舞蹲蹲使君居上头掩口语衆宾勿笑风俗陋勿欺官府贫蜂巢与蚁穴随分有君臣

开元寺东池早春

池水暖温暾【他昆切】水清波潋【力冉切】灩【以冉切】簇簇青泥中新蒲叶如剑梅房小白裹柳彩轻黄染顺气草薰薰适情鸥泛泛旧游成梦寐往事随阳焱【以冉切】芳物感幽怀一动平生念

东涧种柳

野性爱栽植植柳水中坻【陈知切】乘春持斧斫栽截而树之长短既不一高下随所宜倚岸埋大干临流插小枝松柏不可待榎楠固难移不如种此树此树易荣滋无根亦可活成阴况非迟三年未离郡可以见依依种罢水边憩仰头闲自思富贵本非望功名须待时不种东溪柳端坐欲何为

卧小斋

朝起视事毕晏坐饱食终散步长廊下卧退小斋中拙政自多暇幽情谁与同孰云二千石心

如田野翁

步东坡

朝上东坡步夕上东坡步东坡何所爱爱此新成树种植当岁初滋荣及春暮信意取次栽无行亦无数绿阴斜景转芳气微风度新叶鸟下来萎花蝶飞去闲携斑竹杖徐曳黄麻履欲识往来频青苔成白路

徵秋税毕题郡南亭

高城直下视蠢蠢见巴蛮安可施政教尚不通语言且喜赋敛毕幸闻间井安岂伊循良化赖此丰登年案牍既简少池馆亦清闲秋雨檐果落夕钟林鸟还南亭日潇洒偃卧恣疎顽

蚊蟆

巴徼炎毒早二月蚊蟆生嘤【作荅切】肤拂不去遶耳薨薨声斯物颇微细中人初甚轻如有肤受潜久则疮痂【羽委切】成痂成无奈何所要防其萌麽虫何足道潜谕傲人情

登龙昌上寺望江南山怀钱舍人

骑马出西郭悠悠欲何之独上高寺去一与白云期虚槛晚潇洒前山碧参差忽似青龙阁同望玉峰时因咏松雪句永怀鸾鹤姿六年不相见况乃隔荣衰【昔尝与钱舍人登青龙寺上方同望蓝田山各有绝句钱云偶来上寺因高望松雪分明见旧山】

郊下

西日照高树树头子规鸣东风吹野水水畔江蓠生尽日看山立有时寻涧行兀兀长如此何许似专城

遣怀

乐往必悲生泰来由否极谁言此数然吾道何终塞尝求檐尹卜拂龟竟默默亦曾仰问天天但苍苍色自兹唯委命名利心双息近日转安闲乡园亦休忆回看世间苦苦在求不得我今无所求庶离忧悲域

岁晚

霜降水返壑风落木归山冉冉岁将宴物皆复本源何此南迁客五年独未还命途分已定日久心弥安亦尝心与口静念私自言去国固非乐归乡未必欢何须自生苦舍易求其难

负冬日

杲杲冬日出照我屋南隅负暄闭目坐和气生肌肤初似饮醇醪又如蛰者苏外融百骸畅中适一念无旷然忘所在心与虚空俱

委顺

山城虽荒芜竹树有嘉色郡俸诚不多亦足充衣食外累由心起心宁累自息尚欲忘家乡谁能筭官职宜怀齐远近委顺随南北归去诚可怜天涯住亦得

宿溪翁【时初除郎官赴朝】

衆心爱金玉衆口贪酒肉何此溪上翁饮瓢亦自足溪南刈薪草溪北修墙屋岁种一顷田春驱两黄犊於中甚安适此外无营欲溪畔偶相逢庵中遂同宿醉翁向朝市问我何官禄虚言笑杀翁郎官应列宿

重过寿泉忆与杨九别时因题店壁

商州南十里有水名寿泉涌出石崖下流经山店前忆昔相送日我去君言还寒波与老泪此地共潺湲一去历万里再来经六年形容已变改处所犹依然他日君过此殷懃吟此篇

西掖早秋直夜书意【自此後中书舍人时作】

凉风起禁掖新月生宫沼夜半秋闇来万年枝嫋嫋炎凉递时节钟鼓交昏晓遇圣惜年衰报恩愁力小素餐无补益朱绶虚纒绕冠盖栖野云稻粱养山鸟量力私自省所得已非少五品不为贱五十不为天若无知足心贪求何日了

庭松

堂下何所有十松当我阶乱立无行次高下亦不齐高者三丈长下者十尺低有如野生物不知何人栽接以青瓦屋承之白沙台朝昏有风月燥湿无尘泥疎韵秋槭槭【止戟切隕落貌】凉阴夏凄凄春深微雨夕满叶珠蓑蓑【苏回切】岁暮大雪天压枝玉皜皜【鱼开切】四时各有趣万木非其侪去年买此宅多为人所哈【呼来切】一家二十口移转就松来移来有何得但得烦襟开即此是益友岂必交贤才顾我犹俗士冠盖走尘埃未称为松主时时一愧怀

竹窗

常爱辋川寺竹窗东北廊一别十余载见竹未曾忘今春二月初卜居在新昌未暇作廐库且

先营一堂开窗不糊纸种竹不依行意取北檐下窗与竹相当遶屋声淅淅逼人色苍苍烟通杳霭气月透玲珑光是时三伏天天气热如汤独此竹窗下朝回解衣裳轻纱一幅巾小簟六尺牀无客尽日静有风终夜凉乃知前古人言事颇谙详清风北窗卧可以傲羲皇

同韩侍郎游郑家池吟诗小饮

野艇容三人晚池流浼浼【莫赧切】悠然依棹坐水思如江海宿雨洗沙尘晴风荡烟霭残阳上竹树枝叶生光彩我本偶然来景物如相待白鸥惊不起绿芡行堪采齿发虽已衰性灵未云改逢时遇杯酒尚有心情在

晚归有感

朝吊李家孤暮问崔家疾【时李十一侍御诸子尚居忧崔二十二员外三年卧病】回马独归来低眉心郁郁平生所善者多不过六七如何十年间零落三无一刘曾梦中见元向花前失【刘三十二校书歿後尝梦见之元八少尹今春樱桃花时长逝】渐老与谁游春城好风日

曲江感秋二首【并序】

元和二年三年四年予每岁有曲江感秋诗凡三篇编在第七集卷是时予为左拾遗翰林学士无何贬江州司马忠州刺史前年迁主客郎中知制诰未周岁授中书舍人今游曲江又值秋日风物不改人事屡变况予中否後遇昔壮今衰慨然感怀复有此作噫人生多故不知明年秋又何许也时二年七月十日云耳

元和二年秋我年三十七长庆二年秋我年五十一中间十四年六年居谴黜穷通与荣悴委运随外物遂师庐山远重吊湘江屈夜听竹枝愁秋看艳堆没近辞巴郡印又秉纶闾笔晚遇何足言白发映朱绂消沈昔意气改换旧容质独有曲江秋风烟如往日

疎芜南岸草萧飒西风树秋到未几时蝉声又无数莎平绿茸合莲落青房露今日临望时往年感秋处池中水依旧城上山如故独我髯间毛昔黑今垂素荣名与壮齿相避如朝暮时命始欲来年颜已先去当春不欢乐临老徒惊悞故作咏怀诗题於曲江路

翫松竹二首

龙蛇隐大泽麋鹿游丰草栖凤安於梧潜鱼乐於藻吾亦爱吾庐庐中乐吾道前松後修竹偃卧可终老各附其所安不知他物好

坐爱前檐前卧爱北窗北窗竹多好风檐松有嘉色幽怀一以合杂志随缘息在尔虽无情於予即有得乃知性相近不必动与植

衰病无趣因吟所怀

朝餐多不饱夜卧常少睡自觉寝食间多无少年味平生好诗酒今亦将舍弃酒唯下药饮无复曾欢醉诗多听人吟自不题一字病姿与衰相日夜相继至况当尚少朝弥慙居近侍终当求一郡聚少渔樵费合口便归山不问人间事

逍遥咏

亦莫恋此身亦莫厌此身此身何足恋万劫烦恼根此身何足厌一聚虚空尘无恋亦无厌始是逍遥人

白氏长庆集卷十一

卷十二

钦定四库全书

白氏长庆集卷十二

唐白居易撰

感伤四【歌行曲引杂体凡二十九首】

短调行

瞳瞳【徒纪切】太阳如火色上行千里下一刻出为白昼入为夜圆转如珠住不得住不得无奈何为君举酒调短调歌声苦词亦苦四座少年君听取今夕未竟明夕催秋风才往春风回人无根蒂时不驻朱颜白日相隳颓劝君且强笑一面劝君且强饮一杯人生不得长欢乐年少须臾老到来

生离别

食檠不易食梅难檠能苦兮梅能酸未如生别之为难苦在心兮酸在肝晨鸡再鸣残月没征马连嘶行人出回看骨肉哭一声梅酸檠苦甘如蜜黄河水白黄云秋行人河边相对愁天寒野旷何处宿棠梨叶战风飕飕【疏鸠切】生离别生离别忧从中来无断绝忧极心劳血气衰末年三十生白发

浩调行

天长地久无终毕昨夜今朝又明日髣髴发苍浪牙齿疎不觉身年四十七前去五十有几年把镜照面心茫然既无长绳系白日又无大药驻朱颜朱颜日渐不如故青史功名在何处欲留年少待富贵富贵不来年少去去去复去兮如长河东流赴海无回波贤愚贵贱同归尽北邙冢墓高嵯峨古来如此非独我未死有酒且高歌颜回短命伯夷饿我今所得亦已多功名富贵须待命命若不来知奈何

王夫子

王夫子送君为一尉东南三千五百里道途虽远位虽卑月俸犹堪活妻子男儿口读古人书束带敛手来从事近将狗禄给一家远则行道佐时理行道佐时须待命委身下位无为耻命苟未来且求食官无卑高及远迩男儿上既未能济天下下又不至饥寒死吾观九品至一品

其间气味都相似紫绶朱绂青布衫颜色不同而已矣王夫子别有一事欲劝君逢酒逢春且欢喜

江南遇天宝乐叟

白头老叟泣且言禄山未乱入梨园能弹琵琶和法曲多在华清随至尊是时天下太平久年年十月坐朝元千官起居环佩合万国会同车马奔金殿照耀石瓮寺兰麝熏煮温汤源贵妃宛转侍君侧体弱不胜珠翠繁冬雪飘飏锦袍暖春风荡漾霓裳翻欢娱未足燕寇至弓劲马肥胡语喧幽土人迁避夷狄鼎湖龙去哭轩辕从此漂沦到南土万人死尽一身存秋风江上浪无限暮雨舟中酒一樽涸鱼久失风波势枯草曾沾雨露恩我自秦来君莫问骊山渭水如荒村新丰树老笼明月长生殿闇锁春云红叶纷纷盖敝瓦绿苔重重封坏垣唯有中官作宫使每年寒食一开门

送张山人归嵩阳

黄昏惨惨天微雪修行坊西鼓声绝张生马瘦衣且单夜扣柴门与我别媿君冒寒来别我为君沽酒张灯火酒酣火煖与君言何事出关又入关荅云前年偶下山四十余月客长安长安古来名利地空手无金行路难朝游九城陌肥马轻车欺杀客暮宿五侯门残茶冷酒愁杀人春明门门前便是嵩山路幸有云泉容此身明日辞君且归去

醉後走笔酬刘五主簿长句之赠兼简张大贾二十四先辈昆季

刘兄文高行孤立十五年前名翥习是时相遇在符离我年二十君三十得意忘年心迹亲寓居同县日知闻衡门寂寞朝寻我古寺萧条暮访君朝来暮去多携手穷巷贫居何所有秋灯夜写联句诗春雪朝倾煖寒酒陴【蒲麋切】湖绿爱白鸥飞滩【苏回切】水清怜红鲤肥偶语闲攀芳树立相扶醉蹋落花归张贾弟兄同里巷乘闲数数来相访雨天连宿草堂中月夜徐行草桥上我年渐长忽自惊镜中冉冉髭须生心畏後时同励志身牵前事各求名问我栖栖何所适乡人荐为鹿鸣客二千里外谢交游三十韵诗慰行役出门可怜唯一身弊裘瘦马入咸秦??街鼓红尘闇晚到长安无主人二贾二张与余弟驱车迺【良以切】迺【延知切】来相继操词握赋为干戈锋锐森然胜气多同入文场多苦战五人十载九登科二张得隲名居甲美退争雄重告捷棠棣辉荣并桂枝芝兰芬馥和荆叶唯有沅犀屈未伸握中自谓骇鸡珍三年不鸣鸣必大岂独骇鸡当骇人元和运气千年圣同遇明时余最幸始辞秘合吏王畿遽列谏垣升禁闥蹇步何堪鸣佩玉衰容不称着朝衣闾阖晨开朝百辟冕旒不动香烟碧步登龙尾上虚空立去天颜无咫尺宫花似雪从乘輿禁月如霜坐直庐身贱每惊随内宴才微常愧草天书晚松寒竹新昌第职居密近门多闭日暮银台下直回故人到门门颺开回头下马一相顾尘土满衣何处来敛手炎凉叙未毕先说旧山今悔出岐阳旅宦少欢娱江左迂游费时日赠我一篇行路吟吟之句句披沙金岁月徒催白发貌泥涂不屈青云心谁谓茫茫天地意短才获用长才弃我随鹄鹭入烟云谬上丹墀为近臣君同鸾凤栖荆棘犹着青袍作选人惆怅知贤不能荐徒为出入蓬莱殿月慙谏纸二百张岁愧俸钱三十万大底浮荣何

足道几度相逢即身老且倾斗酒慰羁愁重话符离问旧游北巷邻居几家去东林旧院何人住武里村花落复开流沟山色应如故感此酬君千字诗醉中分手又何之须知通塞寻常事莫叹浮沈先後时慷慨临岐重相勉殷勤别後加飧饭君不见买臣衣锦还故乡五十身荣未为晚

和钱员外荅卢员外早春独游曲江见寄长句

春来有色闇融融先到诗情酒思中柳岸霏微裊【乙业切】尘雨杏园淡荡开花风闻君独游心郁郁薄晚新晴骑马出醉思诗侣有同年春叹翰林无暇日云夫首倡寒玉音蔚章继和春搜吟此时我亦闭门坐一日风光三处心【云夫蔚章同年及第时予与蔚章同在翰林】

东墟晚歇【时退居渭村】

凉风冷露萧索天黄蒿紫菊荒凉田邊塚秋花少颜色细虫小蝶飞翩翩中有腾腾独行者手挂渔竿不骑马晚从南涧钓鱼回歇此墟中白杨下褐衣半故白发新人逢知我是何人谁言渭浦栖迟客曾作甘泉侍从臣

客中月

客从江南来时月上弦悠悠行旅中三见清光圆晓随残月行夕与新月宿谁谓月无情千里远相逐朝发渭水桥暮入长安陌不知今夜月又作谁家客

挽歌词

丹旌何飞扬素骖亦悲鸣晨光照闾巷輶【音而】车俨欲行萧条九月天哀挽出重城借问送者谁妻子与弟兄苍苍上古原峨峨开新茔含酸一恸哭异口同哀声旧壠转芜絕新坟日罗列春风草绿北邙山此地年年生死别

长相思

九月西风兴月冷霜华凝思君秋夜长一夜?九升二月东风来草折花心开思君春日迟一日肠九回妾住洛桥北君住洛桥南十五即相识今年二十三有如女萝草生在松之侧蔓短枝苦高萦回上不得人言人有愿愿至天必成愿作远方兽步步比肩行愿作深山木枝枝连理生

山鹧鸪

山鹧鸪朝朝暮暮啼复啼啼时露白风凄凄黄茅岗头秋日晚苦竹岭下寒月低畬田有粟何不啄石楠有枝何不栖迢迢不缓复不急楼上舟中声闇入梦乡迁客展转卧抱儿寡妇彷徨

立山鷓鴣尔本此乡鸟生不辞巢不别羣何苦声声啼到晓啼到晓唯能愁北人南人惯闻如不闻

放旅鴈【元和十年冬作】

九江十年冬大雪江水生冰树枝折百鸟无食东西飞中有旅鴈声最饥雪中啄草水上宿翅冷腾空飞动迟江童持网捕将去手携入市生卖之我本北人今谴谪人鸟虽殊同是客见此客鸟伤客人赎汝放汝飞入云鴈鴈汝飞向何处第一莫飞西北去淮西有贼讨未平百万甲兵久屯聚官军贼军相守老食尽兵穷将及汝健儿饥饿射汝吃拔汝翅翎为箭羽

送春归【元和十一年三月三十日作】

送春归三月尽日日暮时去年杏园花飞御沟绿何处送春曲江曲今年杜鹃花落子规啼送春何处西江西帝城送春犹怏怏天涯送春能不加惆怅莫惆怅送春人冗员无替五年罢应须準拟再送浔阳春五年炎凉凡十变安知此身健不健好送今年江上春明年未死还相见

山石榴寄元九

山石榴一名山踯躅一名杜鹃花杜鹃啼时花扑扑九江三月杜鹃来一声催得一枝开江城上佐闲无事山下斲【之六切】得厅前栽烂漫一栏十八树根株有数花无数千房万叶一时新嫩紫殷红鲜翹尘泪痕衰【乙业切】损臙脂脸剪刀裁破红绡巾谪仙初堕愁在世姹【齿下切】少女也女新嫁娇泥【去声】春日射血珠将滴地风翻焰火欲烧人闲折两枝持在手细看不似人间有花中此物是西施芙蓉芍药皆嫫母奇芳絶艳别者谁通州迁客元拾遗拾遗初贬江陵去去时正值青春暮商山秦岭愁杀人山石榴花红夹路题诗报我何所云若云色似石榴裙当时丛畔唯思我今日栏前只忆君忆君不见坐销落日西风起红纷纷

画竹歌【并序】

协律郎萧悦善画竹举时无伦萧亦甚自秘重有终岁求其一竿一枝而不得者知予天与好事忽写一十五竿惠然见投予厚其意高其艺无以答贶作歌以报之凡一百八十六字云

植物之中竹难写古今虽画无似者萧郎下笔独逼真丹青以来唯一人人画竹身肥拥肿萧画茎瘦节节竦人画竹梢死羸垂萧画枝活叶叶动不根而生从意生不笋而成由笔成野塘水边碕【渠宜切】岸侧森森两丛十五茎婣娟不失筠粉态萧飒尽得风烟情举头忽看不似画低耳静听疑有声西丛七茎劲而健省向天竺寺前石上见东丛八茎疎且寒曾忆湘妃庙里雨中看幽姿远思少人别与君相顾空长叹萧郎萧郎老可惜手颤【六善切】眼昏头雪色自言便是絶笔时从今此竹犹难得

眞娘墓【墓在虎丘寺】

真娘墓虎丘道不识真娘镜中面唯见真娘墓头草霜摧桃李风折莲真娘死时犹少年脂肤
黄手不牢固世间有物难留连易销歇塞北花江南雪

长恨歌

汉王重色思倾国御宇多年求不得杨家有女初长成养在深闺人未识天生丽质难自弃一
朝选在君王侧回头一笑百媚生六宫粉黛无颜色春寒赐浴华清池温泉水滑洗凝脂侍儿
扶起娇无力始是新承恩泽时云鬓花颜金步摇芙蓉帐暖度春宵春宵苦短日高起从此君
王不早朝承欢侍宴无闲暇春从春游夜专夜後宫佳丽三千人三千宠爱在一身金屋粧成
娇侍夜玉楼宴罢醉和春姊妹弟兄皆列土可怜光彩生门户遂令天下父母心不重生男重
生女骊宫高处入青云仙乐风飘处处闻缓歌漫舞凝丝竹尽日君王看不足渔阳鞞鼓动地
来惊破霓裳羽衣曲九重城阙烟尘生千乘万骑西南行翠华摇摇行复止西出都门百余里
六军不发无奈何宛转蛾眉马前死花钿委地无人收翠翘金雀玉搔头君王掩面救不得回
首血泪相和流黄埃散漫风萧索云栈萦纡登剑阁峨嵋山下少人行旌旗无光日色薄蜀江
水碧蜀山青圣主朝朝暮暮情行宫见月伤心色夜雨闻铃肠断声天旋地转回龙驭到此踟
躇不能去马嵬坡下泥土中不见玉颜空死处君臣相顾尽沾衣东望都门信马归归来池苑
皆依旧太液芙蓉未央柳芙蓉如面柳如眉对此如何不泪垂春风桃李花开夜秋雨梧桐叶
落时西宫南苑多秋草宫叶满墙红不扫梨园弟子白发新椒房阿监青娥老夕殿萤飞思悄
然孤灯挑尽未成眠迟迟钟鼓初长夜耿耿星河欲曙天鸳鸯瓦冷霜华重翡翠衾寒谁与共
悠悠生死别经年魂魄不曾来入梦临邛道士鸿都客能以精诚致魂魄为感君王展转思遂教
方士殷勤覓排空驭气奔如电升天入地求之遍上穷碧落下黄泉两处茫茫皆不见忽闻海
上有仙山山在虚无缥缈间楼阁玲珑五云起其中绰约多仙子中有一人字太真雪肤花貌
参差是金阙西厢叩玉扃转教小玉报双成闻道汉家天子使九华帐里梦魂惊揽衣推枕起
徘徊珠箔银屏迤迤开云鬓半偏新睡觉花冠不整下堂来风吹仙袂飘飘举犹似霓裳羽衣
舞玉容寂寞泪阑干梨花一枝春带雨含情凝涕谢君王一别音容两渺茫昭阳殿里恩爱绝
蓬莱宫中日月长回头下望人寰处不见长安见尘雾唯将旧物表深情钿合金钗寄将去钗
留一股合一扇钗擘黄金合分钿但令心似金钿坚天上人间会相见临别殷勤重寄词词中
有誓两心知七月七日长生殿夜半无人私语时在天愿作比翼鸟在地愿为连理枝天长地
久有时尽此恨绵绵无绝期

附长恨歌传【前进士陈鸿撰】

开元中泰阶平四海无事玄宗在位岁久倦于旰食宵衣政无小大始委于右丞相深居游宴
以声色自娱先是元献皇后武淑妃皆有宠相次即世宫中虽良家子千数无可悦目者上心
忽忽不乐时每岁十月驾幸华清宫内命妇嬪耀景从浴日余波赐以汤沐春风灵液淡荡
其间上心油然若有顾遇左右前後粉色如土诏高力士潜搜外宫得宏农杨玄琰女于寿邸
既笄矣鬢【止忍切】发膩理纖穠中度举止闲冶如汉武帝李夫人别疏汤泉诏赐澡莹既
出水体弱力微若不任罗绮光彩焕发转动照人上甚悦进见之日奏霓裳羽衣曲以导之定
情之日授金钗钿合以固之又命戴步摇垂金铛明年册为贵妃半后服用繇是冶其容敏其

词婉变万态以中上意上益嬖焉时省风九州泥金五岳骊山雪夜上阳春朝与上行同室宴专席寝专房虽有三夫人九嫔二十七世妇八十一御妻暨後宫才人乐府妓女使天子无顾盼意自是六宫无复进幸者非徒殊艳尤态致是盖才智明慧善巧便佞先意希旨有不可形容者叔父昆弟皆列在清贵爵为通侯姊妹封国夫人富埒王室车服邸第与大长公主侔而恩泽势力则又过之出入禁门不问京师长吏为侧目故当时谣咏有云生女勿悲酸生男勿喜欢又曰男不封侯女作妃看女却为门上楣其人心羡慕如此天宝末兄国忠盗丞相位愚弄国柄及安禄山引兵向阙以讨杨氏为辞潼关不守翠华南幸出咸阳道次马嵬亭六军徘徊持戟不进从官郎吏伏上马前请诛错以谢天下国忠奉鬻纓盘水死於道周左右之意未快上问之当时敢言者请以贵妃塞天下怒上知不免而不忍见其死反袂掩面使牵之而去苍黄展转竟就絶於尺组之下既而玄宗狩成都肃宗受禅灵武明年大凶归元大驾还都尊玄宗为太上皇就养南宫迁于西内时移事去乐尽悲来每至春之日冬之夜池莲夏开宫槐秋落梨园弟子玉管发音闻霓裳羽衣一声则天颜不怡左右歔歔三载一意其念不衰求之梦杳不能得适有道士自蜀来知上意心念杨妃如是自言有李少君之术玄宗大喜命致其神方士乃竭其术以索之不至又能游神驭气出天界没地府以求之不见又旁求四虚上下东极大海跨蓬壶见最高仙山上多楼阙西厢下有洞户东向阖其门署曰玉妃太真院方士抽簪扣扉有双童女出应问方士造次未及言而双鬟复入俄有碧衣侍女又至诘其所从方士因称唐天子使者且致其命碧衣云玉妃方寝请少待之于时云海沈沈洞天日晓琼户重阖悄然无声方士屏息敛足拱手门下久之而碧衣延入且曰玉妃出见一人冠金莲披紫绶佩红玉曳凤舄左右侍者七八人揖方士问皇帝安否次问天宝十四年已还事言讫悯然指碧衣取金钗钿合各析其半授使者曰为谢太上皇谨献是物寻旧好也方士受辞与信将行色有不足玉妃固徵其意复前跪致词请当时一事不为他人闻者验於太上皇不然恐钿合金钗负新垣平之诈也玉妃茫然退立若有所思徐而言之曰昔天宝十载侍驾避暑骊山宫秋七月牵牛织女相见之夕秦人风俗是夜张锦绣陈饮食瓜果焚香於庭号为乞巧宫掖间犹尚之夜殆半休侍卫於东西厢独侍上上凭肩而立因仰天感牛女事密相誓心愿世世为夫妇言毕执手各呜咽此独君王知之耳因自悲曰由此一念又不得居此复堕下界且结後缘或为天或为人决再相见好合如旧因言太上皇亦不久人世幸唯自安无自苦耳使者还奏太上皇皇心震悼日日不豫其年夏四月南宫宴驾元和元年冬十二月太原白乐天自授书郎尉于盩厔鸿与琅琊王质夫家于是邑暇日相携游仙游寺话及此事相与感叹质夫举酒于乐天前曰夫希代之事非遇出世之才润色之则与时消没不闻于世乐天深於诗多於情者也试为歌之如何乐天因为长恨歌意者不但感其事亦欲惩尤物窒乱阶垂于将来也歌既成使鸿传焉世所不闻者予非开元遗民不得知世所知者有玄宗本纪在今但传长恨歌云尔

妇人苦

蝉鬓加意梳蛾眉用心扫几度晓粧成君看不言好妾身重同穴君意轻偕老惆怅去年来心知未能道今朝一开口语少意何深愿引他时事移君此日心人言夫妇亲义合如一身及至死生际何曾苦乐均妇人一丧夫终身守孤子有如林中竹忽被风吹折一折不重生枯死犹抱节男儿若丧妇能不暂伤情应似门前柳逢春易发荣风吹一枝折还有一枝生为君委曲

言愿君再三听须知妇人苦从此莫相轻

长安道

花枝缺处青楼开艳歌一曲酒一盃美人劝我急行乐自古朱颜不再来君不见外州官客长安道一回来时一回老

潜别离

不得哭潜别离不得语闇相思两心之外无人知深笼夜锁独栖鸟利剑春断连理枝河水虽浊有清日乌头虽黑有白时唯有潜离与闇别彼此甘心无後期

隔浦莲

隔浦爱红莲昨日看犹在夜来风吹落只得一回采花开虽有明年期复愁明年还暂时

寒食野望吟

丘墟郭门外寒食谁家哭风吹旷野纸钱飞古墓累累春草绿棠梨花映白杨树尽是死生离别处冥漠重泉哭不闻萧萧暮雨人归去

琵琶引【并序】

元和十年予左迁九江郡司马明年秋送客湓浦口闻舟中夜弹琵琶者听其音铮铮然有京都声问其人本长安娼女尝学琵琶於穆曹二善才年长色衰委身为贾人妇遂命酒使快弹数曲曲罢悯然自叙少小时欢乐事今漂沦憔悴转徙於江湖间予出官二年恬然自安感斯人言是夕始觉有迁谪意因为长句歌以赠之凡六百一十二言命曰琵琶行

浔阳江头夜送客枫叶荻花秋瑟瑟【半红半白之貌】主人下马客在船举酒欲饮无管弦醉不成欢惨将别别时茫茫江浸月忽闻水上琵琶声主人忘归客不发寻声闇问弹者谁琵琶声停欲语迟移船相近邀相见添酒回灯重开宴千呼万唤始出来犹抱琵琶半遮面转轴拨弦三两声未成曲调先有情弦弦掩抑声声思似诉平生不得志低眉信手续续弹说尽心中无限事轻拢【卢容切】慢捻【乃殄切】抹复挑初为霓裳後六么大弦嘈嘈如急雨小弦切切如私语嘈嘈切切错杂弹大珠小珠落玉盘间关莺语花底滑幽咽泉流水下滩水泉冷澁弦凝絶凝絶不通声暂歇别有幽愁闇恨生此时无声胜有声银罍乍破水浆迸铁骑突出刀枪鸣曲终收拨当心画四弦一声如裂帛东船西舫悄无言唯见江心秋月白沈吟放拨插弦中整顿衣裳起敛容自言本是京城女家在虾蟆陵下住十三学得琵琶成名属教坊第一部曲罢长教善才服粧成每被秋娘妬五陵年少争纏头一曲红绡不知数钿头银篦击节碎血色罗裙翻酒污今年欢笑复明年秋月春风等闲度弟走从军阿姨死暮去朝来颜色故

门前冷落鞍马稀老大嫁作商人妇商人重利轻别离前月浮梁买茶去去来江口守空船
船明月江水寒夜深忽梦少年事梦啼妆泪红阑干我闻琵琶已叹息又闻此语重唧唧同是
天涯沦落人相逢何必曾相识我从去年辞帝京谪居卧病浔阳城浔阳地僻无音乐终岁不
闻丝竹声住近湓江地低湿黄芦苦竹遶宅生其间旦暮闻何物杜鹃啼血猿哀鸣春江花朝
秋月夜往往取酒还独倾岂无山歌与村笛呕哑嘲哳难为听今夜闻君琵琶语如听仙乐耳
暂明莫辞更坐弹一曲为君翻作琵琶行感我此言良久立却坐促弦弦转急凄凄不似向前
声满座重闻皆掩泣座中泣下谁最多江州司马青衫湿

简简吟

苏家小女名简简芙蓉花腮柳叶眼十一把镜学点粧十二抽针能綉裳十三行坐事调品不
肯迷头白地藏玲珑云髻生花样飘飏风袖蔷薇香殊姿异态不可状忽忽转动如有光二月
繁霜杀桃李明年欲嫁今年死丈人阿母勿悲啼此女不是凡夫妻恐是天仙谪人世只合人
间十三岁大都好物不坚牢彩云易散琉璃脆

花非花

花非花雾非雾夜半来天明去来时春梦几多时去似朝云无覓处

醉後狂言酬贈蕭殷二協律

余杭邑客多羈貧其間甚者蕭與殷天寒身上猶衣葛日高甌中未拂塵江城山寺十一月北
風吹沙雪紛紛賓客不見綈袍惠黎庶未沾襦袴恩此時太守自慙愧重衣復衾有余溫因命
染人與針女先制兩裘贈二君吳綿細軟桂布密柔如狐腋白似雲勞將詩書投贈我如此小
惠何足論我有大裘君未見寬廣和暖如陽春此裘非繒亦非紵裁以法度絮似仁刀尺鈍拙
制未畢出亦不獨裹一身若令在郡得五考與君展覆杭州人

醉歌【示妓人商玲瓏】

罷胡琴掩秦瑟玲瓏再拜歌初畢誰道使君不解歌聽唱黃鷄與白日黃鷄催曉丑時鳴白日
催年酉時沒腰間紅綬系未穩鏡里朱顏看已失玲瓏玲瓏奈老何使君歌了汝更歌

白氏長慶集卷十二

卷十三

<集部,别集类,汉至五代,白氏长庆集>

钦定四库全书

白氏长庆集卷十三

唐白居易撰

律诗【五言七言自两韵至一百韵凡九十九首】代书诗一百韵寄微之

忆在贞元岁初登典校司身名同日授心事一言知【贞元中与微之同登科第俱授秘书省校书郎始相识也】肺腑都无隔形骸两不羁疎狂属年少闲散为官卑分定金兰契言通药石规交贤方汲汲友直每依依有月多同赏无盃不共持秋风拂琴匣夜月卷书帷高上慈恩塔幽寻皇子陂唐昌玉蕊会崇敬牡丹期【唐昌观玉蕊崇敬寺牡丹花时多与微之有期】笑劝迂辛酒闲吟短李诗【辛大立度性迂嗜酒李二十绅体短能诗故当时有迂辛短李之号】儒风爱敦质佛理赏玄师【刘三十二敦质有儒风庾七玄师谈佛理有可赏者】度日曾无闷通宵靡不为双声联律句八面对宫棋【双声联句八面宫棋皆当时事】往往游三省腾腾出九逵寒销直城路春到曲江池树暖枝条弱山晴彩翠奇峯攒石绿点柳宛麴尘丝岸草烟铺地园花雪压枝早光红照耀新溜碧逶迤幄幕侵堤布盘筵占地施微伶皆絶艺选妓悉名姬粉黛凝春态金钿耀水嬉风流夸坠髻时势鬪啼眉【贞元中城中复为坠马髻啼眉妆也】密坐随欢促华樽逐胜移香飘歌袂动醉落舞钗遗筹插红螺椀觥飞白玉卮打嫌调笑易饮讶卷波迟【抛打曲有调笑令饮酒曲有卷白波】残席諠譁散归鞍酩酊骑酩酊乌帽侧醉袖玉鞭垂紫陌传钟鼓红尘塞路歧几时会别何处不相随荏苒星霜换回环节候催两衙多请假三考欲成资运偶千年圣天成万物宜皆当少壮日同惜盛明时光景嗟虚掷云霄窃闇窥攻文朝屹屹讲学夜孜孜策目穿如札【时与微之集策畧之目其数百十】锋毫锐若锥【时与微之各有铁锋细管笔携以就试相顾辄笑目为毫锥】繁张获鸟网坚守钓鱼坻【陈知切谓自冬至夏频改试期竟与微之坚守制试也】并受夔龙荐齐陈晁董词万言经济畧三策太平基中第争无敌专场战不疲辅车排胜阵犄角搆降旗【并谓同辅席共笔砚】双阙纷容卫千僚俨等衰【谓制举人欲唱第之时也】恩随紫泥降名向白麻披既在高科选还从好爵縻东垣君谏诤西邑我驰驱【元和元年同登制科微之拜拾遗予授盩厔尉】再喜登乌府多慙侍赤墀【四年微之复拜监察予为拾遗学士也】官班分内外游处遂参差每列鵷鸾序偏瞻獬豸姿简威寒凛冽衣彩綉葳蕤正色摧强御刚肠嫉喔咻常憎持禄位不拟保妻儿养勇当除恶输忠在灭私下鞫【居侯切】惊燕雀当道慑狐狸南国人无怨东台吏不欺【微之使东原奏冤八十余家诏从而平之因分司东都】理冤多定国切谏甚辛毗造次行於是平生志在兹道将心共直言与行兼危水闇波翻覆山藏路险巇

未为明主识已被幸臣疑木秀遭风折兰芳遇霰萎千钧势易压一柱力难支腾口因成瘡【羽委切】吹毛遂得疵忧来吟贝锦谪去咏江蓠邂逅尘中遇殷勤马上辞贾生离魏阙王粲向荆夷水过清源寺山经绮季祠心摇汉皋佩泪堕岷亭碑【并途中所经历处也】驿路缘云际城楼枕水湄思乡多绕泽望阙独登陴林晚青萧索江平绿渺弥野秋鸣蟋蟀沙冷聚鸛鷀官舍黄茅屋人家苦竹篱白醪充夜酌红粟备晨炊寡鹤摧风翻鰈鱼失水髻【渠宜切】閤雏啼渴旦凉叶堕相思【此四句兼含微之鰈居之思】一点寒灯灭三声晓角吹蓝衫经雨故骢马卧霜羸念涸谁濡沫嫌醒自歎醺【邻溪切】耳垂无伯乐舌在有张仪负气冲星劍倾心向日葵金言自销铄玉性肯磷缁伸屈须看蠖穷通莫问龟定知身是患当用道为医想子今如彼嗟予独在斯无憯【连条切】当岁杪有梦到天涯坐阻连襟带行乖接履綦润销衣上雾香散室中芝念远缘迁贬惊时为别离素书三往复明月七盈亏【自与微之别经七月三度得书】旧理非难到余欢不可追树依兴善老草傍静安衰【微之宅在静安坊西近兴善寺】前事思如昨中怀写向谁北村寻古柏南宅访辛夷【开元西北院即隋时龙村佛堂有古柏一枝至今存焉微之宅中有辛夷两树常与微之游息其下】此日空搔首何人共解颐病多知夜永年长觉秋悲不饮长如醉加飧亦似饥狂吟一千字因使寄微之

和郑元及第後秋归洛下闲居【同高侍郎下隔年及第】

勤苦成名後优游得意间玉怜同匠琢桂恨隔年攀山静豹难隐谷幽鷖暂还微吟诗引步浅酌酒开颜门迴暮临水窗深朝对山云衢日相待莫误许身闲

与诸同年贺座主侍郎新拜太常同宴萧尚书亭子【座主与萧尚书下及第得羣字韵】

宠新卿典礼会盛客徵文不失迁莺侣因成贺燕羣池台晴间雪冠盖暮和云共仰曾攀处年深桂尚薰东都冬日会诸同年宴郑家林亭【得先字】

盛时陪上第暇日会羣贤桂折因同树鷖迁各异年宾阶纷组佩妓席俨花钿促膝齐贫贱差肩次後先助歌林下水销酒雪中天他日升沈者无忘共此筵

叙德书情四十韵上宣歙翟中丞【宣州荐送及第後重投此诗】

元圣生乘运忠贤出应期还将稽古力助立太平基土控吴兼越州连歙与池山河地襟带军鎮国藩维廉察安江甸澄清肃海夷股肱分外守耳目付中司楚老歌来暮秦人咏去思望如时雨至福是岁星移政静民无讼刑行吏不欺撫谦惊主宠阴德畏人知白玉慙温色朱绳让直辞行为时领袖言作世蓍龟盛幕招贤士连营训锐师光华下鵷鹭气色动熊羆出入麾幢引登临劒戟随好风迎解榻美景待褰帷晴野霞飞绮春郊柳宛丝城乌惊画角江鴈避红旗藉草朱轮驻攀花紫绶垂山宜谢公屐洲称柳家诗酒气和芳杜弦声乱子规分球齐马首列舞匝蛾眉醉惜年光晚欢怜日影迟回塘排玉棹归路拥金羈自顾龙鍾者尝蒙噢咻之仰山尘不让涉海水难为身忝乡人荐名因国士推提携增善价拂拭长妍姿射策端心术迁乔整羽仪幸穿杨远叶谬折桂高枝佩德潜书带铭仁閤勒肌鞠躬趋馆舍拜手挹阶墀霄汉程虽

在风尘迹尚卑弊衣羞素布败屋压茅茨养乏晨昏膳居无伏腊资盛时贫可耻壮岁病堪嗤
擢第名方立耽书力未疲磨铅重剗【朱缘切】割策蹇再奔驰相马须怜瘦呼鷖正及饥扶
摇重即事会有荅恩诗

和渭北刘大夫借便秋遮虏寄朝中亲友

巨鎮为邦屏全材作国桢韬铃汉上将文墨鲁诸生豹虎关西卒金汤渭北城宠深初受檄威
重正扬兵阵占山河布军由水草行夏苗侵部落宵遁失藩营云队攒戈戟风驰卷旆旌埃空
烽火灭气胜鼓鼙鸣胡马辞南牧周师罢北征回头问天下何处有欃枪

题故曹王宅【宅在檀溪】

甲第何年置朱门此地开山当宾阁出溪绕妓堂回覆井桐新长荫窗竹旧栽池荒红菡萏砌
老绿莓苔捐馆梁王去思人楚客来西园飞盖处依旧月徘徊

自江陵之徐州路上作寄兄弟

岐路南将北离忧弟与兄关河千里别风雪一身行夕宿劳乡梦晨装惨旅情家贫忧後事日
短念前程烟鴈翻寒渚霜乌聚古城谁怜陟冈者西楚望南荆

酬哥舒大见赠【去年与哥舒等八人同登科第今叙会散之意】

去岁游欢何处去【一作好】曲江西岸杏园東花下忘归因美景樽前劝酒是春风各从微
宦风尘里共度流年离别中今日相逢愁又喜八人分散两人同

和谈校书秋夜感怀呈朝中亲友

遥夜凉风楚客悲清砧繁漏月高时秋霜似髻年空长春草如袍位尚卑词赋擅名来已久烟
霄得路去何迟汉庭卿相皆知己不荐杨雄欲荐谁

感秋寄远

惆怅时节晚两情千里同离忧不散处庭树正秋风燕影动归翼蕙香销故丛佳期与芳岁牢
落两成空

春题华阳观【观即华阳公主故宅有旧内人存焉】

帝子吹箫逐凤皇空留仙洞号华阳落花何处堪惆怅头白宫人扫影堂

大雨中贈元九

不堪紅葉青苔地又是涼風暮雨天莫怪獨吟秋思苦比君接近二毛年

城中閑游

寵辱憂歡不到情任他朝市自營營獨尋秋景城東去白鹿原頭信馬行

荅韋八

兩句勞相贈佳期恨有違早知留酒待悔不趁花歸春盡綠醅【鋪杯切酒未沛也】老雨多
紅萼稀今朝如一醉猶得及芳菲

華陽觀桃花時招李六拾遺飲

華陽觀里仙桃發把酒看花心自知爭忍開時不同醉明朝後日即空枝

和友人洛中感春

莫悲金谷園中月莫嘆天津橋上春若學多情尋往事人間何處不傷神

送張南簡入蜀

昨日詔書下求賢訪陸沈無論能與否皆起徇名心君獨南游去雲山蜀路深

寄陸補闕【前年同登科】

忽憶前年科第後此時雞鶴暫同羣秋風惆悵須吹散雞在庭前鶴在雲

華陽觀中八月十五日夜招友翫月

人道秋中明月好欲邀同賞意如何華陽洞里秋壇上今夜清光此處多

曲江憶元九

春來無伴閑游少行樂三分減二分何況今朝杏園里閑人逢盡不逢君

過劉三十二故宅

不见刘君来近远门前两度满枝花朝来惆怅宣平过柳巷当头第一家

下邳庄南桃花

村南无限桃花发唯我多情独自来日暮风吹红满地无人解惜为谁开

三月三十日题慈恩寺

慈恩春色今朝尽尽日徘徊倚寺门惆怅春归留不得紫藤花下尽黄昏

看恠家牡丹花戏赠李二十

香胜烧兰红胜霞城中数令公家人人散後君须看归到江南无此花

春中与卢四周鲸华阳观同居

性情懒慢好相亲门巷萧条称作邻背烛共怜深夜月蹋花同惜少年春杏坛住僻虽宜病芸阁官微不救贫文行如君尚憔悴不知霄汉待何人

自城东至以诗代书戏招李六拾遗崔二十六先辈

青门走马趁心期惆怅归来已按迟应过唐昌玉蕊後犹当崇敬牡丹时暫游还忆崔先辈欲醉先邀李拾遗尚残半月芸香俸不作归粮作酒资

螭屋县北楼望山【自此後诗为尉时作】

一为趋走吏尘上不开颜孤负平生眼今朝始见山

县西郊秋寄赠马造

紫阁峯西清渭东野烟深处夕阳中风荷老叶萧条緑水蓼残花寂寞红我厌宦游君失意可怜秋思两心同

别韦苏州

百年愁里过万感醉中来惆怅城西别愁眉两不开

戏题新栽薔薇【时尉螭屋】

移根易地莫憔悴野外庭前一种春少府无妻春寂寞花开将尔当夫人

酬王十八李大见招游山

自怜幽会心期阻复愧嘉招书信频王事牵身去不得满山松雪属他人

县南花下醉中留刘五

百岁几回同酩酊一年今日最芳菲愿将花赠天台女留取刘郎到夜归

宿杨家

杨氏弟兄俱醉卧披衣独起下高斋夜深不语中庭立月照藤花影下堦

醉中留别杨六兄弟【三月二十日别】

春初携手春深散无日花间不醉狂别後何人堪共醉犹残十日好风光

醉中归盩厔

金光门外昆明路半醉腾腾信马回数日非关王事系牡丹花尽始归来

游云居寺赠穆三十六地主

乱峯深处云居路共蹋花行独惜春胜地本来无定主大都山属爱山人

和王十八蔷薇涧花时有怀萧侍御兼见赠

霄汉风尘俱是系蔷薇花委故山深怜君独向涧中立一把红芳三处心

再因公事到骆口驿

今年到时夏云白去年来时秋树红两度见山心有愧皆因王事到山中

期李二十文畧王十八质夫不至独宿仙游寺

文畧也从牵吏役质夫何故恋嚣尘始知解爱山中宿千万人中无一人

酬赵秀才赠新登科诸先辈

莫羨蓬萊鸞鶴侶道成羽翼自生身君看名在丹台者盡是人間修道人

過天門街

雪盡終南又欲春遙憐翠色對紅塵千車萬馬九衢上回首看山無一人

惜玉蘂花有懷集賢王校書起

芳意將闌風又吹白雲離葉雪辭枝集賢讐校無閑日落盡瑤花君不知

春送盧秀才下第游太原謁嚴尚書

未將時會合且與俗浮沈鴻養青冥翮蛟潛雲雨心烟郊春別遠風磧暮程深墨客投何處并州舊翰林

長安送柳大東歸

白社羈游伴青門遠別離浮名相引住歸路不同歸

送文暢上人東游

得道即無著隨緣西復東貌依年腊老心到夜禪空山宿馴溪虎江行漉【良据切】水虫悠悠塵客思春滿碧雲中

社日關路作

晚景函關路涼風社日天青岩新有鶯紅樹欲無蟬愁立驛樓上厭行官堠前蕭條秋興苦漸近二毛年

重到毓村宅有感

欲入中門淚滿巾庭花無主兩回春軒窗帘幕皆依舊只是堂前欠一人

亂後過流溝寺

九月徐州新戰後悲風杀气滿山河唯有流溝山下寺門前依舊白雲多

嘆發落

多病多愁心自知行年未老发先衰随梳落去何须惜不落终须变作丝

留别吴七正字

成名共记甲科上署吏同登芸阁间唯是尘心殊道性秋蓬常转水长闲

除夜宿洛州

家寄关西住身为河北游萧条岁除夜旅泊在洛州

邯郸冬至夜思家

邯郸夜里逢冬至抱膝灯前影伴身想得家中夜深坐还应说着远行人

冬至夜怀湘灵

艳质无由见寒衾不可亲何堪最长夜俱作独眠人

感故张仆射诸妓

黄金不惜买蛾眉拣得如花三四枝歌舞教成心力尽一朝身去不相随

游仙游山

閤将心地出人间五六年来人怪闲自嫌恋着未全尽犹爱云泉多在山

见尹公亮新诗偶赠絶句

袖里新诗十首余吟看句句是琼琚如何持此将干谒不及公卿一字书

长安闲居

风竹烟松昼掩关意中长似在深山无人不怪长安住何独朝朝暮暮间

早春独游曲江【时为校书郎】

散职无拘束羸骖少送迎朝从直城出春傍曲江行风起池东暖云开山北晴水销泉脉动雪尽草芽生露杏红初拆烟杨绿未成影迟新度鴈声澁欲啼莺关地心俱静韶光眼共明酒狂怜性逸药效喜身轻慵慢疎人事幽栖逐野情回看芸阁笑不似有浮名

秘书省中忆旧山

厌从薄宦校青简悔别故山思白云犹喜兰台非傲吏归时应免动移文

凉夜有怀【自此後诗并未应举时作】

清风吹枕席白露湿衣裳好是相亲夜漏迟天气凉

送武士曹归蜀【士曹即武中丞兄】

花落鸟嚶嚶南归称野情月宜秦岭宿春好蜀江行乡路通云栈郊扉近锦城乌台陟冈送人
羨别时荣江南送北客因凭寄徐州兄弟书【时年十五】

故园望断欲何如楚水吴山万里余今日因君访兄弟数行乡泪一封书

赋得古原草送别

离离原上草一岁一枯荣野火烧不尽春风吹又生远芳侵古道晴翠接荒城又送王孙去萋
萋满别情

夜哭李夷道

逝者絕影响空庭朝复昏家人哀临毕夜鑱寿堂门无妻无子何人葬空见铭旌向月翻

病中作【时年十八】

久为劳生事不学摄生道年少已多病此身岂堪老

秋江晚泊

扁舟泊云岛倚棹念乡国四望不见人烟江澹秋色客心贫易动日入愁未息

旅次景空寺宿幽上人院

不与人境接寺门开向山暮钟鸣鸟聚秋雨病僧闲月隐云树外萤飞廊宇间幸投花界宿暂
得静心颜

长安正月十五日

誼誼车骑帝王州羈病无心逐胜游明月春风三五夜万人行乐一人愁

过高将军墓

原上新坟委一身城中旧宅有何人妓堂宾阁无归日野草山花又欲春
门客空将感恩泪白杨风里一沾巾

寒食卧病

病逢佳节长叹息春雨蒙蒙榆柳色羸坐全非旧日容
扶行半是他人力誼誼里巷蹋青归笑闭柴门度寒食

宿桐庐馆同崔存度醉後作

江海漂漂共旅游一樽相劝散穷愁夜深醒後愁还在雨滴梧桐山馆秋

江楼望归【时避难在越中】

满眼云水色月明楼上人旅愁春入越乡梦夜归秦道路通荒服
田园隔虏尘悠悠沧海外十载避黄巾

除夜寄弟妹

感时思弟妹不寐百忧生万里经年别孤灯此夜情病容非旧日
归思逼新正早晚重欢会羈离各长成

寒食月夜

风香露重梨花湿草舍无灯愁未入南邻北里歌吹时独倚柴门月中立

感芍药花寄正一上人

今日阶前红芍药几花欲老几花新开时不解比色相落後始知如幻身
空门此去几多地欲把残花问上人

晚秋闲居

地僻门深少送迎披衣闲坐养幽情秋庭不扫携藤杖闲蹋梧桐黄叶行

秋暮郊居书怀

郊居人事少昼卧对林峦穷巷厌多雨贫家愁早寒葛衣秋未换书卷病仍看若问生涯计前溪一钓竿

为薛台悼亡

半死梧桐老病身重泉一念一伤神手携稚子夜归院月冷房空不见人

途中寒食

路傍寒食行人尽【一作絕】独占春愁在路傍马上垂鞭愁不语风吹百草野田香

题流沟寺古松

烟叶葱茏苍麋【居里切麋属】尾霜皮剥落紫龙鳞欲知松老看尘壁死却题诗几许人

感月悲逝者

存亡感月一潸然月色今宵似往年何处曾经同望月樱桃树下後堂前

代邻叟言怀

人生何事心无定宿昔如今意不同宿昔愁身不得老如今恨作白头翁

自河南经乱关内阻饥兄弟离散各在一处因望月有感聊书所怀寄上浮梁大兄於潜七兄乌江十五兄兼示符离及下邳弟妹

时难年荒世业空弟兄羁旅各西东田园寥落干戈後骨肉流离道路中吊影分为千里鴈辞根散作九秋蓬共看明月应垂泪一夜乡心五处同

长安早春旅怀

轩车歌吹諠都邑中有一人向隅立夜深明月卷帘愁日暮青山望乡泣风吹新绿草芽坼雨洒轻黄柳条湿此生知负少年春不展愁眉欲三十

寒闺夜

夜半衾裯冷孤眠懒未能笼香销尽火巾泪滴成冰为惜影相伴通宵不灭灯

寄湘灵

泪眼凌寒冻不流每经高处即回头遥知别後西楼上应凭阑干独自愁

冬至宿杨梅馆

十一月中长至夜三千里外远行人若为独宿杨梅馆冷枕单床一病身

临江送夏瞻【瞻年七十余】

悲君老别我沾巾七十无家万里身愁见舟行风又起白头浪里白头人

冬夜示敏巢【时在东都宅】

炉火欲销灯欲尽夜长相对百忧生他时诸处重相见莫忘今宵灯下情

客中守岁【在柳家庄】

守岁樽无酒思乡泪满巾始知为客苦不及在家贫畏老偏惊节防愁预恶春故园今夜里应念未归人

问淮水

自嗟名利客扰扰在人间何事长淮水东流亦不闲

宿樟亭驿

夜半樟亭驿愁人起望乡月明何所见潮水白茫茫

及第後忆旧山

偶献子虚登上第却吟招隐忆中林春萝秋桂莫惆怅纵有浮名不系心

题李次虚窗竹

不用栽为鸣凤管不须截作钓鱼竿千花百草凋零後留向纷纷雪里看

花下自劝酒

酒盏酌来须满满花枝看即落纷纷莫言三十是年少百岁三分已一分

题李十一东亭

相思夕上松台立蛩思蝉声满耳秋惆怅东亭风月好主人今夜在鄜州

春村

二月村园暖桑间戴胜飞农夫春旧谷蚕妾捣新衣牛马因风远鷄豚过社稀黄昏林下路鼓笛赛神归

题施山人野居

得道应无着谋生亦不妨春泥秧稻暖夜火焙茶香水巷风尘少松斋日月长高闲真是贵何处覓侯王

白氏长庆集卷十三

卷十四

钦定四库全书

白氏长庆集卷十四

唐白居易撰

律诗【五言七言自两韵至一百韵凡一百首】翰林中送独孤二十七起居罢职出院

碧落留云住青冥放鹤还银台向南路从此到人间

重寻杏园

忽忆芳时频酩酊却寻醉处重徘徊杏花结子春深後谁解多情又独来

曲江独行【自此後诗在翰林时作】

独来独去何人识廐马朝衣野客心闲爱无风水边坐杨花不动树阴阴

同李十一醉忆元九

花时同醉破春愁醉折花枝作酒筹忽忆故人天际去计程今日到凉州

同钱员外题絶粮僧巨川

三十年来坐对山唯将无事化人间斋时往往闻钟笑一食何如不食闲

絶句代书赠钱员外

欲寻秋景闲行去君病多慵我兴孤可惜今朝山最好强能骑马出来无

晚秋有怀郑中旧隐

天高风嫋嫋乡思绕关河寥落归山梦殷勤采蕨歌病添心寂寞愁入鬓蹉跎晚树蝉鸣少秋阶日上多长闲羡云鹤久别愧烟萝其奈丹墀上君恩未报何

禁中九日对菊花酒忆元九

赐酒盈杯谁共持
宫花满把独相思
相思只傍花边立
尽日吟君咏菊诗【元诗云不是花中
偏爱菊此花开尽更无花】

送王十八归山寄题仙游寺

曾於太白峰前住
数到仙游寺里来
黑水澄时潭底出
白云破处洞门开
林间暖酒烧红叶
石上题诗扫绿苔
惆怅旧游无复到
菊花时节羡君回

荅张籍因以代书

怜君马瘦衣裘薄
许到江东访鄙夫
今日正闲天又暖
可能扶病暂来无

曲江早春

曲江柳条渐无力
杏园伯劳初有声
可怜春浅游人少
好傍池边下马行

见元九悼亡诗因以此寄

夜泪闇销明月幌
春觞遥断牡丹庭
人间此病治无药
唯有楞伽四卷经

寒食夜

无月无灯寒食夜
夜深犹立闇花前
忽因时节惊年几
四十如今欠一年

杏园花落时招钱员外同醉

花园欲去去应迟
正是风吹狼藉时
近西数树犹堪醉
半落春风半在枝

重题西明寺牡丹【时元九在江陵】

往年君向东都去
曾叹花时君未回
今年况作江陵别
惆怅花前又独来
只愁离别长如此
不道明年花不开

同钱员外禁中夜直

宫漏三声知半夜
好风凉月满松筠
此时闲坐寂无语
药树影中惟两人

禁中夜作书与元九

心绪万端书两纸欲封重读意迟迟五声宫漏初鸣後一点窗灯欲灭时

八月十五日夜禁中独直对月忆元九

银台金阙夕沈沈独宿相思在翰林三五夜中新月色二千里外故人心渚宫东面烟波冷浴殿西头钟漏深犹恐清光不同见江陵卑湿足秋阴

寄陈式五兄

年来白发两三茎忆别君时髭未生惆怅料君应满鬓当初是我十年兄

庾顺之以紫霞绮远赠以诗荅之

千里故人心郑重一端香绮紫氛氲开缄日映晚霞色满幅风生秋水纹为褥欲裁怜叶破制裘将剪惜花分不如缝作合欢被寤寐相思如对君

送元八归凤翔

莫道岐州三日程其如风雪一身行与君况是经年别暂到城来又出城

雨雪放朝因怀微之

归骑纷纷满九衢放朝三日为泥涂不知雨雪江陵府今日排衙得免无

咏怀

岁去年来尘土中眼看变作白头翁如何办得归山计两顷村田一亩宫

闻微之江陵卧病以大通中散碧腴垂云膏寄之因题四韵

已题一帖红消散又封一合碧云英凭人寄向江陵去道路迢迢一月程未必能治江上瘴且图遥慰病中情到时想得君拈得枕上开看眼暂明

酬钱员外雪中见寄

松雪无尘小院寒闭门不似住长安烦君想我看心坐报道心空无可看

重酬钱员外

雪中重寄雪山偈问荅殷勤四句中本立空名缘破妄若能无妄亦无空

独酌忆微之【时对所赠盏】

独酌花前醉忆君与君春别又逢君惆怅银杯来处重不曾盛酒劝闲人

微之宅残牡丹

残红零落无人赏雨打风吹花不全诸处见时犹怅望况当元九小庭前

新磨镜

衰容当晚节秋镜偶新磨一与清光对方知白发多鬓毛从幻化心地付头陀任意浑成雪其如似梦何

感发落

昔日愁头白谁知未白衰眼看应落尽无可变成丝八月十五日夜闻崔大员外翰林独直对酒翫月因怀禁中清景偶题是诗

秋月空悬高碧外仙郎静翫禁闱间岁中唯有今宵好海内无如此地闲皓色分明双阙傍清光深到九门关遥闻独醉还惆怅不见金波照玉山

酬王十八见寄

秋思太白峰头雪晴忆仙游洞口云未报皇恩归未得暂君为寄北山文

立春日酬钱员外曲江同行见赠

下直遇春日垂鞭出禁闱两人?手语十里看山归柳色早黄浅水纹新绿微风光向晚好车马近南稀机尽笑相顾不惊鸥鹭飞

和钱员外青龙寺上方望旧山

旧峰松雪旧溪云怅望今朝遥属君共道使臣非俗吏南山莫动北山文

宴周皓大夫光福宅【座上作】

何处风光最可怜
妓堂阶下砌台前
轩车拥路光照地
丝管入门声沸天
绿蕙不香饶桂酒
红樱无色让花钿
野人不敢求他事
唯借泉声伴醉眠

晚秋夜

碧空溶溶月华静
月里愁人吊孤影
花开残菊傍疎篱
叶下衰桐落寒井
塞鸿飞急觉秋尽
邻鷄鸣迟知夜永
凝情不语空所思
风吹白露衣裳冷

惜牡丹花二首【一首翰林院北厅花下作一首新昌窦给事中宅南亭花下作】

惆怅阶前红牡丹
晚来唯有两枝残
明朝风起应吹尽
夜惜衰红把火看

寂寞萎红低向雨
离披破艳散随风
晴明落地犹惆怅
何况飘零泥土中

荅元奉礼同宿见赠

相逢俱叹不闲身
直日常多斋日频
晚鼓一声分散去
明朝风景属何人

荅马侍御见赠

谬入金门侍玉除
烦君问我意何如
蟠木讵堪明主用
笼禽徒与故人疎
苑花似雪同随辇
宫月如眉伴直庐
浅薄求贤思自代
嵇康莫寄絶交书

上元日恩赐曲江宴会即事

赐欢仍许醉
此会兴如何
翰苑主恩重
曲江春意多
花低羞艳妓
鸞散让清歌
共道昇平乐
元和胜永和

夜惜禁中桃花因怀钱员外

前日归时花正红
今夜宿时枝半空
坐惜残芳君不见
风吹狼藉月明中

和钱员外早冬翫禁中新菊

禁署寒气迟
孟冬菊初拆
新黄间繁绿
烂若金照碧
仙郎小隐日
心似陶彭泽
秋怜潭上看
日惯篱边摘
今来此地赏
野意潜自适
金马门内花
玉山峰下客
寒芳引清句
吟翫烟景夕
赐酒色偏宜
握兰香不敌
凄凄百卉死
岁晚水霜积
唯有此花开
殷勤助君惜
【钱尝居蓝田山下故云】

荅刘戒之早秋别墅见寄

凉风木槿篱暮雨槐花枝并起新秋思为得故人诗避地鸟择木入朝鱼在池城中与山下喧静闇相思

凉夜有怀

念别感时节早蛩闻一声风帘夜凉入露簟秋意生灯尽梦初罢月斜天未明闇凝无限思起傍药栏行

秋思

病眠夜少梦闲立秋多思寂寞余雨晴萧条早寒至鸟栖红叶树月照青苔地何况镜中年又过三十二

禁中闻蛩

悄悄禁门闭夜深无月明西窗独闇坐满耳新蛩声

秋虫

切切闇窗下嚶嚶【伊尧切】深草里秋天思妇心雨夜愁人耳

赠别宣上人

上人处世界清净何所似似彼白莲花在水不着水性真悟泡幻行洁离尘滓修道来几时身心俱到此嗟予牵世网不得长依止离念与碧云秋来朝夕起

春夜喜雪有怀王二十二

夜雪有佳趣幽人出书帷微寒生枕席轻素对阶墀坐罢楚弦曲起吟班扇诗明宜灭烛後净爱褰帘时窗引曙色早庭销春气迟山阴应有兴不卧待微之

酬和元九东川路诗十二首【并序】

十二篇皆因新境追惟旧事不能一一曲叙但随而和之唯予与元微之耳

骆口驿旧题诗

拙诗在壁无人爱鸟污苔侵文字残唯有多情元侍御绣衣不惜拂尘看

南秦雪

往岁曾为西邑吏惯从骆口到南秦三时云冷多飞雪二月山寒少有春我思旧事犹惆怅君作初行定苦辛仍赖愁猿寒不叫若闻猿叫更愁人

山枇杷花二首

万重青嶂蜀门口一树红花山顶头春尽忆家归未得低红如解替君愁

叶如裙色碧纱浅花似芙蓉红粉轻若使此花兼解语推囚御史定违程

江楼月

嘉陵江曲曲江池明月虽同人别离一宵光景潜相忆两地阴晴远不知谁料江边怀我夜正当池畔望君时今朝共语方同悔不解多情先寄诗

亚枝花

山邮花木似平阳愁杀多情驄马郎还似昇平池畔坐低头向水自看粧

江上笛

江上何人夜吹笛声声似忆故园春此时闻者堪头白况是多愁少睡人

嘉陵夜有怀二首

露湿墙花春意深西廊月上半床阴怜君独卧无言语惟我知君此夜心

不明不闇朦胧月非暖非寒慢慢风独卧空床好天气平明闲事到心中

夜深行

百年关外夜行客三殿角头宵直人莫道近臣胜远使其如同是不闲身

望驿台【三月三十日】

靖安宅里当窗柳望驿台前扑地花两处春风同日尽居人思客客思家

江岸梨

梨花有意缘和叶一树江头恼杀君最似孀闺少年妇白粧素袖碧纱裙

感元九悼亡诗因为代荅三首

荅谢家最小偏怜女

嫁得梁鸿六七年耽书爱酒日高眠雨荒春圃唯生草雪压朝厨未有烟身病忧来缘女少家
贫忘却为夫贤谁知厚俸今无分枉向秋风吹纸钱

荅骑马入空台

君入空台去朝往暮还来我入泉台去泉门无复开鰥夫仍系职稚女未胜哀寂寞咸阳道家
人覆墓回

荅山驿梦

入君旅梦来千里闭我幽魂欲二年莫忘平生行坐处後堂阶下竹丛前

和元九与吕二同宿话旧感赠

见君新赠吕君诗忆得同年行乐时争入杏园齐马首潜过柳曲鬪蛾眉八人云散俱游宦七
度花开尽别离闻道秋娘犹且在至今时复问微之

忆元九

渺渺江陵道相思远不知近来文卷里半是忆君诗

萧员外寄新茶

蜀茶寄到但惊新渭水煎来始觉珍满瓿似乳堪持翫况是春深酒渴人

寄上大兄【已後诗在邕林居作】

秋鸿过尽无书信病带纱巾强出门独上花台东北望日西愁立到黄昏

病中哭金銮子【小女子名】

岂料吾方病，翻悲汝不全。卧惊从枕上，扶哭就灯前。有女诚为累，无儿岂免怜。病来才十日，养得已三年。慈泪随声迸，悲伤遇物牵。故衣犹架上，残药尚头边。送出深村巷，看封小墓田。莫言三里地，此别是终天。

寄内

桑条初绿即为别，柿叶半红犹未归。不如村妇知时节，解为田夫秋捣衣。

病气

自知气发每因情，情在何由气得平。若问病根深与浅，此身应与病齐生。

叹元九

不入城中来五载，同时班列尽官高。何人牢落犹依旧，唯有江陵元士曹。

眼暗

早年勤倦看书苦，晚岁悲伤出泪多。眼损不知都自取，病成方悟欲如何。夜昏乍似灯将灭，朝闇长疑镜未磨。千药万方治不得，唯应闭目学头陀。

得袁相书

谷苗深处一农夫，面黑头斑手把锄。何意使人犹识我，就田来送相公书。

病中作

病来城里诸亲故，厚薄亲疏心自知。唯有蔚章於我分，深於同在翰林时。

感化寺见元九刘三十二题名处

微之谪去千余里，太白无来十一年。今日见名如见面，尘埃壁上破窗前。

游悟贞寺回山下别张殷衡

世缘未了治不得，孤负青山心共知。愁君又入都门去，即是红尘满眼时。

村居寄张殷衡

金氏村中一病夫生涯濩落性灵迂唯看老子五千字不蹋长安十二衢药铍【徒吊切】夜
倾残酒暖竹床寒取旧毡铺闻君欲发江东去能到茅庵访别无

病中得樊书

荒村破屋经年卧寂絶无人问病身唯有东都樊着作至今书信尚殷勤

开元九诗书卷

红笺白纸两三束半是君诗半是书经年不展缘身病今日开看生蠹鱼

昼卧

抱枕无言语空房独悄然谁知尽日卧非病亦非眠

夜坐

庭前尽日立到夜灯下有时坐彻明此情不语何人会时复长吁一两声

暮立

黄昏独立佛堂前满地槐花满树蝉大抵四时心總苦就中肠断是秋天

有感

絶弦与断丝犹有却续时唯有衷肠断无应续得期

荅友问

似玉童颜尽如霜病鬓新莫惊身顿老心更老於身

村夜

霜草苍苍情切切村南村北行人絶独出门前望野田月明荞麦花如雪

闻虫

闇虫唧唧夜縣縣况是秋阴欲雨天犹恐愁人暂得睡声声移近卧床前

寒食夜有怀

寒食非长非短夜春风不熟不寒天可怜时节堪相忆何况无灯各早眠

赠内

漠漠闇苔新雨地微微凉露欲秋天莫对月明思往事损君颜色减君年

得钱舍人书问眼疾

春来眼闇少心情点尽黄连尚未平唯得君书胜得药开缄未读眼先明

还李十一马

传语李君劳寄马病来唯拄杖持身纵拟强骑无出处却将牵与趁朝人

九日寄行简

摘得菊花?得酒遶村骑马思悠悠下邳田地平如掌何处登高望梓州

夜坐

斜月入前楹迢迢夜坐情梧桐上阶影蟋蟀近牀声曙傍窗闲至秋从簟上生感时因忆事不寝到鸡鸣

村居二首

田园莽苍经春早篱落萧条尽日风若问经过谈笑者不过田舍白头翁

门闭仍逢雪厨寒未起烟贫家重寥落半为日高眠

早春

雪散因和气冰开得暖光春销不得处唯有鬓边霜

和梦游春诗一百韵【并序】

微之既到江陵又以梦游春诗七十韵寄予且题其序曰斯言也不可使不知吾者知知吾者亦不可使不知乐天知吾也吾不敢不使吾子知予辱斯言三复其旨大抵悔既往而悟将来

也然予以为苟不悔不寤则已若悔於此则宜悟於彼也反於彼而悟於妄则宜归於真也况与足下外服儒风内宗梵行者有日矣而今而後非觉路之返也非空门之归也将安反乎将安归乎今所和者其章旨卒归於此夫感不甚则悔不熟感不至则悟不深故广足下七十韵为一百韵重为足下陈梦游之中所以甚感者叙婚仕之际所以至感者欲使曲尽其妄周知其非然後返乎真归乎实亦犹法华经序火宅偈化城维摩经入姪舍过酒肆之义也微之微之予斯文也尤不可使不知吾者知幸藏之云尔昔君梦游春梦游仙山曲恍若有所遇似愜平生欲因寻菖蒲水渐入桃花谷到一红楼家爱之看不足池流渡清泚【雌氏切】草嫩蹋緑蓓门柳闇全低檐樱红半熟转行深深院过尽重重屋乌龙卧不惊青鸟飞相逐渐闻玉佩响始辨珠履躅遥见窗下人娉婷十五六霞光抱明月莲艳开初旭嫋云雨仙氛氲兰麝馥风流薄梳洗时世寬粧束袖輓【乳兗切柔也】异文绫裾轻单丝縠裙腰银线压梳掌金筐蹙带缣紫蒲萄袴花红石竹凝情都未语付意微相矚眉敛远山青鬟低片云緑帟牵翡翠带被解鸳鸯襍【博木切】秀色似堪飡穠华如可掬半卷锦头席斜铺绣腰褥朱唇素指匀粉汗红绵扑心惊睡易觉梦断难续笼委独栖禽劒分连理木存诚期有感誓志贞无黷京洛八九春未曾花里宿壮年徒自弃佳会应无复鸾歌不重闻凤兆徒滋卜韦门女清贵裴氏甥贤淑罗扇夹花灯金鞍攢绣轂既倾南国貌遂坦东床腹刘阮心渐忘潘扬意方睦新修履信笈初食尚书禄九醞备圣贤八珍穷水陆秦家重萧史彦辅怜卫叔朝饌馈独盘夜醪倾百斛亲宾盛辉赫妓乐纷【弋涉切】煜【余六切】宿醉才解醒朝欢俄枕麴饮过君子争令甚将军酷酩酊歌鸛鵒颠狂舞鸛【音劬】鹄【音欲】月流春夜短日下秋天速谢傅隙过驹萧娘风送烛全凋薜花折半死梧桐秃闇镜对孤鸾哀弦留寡鹄凄凄隔幽显冉冉移寒燠万事此时休百身何处赎提携小儿女将领旧姻族再入朱门行一傍青楼哭朽空无廐马水涸失池鹭【莫卜切鵬也】摇落废井梧荒凉故篱菊莓苔上几阁尘土生琴筑【张六切似箏十三弦】舞榭缀蠨蛸歌梁聚蝙蝠嫁分红粉妾卖散苍头仆门客思旁徨家人泣咿噢心期正萧索宦序仍拘局怀策入崑函驱车辞郑鄆逢时念既济聚学思大畜端详筮仕蓍磨拭穿杨鏃始从雠校职首中贤良目一拔侍瑶墀再升紆绣服誓酬君王宠愿使朝廷肃密勿奏封章清明操宪牍鹰鞬中病下豸角当邪触紕缪尽东周申冤动南蜀危言诋閤寺直气忤钧轴不忍曲作钩乍能折为玉扪心无愧畏腾口有谤讟只要明是非何曾虞祸福车摧太行路劒落鄴城狱襄汉问修途荆蛮指殊俗谪为江府掾遣事荆州牧趋走谒麾幢【枯江切】喧烦视鞭朴簿书常自领縲囚每亲鞫竟日坐官曹经旬旷休沐宅荒渚宫草马瘦畬田粟薄俸等涓毫微官同桎梏月中照形影天际辞骨肉鹤病翅羽垂兽穷爪牙缩行看须间白谁劝杯中緑时伤大野麟命问长沙鵬夏梅山雨渍秋瘴海云毒巴水白茫茫楚山青簇簇吟君七十韵是我心所蓄既去诚莫追将来幸前勗欲除忧恼病当取禅经读须悟事皆空无令念将属请思游春梦此梦何闪倏【式竹切】艳色即空花浮生乃焦谷良姻在佳偶顷刻为单独入仕欲荣身须臾成黜辱合者离之始乐兮忧所伏愁恨僧祇长欢荣刹那促觉悟因傍喻迷执由当局膏明诱暗蛾阳焱【以瞻切】奔痴鹿贪为苦聚落爱是悲林麓水荡无明波轮回死生辐尘应甘露洒垢待醍醐浴障要智灯烧魔须慧刀戮外熏性易染内战心难衲【女六切】法句与心玉期君日三复【微之常以法句及心玉头陀经相示故申言以卒其志也】

王昭君二首【时年十七】

满面胡沙满鬓风，眉销残黛脸销红。
愁苦辛勤憔悴尽，如今却是画图中。
汉使却回凭寄语，黄金何日赎蛾眉。
君王若问妾颜色，莫道不如宫里时。

白氏长庆集卷十四

卷十五

<集部,别集类,汉至五代,白氏长庆集>

钦定四库全书

白氏长庆集卷十五

唐白居易撰

律诗【五言七言自两韵至一百韵凡九十九首】

渭村退居寄礼部崔侍郎翰林钱舍人诗一百韵

圣代元和岁闲居渭水阳不才甘命舛多幸遇时康朝野分伦序贤愚定否臧重文疎卜式尚少弃冯唐由是推天运从兹乐性场笼禽放高翥雾豹得深藏世虑休相扰身谋且自强犹须务衣食未免事农桑薤【他计切又音雉】草通三径开田占一坊昼扉肩白版夜碓扫黄粱隙地治场圃闲时粪土疆枳篱编刺夹薤【何戒切葦菜也】塋孽科秧穉力嫌身病农心愿岁穰【如羊切】朝衣典杯酒佩剑博牛羊困倚栽松锸饥提采蕨筐引泉来後?移竹下前冈生计虽勤苦家贫甚渺茫尘埃常满甌钱帛少盈囊弟病仍扶杖妻愁不出房传衣念褊【卢监切】褊【两举切】举案笑糟糠犬吠村胥闹蝉鸣织妇忙纳租看县帖输粟问军仓夕歇攀村树秋行遶野塘云容阴惨澹月色冷悠扬荞麦铺花白棠梨间叶黄早寒风撼撼【山赧切陨落貌】新霁月苍苍园菜迎霜死庭芜过雨荒檐空愁宿鸛壁闇思啼蜚眼为看书损肱因运甕伤病骸浑似木老鬓欲成霜少睡知年长端忧觉夜长旧游多废忘往事偶思量忽忆烟霄路常陪剑履行登朝思检束入阁学趋跄命偶风云会恩覃雨露霑枯发枝叶磨钝起锋铓崔合连镳骛钱兄接翼翔齐竽混韶夏燕石厕琳琅同日升金马分宵直未央共词加宠命合表谢恩光廐马骄初跨天厨味始尝朝晡【奔模切】颁饼饵寒暑赐衣裳对秉鹅毛笔俱含鷄舌香青缣衾薄絮朱里幕高张昼食恒连案宵眠每并牀差肩承诏旨连署进封章起草偏同视疑文最共详灭私容点窜穷理折毫芒便共输肝胆何曾异肺肠慎微参石奋决密学张汤禁闋青交琐官垣紫界墙井栏排菡萏檐瓦鬬鸳鸯楼额题鵷【旨而切】鵷池心浴凤凰风枝万年动温树四时芳宿露凝金掌晨晖上璧璫砌筠涂緑粉庭果滴红浆晓从朝兴庆春陪宴柏梁传呼鞭索索拜舞佩锵锵仙仗环双阙神兵辟两厢火翻红尾旆水卓白竿枪滉漾经鱼藻深沈近浴堂分庭皆命妇对面即储皇贵主冠浮动亲王辔闹装金钿相照耀朱紫间荧煌球簇桃花绮歌巡竹叶觴洼【乌瓜切】银中贵带昂黛内人粧赐褊【胡计切】东城下颁酺【昆逋切】曲水傍樽罍分圣酒妓乐借仙倡浅酌看红药徐吟把緑杨宴回过御陌行歇入僧房白鹿原东郭青龙寺北廊望春花景暖避暑竹风凉下直闲如社寻芳醉似狂有时还後到无处不相将鸡鹤初虽杂萧兰久乃彰来燕隗贵重去鲁孔凄惶聚散期难定

飞沈势不常五年同昼夜一别似参【疏簪切】商屈折孤生竹销摧百链钢途穷任憔悴道在肯旁徨尚念遗簪折仍怜病雀疮恤寒分赐帛救馁减余粮药物来盈裹书题寄满箱殷勤翰林主珍重礼闱郎煦沫诚多谢搏扶岂所望提携劳气力吹簸不飞扬拙劣才何用龙鍾分自当粧嫫徒费黛磨甑【丁历砖也】切诤成章习隐将时背干名与道妨外身宗老氏齐物学蒙庄疎放遗千虑愚蒙守一方乐天无怨叹倚命不匡勩愤懣胸须豁交加臂莫攘珠沈犹是宝金跃未为祥泥尾休摇掉灰心罢激昂渐闲亲道友因病事医王息乱归禅定存神入坐亡断痴求慧剑济苦得慈航不动为吾志无何是我乡可怜身与世从此两相忘

酬卢秘书二十韵【时初奉诏除赞善大夫】

谬历文場选慙非翰苑才云霄高翥致毛羽弱先摧识分忘轩冕知归返草莱杜陵书积蠹丰狱剑生苔晦仄鸣鸡雨春惊震蛰雷旧恩收坠履新律动寒灰凤诏容徐起鵷行许重陪衰颜虽拂拭蹇步尚徘徊睡少钟偏警行迟漏苦催风霜趣朝去雨雪拜陵回上感君犹念傍慙友或推石顽镌费力女丑嫁劳媒倏忽青春度奔波白石颓性将时共背病与老俱来闻有蓬壶客知怀杞梓材世家标甲第官职滞麟台笔尽铅黄点诗成锦绣堆尝思豁云雾忽喜访尘埃心为论文合眉因劝善开不胜珍重意满袖写琼瑰

题卢秘书夏日新栽竹二十韵

湘竹初封植卢生此考盘久持霜节苦新托露根难等度须当砌疎稠要满栏买怜分薄俸栽称作闲官叶剪蓝罗碎茎抽玉琯端几声清淅沥一簇绿檀栾未夜青岚入先秋白露团拂肩摇翡翠慰手弄琅玕韵透窗风起陰铺砌月残炎天闻觉冷窄地见疑寬梢动胜摇扇枝低好挂冠碧笼烟幂幂【莫狄切】珠洒雨珊珊晚箨【他各切】晴云展阴芽蛰虺蟠爱从抽马策惜未截鱼竿松韵徒烦听桃夭不足观梁慙当家杏台陋本司兰【古诗云卢家兰室杏为梁又秘书府即兰台也】撑拨诗人兴勾牵酒客欢静连芦簟滑凉拂葛衣单岂止消时暑应能保岁寒莫同凡草木一种夏中看

渭村酬李二十见寄

百里音书何太迟暮秋把得暮春诗柳条绿日君相忆梨叶红时我始知莫叹学官贫冷落犹胜村客病支离形容意绪遥看取不似华阳观里时

初授赞善大夫早朝寄李二十助教

病身初谒青宫日衰貌新垂白发年寂寞曹司非热地萧条风雪是寒天远坊早起常侵鼓瘦马行迟苦费鞭一种共君官职冷不如犹得日高眠

欲与元八卜隣先有是赠

平生心迹最相亲欲隐墙东不为身明月好同三径夜綠杨宜作两家春每因暂出犹思伴岂得安居不择隣何独终身数相见子孙长作隔墙人

游城南留元九李二十晚归

老游春饮莫相违不独花稀人亦稀更劝残盃看日影犹应趣得鼓声归

广宣上人以应制诗见示因以赠之诏许上人居安国寺红楼院以诗供奉

道林谈论惠休诗一到人天便作师香积筵承紫泥诏昭阳歌唱碧云词红楼许住请银钥翠輦陪行蹋玉墀惆悵甘泉曾侍从与君前後不同时

重过秘书旧房因题长句【时为赞善大夫】

阁前下马思徘徊第二房门手自开昔为白面书郎去今作苍头赞善来吏人不识多新补松竹相亲是旧栽应有题墙名姓在试将衫袖拂尘埃

重到城七絕句

见元九

容貌一日減一日心情十分无九分每逢陌路犹嗟叹何况今朝是见君

高相宅

青苔故里怀恩地白发新生抱病身涕泪虽多无哭处永宁门館属他人

张十八

諫垣几见迁遗补宪府频闻转殿监独有咏诗张太祝十年不改旧官衔

刘家花

刘家墙上花还发李十门前草又春处处伤心心始悟多情不及少情人

裴五

莫怪相逢无笑语感今思旧戟门前张家伯仲偏相似每见青杨一惘然

仇家酒

年年老去欢情少处处春来感事深时到仇家非爱酒醉时心胜醒时心

恒寂师

旧游分散人零落如此伤心事几条会逐禅师坐禅去一时灭尽定中消

靖安北街赠李二十

榆荚抛钱柳展眉两人并马语行迟还似往年安福寺共君私试却回时

重伤小女子

学人言语凭牀行嫩似花房脆似琼才知恩爱迎三岁未辨东西过一生汝异下殇应杀礼吾非上圣讵忘情伤心自叹鸠巢拙长堕春雏养不成

过颜处士墓

向坟通径没荒榛满室诗书积闇尘长夜肯教黄壤晓悲风不许白杨春簞瓢颜子生仍促布被黔娄死更贫未会悠悠上天意惜将富寿与何人

题周皓大夫新亭子二十二韵

东道常为主南亭别待宾规模何日创景致一时新广砌罗红药疎窗緑筠鑱开宾阁晓梯上妓楼春置醴宁三爵加笏过八珍茶香飘紫笋脰缕落红鳞辉赫车舆闹珍奇鸟兽驯猕猴看枥马鸚鵡唤家人锦额帘高卷银花盞慢巡劝尝光禄酒许看洛川神【周兼光禄卿有家妓数十人】敛翠凝歌黛流香动舞巾裙翻绣鵷鷺梳陷钿麒麟怨音含楚箏娇语带秦侍儿催画烛醉客吐文茵投辖多连夜鸣珂便达晨入朝纓紫绶待漏拥朱轮贵介交三事光荣照四隣甘浓将奉客稳煖不缘身十载歌鍾地三朝节钺臣爱才心偶悦敦旧礼殷勤门以招贤盛家因好事贫始知豪杰意富贵为交亲

赋得听边鸿

惊风吹起塞鸿羣半拂平沙半入云为问昭君月下听何如苏武雪中闻

见杨宏贞诗赋因题絶句以自谕

赋句诗章妙入神末年三十即无身常嗟薄命形憔悴若比宏贞是幸人

病中早春

今朝枕上觉头轻
强起堦前试脚行
羶膩断来无气力
风痰恼得少心情
煖销霜瓦津初合
寒减冰渠凍不成
唯有愁人鬓间雪
不随春尽逐春生

送人贬信州判官

地僻山深古上饶
土风贫薄道程遥
不唯迁客须恓屑
见说居人也寂寥
溪畔毒沙藏水弩
城头枯树下山魈
【先雕切】若於此郡为卑吏
刺史厅前又折腰

曲江醉後赠诸亲故

郭东丘墓何年客
江畔风光几日春
只合殷勤逐杯酒
不须疎索向交亲
中天或有长生药
下界应无不死人
除却醉来开口笑
世间何事更关身

和元八侍御升平新居四絶句【时方与元八卜隣】看花屋

忽惊映树新开屋
却似当檐故种花
可惜年年红似火
今春始得属元家

累土山

堆土渐高山意出
终南移入户庭间
玉峯蓝水应惆怅
恐见新山望旧山
【元八旧居在蓝田山】

高亭

亭脊太高君莫拆
东家留取当西山
好看落日斜衔处
一片春岚映半环

松树

白金换得青松树
君既先栽我不栽
幸有西风易凭仗
夜深偷得好声来

醉後却寄元九

蒲池村里匆匆别
澧水桥边兀兀回
行到地门残酒醒
万重离恨一时来

重寄

萧散弓惊鴈分飞
剑化龙悠悠天地内
不死会相逢李十一
舍人松园饮小酎酒
得元八侍御

诗叙云在台中推院有鞠狱之苦即事书怀因酬四韵

爱酒舍人开小酌能文御史寄新诗
乱松园里醉相忆古柏厅前忙不知
早夏我当逃暑日晚衙君是虑囚时
唯应清夜无公事新草亭中好一期

重到华阳观旧居

忆昔初年三十二当时秋思已难堪
若为重入华阳院病鬓愁心四十三

荅劝酒

莫怪近来都不饮几回因醉却沾巾
谁料平生狂酒客如今变作酒悲人

题王侍御池亭

朱门深锁春池满岸落蔷薇水浸莎
毕竟林塘谁是主主人来少客来多

听水部吴员外新诗因赠絶句

朱绂仙郎白雪歌和人虽少爱人多
明朝说向诗家道水部如今不姓何

雨夜忆元九

天阴一日便堪愁何况连宵雨不休
一种雨中君最苦偏梁阁道向通州

雨中?元九诗访元八侍御

微之诗卷忆同开暇日多应不入台
好句无人堪共咏冲泥蹋水就君来

赠杨秘书巨源【杨尝有赠洛州诗由三刀梦益州一箭取辽城由是知名】

早闻一箭取辽城相识虽新有故情
清句三朝谁是敌白须四海半为兄
贫家薤草时时入瘦马寻花处处行
不用更教诗过好折君官职是声名

和武相公感韦令公旧池孔雀【同用深字】

索寞少颜色池边无主禽难收带泥
翅易结着人心顶毳【充芮切】落残
碧尾花销闇金放归飞不得云海故
巢深

寄生衣与微之因题封上

浅色縠纱轻似雾 纺花纱袴薄如云 莫嫌轻薄但知着 犹恐通州热杀君

白牡丹

白花冷淡无人爱 亦占芳名道牡丹 应是东宫白赞善 被人还唤作朝官

梦旧

别来老大苦修道 链得离心成死灰 平生忆念消磨尽 昨夜因何入梦来

戏题卢秘书新移蔷薇

风动翠条腰嫋嫋 露垂红萼泪阑干 移他到此须为主 不爱花人莫使看

曲江夜归闻元八见访

自入台来见面稀 班中遥得揖容辉 早知相忆来相访 悔待江头明月归

苦热题恒寂师禅室

人人避暑走如狂 独有禅师不出房 可是禅房无热到 但能心静即身凉

微之到通州日授馆未安 见尘壁间有数行字 读之即仆旧诗 其落句云 緑水红莲一朵开 千花百草无颜色 然不知题者何人也 微之吟叹不足 因缀一章 兼録仆诗 本同寄省 其诗乃是十五年前初及第时 赠长安妓人阿软絶句 缅思往事 杳若梦中 怀旧感今 因酬长句

十五年前似梦游 曾将诗句结风流 偶助笑歌嘲阿软 可知传诵到通州 昔教红袖佳人唱 今遣青衫司马愁 惆怅又闻题处所 雨淋江馆破墙头

得微之到官後书 备知通州之事 怅然有感 因成四章

来书子细说通州 州在山根峡岸头 四面千重火云合 中心一道瘴江流 虫蛇白昼拦官道 蚊蚋黄昏扑郡楼 何罪遣君居此地 天高无处问来由

匱【遏合切】 匱巔山万仞 余人家应似甑中居 寅年篱下多逢虎 亥日沙头始卖鱼 衣斑梅雨长须熨 米涩畬田不解鉏 努力安心过三考 已曾愁杀李尚书【李实尚书先贬此州身歿於彼处】

人稀地僻医巫少夏旱秋霖瘴疰多老去一身须爱惜别来四体得如何侏儒饱笑东方朔
薏苡谗忧马伏波莫遣沈愁结成病时时一唱濯缨歌

通州海内恹惶地司马人间冗长官伤鸟有弦惊不定卧龙无水动应难剑埋狱底谁深掘松
偃霜中尽冷看举目争能不惆怅高车大马满长安

病中荅招饮者

顾我镜中悲白发尽君花下醉青春不缘眼痛兼身病可是樽前第二人

燕子楼三首【并序】

徐州故尚书张有爱妓曰盼盼善歌舞雅多风态予为校书郎时游徐泗闲张尚书宴予酒酣
出盼盼以佐欢欢甚予因赠诗云醉娇胜不得风嫋牡丹花尽欢而去迹後絶不相闻迨兹仅
一纪矣昨日司勳员外郎张仲素缙之访予因吟新诗有燕子楼三首词甚婉丽诘其由为盼
盼作也缙之从事武宁军累年颇知盼盼始末云尚书既没归葬东洛而彭城有张氏旧第第
中有小楼名燕子盼盼念旧爱而不嫁居是楼十余年幽独块然于今尚在予爱缙之新咏感
彭城旧游因同其题作三絶句

满窗明月满帘霜被冷灯残拂卧牀燕子楼中霜月夜秋来只为一人长

钿晕罗衫色似烟几回欲着即潸然自从不舞霓裳曲叠在空箱十一年

今春有客洛阳回曾到尚书墓上来见说白杨堪作柱争教红粉不成灰

初贬官过望秦岭【自此後诗江州路上作】

草草辞家忧後事迟迟去国问前途望秦岭上回头立无限秋风吹白须

蓝桥驿见元九诗【诗中云江陵归时逢春雪】

蓝桥春雪君归日秦岭秋风我去时每到驿亭先下马循墙遶柱覓君诗

韩公堆寄元九

韩公堆北涧西头冷雨凉风拂面秋努力南行少惆怅江州犹似胜通州

发商州

商州馆里停三日待得妻孥相逐行若比李三犹自胜儿啼妇哭不闻声

武关南见元九题山石榴花见寄

往来同路不同时前後相思两不知行过关门三四里榴花不见见君诗

红鹦鹉【商山路逢】

安南远进红鹦鹉色似桃花语似人文章辩慧皆如此笼檻何年出得身

题四皓庙

卧逃秦乱起安刘舒卷如云得自由若有精灵应笑我不成一事谪江州

罢药

自学坐禅休服药从他时复病沈沈此身不要全强健强健多生人我心

白鹭

人生四十未全衰我为愁多白发垂何故水边双白鹭无愁头上亦垂丝

襄阳舟中

下马襄阳郭移舟汉阴驿秋风截江起寒浪连天白本是多愁人复此风波夕

江夜舟行

烟澹月蒙蒙舟行夜色中江铺满槽水帆展半樯风叫曙嗷嗷鴈啼秋唧唧虫只应催北客早作白须翁

红藤杖

交亲过滢别车马到江回唯有红藤杖相随万里来

江上吟元八絕句

大江深处月明时一夜吟君小律诗应有水仙潛出听翻将唱作步虚词

途中感秋

节物行摇落年颜坐变衰
树初黄叶日人欲白头时
乡国程程远亲朋处处辞
唯隣病与老一步不相离

登郢州白雪楼

白雪楼中一望乡青山簇簇水茫茫
朝来渡口逢京使说道烟尘近洛阳【时淮西寇未平】

舟夜赠内

三声猿後垂乡泪一叶舟中载病身
莫凭水窗南北望月明月闇總愁人

逢旧

我梳白发添新恨君扫青蛾减旧容
应被傍人怪惆怅少年离别老相逢

白口阻风十日

洪涛白浪塞江津处处遭回事事违
世上方为失途客江头又作阻风人
鱼鰕遇雨腥盈鼻蚊蚋和烟痒满身
老大光阴能几日等闲白口坐经旬

浦中夜泊

闇上江堤还独立水风霜气夜棱棱
回看深浦停舟处芦荻花中一点灯

卢侍御与崔评事为予於黄鹤楼置宴宴罢同望

江边黄鹤古时楼芳置华筵待我游
楚使森【匹妙切】茫云水冷商声清脆
管弦秋白花浪溅头陀寺红叶林笼鸚鵡洲
摠是平生未行处醉来堪赏醒堪愁

舟中读元九诗

把君诗卷灯前读诗尽灯残天未明
眼痛灭灯犹闇坐逆风吹浪打船声

舟行阻风寄李十一舍人

扁舟厌泊烟波上轻策闲寻浦屿【象吕切】
间虎蹋青泥稠似印风吹白浪大於山
且愁江郡何时到敢望京都几岁还
今日料君朝退後迎寒新耐煖开颜【李好小酌酒故云】

雨中题衰柳

湿屈青条折寒飘黄叶多不知秋雨意更遣欲何如

题王处士郊居

半依云渚半依山爱此令人不欲还负郭田园八九顷向阳茅屋两三间寒松纵老风标在野鹤虽饥饮啄闲一卧江村来早晚着书盈帙鬓毛斑

岁晚旅望

朝来暮去星霜换阴惨阳舒气序牵万物秋霜能坏色四时冬日最凋年烟波半露新沙地鸟雀羣飞欲雪天向晚苍苍南北望穷阴离思两无边

晏坐闲吟

昔为京洛声华客今作江湖潦倒翁意气销磨羣动里形骸变化百年中霜侵残鬓无多黑酒伴衰颜只颺红愿学禅门非想定千愁万念一时空

题李山人

无烟火室无妻篱落萧条屋舍低每日将何疗饥渴井华云粉一刀圭

读庄子

去国辞家谪异方中心自怪少忧伤为寻庄子知归处认得无何是本乡

江楼偶宴赠同座

南浦闲行罢西楼小宴时望湖凭槛久待月放杯迟江果尝卢橘山歌听竹枝相逢且同乐何必旧相知

放言五首【并序】

元九在江陵时有放言长句诗五首韵高而体律意古而词新予每咏之甚觉有味虽前辈深於诗者未有此作唯李颀【渠宜切】有云济水至清河自浊周公大圣接輿狂斯句近之矣予出佐浔阳未届所任舟中多暇又江上独吟因缀五篇以续其意耳

朝真暮伪何人辩古往今来底事无但爱庄生能诈圣可知甯子解佯愚草萤有耀终非火荷

露虽团岂是珠不取燔柴兼照乘可怜光彩亦何殊

世途倚伏都无定尘网牵纏卒未休祸福回还车转毂荣枯反覆手藏钩龟灵未免刳肠患马失应无折足忧不信君看奕棋者输赢须待局终头

赠君一法决狐疑不用钻龟与祝蓍试王要烧三日满【真玉烧三日不热】辨材须待七年期【豫章木生七年而後知】周公恐惧流言日王莽谦恭未篡时向使当时身便死一生真伪复谁知

谁家第宅成还破何处亲宾哭复歌昨日屋头堪炙手今朝门外好张罗北邙未省留闲地东海何曾有定波莫笑贱贫夸富贵共成枯骨两如何

泰山不要欺毫末颜子无心羨老彭松树千年终是朽槿花一日自为荣何须恋世常忧死亦莫嫌身漫厌生去死来都是幻人哀乐系何情

岁暮道情二首

壮日苦曾惊岁月长年都不惜光阴为学空门平等法先齐老少死生心

半故青衫半白头雪风吹面上江楼禅功自见无人觉合是愁时亦不愁

读李杜诗集因题卷後

翰林江左日员外剑南时不得高官职仍逢苦乱离暮年逋客恨浮世谪仙悲吟咏流千古声名动四夷文场供秀句乐府待新词天意君须会人间要好诗【贺监知章目李白为谪仙人】

强酒

若不坐禅销妄想即须吟醉放狂歌不然秋月春风夜争那闲思往事何

独树浦雨夜寄李六郎中

忽忆两家同里巷何曾一处不追随闲游预筭分朝日静语多同待漏时花下放狂冲黑饮灯前起坐彻明棋可知风雨孤舟夜芦苇丛中作此诗

听崔七妓人箏

花脸云鬟坐玉楼十三弦里一时愁凭君向道休弹去白尽江州司马头

望江州

江回望见双华表知是浔阳西郭门犹去孤舟三四里水烟沙雨欲黄昏

初到江州

浔阳欲到思无穷庾亮楼南湓口东树木凋疎山雨後人家低湿水烟中菰【攻乎切】蒋【子良切】餽马行无力芦荻编房卧有风遥见朱轮来出郭相迎劳动使君公

醉後题李马二妓

行摇云髻花钿节应似霓裳趁管弦艷动舞裙浑是火愁凝歌黛欲生烟有风纵道能回雪无水何由忽吐莲疑是两般心未决雨中神女月中仙

卢侍御小妓乞诗座上留赠

郁金香汗裊【一入切】歌巾山石榴花染舞裙好似文君还对酒胜於神女不归云梦中那及觉时见宋玉荆王应羡君

白氏长庆集卷十五

卷十六

钦定四库全书

白氏长庆集卷十六

唐白居易撰

律诗

东南行一百韵寄通州元九侍御沔州李十一舍人果州崔二十二使君开州韦大员外庾三十二补阙杜十四拾遗李二十助教员外窦七校书

南去经三楚东来过五湖山头看候馆水面问征途地远穷江界天低极海隅飘零同落叶浩荡似乘桴渐觉乡原异深知土产殊夷音语嘲哂【先击切】蛮态笑睢盱水市通闾闾烟村混舳【直六切】舳【龙都切】吏徵鱼户税人纳火田租亥日饶鰕蟹寅年足虎貔【抽居切】成人男作𠂔【古患切】似鬼女为巫楼閣攢倡妇堤喧簇贩夫夜船论铺赁春酒断瓠沽见果多卢橘闻禽悉鷓鴣山歌猿独叫野哭鸟相呼岭徼云成栈江郊水当郛月移翘柱鹤风泛颭樯乌鰲碍潮无信蛟惊浪不虞鼉鸣泉窟室蜃【时軫切】结气浮图树裂山魑【先雕切】穴沙含水弩枢喘牛犁紫芋羸马放青菰绣面谁家婢鵲头几岁奴泥中采菱芡【巨险切】烧後拾樵苏鼎臠愁烹鼈盘腥厌脍鲈钟仪徒恋楚张翰浪思吴气序凉还热光阴旦复晡【奔模?】身方逐萍梗年欲近桑榆渭北田园废江西岁月徂忆归恒惨澹怀旧忽踟蹰自念咸秦客尝为邹鲁儒蘊藏经国术轻弃度关繻赋力凌鸚鵡词锋敌轳轳战文重掉鞅射策一弯弧崔杜鞭齐下元韦饗并驱名声逼杨马交分过萧朱世务轻磨揣周行窃觊觎风云皆会合雨露各沾濡共偶昇平代偏慙固陋躯承明连夜直建礼拂晨趋美服颁王府珍羞降御厨议高通白虎谏切伏青蒲柏殿行陪宴花楼走看酺【薄胡切】神旗张鸟兽天籁动笙竽丸劒星芒耀鱼龙电策駟定场排汉旅促坐进吴歙【羊朱切吴歌曰歙】缥缈疑仙乐婬娟胜画图歌鬟低翠羽舞汗堕红珠别选闲游伴潜招小饮徒一杯愁已破三盞气弥羸软美仇家酒幽闲葛氏姝十千方得斗二八正当鑪论笑杓胡碑谈怜玃噉嚙李酣犹短窳庾醉更薦【因肩切】迂鞍马呼教住骰盘喝遣输长驱波卷白连掷采成卢【骰盘卷白波莫走鞍马皆当时酒令】筹并频逃席觥严列置盂满卮那可濯颓玉不胜扶入视中枢草归乘内厩驹醉曾冲宰相骄不揖金吾日近恩虽重云高势却孤翻身落霄汉失脚倒泥涂博望移门籍浔阳佐郡符【予自太子赞善大夫出为江州司马】时情变寒暑世利算锱铢即日辞双阙明朝别九衢播迁分郡国次第出京都【十年春微之移佐通州其年秋予出佐浔阳明年冬杓直出牧沔州崔二十二出牧果州韦大出牧开州】秦岭驰三驿商山上二邽【云俱切商山险道中有东西二邽】崑阳亭寂寞夏口路崎岖大道全生棘中丁尽执殳江关未彻警淮寇尚稽诛【时淮西未平路经襄郡二州界所见如此】林对东西寺山分大小姑【东林西

林寺在庐山北大姑小姑在庐山南彭蠡湖中】庐峯莲刻削湓浦带紫纁【莲花峯在庐山北湓水在江城南何逊诗云湓城对湓水湓水萦如带】九派吞青草【浔阳在九派南通青草洞庭湖】孤城覆緑芜【南方城壁多以草覆】黄昏钟寂寂清晓角呜呜春色辞门柳秋声到井梧残芳悲鶗鴂【音啼决】暮节感茱萸拆金英菊花飘雪片芦波红日斜没沙白月平铺几见林抽笋频惊燕引雏岁华何倏忽年少不须與眇默思千古苍茫想八区孔穷缘底事颜夭有何辜龙智犹经醢龟灵未免剗穷通应已定圣哲不能逾况我身谋拙逢他厄运拘漂流随大海鎚鍛任洪炉险阻尝之矣栖迟命也夫沈冥消意气穷饿耗肌肤防瘡和残药迎寒补旧襦书牀鸣蟋蟀琴匣网踟躕贫室如悬磬端忧剧守株时遭人指点数被鬼揶【余遮切】揶【云俱切】兀兀都疑梦昏昏半是愚女惊朝不起妻怪夜长吁万里抛朋侣三年隔友于自然悲聚散不是恨荣枯去夏微之疟今春席八殂天涯书达否泉下哭知无【去年间元九疟书去竟未报今春闻席八殂久与还往能无恻矣】谩写诗盈卷空盛酒满壶只添新怅望岂复旧欢娱壮志因愁减衰容与病俱相逢应不识满颌【户感切】白髭须

谪居

面瘦头班四十四远谪江州为郡吏逢时弃置从不才未老衰羸为何事火烧寒涧松为烬霜降春林花委地遭时荣悴一时间岂是昭昭上天意

初到江州寄翰林张李杜三学士

早攀霄汉上天衢晚落风波委世途雨露施恩无厚薄蓬蒿随分有荣枯伤禽侧翅惊弓箭老妇低颜事舅姑碧落三仙曾识面年深记得姓名无

庾楼晓望

独凭朱槛立凌晨山色初明水色新竹雾晓笼衔岭月苹风送煖过江春子城阴处犹残雪衙鼓声前未有尘三百年来庾楼上曾经多少望乡人

宿西林寺

木落天晴山翠开爱山骑马入山来心知不及柴桑令一宿西林便欲回【柴桑令刘遗民是也】

江楼宴别

楼中别曲催离酌灯下红裙间緑袍缥缈楚风罗绮薄铮鏦越调管弦高寒流带月澄如镜夕吹和霜利似刀樽酒未空欢未尽舞腰歌袖莫辞劳

题山石榴花

一丛千朵压栏干剪碎红绡却作团风嫋舞腰香不尽露销粧脸泪新乾蔷薇带刺攀应懒菡萏生泥翫亦难争及此花檐户下任人采弄尽人看

代春赠

山吐晴峰水放光辛夷花白柳梢黄但知莫作江西意风景何曾异帝乡

荅春

草烟低重水花明从道风光似帝京其奈山猿江上叫故乡无此断肠声

樱花花下叹白发

逐处花皆好随年貌自衰红樱满眼日白发半头时倚树无言久攀条欲放迟临风两堪叹如雪复如丝

惜落花赠崔二十四

漠漠纷纷不奈何狂风急雨两相和晚来怅望君知否枝上稀疏地上多

移山樱桃

亦知官舍非吾宅且鬪山樱满院栽上佐近来多五考少应四度见花开

官舍闲题

职散优闲地身慵老大时送春唯有酒销日不过基禄米甿【工良切】牙稻园疏鸭脚葵饱餐晨晏起余暇弄龟儿【龟儿即小侄名】

晚春登大云寺南楼赠常禅师

花尽头新白登楼意若何岁时春日少世界苦人多愁醉非因酒悲吟不是歌求师治此病唯劝读楞伽

北楼送客归上都

凭高眺远一凄凄却下朱栏手共携京路人归天直北江楼客散日平西长津欲渡回船尾残酒重倾簇马蹄不独别君须强饮穷愁自要醉如泥

北亭招客

疎散郡丞同野客幽闲官舍抵山家春风北户千茎竹晚日东园一树花小盞吹醅【铺杯切】尝冷酒深炉敲火炙新茶能来尽日观碁否太守知慵放晚衙

宿西林寺早赴东林满上人之会因寄崔二十二员外

谪辞魏阙鵷鸾隔老入庐山麋鹿随薄暮萧条投寺宿凌晨清浄与僧期双林我起闻钟後只日君趋入阁时鹏鷃高低分皆定莫劳心力远相思

游宝称寺

竹寺初晴日花塘欲晚春野猿疑弄客山鸟似呼人酒嬾倾金液茶新碾玉尘可怜幽静地堪寄老慵身

早春闻提壶鸟因题隣家

厌听秋猿催下泪喜闻春鸟劝提壶谁家红树先花发何处青楼有酒沽进士龔豪寻静尽拾遗风采近都无欲期明日东邻醉变作腾腾一俗夫

见紫薇花忆微之

一丛闇淡将何比浅碧笼裙衬紫巾除却微之见应爱人间少有别花人

蔷薇花一丛独死不知其故因有是篇

柯条未尝损根蔕不曾移同类今齐茂孤芳忽独萎仍怜委地日正是带花时碎碧初凋叶焦红尚恋枝乾坤无厚薄草木自荣衰欲问因何事春风亦不知

湖亭望水

久雨南湖涨新晴北客过日沈红有影风定緑无波岸没闾阎少滩平船舫多可怜心赏处其柰独游何

闲游

外事因慵废中怀与静期寻泉上山远看笋出林迟白石磨樵斧青竿理钓丝澄清深浅好最爱夕阳时

忆微之伤仲远【李三仲远去年春丧】

幽独辞羣久漂流去国賒只将琴作伴唯以酒为家感逝因看水伤离为见花李三埋地底元九谪天涯举眼青云远回头白日斜可能胜贾谊犹自滞长沙

过郑处士

闻道移居村坞间竹林多处独开关故来不是求他事暂借南亭一望山

霜雨苦多江湖暴涨块然独望因题北亭

自作浔阳客无如苦雨何阴昏晴日少闲闷睡时多湖阔将天合云低与水和篱根舟子语巷口钓人歌雾鸟沈黄气风帆蹙白波门前车马道一宿变江湖

春末夏初闲游江郭二首

闲出乘轻屐徐行蹋软沙观鱼傍湓浦看竹入杨家【湓浦多鱼浦西有杨侍郎宅多好竹】林迸穿篱笋藤飘落水花雨埋钓舟小风扬酒旗斜嫩剥青菱角浓煎白茗茶淹留不知夕城树欲栖鸦

二

柳影繁初合莺声澁渐稀早梅迎夏结残絮送春飞西日韶光尽南风暑气微展张新小簟熨帖旧生衣緑蚁杯香嫩红丝鱠缕肥故园无此味何必苦思归

红藤杖【杖出南蛮】

南诏红藤杖西江白首人时时?步月处处把寻春劲健孤茎直疎圆六节匀火山生处远泸水洗来新粗细才盈手高低仅过身天边望乡客何日挂归秦

风雨中寻李十一因题船上

匹马来郊外扁舟在水滨可怜冲雨客来访阻风人小醺【苦盍切】沽清醕【私?切】行厨煮白鳞停杯看柳色各忆故园春

题庐山山下汤泉

一眼汤泉流向东浸泥浇草煖无功骊山温水因何事流入金铺玉瓮中

寄蕲州簟与元九因题六韵【时元九鰥居】

笛竹出蕲春霜刀劈翠筠织成双锁簟寄与独眠人卷作筒中布舒为席上珍滑如铺薤叶冷似卧龙鳞清润宜乘露鲜华不受尘通州炎瘴地此物最关身

秋热

西江风候接南威暑气常多风气微犹道江州最凉冷至今九月着生衣

题元八溪居

溪岚漠漠树重重水檻山牕次第逢晚叶尚开红踟躕秋芳初结白芙蓉声来枕上千年鹤影落杯中五老峯更媿殷勤留客意鱼鲜饭细酒香浓

晚出西郊

散吏闲如客贫州冷似村早凉湖北岸残照郭西门嬾镊【尼辄切】从须白休医任眼昏老来何所用少兴不多言

阶下莲

叶展影翻当砌月花开香散入帘风不如种在天池上犹胜生於野水中

端居咏怀

贾生俟罪心相似张翰思归事不如斜日早知惊鵬鸟秋风悔不忆鲈鱼胸襟曾贮匡时策怀袖犹残谏猎书从此万缘都摆落欲携妻子买山居

夜宿江浦闻元八改官因寄此诗

君游丹陛已三迁我泛沧浪欲二年剑佩晓趋双凤阙烟波夜宿一渔船交亲尽在青云上乡国遥抛白日边若报生涯应笑杀结茅栽芋种畬田

百花亭

朱檻在空虚凉风八月初山形如峴首江色似桐庐佛寺乘船入人家枕水居高亭仍有月今夜宿何如

江楼早秋

南国虽多热秋来亦不迟湖光朝霁後竹气晚凉时楼阁宜佳客江山入好诗清风水苹叶白露木兰枝欲作云泉计须营伏腊资匡庐一步地官满更何之

送客之湖南

年年渐见南方物事事堪伤北客情山鬼趨【丘妖切】跳唯一足峡猿哀怨过三声帆开青草湖中去衣湿黄梅雨里行别後双鱼难定寄近来朝不到湓城

百花亭晚望夜归

百花亭上晚徘徊云影阴晴掩复开日色悠扬暎山尽雨声萧?渡江来鬓毛遇病双如雪心绪逢秋一似灰向夜欲归愁未了满湖明月小船回

西楼

小郡大江边危楼夕照前青芜卑湿地白露沆【呼决切】寥天乡国此时阻家书何处传仍闻陈蔡戍转战已三年

寻李道士山居兼呈元明府

尽日行还歇迟迟独上山攀藤老筋力照水病容颜陶巷招居住茅家许往还饱谙荣辱事无意恋人间

四十五

行年四十五两鬓半苍苍清瘦成诗癖粗豪酒放狂老来犹委命安处即为乡或拟庐山下来春结草堂

寄李相公崔侍郎钱舍人

曾陪鹤驭两三仙亲侍龙舆四五年天上欢华春有限世间漂泊海无边荣枯事过都成梦忧喜心忘便是禅官满更归何处去香炉峰在宅门前

厅前桂

天台岭上凌霜树司马厅前委地丛一种不生明月里山中犹校胜尘中

寻黄道士药堂因有题赠

行行覓路缘松峤步步寻花到杏坛白石先生小有洞黄芽姹【齿下切】女大还丹常悲东郭千家塚欲乞西山五色丸但恐长生须有籍仙台试为捡名看

秋晚

篱菊花稀砌桐落树阴离离日色薄单幕疎帘贫寂寞凉风冷露秋萧索光阴流转忽已晚颜色凋残不如昨莱妻卧病月明时不捣寒衣空捣药

南浦岁暮对酒送王十五归京

腊後水生覆湓水夜来云闇失庐山风飘细雪落如米索索萧萧芦苇间此地二年留我住今朝一酌送君还相看渐老无过醉聚散穷通总是闲

除夜

薄晚支颐坐中宵枕臂眠一从身去国再见日周天老度江南岁春抛渭北田浔阳来早晚明日是三年闻李十一出牧沔州崔二十二出牧果州因寄絶句

平生相见即眉开静念无如李与崔各是天涯为刺史缘何不覓九江来

元和十三年淮寇未平诏停岁仗愤然有感率尔成章

闻停岁仗軫皇情应为淮西寇未平不分气从歌里发无明心向酒中生愚计忽思飞短檄狂心便欲请长缨从来妄动多如此自笑何曾得事成

庾楼新岁

岁时销旅貌风景触乡愁牢落江湖意新年上庾楼

上香炉峯

倚石攀萝歇病身青筇竹杖白纱巾他时画出庐山障便是香炉峯上人

忆微之

与君何日出屯蒙鱼恋江湖鸟厌笼分手各抛沧海畔折腰俱老緑衫中三年隔阔音尘断两地飘零气味同又被新年劝相忆柳条黄软欲春风

雨夜赠元十八

卑湿沙头宅连阴雨夜天共听檐溜滴心事两悠然把酒循环饮移牀曲尺眠莫言非故旧相识已三年

寒食江畔

草香沙暖水云晴风景令人忆帝京还似往年春气味不宜今日病心情闻莺树下沈吟立信马江头取次行忽见紫桐花怅望下邳明日是清明

三月三日登庾楼寄三十二

三日欢游辞曲水二年愁卧在长沙每登高处长相忆何况兹楼属庾家

闻李六景俭自河东令授唐邓行军司马以诗贺之

谁能淮上静风波闻道河东应此科不独文词供奉记定将谈笑解兵戈泥埋剑戟终难久水借蛟龙可在多四十着绯军司马男儿官职未蹉跎

石榴树

可怜颜色好阴凉叶剪红牋花扑霜伞盖低垂金翡翠薰笼乱搭绣衣裳春芽细炷千灯焰夏蘂浓焚百和香见说上林无此树只教桃柳占年芳【柳一作李】

大林寺桃花

人间四月芳菲尽山寺桃花始盛开长恨春归无覓处不知转入此中来

咏怀

自从委任顺浮沈渐觉年多功用深面上减除忧喜色胸中消尽是非心妻儿不问唯耽酒冠带皆慵只抱琴长笑灵均不知命江蓠丛畔苦悲吟【鱼音切】

早发楚城驿

过雨尘埃灭沿江道径平月乘残夜出人趁早凉行寂历闲吟动冥蒙闇思生荷塘翻露气稻垄泻泉声宿犬闻铃起栖禽见火惊矐矐烟树色十里始天明

箬岷东池

箬【如灼切】岷【胡典切】亭东有小池早荷新荇绿参差中宵把火行人发惊起双栖白

鹭鹭

建昌江

建昌江水县门前立马教人唤渡船忽似往年归蔡渡草风沙雨渭河边

哭从弟

伤心一尉便终身叔母年高新妇贫一片绿衫消不得腰金拖紫是何人

香炉峯下新卜山居草堂初成偶题东壁五首

五架三间新草堂石阶桂柱竹编墙南檐纳日冬天煖北户迎风夏月凉洒砌飞泉才有点拂
牕斜竹不成行来春更葺东厢屋纸阁芦帘着孟光

喜入山林初息影厌趋朝市久劳生早年薄有烟霞志岁晚深谙世俗情已许虎溪云里卧不
争龙尾道前行从兹耳界应清净免见啾啾毁誉声

长松树下小溪头斑鹿胎巾白布裘药圃茶园为产业野麋林鹤是交游云生涧户衣裳润岚
隐山厨火独幽最爱一泉新引得清泠屈曲遶阶流

日高睡足犹慵起小阁重裘不怕寒遗爱寺泉敲枕听香炉峯雪拨帘看匡庐便是逃名地司
马仍为送老官心泰身宁是归处故乡何独在长安

宦途自此心长别世事从今口不言岂止形骸同土木兼将寿夭任乾坤胸中壮气犹须遣身
外浮云何足论还有一条遗恨事高家门馆未酬恩

山月问月

为问长安月谁教不暂离昔随飞盖处今照入山时借助秋怀旷留连夜卧迟如归旧乡国似
对好亲知松下行为伴谿头坐有期干岩将万壑无处不相随

正月十五日夜东林寺学禅偶怀蓝田杨主簿因呈智禅师

新年三五东林夕星汉迢迢锤梵迟花县当君行乐夜松房是我坐禅时忽看月满还相忆始
叹春来自不知不觉定中微念起明朝更问鴈门师

临水坐

昔为东掖垣中客今作西方社内人手把杨枝临水坐闲思往事似前身

山居

山斋方独往尘事莫相仍蓝輦辞鞍马缁徒换友朋朝餐唯药菜夜伴只纱灯除却青衫在其余便是僧

遗爱寺

弄日临溪坐寻花遶寺行时时闻鸟语处处是泉声

山中与元九书因题书後

忆昔封书与君夜金銮殿後欲明天今夜封书在何处庐山庵里晚灯前笼鸟檻猿俱未死人间相见是何年

黄石岩下作

久别鵷鸾侣深随鸟兽羣教他远亲故何处覓知闻昔日青云意今移向白云

戏赠李十三判官

垂鞭相送醉醺醺遥见庐山指似君想君初觉从君乐未爱香炉峯上人

醉中戏赠郑使君【时使君先归留妓乐重饮】

密座移红毯【吐敢切】酡颜照緑杯双娥留且住五马任先回醉耳歌催醒愁眉笑引开平生少年兴临老覩重来

江亭夕望

凭高远望思悠哉晚上江亭夜未回日欲没时红浪沸月初生处白烟开辞枝雪蘂将春去满镊【尼輒切】霜毛送老来争敢三年作归计心知不及贾生才

酬元员外三月三十日慈恩寺相忆见寄

怅望慈恩三月尽紫桐花落鸟关关诚知曲水春相忆其奈长沙老未还赤岭猿声催白首黄茅瘴领换朱颜谁言南国无霜雪尽在愁人鬓发间

偶然二首

楚怀邪乱灵均直放弃合宜何恻恻汉文明圣贾生贤谪向长沙堪叹息人事多端何足怪天文至信犹差忒月离于毕合霁 有时不雨谁能测

火发城头鱼水里救火竭池鱼失水乖龙藏在牛领中雷击龙来牛枉死人道著神龟骨灵试卜鱼牛那至此六十四卦七十钻毕竟不能知所以

中秋月

万里清光不可思添愁益恨遶天涯谁人陇外久征戍何处亭前新别离失宠故姬归院夜没蕃老将上楼时照他几许人肠断玉兔银蟾远不知

谢李六郎中寄新蜀茶

故情周匝向交亲新茗分张及病身红纸一封书後信绿芽十片火前春汤添勺水煎鱼眼末下刀圭搅麴尘不寄他人先寄我应缘我是别茶人

?诸山客同上香炉峰遇雨而还沾濡狼籍互相笑谑题此解嘲

萧洒登山去龙锺遇雨回磴【丁切】邓危攀薜【博陌切】荔【力霁切】石滑践莓苔袜污君相谑鞋穿我自哈【呼来切】莫欺泥土脚曾蹋玉阶来

彭蠡湖晚归

彭蠡湖天晚桃花水气春鸟飞千白点日没半红轮何必为迁客无劳是病身但来临此望少有不愁人

酬赠李链师见招

几年司谏直承明今日求真礼上清曾犯龙鳞容不死欲骑鹤背覓长生刘纲有妇仙同得伯道无儿累更轻若许移家相近住便驱鸡犬上层城

西河雨夜送客

云黑雨翛翛江昏水闇流有风催解缆无月伴登楼酒罢无多兴帆开不少留唯看一点火遥认是行舟

登西楼忆行简

每因楼上西南望始觉人间道路长碍日暮山青簇簇浸天秋水白茫茫风波不见三年面书信难传万里肠早晚东归来下峡稳乘船舫过瞿唐

罗子

有女名罗子生来才两春我今年已长日夜二毛新顾念娇啼面思量老病身直应头似雪始得见成人

读灵彻诗

东林寺里西廊下石片?题数首诗言句怪来还校别看名知是老汤师

听李士良琵琶【人各赋二十八字】

声似胡儿弹舌语愁如塞月恨边云闲人颺听犹眉敛可使和蕃公主闻

昭君怨

明妃风貌最娉婷合在椒房应四星只得当年备宫掖何曾专夜奉帏屏见疎从道迷图画知屈那教配虏庭自是君恩薄如纸不须一向恨丹青【一作命卑如纸薄】

闲吟

自从苦学空门法销尽平生种种心唯有诗魔降未得每逢风月一闲吟

戏问山石榴

小树山榴近砌栽半含红萼带花来争知司马夫人妬移到庭前便不开

編集拙诗成一十五卷因题卷末戏赠元九李二十

一篇长恨有风情十首秦吟近正声每被老元偷格律【元九向江陵日尝以拙诗一轴赠行自後格变】苦教短李伏歌行【李二十常自负歌行近见予乐府五十首默然心伏】世间富贵应无分身後文章合有名莫怪气粗言语大新排十五卷诗成

湖上闲望

藤花浪拂紫茸条菰叶风翻绿剪刀闲弄水芳生楚思时时合眼咏离骚

白氏长庆集卷十六

卷十七

<集部,别集类,汉至五代,白氏长庆集>

钦定四库全书

白氏长庆集卷十七

唐白居易撰

律诗【五言七言自两韵至五十韵凡一百首】

江南谪居十韵

自哂沈冥客曾为献纳臣
壮心徒许国薄命不如人
才展凌云翅俄成失水鳞
葵枯犹向日蓬断欲辞春
泽畔长愁地天边欲老身
萧条残活计冷落旧交亲
草合门无迳烟消甑有尘
忧方知酒圣贫始觉钱神
虎尾难容足羊肠易覆轮
行藏与通塞一切任陶钧

江楼夜吟元九律诗成三十韵

昨夜江楼上吟君数十篇
词飘朱槛底韵坠绿江前
清楚音谐律精微思入玄
收将白雪丽夺尽碧云妍
寸截金为句双雕玉作联
八风凄闲发五彩烂相宣
冰扣声声冷珠排字字圆
文头交比绣筋骨软於绵
湏【胡孔切】涌同波浪
铮鏦过管弦醴泉流出地
钧乐下从天神鬼闻如泣
鱼龙听似禅星回疑聚散
月落为留连鴈感无鸣者
猿愁亦悄然交流迁客泪
停住贾人船闇被歌姬乞
潜闻思妇传斜行题粉壁
短卷写红笺肉味经时忘
头风当日痊老张知定伏
短李爱应颠【张十八籍李十二绅皆攻律诗故云】道屈才方振身闲业始专
天教声烜【况远切】赫理合命迍
遭顾我文章劣知他气力全
功夫虽共到巧拙尚相悬
各有诗千首俱抛海一边
白头吟处变青眼望中穿
酬答朝妨食披寻夜废眠
老偿文债负宿结字因缘
每叹陈夫子【陈子昂着感兴诗称於世】常嗟李谪仙【贺知章谓李白为谪仙】
名高折人爵思苦减天年【李竟无官陈亦早夭】不得当时遇空令後代怜
相悲今若此湓浦与通川

浔阳岁晚寄元八郎中庾三十二员外

阅水年将暮烧金道未成
丹砂不肯死白发自须生
病肺慙杯满衰顔忌镜明
春深旧乡梦岁晚故交情
一别浮云散双瞻列宿荣
螭【抽知切】头阶下立龙尾道前行
封事频闻奏除书数见名
虚怀事僚友平步取公卿
漏尽鸡人报朝回幼女迎
可怜白司马老大在湓城

元九以绿丝布白轻裾【以中切】见寄制成衣服以诗报知

绿丝文布素轻裾珍重京华手自封贫友远劳君寄附病妻亲为我裁缝袴花白似秋云薄衫色青於春草浓欲着却休知不称折腰无复旧形容

清明送韦侍郎贬?州

寂寞清明日萧条司马家留觞【徐盈切】和冷粥出火煮新茶欲别能无酒相留亦有花南迁更何处此地已天涯

九江春望

淼【匹妙切】茫积水非吾土飘泊浮萍自我身身外信缘为活计眼前随事觅交亲鑪烟岂异终南色湓草宁殊渭北春此地何妨便终老譬如元是九江人【香鑪峯上多烟湓水岸边有草因而记之】

晚题东林寺双池

向晚双池好初晴百物新裛枝翻翠羽溅水跃红鳞萍泛同游子莲开当丽人临流一惆怅还忆曲江春

赠内子

白发长兴叹青娥亦伴愁寒衣补灯下小女戏牀头閤澹屏帟故凄凉枕席秋贫中有等级犹胜嫁黔娄送客春游岭南二十韵【因叙岭南方物以谕之并拟微之送崔二十二之作】

已讶游何远仍嗟别太频离容君蹙促赠语我殷勤迢递天南面苍茫海北濔【殊伦切】诃陵国分界交趾郡为隣蓊【乌红切】郁三光晦温暾【他昆切】四气匀陰晴变寒暑昏晓错星辰瘴地难为老蛮貊不易驯土民稀白首洞主尽黄巾战舰犹惊浪戎车未息尘【时黄家贼方动】红旗围卉服紫绶裹文身面苦桃【姑黄切】榔【鲁堂切】制浆酸橄榄新牙檣迎海舶铜鼓赛江神不冻贪泉暖无霜毒草春云烟蟒虺气刀剑鰐鱼鳞路足羈栖客官多谪逐臣天黄生【忌遇切】母【母如虹欲大风即见】雨黑长枫人【枫人因夜雷雨辄闇长数丈】回使先传语征轩早返轮须防杯里蛊【南方蛊毒多置酒中】莫爱橐中珍北与南殊俗身将货孰亲尝闻君子诚忧道不忧贫

自题

功名宿昔人多许宠辱斯须自不知一旦失恩先左降三年随例未量移马头觅角生何日石火敲光住几时前事是身俱若此空门不去欲何之

自悲

火宅煎熬地霜松摧折身因知羣动内易死不过人

寻郭道士不遇

郡中乞假来相访洞里朝元去不逢看院只留双白鹤入门惟见一青松药炉有火丹应伏云碓无人水自舂【庐山中云母多故以水碓捣链俗呼为水碓】欲问参同契中事更期何日得从容

浔阳春三首【元和十二年作】

春生

春生何处闇周游海角天涯遍始休先遣和风报消息续教啼鸟说来由展张草色长河畔点缀花房小树头若教故园应觅我为传沦落在江州

春来

春来触动故乡情忽见风光忆两京金谷蹋花香骑入曲江碾草钿车行谁家绿酒欢连夜何处红楼睡失明独有不眠不醉客经春冷坐古湓城

春去

一从泽畔为迁客两度江头送暮春白发更添今日鬓青衫不改去年身百川未有回流水一老终无却少人四十六时三月尽送春争得不殷勤

梦微之【十二年八月二十日夜】

晨起临风一惆怅通川湓水断相闻不知忆我因何事昨夜三回梦见君

赠韦链师

浔阳迁客为居士身似浮云心似灰上界女仙无嗜欲何因相顾两徘徊共疑过去人间世曾作谁家夫妇来

问刘十九

绿蚁【语起切】新醅酒红泥小火炉晚来天欲雪能饮一杯无

得行简书闻欲下峡先以此寄

朝来又得东川信欲取春初发梓州书报九江闻暂喜路经三峡想还愁潇湘瘴雾加餐饭灩
澦惊波稳泊舟欲寄两行迎尔泪长江不肯向西流

南湖早春

风回云断雨初晴返照湖边暖复明乱点碎红山杏发平铺新绿水苹生翅低白鴈飞仍重舌
澁黄鹂语未成不道江南春不好年年衰病减心情

元十八从事南海欲出庐山临别旧居有恋泉声之什因以投和兼伸别情

贤侯辟土礼从容莫恋泉声问所从雨露初承黄纸诏烟霞欲别紫霄峰伤弓未息心惊鸟得
水难留久卧龙我正退藏君变化一杯可易得相逢

题韦家泉池

泉落青山出白云萦村遶郭几家分自从引作池中水深浅方圆一任君

醉中对红叶

临风杪秋树对酒长年人醉貌如霜叶虽红不是春

遣怀

羲和走驭趁年光不许人间日月长遂使四时都似电争教两鬓不成霜荣销枯去无非命壮
尽衰来亦是常已共身心要约定穷通生死不惊忙

点额鱼

龙门点额意何如红尾青髻却返初见说在天行雨苦为龙未必胜为鱼

闻龟儿咏诗

怜渠已解咏诗章摇膝支颐学二郎莫学二郎吟太苦才年四十鬓如霜

对酒

未济卦中休卜命参同契里莫劳心无如饮此销愁物一饷愁消直万金

东墙夜合树去秋为风雨所摧今年花时怅然有感

碧萸红缕今何在风雨飘将去不回惆怅去年墙下地今春唯有荠花开

病起

病不出门无限时今朝强出与谁期经年不上江楼醉劳动春风扬酒旗

梦亡友刘太白同游彰敬寺

三千里外卧江州十五年前哭老刘昨夜梦中彰敬寺死生魂魄曷同游

与果上人歿时题此诀别兼简二林僧社

本结菩提香火社为嫌烦恼电泡身不须惆怅从师去先请西方作主人

赠写真者

子骋丹青曰予当丑老时无劳役神思更画病容仪迢递麒麟阁图功未有期区区尺素上焉用写真为

刘十九同宿【时淮寇初破】

红旗破贼非吾事黄纸除书无我名唯共嵩阳刘处士围碁赌酒到天明

十二年冬江西温暖喜元八寄金石棱到因题此诗

今冬腊後不严凝暖雾温风气上腾山脚崦【於检切】中才有雪江流慢处亦无冰欲将何药防春瘴只有元家金石棱

闲意

不争荣耀任沈沦日与时疎共道亲北省朋僚音信断东林长老往还频病停夜食闲如社慵拥朝裘煖似春渐老渐谙闲气味终身不拟作忙人

送友人上峡赴东川辟命

见说瞿塘峡斜衔灩澦根难於寻鸟路险过上龙门羊角风头急桃花水色浑山回若鳌转舟入似鲸吞岩合愁天断波跳恐地翻怜君经此去为感主人恩

夜送孟司功

浔阳白司马夜送孟功曹江闍管弦急楼明灯火高湖波翻似箭霜草杀如刀且莫开征棹阴风正怒号

衰病

老辞游冶寻花伴病别荒狂旧酒徒更恐五年三岁後些些谈笑亦应无

题诗屏风絶句【并序】

十二年冬微之犹滞通州予亦未离湓上相去万里不见三年郁郁相念多以吟咏自解前後辱微之寄示之什殆数百篇虽藏篋中永以为好不若置之坐右如见所思繇是掇律句中短小丽絶凡一百首题录合为一屏风举目会心参若其人在於前矣前辈作事多出偶然则安知此屏不为好事者所传异日作九江一故事尔因题絶句聊以獎之

相忆采君诗作障自书自勘不辞劳障成定被人争写从此南中纸价高

答微之【微之於閬州西寺手题予诗予又以微之百篇题此屏上各以絶句报答】

君写我诗盈寺壁我题君句满屏风与君相遇知何处两叶浮萍大海中

偶宴有怀

遇兴寻文客因欢命酒徒春游忆亲故夜会似京都诗思闲仍在乡愁醉暂无狂来欲起舞慙见白髭须

山中酬江州崔使君见寄

眷盼情无限优容礼有余三年为吏部一半许山居酒熟心相待诗来手自书庾楼春好醉明月且回车

山枇杷

深山老去惜年华况对东溪野枇杷火树风来翻绛?琼枝日出晒【所卖切】红纱回看桃李都无色映得芙蓉不是花争奈结根深石底无因移得到人家

闻李尚书拜相因以长句寄贺微之

怜君不久在通川知己新提造化权夔高定求才济世张雷应辨气冲天那知沦落天涯日正是陶钧海内年肯向泥中抛折劒不收重铸作龙泉

岁暮

穷阴急景坐相催壮齿韶颜去不回旧病重因年老发新愁多是夜长来膏明自熬缘多事鴈默先烹为不才祸福细寻无会处不如且进手中杯

雨中赴刘十九二林之期及到寺刘已先去因以四韵寄之

云中台殿泥中路既阻同游懒却还将谓独愁犹对雨不知多兴已寻山才应行到千峰里只校来迟半日间最惜杜?花烂漫春风吹尽不同攀

蔷薇正开春酒初熟因招刘十九张大夫崔二十四同饮

瓮头竹叶经春熟阶底蔷薇入夏开似火浅深红压架如饴【徐盈切】气味绿粘台试将诗句相招去倘有风情或可来明日早花应更好心期同醉卯时杯

李白墓

采石江边李白坟遶田无限草连云可怜荒壠穷泉骨曾有惊天动地文但是诗人多薄命就中沦落不过君

对酒

漫把参同契难烧伏火砂有时成白首无处问黄芽幻世如泡影浮生抵眼花唯将绿醕酒且替紫河车

戏答诸少年

顾我长年头似雪饶君壮岁气如云朱颜今日虽欺我白发他时不放君

风雨夜泊

苦竹林边芦苇丛停舟一望思无穷青苔扑地连香雨白浪掀天尽日风忽忽百年行欲半茫茫万事坐成空此生飘荡何时定一缕鸿毛天地中

题崔使君新楼

忧人何处可销忧碧甃红栏溢水头从此浔阳风月夜崔公楼替庾公楼

山中戏问韦侍郎

我抱栖云志君怀济世才常吟反招隐那得入山来

赠昙禅师【梦中作】

五年不入慈恩寺今日寻师始一来欲知火宅焚烧苦方寸如今化作灰

寄微之

帝城行乐日纷纷天畔穷愁我与君秦女笑歌春不见巴猿啼哭夜长闻何处琵琶弦似语谁家舂【苦乖切】堕髻如云人生多少欢娱事那独千分无一分

醉吟二首

空王百法学未得姹女丹砂烧即飞事事无成身老也醉乡不去欲何归

两鬓千茎新似雪十分一盞欲如泥酒狂又引诗魔发日午悲吟到日西

晓寝

转枕重安寝回头一欠伸纸牕明觉晓布被煖知春莫强疎慵性须安老大身鸡鸣犹独睡不博早朝人

答元八郎中杨十二博士

身觉浮云无所着心同止水有何情但知潇洒疎朝市不要崎岖隐姓名尽日观鱼临涧坐有时随鹿上山行谁能抛得人间事来共腾腾过此生

湖亭与行简宿

浔阳少有风情客招宿湖亭尽却回水槛虚凉风月好夜深谁共阿怜来

八月十五日夜湓亭望月

昔年八月十五夜曲江池畔杏林边今年八月十五夜湓浦沙头水馆前西北望乡何处是东南见月几回圆临风一叹无人会今夜清光似往年

赠江客

江柳阴寒新雨地塞鸿声急欲霜天愁君独向沙头宿水遶芦花月满船

残暑招客

云截山腰断风驱雨脚回早阴江上散残热日中来却取生衣着重拈竹簟开谁能淘晚热闲饮两三杯

浔阳秋怀赠许明府

霜红二林叶风白九江波暝色投烟鸟秋声带雨荷马闲无处出门冷少人过卤莽还乡梦依稀望阙歌共思除醉外无计奈愁何试问陶家酒新刍得几多

九日醉吟

有恨头还白无情菊自黄一为州司马三见岁重阳剑匣尘埃满笼禽日月长身从渔父笑门任雀罗张问疾因留客听吟偶置觞叹时论倚伏怀旧数存亡奈老应无计医愁或有方无过学王积唯以醉为乡

问韦山人山甫

身名身事两蹉跎试就先生问若何从此神仙学得否白须虽有未为多

送萧链师步虚词十首卷後以二絶继之

欲上瀛洲临别时赠君十首步虚词天仙若爱应相问可道江州司马诗

花纸瑶緘松墨字把将天上共谁开试呈王母如堪唱发遣双成更取来

赠李兵马使

身得贰师余气槩家藏都尉旧诗章江南别有楼船将燕颌虬须不姓杨

题遗爱寺前溪松

偃亚长松树侵临小石溪静将流水对高共远峰齐翠盖烟笼密花幢雪压低与僧清影坐借鹤稳枝栖笔写形难似琴偷韵易迷暑天风槭【止戟切】槭晴夜露凄凄独憩依为舍闲行遶作谿栋梁君莫采留着伴幽栖庐山草堂夜雨独宿寄牛二李七庾三十二员外

丹青携手三君子白发垂头一病翁
兰省花时锦帐下庐山雨夜草庵中
终身胶漆心应在半路云泥迹不同
唯有无生三昧观荣枯一照两成空

闻杨十二新拜省郎遥以诗贺

文昌新入有光辉紫界宫墙白粉闱
晓日鸡人传漏箭春风侍女护朝衣
雪飘歌曲高难和鹤拂烟霄老惯飞
官职声名俱入手近来诗客似君稀
【顷曾有赠杨诗落句云不用更教诗过好折君官职是声名今故云俱入手】

三月三日怀微之

良时光景长虚掷壮岁风情已闇销
忽忆同为校书日每年同醉是今朝

赠韦八

辞君虽久见君初白发惊嗟两有余
容鬓别来今至此心情料取合何如
曾同曲水花亭醉亦共华阳竹院居
岂料天南相见夜哀猿瘴雾宿匡庐

春江闲步赠张山人

江景又妍和牵愁发浩歌晴沙金屑色
春水麴尘波红簇交枝杏青含卷叶荷
藉莎怜輭【乳兗切】暖憩树爱婆娑
书信朝贤断知音野老多相逢不闲语
争奈日长何

春听琵琶兼简长孙司户

四弦不似琵琶声乱写真珠细撼铃
指底商风悲【悉合切】?舌头胡语苦
醒醒如言都尉思京国似诉明妃厌虏
庭迁客共君相劝谏春肠易断不须听

吴宫词

一入吴王殿无人覩翠娥楼高时见舞
宫静夜闻歌半露胷如雪斜回脸似波妍
?各有分谁敢妬恩多

送韦侍御量移金州司马【时予官独未出】

春欢雨露同沾泽冬叹风霜独满衣
留滞多时如我少迁移好处似君稀
卧龙云到须先起蛰燕雷惊尚未飞
莫恨东西沟水别沧溟长短拟同归

自到浔阳生三女子因诮真理用遣妄怀

宦途本自安身拙世累由来向老多远谪四年徒已矣晚生三女拟如何预愁嫁娶真成患细念因缘尽是魔赖学空王治苦法须抛烦恼入头陀

江西裴常侍以优礼见待又蒙赠诗辄叙鄙诚用伸感谢

一从簪笏事金貂每借温颜故折腰长觉身轻离泥滓忽惊手重捧琼瑶马因回顾虽增价桐遇知音已半焦他日秉钧如见念壮心直气未全销

自江州司马授忠州刺史仰荷圣泽聊书鄙诚

炎瘴抛身远泥涂索脚难网初鳞蹙【普活切】刺【郎达切】笼久翅摧残雷电颁时令阳和变岁寒移簪承旧念剖竹授新官乡觉前程近心随外事宽生还应有分西笑问长安

除忠州寄谢崔相公

提拔出泥知力竭吹嘘生翅见情深劒锋折难冲斗桐尾烧焦岂望琴感旧两行年老泪酬恩一寸岁寒心忠州好恶何须问鸟得辞笼不择林

初授官蒙裴常侍赠鹖衔瑞草绯袍鱼袋因谢惠贶兼纾离情

新授铜符未着绯因君装束始光辉惠深范叔绋袍赠荣过苏秦佩印归鱼缀白金随步跃鹖衔红绶遶身飞明朝恋别朱门泪不敢多垂恐污衣

洪州逢熊孺登

靖安院里辛夷下醉笑狂吟气最麤莫问别来多少苦低头看取白髭须

初着刺史绯答友人见赠

故人安慰善为辞五十专城道未迟徒使花袍红似火其如蓬鬓白如丝且贪薄俸君应惜不称衰容我自知银印可怜将底用只堪归舍吓妻儿

又答贺客

银章暂假为专城贺客来多懒起迎似挂绯衫衣架上朽株枯竹有何荣

别草堂三绝句

正听山鸟向阳眠黄纸除书落枕前为感君恩须暂起炉峰不拟住多年

久眠褐被为居士忽挂绯袍作使君身出草堂心不出庐山未要勒移文

三间茅舍向山开一带山泉遶舍回山色泉声莫惆怅三年官满却归来

鍾陵餞送

翠幕红筵高在云歌鍾一曲万家闻路人指点滕王阁看送忠州白使君

浔阳宴别【此後忠州路上作】

鞍马军城外笙歌祖帐间乘潮发湓口带雪别庐山暮景牵行色春寒散醉顏共嗟炎瘴地尽室得生还

戏贈户部李巡官

好语民曹李判官少贪公事且谋欢男儿未死争能料莫作忠州刺史看

行次夏口先寄李大夫

连山断处大江流红旆逶迤镇上游幕下翱翔秦御史军前奔走汉诸侯曾陪剑履升鸾殿欲谒旌幢入鹤楼假着绯袍君莫笑恩深始得向忠州

重贈李大夫

早接清班登玉陛同承别诏直金銮凤巢阁上容身稳鹤锁笼中展翅难流落多年应是命量移远郡未成官慙君独不欺憔悴犹作银台旧眼看

对鏡吟

闲看明鏡坐清晨多病姿容半老身谁论情性乖时事自想形骸非贵人三殿失恩宜放弃九宫推命合漂沦如今所得须甘分腰佩银龟朱两轮

江州赴忠州至江陵以来舟中示舍弟五十韵

昔作咸秦客常思江海行今来仍尽室此去又专城典午犹为幸分忧固是荣簪【晡朋切】簪【先清切车輶也】州乘送艘【卢侯切】牒【徒协切】驿船迎共载皆妻子同游即弟兄宁辞浪蹟远且贵赏心并云展帆高挂飈驰棹迅征泝流从汉浦循路转荆衡山逐时移色江随地改名风光近东早水木向南清夏口烟孤起湘州雨半晴日煎红浪沸月射白砂明北渚寒留雁南枝暖待莺骈朱桃露萼点翠柳含萌亥市鱼盐聚神林鼓笛鸣壶浆椒叶气歌曲

竹枝声系缆怜沙静垂纶爱岸平水浪红粒稻野茹紫花菁瓿泛茶如乳台粘酒似饧【徐盈切】脰长抽锦缕藕脆削琼英容易来千里斯须进一程未曾劳气力渐觉有心情卧稳添春睡行迟带酒醒忽愁牵世网便欲濯尘缨早接文场战曾争翰苑盟掉头称俊逸翘足取公卿且昧随时义徒输报国诚衆排恩易失偏压势先倾虎尾忧危切鸿毛性命轻烛蛾谁救活蚕茧自纏紫斂手辞双阙回眸望两京长沙抛贾谊漳浦卧刘桢鷓鴣鸣还歇蟾【时占切】蜍【长鱼切】破又盈年光同激箭乡思极摇旌潦倒亲知笑衰羸旧识惊乌头因感白鱼尾为劳赧劒学将何用丹烧竟不成孤舟萍一叶双鬓雪千茎老见人情尽闲思物理精如汤探冷热似博鬪输赢险路应须避迷途莫共争此心知止足何物要经营玉向泥中洁松经雪後贞无妨隐朝市不必谢寰瀛但在前非悟期无後患婴多知非景福少语是元亨晦即全身药明为伐性兵昏昏随世俗蠢蠢学黎甿鸟以能言 龟缘入梦烹知之一何晚犹足保余生

题岳阳楼

岳阳城下水漫漫独上危楼凭曲栏春岸绿时连梦泽夕波红处近长安猿攀树立啼何苦鴈点湖飞渡亦难此地唯堪画图障华堂张与贵人看

入峡次巴东

不知远郡何时到犹喜全家此去同万里王程三峡外百年生计一舟中巫山暮足沾花雨陇水春多逆浪风两片红旌数声鼓使君艤牒上巴东

十年三月三十日别微之於泮上十四年三月十一日夜遇微之於峡中停舟夷陵三宿而别言不尽者以诗终之因赋七言十七韵以赠且欲记所遇之地与相见之时为他年会话张本也

泮水店头春尽日送君上马谪通川夷陵峡口明月夜此处逢君是偶然一别五年方见面相携三宿未回船

坐从【日】暮唯长叹语到天明竟未眠齿发蹉跎将五十关河迢递过三千生涯共寄沧江上乡国俱抛白日边往事渺茫都似梦旧游零落半归泉醉悲洒泪春盃里吟苦支颐晓烛前莫问龙鍾恶官职且听清脆好诗篇【微之别来有新诗数百篇丽絶可爱】别来只是成诗癖老去何曾更酒颠各限王程须去住重开离宴贵留连黄牛渡北移征棹白狗崖东卷别筵【黄牛白狗皆峡中地名即与微之遇别之所也】神女台云闲缭绕使君滩水急潺湲风凄暝色愁杨柳月吊宵声哭杜?万丈赤幢潭底日一条白练峡中天君还秦地辞炎徼我向忠州入瘴烟未死会应相见在又知何地复何年

题峡中石上

巫女庙花红似粉昭君村柳翠於眉诚知老去风情少见此争无一句诗

白氏长庆集卷十七

卷十八

钦定四库全书

白氏长庆集卷十八

唐白居易撰

律诗【五言七言自两韵至三十韵凡一百首】

夜入瞿塘峡

瞿塘天下险夜上信难哉岸似双屏合天如匹帛开逆风惊浪起拔 閤船来欲识愁多少高
於灩澦堆

初到忠州赠李六

好在天涯李使君江头相见日黄昏吏人生硬都如鹿市井萧疎只抵村一只兰船当驿路百
层石磴上州门更无平地堪行处虚受朱轮五马恩

郡斋暇日忆庐山^廿堂兼寄二林僧社三十韵皆叙贬官以来出处之意

谏诤知无补迁移分所当不堪匡圣主只合事空王龙象投新社鵷鸾失故行沈吟辞北阙诱
引向西方便住双林寺仍开一^廿堂平治行道路安置坐禅牀手板支为枕头巾阁在墙先生
乌几舄居士白衣裳竟岁何曾闷终身不拟忙灭除残梦想换尽旧心肠世界多烦恼形神久
损伤正从风鼓浪转作日销霜【佛经云此生死无休已如风鼓海浪又云烦恼如霜露慧日
能消除】吾道寻知止君恩偶未忘忽蒙颁凤诏兼谢剖鱼章莲静方依水葵枯重仰阳三车
犹夕会五马已晨装去似寻前世来如别故乡眉低出鹫【疾僦切】岭脚重下虵冈【庐山
冈名】渐望庐山远弥愁峡路长香炉峯隐隐巴字水茫茫瓢挂留庭树经收在屋梁春抛红
药圃夏忆白莲塘唯拟捐尘事将何荅宠光有期追永远【晋时永远二法师曾居此等】无
政继龚黄南国秋犹热西斋夜颺凉闲吟四句偈静对一炉香身老同丘井心空是道场覓僧
为去伴留俸作归粮为报山中侣凭看竹下房会应归去在松菊莫教荒

赠康叟

八十秦翁老不归南宾太守乞寒衣再三怜汝非他意天宝遗民见渐稀

鹦鹉

竟日语还默中宵栖复惊身囚缘彩翠心苦为分明暮起归巢思春多忆侣声谁能拆笼破从放快飞鸣京使回累得南省诸公书因以长句诗寄谢萧五刘二元八吴十一韦大陆郎中崔二十二牛二李七庾三十二李六李十杨三樊大杨十二员外

雪压泥埋未死身每劳存问媿交亲浮萍漂泊三千里列宿参差十五人禁月落时君待漏畚烟深处我行春瘴乡得老犹为幸岂敢伤嗟白发新

东城春意

风輭【乳兗切】云不动郡城东北隅晚来春澹澹天气似京都弦管随宜有杯觞不道无其如亲故远无可共欢娱木莲树生巴峡山谷闲巴民亦呼为黄心树大者高五丈涉冬不凋身如青杨有白文叶如桂厚大无脊花如莲香色艳膩皆同独房蕊有异四月初始开自开迨谢仅二十日忠州西北十里有鸣玉谿生者穠茂惜其遐僻因题三絶句云

如折芙蓉栽旱地似抛芍药挂高枝云埋水隔无人识唯有南宾太守知

红似臙脂膩如粉伤心好物不须臾山中风起无时节明日重来得在无

已愁花落荒岩底复恨根生乱石闲几度欲移移不得天教抛掷在深山

种桃杏

无论海角与天涯大抵心安即是家路远谁能念乡曲年深兼欲忘京华忠州且作三年计种杏栽桃拟待花

新秋

二毛生镜日一叶落庭时老去争由我愁来欲泥谁空销闲岁月不见旧亲知唯弄扶牀女时时强展眉

龙昌寺荷池

冷碧新秋水残红半破莲从来寥落意不似此池边

听竹枝赠李侍御

巴童巫女竹枝歌懊恼何人怨咽多暫听遣君犹怅望长闻教我复如何

寄胡饼与杨万州

胡麻饼样学京都面脆油香新出炉寄与饥馋杨大使尝看得似辅兴无

感樱桃花因招饮客

樱桃昨夜开如雪鬓发今年白似霜渐觉花前成老丑何曾酒後更颠狂谁能闻此来相劝共泥春风醉一场

东亭闲望

东亭尽日坐谁伴寂寥身绿桂为佳客红蕉当美人笑言虽不接情状似相亲不作悠悠想如何度晚春

画木莲花图寄元郎中

花房膩似红莲朵艳色鲜如紫牡丹唯有诗人能解爱丹青写出与君看

和李沔州题韦开州经藏诗

既悟莲花藏须遗贝叶书菩提无处所文字本空虚观指非知月忘筌是得鱼闻君登彼岸舍筏复何如

九日题涂谿

蕃草席铺枫叶?竹枝歌送菊花杯明年尚作南宾守或可重阳更一来

即事寄微之

畚田澁米不耕鋤旱地荒园少菜蔬想念土风今若此料看生计合何如衣缝紕【篇夷切】纈【力遂切】黄丝绢饭下腥咸白小鱼饱暖饥寒何足道此身长短是空虚

题郡中荔枝诗十八韵兼寄杨万州八使君

奇果标南土芳林对北堂素华春漠漠丹实夏煌煌叶捧低垂户枝擎重压墙始因风弄色渐与日争光夕讶条悬火朝惊树点粧深於红踣躅大校白?榔星缀连心朵珠排耀眼房紫罗裁衬殼白玉裹填瓢【女良切】早岁曾闻说今朝始摘尝嚼疑天上味嗅异世间香润胜莲生水鲜逾橘得霜臙脂掌中颗甘露舌头浆物少犹珍重天高苦渺茫已教生暑月又使阻遐方粹液灵难驻妍姿嫩易伤近南光景热向北道途长不得充王赋无由寄帝乡唯君堪擲赠面

白似潘郎

留北客

峡外相逢远樽前一会难即须分手别且强展眉欢楚袖萧条舞巴弦趣数弹笙歌随分有莫作帝乡看重寄荔枝与杨使君时闻杨使君欲种植故有落句之戏

摘来正带凌晨露寄去须凭下水船映我绯衫浑不见对公银印最相鲜香连翠叶真堪画红透青笼实可怜闻道万州方欲种愁君得吃是何年

和万州杨使君四絶句

竞渡

竞渡相传为汨罗不能止遏意无他自经放逐来憔悴能校灵均死几多

江边草

闻君泽畔伤春草忆在天门街里时漠漠凄凄愁满眼就中惆怅是江蓠

嘉庆李

东都绿李万州裁君手封题我手开把得欲尝先怅望与渠同别故乡来

白槿花

秋薜【试刃切】晚英无艳色何因栽种在人家使君自别罗敷面争解回头爱白花

望郡南山寄行简

临江一嶂白云闲红绿层层锦绣斑不作巴南天外意何如昭应望骊山

和行简望郡南山

反照前山云树明从君苦道似华清试听肠断巴猿叫早晚骊山有此声

种荔枝

红颗珍珠诚可爱白须太守亦何痴十年结子知谁在自向庭前种荔枝

陰雨

嵐【卢含切】 雾今朝重江山此地深滩声秋更急峡气晓多陰望阙云遮眼思乡雨滴心将何慰幽独赖此北牕琴

送客归京

水陆四千里何时归到秦舟辞三峡雨马入九衢尘有酒留行客无书寄贵人唯凭远传语好在曲江春

送萧处士游黔南

能文好饮老萧郎身似浮云鬓似霜生计抛来诗是业家园忘却酒为乡江从巴峡初成字猿过巫阳始断肠不醉黔中争去得磨围山月正苍苍

东楼醉

天涯深峡无人地岁暮穷陰欲夜天不向东楼时一醉如何拟过二三年

寄微之【时微之为虢州司马】

高天默默物茫茫各有来由致损伤鸚为能言长剪翅龟缘难死久搢【旨而切】牀莫嫌冷落抛闲地犹胜炎蒸卧瘴乡外物竟关身底事谩排门戟系腰章

东楼招客夜饮

莫辞数数醉东楼除醉无因破得愁唯有绿樽红烛下暫時不似在忠州

醉後戏题

自知清冷似冬淩每被人呼作律僧今夜醉醺罗绮煖被君融尽玉壶冰

冬至夜

老去襟怀常濩落病来须鬓转苍浪心灰不及炉中火鬓雪多於砌下霜三峡南宾城最远一年冬至夜偏长今宵始觉房栊冷坐索寒衣托孟光

竹枝词四首

瞿塘峡口水烟低白帝城头月向西唱到竹枝声咽处寒猿闇鸟一时啼
竹枝苦怨怨何人夜静山空歇又闻蛮儿巴女齐声唱愁杀江南病使君
巴东船舫上巴西波面风生雨脚齐水蓼冷花红簇簇江蓠湿叶碧凄凄
江畔谁人唱竹枝前声断咽後声迟怪来调苦缘词苦多是通州司马诗

酬严中丞晚眺黔江见寄

江水三回曲愁人两地情磨围山下色明月峡中声晚後连天碧秋来彻底清临流有新恨照
见白须生

寄题杨万州四望楼

江上新楼名四望东西南北水茫茫无由得与君携手同凭栏干一望乡

答杨使君登楼见忆

忠万楼中南北望南州烟水北州云两州何事偏相忆各是笼禽作使君

除夜

岁暮纷多思天涯渺未归老添新甲子病减旧容辉乡国仍留念功名已息机明朝四十九应
转悟前非

闻雷

瘴地风霜早温天气候催穷冬不见雪正月已闻雷震蛰虫虵出惊枯草木开空余客方寸依
旧似寒灰

春至

若为南国春还至争向东楼日又长白片落梅浮涧水黄梢新柳出城墙闲拈蕉叶题诗咏闷
取藤枝引酒尝乐事渐无身渐老从今始拟负风光

感春

巫峡中心郡巴城四面春草青临水地头白见花人忧喜皆心火荣枯是眼尘除非一盃酒何

物更关身

春江

炎凉昏晓苦推迁不觉忠州已二年
闭阁只听朝暮鼓上楼空望往来船
莺声诱引来花下草色勾留坐水边
唯有春江看未厌
紫砂遶石绿潺湲

题东楼前李使君所种樱桃花

身入青云无见日手栽红树又逢春
唯留花向楼前看故故抛愁与後人

巴水

城下巴江水春前似麴尘
软砂如渭曲斜岸忆天津
影蘸新黄柳香浮小白苹
临流搔首坐惆怅
为何人

野行

草润衫襟重沙乾屐齿轻
仰头听鸟立信脚望花行
暇日无公事衰年有道情
浮生短於梦梦里莫营营

送高侍御使回因寄杨八

明月峡边逢制使黄茆岸上是忠州
到城莫说忠州恶无益虚教杨八愁

奉酬李相公见示絶句【时初闻国哀】

碧油幢下捧新诗荣贱虽殊共一悲
涕泪满襟君莫怪甘泉侍从最多时

喜山石榴花开【去年自庐山移来】

忠州州里今日花庐山山头去年树
已怜根损斩新栽还喜花开依旧数
赤玉何人少琴轸红绡【胡结切】
谁家合罗袴但知烂熳恣情开
莫怕南宾桃李妬

戏赠萧处士清禅师

三杯崑崙忘机客百衲头陀任运僧
又有放慵巴郡守不营一事共腾腾

钱虢州以三堂絶句见寄因以本韵和之

同事空王岁月深相思远寄定中吟遥如清静中和化只用金刚三昧心【余早岁与钱君同习读金刚三昧经故云】

三月三日

暮春风景初三日流世光阴半百年欲作闲游无好伴半江惆怅却回船

寒食夜

四十九年身老日一百五夜月明天抱膝思量何事在痴男騃女唤秋千

代州民问

龙昌寺底开山路巴子台前种柳林官职家乡都忘却谁人会得使君心

答州民

宦情抖擞随尘去乡思磨销逐日无唯拟腾腾作闲事遮渠不道使君愚

荔枝楼对酒

荔枝新熟鸡冠色烧酒初开琥珀香欲摘一枝倾一盞西楼无客共谁尝

房家夜宴喜雪戏赠主人

风头向夜利如刀赖此温炉软锦袍桑落气熏珠翠暖柘枝声引管弦高酒钩送盞推莲子烛泪粘盘垒葡萄不醉遣侬争散得门前雪片似鹅毛

醉後赠人

香球趁拍回环匝【遏合切】花盞抛巡取次飞自入春来不同醉那能夜去独先归

初除尚书郎脱刺史绯

亲宾相贺问何如服色恩光尽反初头白喜抛黄草峡眼明惊拆紫泥书便留朱绂还铃阁却着青袍侍玉除无奈娇痴三岁女绕腰啼哭觅金鱼

留题开元寺上方

东寺台阁好上方风景清
数来犹未厌长别岂无情
恋水多临坐辞花剩绕行
最怜新岸柳手种未全成

别种东坡花树两絕

三年留滞在江城草树禽鱼尽有情
何处殷勤重回首东坡桃李种新成

花林好住莫顛顚春至但知依旧春
楼上明年新太守不妨还是爱花人

别桥上竹

穿桥迸竹不依行恐碍行人被损伤
我去自慙遗爱少不教君得似甘棠

发白狗峡次黄牛峡登高寺却望忠州

白狗次黄牛滩如竹节稠路穿天地险
人续古今愁忽见千花塔因停一叶舟
畏途常迫促静境暂淹留巴曲春全尽
巫阳雨半收北归虽引领南望亦回头
昔去悲殊俗今来念旧游别僧山北寺
抛竹水西楼郡树花如雪军厨酒似油
时时大开口自笑忆忠州

棣华驿见杨八题梦兄弟诗

遥闻旅宿梦兄弟应为邮亭名棣华
名作棣华来早晚自题诗後属杨家

商山路有感

万里路长在六年身始归所经多旧馆
大半主人非商山路驿桐树昔与微之
之前後题名处

与君前後多迁谪五度经过此路隅
笑问中庭老桐树这回归去免来无

恻恻吟

恻恻复恻恻逐臣返乡国前事难重论
少年不再得泥涂绦老头班白炎瘴灵
均面黎黑六年不死却归来道着姓名
人不识

德宗皇帝挽歌词四首

执象宗玄祖貽谋啓孝孙文高柏梁殿
礼薄灞陵原京仗辞天阙朝仪出国门
生成不可报二十七年恩虞帝南巡後
殷宗谅闇中初辞铸鼎地已闭望仙宫
晓落当陵月秋生满旆风前星承帝座
不使北辰空业大承宗祖功成付子孙
睿文诗播乐遗训史标言节表中和德
方垂广

利恩悬知千载後理代数贞元梦減三齡寿哀延七月期寢园愁望远宫仗哭行迟云日添寒
惨笳箫向晚悲因山有遗诏如葬汉文时

昭德王后挽歌词

仙去逍遥境诗留窈窕章春归金屋少夜入寿宫长凤引曾辞輶蚕休昔采桑阴灵何处感沙
麓月无光

太平乐词二首【已下七首在翰林时奉敕撰进】

岁丰仍节俭时泰更销兵圣念长如此何忧不太平湛露浮尧酒薰风起舜歌愿同尧舜意所
乐在人和

小曲新词【二首】

霁色鲜宫殿秋声脆管弦圣明千岁乐岁岁似今年红裙明月夜碧簟早秋时好向昭阳宿天
凉玉漏迟

闺怨词

朝憎莺百啭夜妬燕双栖不惯经春别唯知到晓啼珠箔笼寒月纱窗背晓灯夜来巾上泪一
半是春冰关山征戍远闺合别离难苦战应顛顚寒衣不要寬

残春曲【禁中口号】

禁苑残莺三四声景迟风慢暮春情日西无事墙阴下闲蹋宫花独自行

长安春

青门柳枝软无力东风吹作黄金色街东酒薄醉易醒满眼春愁消不得

长乐坡送人赋得愁字

行人南北分征路流水东西接御沟终日坡前恨离别谩名长乐是长愁

独眠吟二首

夜长无睡起阶前寥落星河欲曙天十五年来明月夜何曾一夜不孤眠

独眠客夜夜可怜长寂寂就中今夜最愁人凉月清风满牀席

期不至

红烛青樽久延伫出门入门天欲曙星稀月落竟不来烟柳胧胧鹊飞去

长洲苑

春入长洲草又生鷓鴣飞起少人行年深不辨娃宫处夜夜苏台空月明

忆江柳

曾栽杨柳江南岸一别江南两度春遥忆青青江岸上不知攀折是何人

南浦别

南浦凄凄别西风嫋嫋秋一看肠一断好去莫回头

三年别

悠悠一别已三年相望相思明月天肠断青天望明月别来三十六回圆

伤春词

深浅檐花十万枝碧纱窗外啜黄鹂残粧含泪下帘坐尽日伤春春不知

後宫词

泪湿罗巾梦不成夜深前殿按歌声红顔未老恩先断斜倚薰笼坐到明

白氏长庆集卷十八

卷十九

<集部,别集类,汉至五代,白氏长庆集>

钦定四库全书

白氏长庆集卷十九

唐白居易撰

律诗【五言七言自两韵至四十韵凡一百首】

吟元郎中白须诗兼饮雪水茶因题壁上

吟咏霜毛句闲尝雪水茶城中展眉处只是有元家

吴七郎中山人待制班中偶赠絶句

金马东门只日开汉庭待诏重仙才第三松树非华表那得辽东鹤下来

和张十八秘书谢裴相公寄马

齿齐臙【卑遥切肥也或作臙】足毛头膩秘阁张郎叱拨驹洗了颔花飜假锦走时蹄汗蹋
真珠青衫昨见曾惊否红粟难賒得饱无丞相寄来应有意遣君骑去上云衢

答山侣

颌下髭须半是丝光阴向後几多时非无解挂簪缨意未有支持伏腊资冒热冲寒徒自取随
行逐队欲何为更慙山侣频传语五十归来道未迟

早朝思退居

霜严月苦欲明天忽忆闲居思浩然自问寒灯夜半起何如暖被日高眠唯慙老病披朝服莫
虑饥寒计俸钱随有随无且归去拟求丰足是何年

曲江亭晚望

曲江岸北凭栏干水面阴生日脚残尘路行多绿袍故风亭立久白须寒诗成闍着闲心记山
好遥偷病眼看不被马前提省印何人信道是郎官

初除主客郎中知制诰与王十一李七元九三舍人中书同宿话旧感怀

闲宵静语喜还悲聚散穷通不自知已分云泥行异路忽惊鸡鹤宿同枝紫垣曹署荣华地白
发郎官老丑时莫怪不如君气味此中来校十年迟

西省对花忆忠州东坡新花树因寄题东楼

每看阙下丹青树不忘天边锦绣林西掖垣中今日眼南宾楼上去年心花含春意无分别物
感人情有浅深最忆东坡红烂熳野桃山杏水林檎

寄题忠州小楼桃花

再游巫峡知何日总是秦人说向谁长忆小楼风月夜红栏干外两三枝

中书连直寒食不归因忆元九

去岁清明日南巴古郡楼今年寒食夜西省凤池头并上新人直难随旧伴游诚知视草贵未
免对花愁鬓发茎茎白光阴寸寸流经春不同宿何异在忠州

春忆二林寺旧游因寄郎满晦三上人

一别东林三度春每春常似忆亲情头陀会里为逋客供奉班中作老臣清浄久辞香火伴尘
劳难索幻泡身最慙僧社题桥处十八人名空一人

和元少尹新授官

官稳身应泰春风信马行纵忙无苦事虽病有心情厚禄儿孙饱前驱道路荣花时八入直无
暇贺元兄

朝回和元少尹絶句

朝客朝回回望好尽纡朱紫佩金银此时独与君为伴马上青袍唯两人

重和元少尹

凤阁舍人京亚尹白头俱未着绯衫南宫起请无消息朝散何时得入衙

中书夜直梦忠州

阁下灯前梦巴南城里游
觅花来渡口寻寺下山头
江色分明绿猿声依旧
愁禁钟惊睡觉唯不上东楼

醉後

酒後高歌且放狂
门前闲事莫思量
犹嫌小户长先醒
不得多时住醉乡

待漏入阁书事奉赠元九学士阁老

衙排宣政仗
门啓紫宸关
彩笔停书命
花毡趣立班
稀星点银砾
残月堕金环
闇漏犹传水
明河渐下山
从东分地色
向北仰天颜
碧缕炉烟直
红垂佩尾闲
纶闈惭并入
翰苑忝先攀
笑我青袍故
饶君茜【仓见切】
染红草也
绶殷诗仙归洞里
酒病滞人闲
好去驾鸾侣
冲天便不还

晚春重到集贤院

官曹清切非人境
风日鲜明是洞天
满砌荆花铺紫毯【吐敢切】
隔墙榆荚撒青钱
前时谪去三千里
此地辞来十四年
虚薄至今惭旧职
院名擢举号为贤

紫薇花

丝纶阁下文书静
钟鼓楼中刻漏长
独坐黄昏谁是伴
紫薇花对紫薇郎

後宫词

雨露由来一点恩
争能遍布及千门
三千宫女胭脂面
几个春来无泪痕

卜居

游宦京都二十春
贫中无处可安贫
尝羹蜗牛犹有舍
不如硕鼠解藏身
且求容立锥头地
免似漂流木偶人
但道吾庐心便足
敢辞湫隘与嚣尘

题新居寄元八

青龙冈北近西边
移入新居便泰然
冷巷闭门无客到
暖檐移榻向阳眠
阶墀宽窄才容足
墙壁高低粗及肩
莫羡昇平元八宅
自思买用几多钱

登龙尾道南望忆庐山旧隐

龙尾道边来一望香炉峯下去无因青山举眼三千里白发平头五十人自笑形骸纡组绶将何言语掌丝纶君恩壮健犹难报况被年年老逼身

冯阁老处见与严郎中酬和诗因戏赠絶句

乍来天上宜清浄不用回头望故山纵有旧游君莫忆尘心起即堕人闲

见于给事暇日上直寄南省诸郎官诗因以戏赠

倚作天仙弄地仙夸张一日抵千年黄麻敕胜长生籙白紵词嫌内景篇云彩误居青琐地风流合在紫微天东曹渐去西垣近鹤驾无妨更着鞭

题新昌所居

宅小人烦恼泥深马钝顽街东闲处住日午热时还院窄难栽竹墙高不见山唯应方寸内此地觉寛闲西省北院新构小亭种竹开窗东通骑省与李常侍隔窗小饮各题四韵

结托白须伴因依青竹丛题诗新壁上过酒小窗中深院晚无日虚檐凉有风金貂醉看好回面紫垣东酬元郎中同制加朝散大夫书怀见赠

命服虽同黄纸上官班不共紫垣前青衫脱早差三日白发生迟较九年曩者定交非势利老来同病是诗篇终身拟作卧云伴逐月须收烧药钱五品足为婚嫁主绯袍着了好归田

初着绯戏赠元九

晚遇缘才拙先衰被病牵那知垂白日始是着绯年身外名徒尔人闲事偶然我朱君紫绶犹未得差肩

和韩侍郎苦雨

润气凝柱础繁声注瓦沟闇留窗不晓凉引簟先秋叶湿蚕应病泥稀燕亦愁仍闻放朝夜误出到街头

连雨

风雨闇萧萧鸡鸣暮复朝碎声笼苦竹冷翠落芭蕉水鸟投檐宿泥蛙入户跳仍闻蕃客见明日欲追朝

初加朝散大夫又转上柱国

紫微今日烟霄地赤岭前年泥土身得水鱼还动鳞鬣乘轩鹤亦长精神且慙身忝官阶贵未敢家嫌活计贫柱国勲成私自问有何功德及生人

行简初授拾遗同早朝入阁因示十二韵

夜色尚苍苍槐阴夹路长听钟出长乐传鼓到新昌宿雨沙堤润秋声桦【胡卦切】烛香马骄欺地软人健得天凉待漏排闾阖停珂拥建章尔随黄阁老吾次紫薇郎并入连称籍齐趋对折方鬪班花接萼绰立鴈分行近职诚为美微才岂合当纶言难下笔谏纸易盈箱老去何侥幸时来不料量唯求杀身地相誓答恩光

立秋日登乐游园

独行独语曲江头回马迟迟上乐游萧萧凉风与衰鬓谁教同会一时秋

新秋早起有怀元少尹

秋来转觉此身衰晨起临阶盥漱时漆匣镜明头尽白铜甁水冷齿先知光阴纵惜难留住官职虽多不得已迟老去相逢无别计强开笑口展愁眉

夜筝

紫袖红弦明月中自弹自感闇低容弦凝指咽声停处别有深情一万重

妻初授邑号告身

弘农旧县授新封钿轴金泥诰一通我转官阶常自愧君加邑号有何功花牋印了排窠湿锦褱装来耀手红倚得身名便慵堕日高犹睡绿窗中

送客南迁

我说南中事君应不愿听曾经身困苦不觉语丁宁烧处愁云梦波时忆洞庭春畚烟勃勃秋瘴露冥冥蚊蚋经冬活鱼龙欲雨腥水虫能射影山鬼解藏形穴掉巴蛇尾林飘鸩鸟翎 风千里黑?【徐廉切山菜也】草四时青客似惊弦鴈舟如委浪萍谁人劝言笑何计慰漂零慎勿琴离膝长须酒满瓶大都从此去宜醉不宜醒

暮归

不觉百年半何曾一日闲朝随烛影出暮趁鼓声还瓮里非无酒墙头亦有山归来常困卧早晚得开颜

寄远

欲忘忘未得欲去去无由两腋不生翅二毛空满头坐看新落叶行上最高楼暝色无边际茫茫尽眼愁

旧房

远壁秋声虫络丝入檐新影月低眉牀帷半故帘旌断仍是初寒欲夜时

钱侍郎使君以题庐山草堂诗见寄因酬之

殷勤江郡守怅望掖垣郎慙见新琼什思归旧草堂事随心未得名与道相妨若不休官去人闲到老？

寄山僧【时年五十】

眼看过半百早晚扫岩扉白首谁留住青山自不归百千万劫障四十九年非会拟抽身去当风抖擞衣

慈恩寺有感【时构直初逝居敬方病】

自问有何惆怅事寺门临入却迟回李家哭泣元家病柿叶红时独自来

酬严十八郎中见示

口厌含香握厌兰紫薇青琐举头看忽惊鬓後苍浪发未得心中本分官夜酌满客花色暖秋唵切骨玉声寒承明长短君应入莫忆家江七里滩

寄王秘书

霜菊花萎日风梧叶碎时怪来秋思苦缘咏秘书诗

中书寓直

缭绕宫墙围禁林半开阊阖晓沈沈天晴更觉南山近月出方知西掖深病对词头慙彩笔老看镜面愧华簪自嫌野物将何用土木形骸麋鹿心

自问

黑花满眼丝满头早衰因病病因愁宦途气味已谙尽五十不休何日休

曲江独行招张十八

曲江新岁後冰与水相和南岸犹残雪东风未有波偶游身独自相忆意如何莫待春深去花时鞍马多

新居早春二首

静巷无来客深居不出门铺沙盖苔面扫雪拥松根渐暖宜闲步初晴爱小园觅花都未有唯觉树枝繁地润东风暖闲行蹋草芽呼童遣移竹留客伴尝茶溜滴檐水尽尘浮隙日斜新居未曾到隣里是谁家新昌新居书事四十韵因寄元郎中张博士

冒宠已三迁归朝始二年囊中贮余俸园外买闲田狐兔同三迳蒿莱共一壥新园聊剗秽旧屋且扶颠檐漏移倾瓦梁欹换蠹椽平治遶台路整顿近阶甃巷狭开容驾墙低垒过肩门间堪驻盖堂室可铺筵丹凤楼当後青龙寺在前市街尘不到宫树影相连省吏嫌坊远豪家笑地偏敢劳宾客访或望子孙传不觅他人爱唯将自性便等闲栽树木随分占风烟逸致因心得幽期遇境牵松声疑涧底草色胜河边虚润冰销地晴和日出天苔行滑如簟莎坐软於絺帘每当山卷帷多待月褰篱东花掩映窗北竹婵娟迹慕青门隐名慙紫禁仙假归思晚沐朝去恋春眠拙薄才无取疎慵职不专题墙书命笔沽酒率分钱柏杵春灵药铜瓶漱暖泉炉香穿盖散笼烛隔纱然陈室何曾扫陶琴不要弦屏除俗事尽养活道情全尚有妻孥累犹为组绶纏终须抛爵禄渐拟断腥羶大抵宗庄叟私心事竺乾浮荣水划字真谛火生莲梵部经十二玄书字五千是非都付梦语默不妨禅博士官犹冷郎中病已痊多同僻处住久结静中缘缓步携筇杖徐吟展蜀笺老宜闲语话闷忆好书篇蛮榼来方泻蒙茶到始煎无辞数相见鬓发各苍然

喜敏中及第偶示所怀

自知羣从为儒少岂料词场中第频桂折一枝先许我杨穿三叶尽惊人【始予进士及第行简次之敏中又次之】转於文墨须留意贵向烟霄早致身莫学尔兄年五十蹉跎始得掌丝纶

久不见韩侍郎戏题四韵以寄之

近来韩阁老疎我我心知户大嫌甜酒才高笑小诗静吟乘月夜闲醉旷花时还有愁同处春风满鬓丝

寄白头陀

近见头陀伴云师老更慵性灵闲似鹤顔状古於松山里犹难觅人闲岂易逢仍闻移住处太白最高峯

和韩侍郎题杨舍人林池见寄

渠水闇流春冻解风吹日炙不成凝凤池冷暖君谙在二月因何更有冰

勤政楼西老柳

半朽临风树多情立马人开元一株柳长庆二年春

偶题阁下厅

静爱青苔院深宜白发翁貌将松共瘦心与竹俱空暖有低檐日春多扬幕风平生闲境界尽在五言中予与故刑部李侍郎早结道友以药术为事与故京兆元尹晚为诗侣有林泉之期周岁之闲二君长逝李住曲江北元居昇平西追感旧游因贻同志

从哭李来伤道气自亡元後减诗情金丹同学都无益水竹隣居竟不成月夜若为游曲水花时那忍到昇平如年七十身犹在但恐伤心无处行

送马舍人阁老往襄阳

紫微阁底送君回第二厅帘下不开莫恋汉南风景好岷山花尽早归来

莫走柳条词送别

南陌伤心别东风满把春莫欺杨柳弱劝酒胜於人

酬韩侍郎张博士雨後游曲江见寄

小园新种红樱树闲遶花行便当游何必更随鞍马队冲泥蹋雨曲江头

元家花

今日元家宅樱桃发几枝稀稠与顔色一似去年时失却东园主春风可得知

代人赠王员外

好在王员外平生记得不共赧黄叟酒同上莫愁楼静接殷勤语狂随烂熳游那知今日眼相见冷於秋

惜小园花

晓来红萼凋零尽但见空枝四五株前日狂风昨夜雨残芳更合得存无

萧相公宅遇自远禅师有感而赠

宦途堪笑不胜悲昨日荣华今日衰转似秋蓬无定处长於春梦几多时半头白发慙萧相满面红尘问远师应是世闲缘未尽欲抛官去尚迟疑

草词毕遇芍药初开因咏小谢红药当堦翻诗以为一句未尽其状偶成十六韵

罢草紫泥诏起吟红药诗词头封送後花口拆开时坐对鈎帘久行观步履迟两三丛烂熳十二叶参差背日房微敛当堦朶旋欹钗萼抽碧股粉蘂扑黄丝动荡情无限低斜力不支周回看未足比谕语难为勾漏丹砂裹焦饶火焰旗彤云賸根蒂绦帙欠纓綬况有晴风度仍兼宿露垂凝香熏罨画似泪着胭脂有意留连我无言怨思谁应愁明日落如恨隔年期菡萏泥连萼玫【音梅】瑰【音回】刺绕枝等量无胜者唯眼与心知

喜张十八博士除水部员外郎

老何歿後吟声絶虽有郎官不爱诗无复篇章传道路空留风月在曹司长嗟博士官犹屈亦恐骚人道渐衰今日闻君除水部喜於身得省郎时

与沈杨二舍人阁老同食敕赐樱桃翫物感恩因成十四韵

清晓趋丹禁红樱降紫宸驱禽养得熟和叶摘来新圆转盘倾玉鲜明笼透银内园题两字西掖赐三臣荧惑晶华赤醍醐气味真如珠未穿孔似火不烧人杏俗难为对桃顽讵可伦肉嫌卢橘厚皮笑荔枝皴琼液酸甜足金丸大小匀偷须防曼倩惜莫掷安仁手擘才离核匙抄半是津甘为舌上露煖作腹中春已惧长尸禄仍惊数食珍最慙恩未报饱餒不才身

送严大夫赴桂州

地压坤方重官兼宪府雄桂林无瘴气栢署有清风山水衙门外旌旗艘【音娄】牒【音牒】中大夫应絶席诗酒与谁同

春夜宿直

三月十四夜西垣东北廊碧梧叶重叠红药树低昂月砌漏幽影风帘飘闇香禁中无宿客谁伴紫薇郎

夏夜宿直

人少庭宇旷夜凉风露清槐花满院气松子落堦声寂寞挑灯坐沈吟蹋月行年衰自无趣不是厌承明七言十二句赠驾部吴郎中七兄【时早夏朝归闭斋独处偶题此什】

四月天气和且清绿槐阴合沙堤平独骑善马衔镫稳初着单衣肢体轻退朝下直少徒侣归舍闭门无送迎风生竹夜窗闲卧月照松时台上行春酒冷尝三数盏晓琴闲弄十余声幽怀静境何人别唯有南宫老驾兄

玉真张观主下小女冠阿容

绰约小天仙生来十六年姑山半峯雪瑶水一枝莲晚院花留立春窗月伴眠回眸虽欲语阿母在傍边龙花寺主家小尼【郭代公爱姬薛氏幼尝为尼小名仙人子】

头青眉眼细十四女沙弥夜静双林怕春深一食饥步慵行道困起晚诵经迟应似仙人子花宫未嫁时

访陈二

晓垂朱绶带晚着白纶巾出去为朝客归来是野人两飧聊过日一榻足容身此外皆闲事时时访老陈

晚亭逐凉

送客出门後移牀下砌初趁凉行绕竹引睡卧看书老更为官拙佣多向事疎松窗倚藤杖人道似僧居

曲江忆李十一

李君歿後共谁游柳岸荷亭两度秋独遶曲江行一匝依前还立水边愁

江亭翫春

江亭乘晓阅衆芳春妍景丽草树光日消石桂绿岚气风坠木兰红露浆水蒲渐展书带叶山榴半含琴轸房何物春风吹不变愁人依旧鬓苍苍

闻夜砧

谁家思妇秋捣帛月苦风凄砧杵悲八月九月正长夜千声万声无了时应到天明头尽白一声添得一茎丝

板桥路

梁苑城西二十里一渠春水柳千条若为此路今重过十五年前旧板桥曾共玉颜桥上别不知消息到今朝

青门柳

青青一树伤心色曾入几人离恨中为近都门多送别长条折尽减春风

梨园弟子

白头垂泪语梨园五十年前雨露恩莫问华清今日事满山红叶锁宫门

暮江吟

一道残阳铺水中半江瑟瑟半江红可怜九月初三夜露似真珠月似弓

思妇眉

春风摇荡自东来折尽樱桃绽尽梅惟余思妇愁眉结无限春风吹不开

怨词

夺宠心那惯寻思倚殿门不知移旧爱何处作新恩

空闺怨

寒月沈沈洞房静真珠帘外梧桐影秋霜欲下手先知灯底裁缝剪刀冷

秋房夜

云露青天月漏光中庭立久却归房水窗席冷未能卧挑尽残灯秋夜长

采莲曲

菱叶萦波荷飏风荷花深处小船通
逢郎欲语低头笑碧玉搔头落水中

隣女

娉婷十五胜天仙白日姮【胡登切】娥旱地莲何处闲教鹦鹉语碧纱窗下绣牀前

闺妇

斜凭绣牀愁不动红绡带缓绿鬟低
辽阳春尽无消息夜合花前日又西

移牡丹栽

金钱买得牡丹栽何处辞丛别主来
红芳堪惜还堪恨百处移将百处开

听夜箏有感

江州去日听箏夜白发新生不愿闻
如今况是头成雪弹到天明亦任君

代谢好妓答崔员外

青娥小谢娘白发老崔郎谩爱胸前雪
其如头上霜别後曹家碑背上思量好字断君肠

琵琶

弦清拨刺语铮铮背却残灯就月明
赖是心无惆怅事不然争奈子弦声

和殷协律琴思

秋水莲冠春草裙依稀风调似文君
烦君五指分明语知是琴心佯不闻

寄李苏州兼示杨琼

真娘墓头春草碧心奴鬓上秋霜白
为问苏台酒席中使君歌笑与谁同
就中犹有杨琼在堪上东山伴谢公

听弹湘妃怨

玉轸朱弦瑟瑟徽吴娃徵调奏湘妃
分明曲里愁云雨似道萧萧郎不归
【江南新词有云暮雨萧萧郎不归】

闲坐

煖拥红炉火闲搔白发头百年慵里过万事醉中休
有室同摩诘无儿比邓攸莫论身在日身後亦无忧

白氏长庆集卷十九

卷二十

钦定四库全书

白氏长庆集卷二十

唐白居易撰

律诗【五言七言凡一百首】

初罢中书舍人

自慙拙宦叨清贵还有痴心怕素飧或望君臣相献替可图妻子免饥寒性疎岂合承恩久命薄元知济事难分寸宠光酬未得不休更拟觅何官

宿阳城驿对月【自此後诗赴杭州路中作】

亲故寻回驾妻孥未出关凤皇池上月送我过商山

商山路有感【并序】

前年夏予自忠州刺史除书归阙时刑部李十一侍郎户部崔二十员外亦自沔果二郡守徵还相次入关皆同此路今年予自中书舍人授杭州刺史又由此途出二君已逝予独南行追叹兴怀慨然成咏後来有与予构直虞平游者见此短什能无惻惻乎傥未忘情请为继和长庆二年七月三十日题於内乡县南亭云尔忆昨徵还日三人归路同此生都是梦前事旋成空构直泉埋玉虞平烛过风唯残乐天在头白向江东

重感

停骖歇路隅重感一长吁扰扰生还死纷纷荣又枯困支青竹杖闲捋白髭须莫叹身衰老交游半已无

逢张十八员外籍

旅思正茫茫相逢此道傍晓岚林叶闇秋露草花香白发江城守青衫水部郎客亭同宿处忽似夜归乡赴杭州重宿棣华驿见杨八旧诗感题一絶

往恨今愁应不殊题诗梁下又踟蹰
羡君犹梦见兄弟我到天明睡亦无

寓言题僧

劫风火起烧荒宅苦海波生荡破船
力小无因救焚溺清凉山下且安禅

内乡县村路作

日下风高野路凉缓驱疲马闇思乡
渭村秋物应如此枣赤梨红稻穗黄

路上寄银匙与阿龟

谪宦心都惯辞乡去不难缘留龟子住
涕泪一阑干小子须娇养邹婆为好看
银匙封寄汝忆我即加飧

山泉煎茶有怀

坐酌泠泠水看煎瑟瑟尘无由持一盃
寄与爱茶人

郢州赠别王八使君

昔是诗狂客今为酒病夫强吟翻怅望
纵醉不欢娱鬓发三分白交亲一半无
郢城君莫厌犹校近京都

吉祥寺见钱侍郎题名

云雨三年别风波万里行愁来正萧索
况见故人名

重到江州感旧游题郡楼十一韵

掌纶知是忝剖竹信为荣才薄官仍重
恩深责尚轻昔徵从典午今出自承明
凤诏休挥翰渔歌欲濯缨还乘小艫牒
【音楼牒小舟也】却到古湓城醉客
临江待禅僧出郭迎青山满眼在白发
半头生又较三年老何曾一事成重过
萧寺宿再上庾楼行云水新秋思闻阁
旧日情郡民犹认得司马咏诗声

赠江州李十使君员外十四韵

我本江湖上悠悠任运身朝随卖药客
暮伴钓鱼人迹为烧丹隐家缘嗜酒贫
经过剡溪雪寻觅武陵人岂有疎狂性
堪为侍从臣仰头惊凤阙下口触龙鳞
劒佩辞天上风波向海滨非贤

虚偶圣无屈敢求伸昔去曾同日今来即後尘【元和末与李员外同日黜官今又相次出为刺史】中年俱白鬓仕宦各朱轮长短才虽异荣枯事略均殷勤李员外不合不相亲

题别遗爱草堂兼呈李十使君【李亦庐山人常隐白鹿洞】

曾住炉峯下书堂对药台
斩新萝径合依旧竹窗开
砌水亲开决池荷手自栽
五年方蹶至一宿又须回
纵未长归得犹胜不到来
君家白鹿洞闻道亦生苔

重题

泉石尚依依林疎僧亦稀
何年辞水阁今夜宿云扉
谩献长杨赋虚抛薜荔衣
不能成一事赢得白头归

夜泊旅望

少睡多愁客中宵起望乡
沙明连浦月帆白满船霜
近海江弥濶迎秋夜更长
烟波三十宿犹未到钱塘

九江北岸遇风雨

黄梅县边黄梅雨白头浪
里白头翁九江濶处不见岸
五月尽时多恶风人间稳路
应无限何事抛身在此中

舟中晚起

日高犹掩水窗眠枕簟清凉
八月天泊处或依沽酒店宿
时多伴钓鱼船退身江海应
无用忧国朝廷自有贤且向
钱塘湖上去冷吟闲醉二三年

秋寒

雪鬓年顔老霜庭景气秋
病看妻捡药寒遣婢梳头
身外名何有人间事且休澹
然方寸内唯拟学虚舟初到
郡斋寄钱湖州李苏州【聊取
二郡一晒故有落句之戏】

俱来沧海郡半作白头翁
谩道风烟接何曾笑语同
吏稀秋税毕客散晚亭空
霁後当楼月潮来满座风
雪【直甲切水名在吴兴】
溪殊冷僻茂苑太繁雄
唯此钱塘郡闲?恰得中

对酒自勉

五十江城守停杯一自思
头仍未尽白官亦不全卑
荣宠寻过分欢娱已校迟
肺伤虽怕酒心

健尚夸诗夜舞吴娘袖春歌蛮子词犹堪三五岁相伴醉花时

郡楼夜宴留客

北客劳相访东楼为一开卷帘待月出把火看潮来艳听竹枝曲香传莲子杯寒天殊未晓归骑且迟回

醉题候仙亭

蹇步垂朱绶华缨映白须何因驻衰老只有且欢娱酒兴还应在诗情可使无登山与临水犹未要人扶

东院

松下轩廊竹下房暖檐晴日满绳牀净名居士经三卷荣啓先生琴一张老去齿衰嫌橘醋病来肺渴觉茶香有时闲酌无人伴独自腾腾入醉乡

虚白堂

虚白堂前衙退後更无一事到中心移牀就月檐闲卧卧咏闲诗侧枕琴

闲夜咏怀因招周协律刘薛二秀才

世名检束为朝士心性疎慵是野夫高置寒灯如客店深藏夜火似僧炉香浓酒熟能尝否冷澹诗成肯和无若厌雅嗔须俗饮妓筵勉力为君铺

晚兴

极浦收残雨高城驻落晖山明虹半出松闥鹤双归将吏随衙散文书入务稀闲吟倚新竹筠粉污朱衣

衰病

老与病相仍华簪发不胜行多朝散药睡少夜停灯禄食分供鹤朝衣减施僧性多移不得郡政漫如绳

病中对病鹤

同病病夫怜病鹤精神不损翅翎伤未堪再举摩霄汉只合相随觅稻粱但作悲吟和嘹唳难

将俗貌对昂藏唯应一事宜为伴我发君毛俱似霜

夜归

半醉闲行湖岸东马鞭敲镫警珑璁万株松树青山上十里沙堤明月中楼角渐移当路影潮头欲过满江风归来未放笙歌散画戟门开蜡烛红

腊後岁前遇景咏意

海梅半白柳微黄冻水初融日欲长度腊都无苦霜霰迎春先有好风光郡中起晚听衙鼓城上行慵倚女墙公事渐闲身且健使君殊未厌余杭

白发

雪发随梳落霜毛绕鬓垂加添老气味改变旧容仪不肯长如漆无过总作丝最憎明镜里黑白半头时钱湖州以箬【如灼切】下酒李苏州以五醖【大透切重酿酒】酒相次寄到无因同饮聊咏所怀

劳将箬下忘忧物寄与江城卖酒翁铛脚三州何处会瓮头一盏几时同倾如竹叶盈樽绿饮作桃花上面红莫怪殷勤醉相忆曾陪西省与南宫

花楼望雪命宴赋诗

连天际海白皑皑好上高楼望一回何处更能分道路此时兼不认池台万重云树山头翠百尺花楼江畔开素壁联题分韵句红炉巡饮暖寒盃冰铺湖水银为面风卷汀沙玉作堆绁惹舞人春艳曳勾留醉客夜徘徊输将虚白堂前鹤失却樟亭驿後梅别有故情偏忆得曾经穷苦照书来

晚岁

壮岁忽已去浮荣何足论身为百口长官是一州尊不觉白双鬓徒言朱两轡病难施郡政老未答君恩岁暮别兄弟年衰无子孙惹愁谙世网治苦赖空门攀【鲁敢切手取也】带知腰瘦看灯觉眼昏不缘衣食系寻合返丘园

宿竹阁

晚坐松檐下宵眠竹阁间清虚当服药幽独抵归山巧未能胜拙?应不及闲无劳别修道即此是玄关岁暮枉衢州张使君书并诗因以长句报之

西州彼此意何如官职蹉跎岁欲除浮石潭边停五马望涛楼上得双鱼
万言旧手才难敌五字新题思有余贫薄诗家无好物反投桃李报琼琚

和薛秀才寻梅花同饮见赠

忽惊林下发寒梅便试花前饮冷盃白马走迎诗客去红筵铺待舞人来
歌声怨处微微落酒气醺时旋旋开若到岁寒无雨雪犹应醉得两三回

与诸客空腹饮

隔宿书招客平明饮暖寒麴神寅日合酒圣卯时欢促膝才飞白酡颜已渥丹
碧筹攒米椀红袖拂骰盘醉後歌尤异狂来舞不难抛盃语同坐莫作老人看

小岁日对酒喺钱湖州所寄诗

独酌无多兴闲吟有所思一杯新岁酒两句故人诗杨柳初黄日髭须半白时
蹉跎春气味彼此老心知

钱塘湖春行

孤山寺北贾亭西水面初平云脚低几处早莺争暖树谁家新燕啄春泥
乱花渐欲迷人眼浅草才能没马蹄最爱湖东行不足绿杨阴里白沙堤

题灵隐寺红辛夷花戏酬光上人

紫粉笔含尖火焰红胭脂染小莲花芳情乡思知多少恼得山僧悔出家

重向火

火销灰复死疎弃已经旬岂是人情薄其如天气春风寒忽再起手冷重相亲
却就红炉坐心如逢故人

候仙亭同诸客醉作

谢安山下空携妓柳恹洲边只赋诗争及湖亭今日会嘲花咏水赠蛾眉

城上

城上冬冬鼓朝衙复晚衙为君慵不出落尽遶城花

早行林下

披衣未冠栉晨起入前林宿露残花气朝光新叶陰傍松人迹少隔竹鸟声深闲倚小桥立倾头时一唸

送李校书趁寒食归义兴山居

大见腾腾诗酒客不忧生计似君稀到舍将何作寒食满船惟载树陰归

题孤山寺山石榴花示诸僧衆

山榴花似结红巾容艳新妍占断春色相故关行道地香尘拟触坐禅人瞿曇弟子君知否恐是天魔女化身

独行

闇诵黄庭经在口闲携青竹杖随身晚花新笋堪为伴独入林行不要人

二月五日花下作

二月五日花如雪五十二人头似霜闻有酒时须笑乐不关身事莫思量羲和趁日沈西海鬼伯驱人葬北邙只有且来花下醉从人笑道老颠狂

戏题木兰花

紫房日照臙脂拆素艳风吹膩粉开怪得独饶脂粉态木兰曾作女郎来

清明日观妓舞听客诗

看舞顏如玉听诗韵似金绮罗从许笑弦管不妨吟可惜春风老无嫌酒盏深辞花送寒食并在此时心

西湖晚归回望孤山寺赠诸客

柳湖松岛莲花寺晚动归桡出道场卢橘子低山雨重棕榈叶战水风凉烟波澹荡摇空碧楼殿参差倚夕阳到岸请君回首望蓬莱宫在海中央

湖中自照

重重照影看容鬓不见朱颜见白丝失却少年无觅处泥他湖水欲何为

赠苏链师

两鬓苍然心浩然松窗深处药炉前携将道士通宵语忘却花光尽日眠明镜懒开长在匣素琴欲弄半无弦犹嫌庄子多词句只读逍遥六七篇

杭州春望

望海楼明照曙霞【城东楼名望海楼】护江堤白蹋晴沙涛声夜入伍员庙柳色春藏苏小家红袖织绡夸柿蒂【杭州出柿蒂花者尤佳也】青旗沽酒趁梨花【其俗酿酒趁梨花时熟号为梨花春】谁开湖寺西南路草绿裙腰一道斜【孤山寺路在湖州中草绿时望如裙腰】

饮散夜归赠诸客

鞍马夜纷纷香街起暗尘回鞭招饮妓分火送归人风月应堪惜杯觞莫厌频明朝三月尽忍不送残春

湖亭晚归

尽日湖亭卧心闲事亦稀起因残醉醒坐待晚凉归松雨飘藤帽江风透葛衣柳堤行不厌沙软絮霏霏

东楼南望八韵

不厌东南望江楼对海门风涛生有信天水合无痕鷁带云帆动鸥和雪浪翻鱼盐聚为市烟火起成村日脚金波碎峯头钿点繁送秋千里鴈报暝一声已豁烦襟闷仍开病眼昏郡中登眺处无胜此东轩

醉中酬殷协律

泗水亭边一分散浙江楼上重游陪挥鞭二十年前别命驾三千里外来醉袖放狂相向舞愁眉和笑一时开留君夜住非无分且尽青娥红烛台

孤山寺遇雨

拂波云色重洒叶雨声繁水鹭双飞起风荷一向翻空蒙连北岸萧飒入东轩或拟湖中宿留船在寺门

樟亭双樱树

南馆西轩两树樱春条长足夏阴成素华朱实今虽尽碧叶风来别有情

湖上夜饮

郭外迎人月湖边醒酒风谁留使君饮红烛在舟中

赠沙鸥

老逼教垂白官科遣着绯形骸虽有累方寸却无机遇酒多先醉逢山爱晚归沙鸥不知我犹避隼旗飞

余杭形胜

余杭形胜四方无州傍青山县枕湖邊郭荷花三十里拂城松树一千株梦儿亭古传名谢教妓楼新道姓苏【州西灵隐山上有梦谢亭即是杜明浦梦谢灵运之所因名客儿也苏小小本钱塘妓人也】独有使君年太老风光不称白髭须

江楼夕望招客

海天东望夕茫茫山势川形濶复长灯火万家城四畔星河一道水中央风吹古木晴天雨月照平沙夏夜霜能就江楼销暑否比君茅舍较清凉

新秋病起

一叶落梧桐年光半又空秋多上阶日凉足入怀风病瘦形如鹤愁焦鬓似蓬损心诗思里伐性酒狂中华盖何曾惜金丹不致功犹须自慙愧得作白头翁

木芙蓉花下招客饮

晚凉思饮两三盃召得江头酒客来莫怕秋无伴醉物水莲花尽木莲开

悲歌

白头新洗镜新磨老逼身来不奈何耳里频闻故人死眼前唯觉少年多塞鸿遇暖犹回翅江水因潮亦反波独有衰颜留不得醉来无计但悲歌

江楼晚眺景物鲜奇吟翫成篇寄水部张员外

澹烟疎雨间斜阳江色鲜明海气凉蜃散云收破楼阁虹残水照断桥梁风翻白浪花千片鴈点青天字一行好着丹青图写取题诗寄与水曹郎

夜招周协律兼答所赠

满眼虽多客开眉复向谁少年非我伴秋夜与君期落魄俱耽酒殷勤共爱诗相怜别有意彼此老无儿

重酬周判官

秋爱冷吟春爱醉诗家眷属酒家仙若教早被浮名系可得闲游三十年

饮後夜醒

黄昏饮散归来卧夜半人扶强起行枕上酒容和睡醒楼前海月伴潮生将归梁燕还重宿欲灭窗灯却复明直至晓来犹妄想耳中如有管弦声

代卖薪女赠诸妓

乱蓬为鬓布为巾晓蹋寒山自负薪一种钱塘江畔女着红骑马是何人

奉和李大夫题新诗二首各六韵

因严亭【一作固严】

箕颍人穷独蓬壶路阻难何如兼吏隐复得事跻攀岩树罗阶下江云贮栋间似移天目石疑入武丘山清景徒堪赏皇恩肯放闲遥知兴未足即被诏徵还

忘筌亭

翠巘公门对朱轩野迳连只开新户牖不改旧风烟空室闲生白高情澹入玄酒容同座劝诗借属城传自笑沧江畔遥思绛帐前庭台随事有争敢比忘筌

予以长庆二年冬十月到杭州明年秋九月始与范阳卢贾汝南周元范兰陵萧悦清河崔求东莱刘方舆同游恩德寺之泉洞竹石籍甚久矣及兹目击果愜心期因自嗟云到郡周岁方来入寺半日复去俯视朱绶仰睇白云有愧於心遂留絶句

云水埋藏恩德洞簪裾束缚使君身慙来不宿归州去应被山呼作俗人

早冬

十月江南天气好可怜冬景似春华霜轻未杀萋萋草日暖初乾漠漠沙老柘叶黄如嫩树寒樱枝白是狂花此时却羡闲人醉五马无由入酒家

岁假内命酒赠周判官萧协律

共知欲老流年急且喜新正假日频闻健此时相劝醉偷闲何处共寻春脚随周叟行犹疾头比萧翁白未匀岁酒先拈辞不得被君推作少年人

与诸客携酒寻去年梅花有感

马上同携今日盃湖边共觅去年梅年年只是人空老处处何曾花不开诗思又牵吟咏发酒酣闲唤管弦来樽前百事皆依旧点检惟无薛秀才【去年与薛景文同赏今年长逝】醉送李协律赴湖南辟命因寄沈八中丞

富阳山底樟亭畔立马停舟飞酒盃曾共中丞情缱绻暂留协律语踟蹰紫微星北承恩去青草湖南称意无不羡君官羡君幕幕中收得阮元瑜

内道场永讷上人就郡见访善说维摩经临别请诗因以此赠

五夏登坛内殿师水为心地玉为仪正传金粟如来偈何用钱塘太守诗苦海出来应有路灵山别後可无期他生莫忘今朝会虚白亭中发药时

见李苏州示男阿武诗自感成咏

遥羡青云里祥鸾正引雏自怜沧海畔老蚌不生珠

正月十五日夜月

岁熟人心乐朝游复夜游春风来海上明月在江头灯火家家市笙歌处处楼无妨思帝里不合厌杭州

题州北路傍老柳树

皮枯缘受风霜久条短为经攀折频但见半衰当此路不知初种是何人雪花零碎逐年减烟叶稀疏随分新莫道老株芳意少逢春犹胜不逢春

题清头陀

头陀独宿寺西峯百尺禅庵半夜钟烟月苍苍风瑟瑟更无杂树对山松

自叹二首

形羸自觉朝餐减睡少偏知夜漏长
实事渐消虚事在银鱼金带遶腰光

二毛晓落梳头懒两眼春昏点药频
唯有闲行犹得在心情未到不如人

湖上醉中代诸妓寄严郎中

笙歌杯酒正欢娱忽忆仙郎望帝都
借问连宵直南省何如尽日醉西湖
蛾眉别久心知否鸡舌含多口厌无
还有些些惆怅事春来山路见蘼芜

自咏

闷发每吟诗引兴兴来兼酌酒开颜
欲逢暇日先招客正对衙时亦望山
勾检簿书多卤莽堤防官吏少机关
谁能头白劳心力人道无才也是闲

晚兴

草浅马翩翩新晴薄暮天
柳条春拂面衫袖醉垂鞭
立语花堤上行吟水寺前
等闲消一日不觉过三年

早兴

晨光出照屋梁明初打开门鼓一声
犬上阶眠知地湿鸟临窗语报天晴
半销宿酒头仍重新脱冬衣体乍轻
睡觉心空思想尽近来乡梦不多成

竹楼宿

小书楼下千竿竹深火炉前一盏灯
此处与谁相伴宿烧丹道士坐禅僧

湖上招客送春泛舟

欲送残春招酒伴客中谁最有风情
两瓶簪下新开得一曲霓裳初教成
【时崔湖州寄新箬下酒来乐妓案霓裳羽衣曲初毕】
排比管弦行翠袖指麾船舫点红旗
慢牵好向湖心去恰似菱花镜上行

戏醉客

莫言鲁国书生懦莫把杭州刺史欺醉客请君开眼望绿杨风下有红旗

紫阳花【招贤寺有山花一树无人知名色紫气香芳丽可爱颇类仙物因以紫阳花名之】

何年植向仙坛上早晚移栽到梵家虽在人间人不识与君名作紫阳花

白氏长庆集卷二十

卷二十一

<集部,别集类,汉至五代,白氏长庆集>

钦定四库全书

白氏长庆集卷二十一

唐白居易撰

後序

前三年元微之为予编次文集而叙之凡五帙每帙十卷讫长庆二年冬号白氏长庆集迺来复有格诗律诗碑志序记表赞以类相附合为卷轴又从五十一以降卷而第之是时大和二年秋予春秋五十有七目昏头白衰也久矣拙音狂句亦已多矣由兹而後宜其絶笔若余习未尽时时一咏亦不自知也因附前集报微之故复序于卷首云尔【按此序宜与元相序同列帙首今遍考诸本俱附此卷姑仍其旧】

格诗调行杂体【凡五十七首】

郡斋旬假命宴呈座客示郡寮【自此後在苏州作】

公门日两衙公假月三旬衙用决簿领旬以会亲宾公多及私少劳逸常不均况为剧郡长安得闲宴频下车已二月开筵始今晨初黔军厨突一拂郡榻尘既备献酬礼亦具水陆珍萍醅簋溪醕水鱠松江鳞侑食乐悬动佐懽妓席陈风流吴中客佳丽江南人歌节点随袂舞香遗在茵清奏凝未阕酩酊颜气已春衆宾勿遽起群寮且逡巡无轻一日醉用犒九日勤微彼九日勤何以治吾民微此一日醉何以乐吾身

题西亭

朝亦视簿书暮亦视簿书簿书视未竟蟋蟀鸣座隅始觉芳岁晚复嗟尘务拘西园景多暇可以少踟蹰池鸟澹容与桥柳高扶疎烟蔓嫋青薜水花披白蕖何人造兹亭华敞绰有余四檐轩鸟翅复屋罗蜘蛛直廊抵曲房【锄交切】窰【土了切深貌】深且虚修竹夹左右清风来徐徐此宜宴佳宾鼓瑟吹笙竽荒淫即不可废旷将何如幸有酒与乐及时欢且娱忽其解郡印他人来此居

郡中西园

闲园多芳草春夏香靡靡深树足佳禽旦暮鸣不已院门闭松竹庭径穿兰芷爱彼池上桥独来聊徙倚鱼依藻长乐鸥见人暂起有时舟随风尽日莲照水谁知郡府内景物闲如此始悟
誼静缘何尝系远迩

北亭卧

树绿晚陰合池凉朝气清莲开有佳色鹤唳无凡声唯此闲寂境愜我幽独情病假十五日十日卧兹亭明朝吏呼起还复视黎甿

一叶落

烦暑郁未退凉飈潜已起寒温与盛衰递相为表里萧萧秋林下一叶忽先委勿言微摇落摇落从此始崔湖州赠红石琴荐焕如锦文无以答之以诗酬谢

蘋锦支绿绮韵同相感深千年古涧石八月秋堂琴引出山水思助成金玉音人间无可比比
我与君心九日宴集醉题郡楼兼呈周殷二判官

前年九日余杭郡呼宾命宴虚白堂去年九日到东洛今年九日来吴乡两边蓬鬓一时白三
处菊花同色黄一日日知添老病一年年觉惜重阳江南九月未摇落柳青蒲绿稻穠香姑苏
台榭倚苍霭太湖山水含清光可怜假日好天色公门吏静风景凉榜舟鞭马取宾客扫楼拂
席排壶觞胡琴铮鏦指拨刺吴娃美丽眉眼长笙歌一曲思凝絕金钿再拜光低昂日脚欲落
备灯烛风头渐高加酒浆觥盞艳翻菡萏叶舞鬟摆落茱萸房半酣凭檻起四顾七堰八门十
六坊远近高低寺闲出东西南北桥相望水道脉分棹鳞次里闾碁布城册方人烟树色无隙
罅十里一片青茫茫自问有何才与政高厅大馆居中央铜鱼今乃泽国节刺史是古吴都王
郊无戎马郡无事门有桀戟腰有章盛时傥来合慚媿壮岁忽去还感伤从事醒归应不可使
君醉倒亦何妨请君停盃听我语此语真实非虚狂五旬已过不为夭七十为期盖是常须知
菊酒登高会从此多无二十场

同微之赠别郭虚舟链师五十韵

我为江司马君为荆判司俱当愁悴日始识虚舟师师年三十余白皙好容仪专心在铅【音
延】汞【呼孔切水银】余力工琴棋静弹弦数声闲饮酒一卮因指尘土下蜉蝣良可悲不
闻姑射上千岁冰雪肌不见辽城外古今塚累累嗟我天地闲有术人莫知得可逃死籍不唯
走三尸授我参同契其辞妙且微六一閤扁鐻子午守雄雌我读随日悟心中了无疑黄芽与
紫车谓其坐致之自负因自叹人生号男儿若不佩金印即合翳玉芝高谢人间世深结山中
期泥坛方合矩铸鼎圆中规鑪橐一以动瑞气红辉辉齐心独叹拜中夜偷一窥二物正欣合
厥状何怪奇绸缪夫妇体狎猎鱼龙姿简寂馆鍾後紫霄峰晓时心尘未净洁火候遂参差万
寿觔刀圭千功失毫厘先生弹指起姹女随烟飞始知缘会闲陰鹭不可移药竈今夕罢诏书
明日追追我复追君次第承恩私官虽小大殊同立白玉墀我直紫微闕手进赏罚词君侍玉

皇座口含生杀机直躬易媒孽浮俗多瑕疵转徙今安在越峽吴江湄一提支郡印一建连帅
旗何言四百里不见如天涯秋风旦夕来白日西南驰雪霜各满鬓朱紫徒为衣师从庐山洞
访旧来於斯寻君又觅我风驭纷逶迤帔曳黄绢须发垂青丝逢人但敛手问道亦颔颐孤
云难久留十日告将归欸曲话平昔殷勤勉衰羸後会杳何许前心日磷缁俗家无异物何以
充别资素牋一百句题附元家诗朱顶鹤一只与师云间骑云间鹤背上故情若相思时时摘
一句唱作步虚辞

霓裳羽衣歌【和微之】

我昔元和侍宪皇曾陪内宴宴昭阳千歌百舞不可数就中最爱霓裳舞舞时寒食春风天玉
钩栏下香案前案前舞者颜如玉不着人家俗衣服虹裳霞帔步摇冠钿璫累累佩珊珊娉婷
似不任罗绮顾听乐悬行复止磬箫箏笛递相搀击撼弹吹声迤迤【凡法曲之初衆乐不齐
唯金石丝竹次第发声霓裳序初亦复如此】散序六奏未动衣阳台宿云慵不飞【散序六
遍无拍故不舞也】中序擘騷【霍虢切】初入拍秋竹竿裂春冰拆【中序始有拍亦名拍
序】飘然转旋回雪轻嫣然纵送游龙惊小垂手後柳无力斜曳裾时云欲生【四句皆霓裳
舞之初态】烟蛾敛略不胜态风袖低昂如有情上元点鬟招萼绿王母挥袂别飞琼【许飞
琼萼绿华皆女仙也】繁音急节十二遍跳珠撼玉何铿锵【霓裳曲十二遍而终】翔鸾舞
了却收翅唳鹤曲终长引声【凡曲将毕皆声拍促速惟霓裳之末长引一声也】当时乍见
惊心目凝视谛听殊未足一落人闲八九年耳冷不曾闻此曲湓城但听山魃语巴峡唯闻杜
哭【予自江州司马转忠州刺史】移领钱塘第二年始有心情问丝竹玲珑箜篌谢好箏陈
宠鸞栗沈平笙清弦脆管纖纖手教得霓裳一曲成【自玲珑以下皆杭之妓名】虚白亭前
湖水畔前後只应三度按便除庶子抛却来闻道如今各星散今年五月至苏州朝钟暮角催
白头贪看案牍常侵夜不听笙歌直到秋秋来无事多闲闷忽忆霓裳无处问闻君部内多乐
徒问有霓裳舞者无答云十县十万户无人知有霓裳舞唯寄长歌与我来题作霓裳羽衣谱
四幅花牋碧闲红霓裳实录在其中千姿万状分明见恰与昭阳舞者同眼前髣髴覩形质昔
日今朝想如一疑从魂梦呼召来似着丹青图写出我爱霓裳君合知发於歌咏形於诗君不
见我歌云惊破霓裳羽衣曲【长恨歌云】又不见我诗云曲爱霓裳未拍时【钱塘诗云】
由来能事皆有主杨氏创声君造谱【开元中西凉府节度杨敬述造】君言此舞难得人须
是倾城可怜女吴妖小玉飞作烟【夫差女小玉死後形见於王其母抱之霏微若烟雾散空
】越艳西施化为土娇花巧笑久寂寥娃馆苧萝空处所如君所言诚有是君试从容听我语
若求国色始翻传但恐人间废此舞妍媸优劣宁相远大都只在人擡举李娟张态君莫嫌亦
拟随宜且教取【娟态苏妓之名】

小童薛阳陶吹鸞栗歌【和浙西李大夫作】

剪削乾芦插寒竹九孔漏声五音足近来吹者谁得名关雎老死李褒生褒今又老谁其嗣薛
氏乐童年十二指点之下师授声含嚙之间天与气润州城高霜月明吟霜思月欲发声山头
江底何悄悄猿声不喘鱼龙听翕然声作疑管裂拙然声尽疑刀截有时婉软无筋骨有时顿
挫生棱节急声圆转促不断辘辘辘似珠贯缓声展引长有条有条直直如笔描下声乍坠

石沈重高声忽举云飘萧明旦公堂陈宴席主人命乐娱宾客碎丝细竹徒纷纷宫调一声雄
出群衆音飏【郎何切】缕不落道有如部伍随将军嗟尔阳陶方稚齿下手发声已如此若
教头白吹不休但恐声名压关李

啄木曲

莫买宝剪刀虚费千金直我有心中愁知君剪不得莫磨解结锥虚劳人气力我有肠中结知
君解不得莫染红丝线徒夸好颜色我有双泪珠知君穿不得莫近红炉火炎气徒相逼我有
两鬓霜知君消不得刀不能剪心愁锥不能解肠结线不能穿泪珠火不能销鬓雪不如饮此
神圣杯万念千忧一时歇

题灵岩寺【寺即吴馆娃宫鸣屨廊砚池采香径遗迹在焉】

娃宫屨廊寻已倾砚池香径又欲平二三月时但草绿几百年来空月明使君虽老颇多思携
觴领妓处处行今愁古恨入丝竹一曲凉州无限情直自当时到今日中闲歌吹更无声

双石

苍然两片石厥状怪且丑俗用无所堪时人嫌不取结从胚浑始得自洞庭口万古遗水滨一
朝入吾手担舁来郡内洗刷去泥垢孔黑烟痕深罅青苔色厚老蛟蟠作足古剑插为首忽疑
天上落不似人闲有一可支吾琴一可贮吾酒峭絶高数尺坳泓容一斗五弦倚其左一杯置
其右洼樽酌未空玉山颓已久人皆有所好物各求其偶渐恐少年场不容垂白叟回头问双
石能伴老夫否石虽不能言许我为三友

宿东亭晓兴

温温土炉火耿耿纱笼烛独抱一张琴夜入东斋宿窗声渡残漏帘影浮初旭头痒晓梳多眼
昏春睡足负暄檐宇下散步池塘曲南鴈去未回东风来何速雪依瓦沟白草遶墙根绿何言
万户州太守常幽独

日渐长赠周殷二判官

日渐长春尚早墙头半露红萼枝池岸新铺绿芽草蹋草攀枝仰头叹何人知此春怀抱年顏
盛壮名未成官职欲高身已老万茎白发真堪恨一片绯衫何足道赖得君来劝一杯愁开闷
破心头好

花前叹

前岁花前五十二今年花前五十五岁课年功头发知从霜成雪君看取【五年前在杭州有

诗云五十二人头似霜】几人得老莫自嫌樊李吴韦尽成土【樊绦州宗师李谏议景俭吴饶州丹韦侍郎顗皆旧往还相继丧逝】南州桃李北州梅且喜年年作花主花前置酒谁相劝容坐唱歌满起舞【容满皆妓名也】欲散重拈花细看争知明日无风雨

自咏五首

朝亦随羣动暮亦随羣动荣华瞬息闲求得将何用形骸与冠盖假合相戏弄何异睡着人不知梦是梦一家五十口一郡十万户出为差科头入为衣食主水旱合心忧饥寒须手抚何异食蓼虫不知苦是苦公私颇多事衰惫殊少欢迎送宾客懒鞭笞黎庶难老耳倦声乐病口厌盃盘既无可恋者何以不休官一日复一日自问何留滞为贪逐日俸拟作归田计亦须随丰约可得无限剂若待足始休休官在何岁官舍非我庐官园非我树洛中有小宅渭上有别墅既无婚嫁累幸有归休处归去诚已迟犹胜不归去和微之听妻弹别鹤操因为解释其义依韵加四句

义重莫若妻生离不如死誓将死同穴其奈生无子商陵追礼教妇出不能止舅姑明旦辞夫妻中夜起起闻双鹤别若与人相似听其悲唳声亦如不得已青田八九月辽城一万里徘徊去住云呜咽东西水写之在琴曲听者酸心髓况当秋月弹先入忧人耳怨抑掩朱弦沈吟停玉指一闻无儿叹相念两如此无儿虽薄命有妻偕老矣幸免生别离犹胜商陵氏

题故元少尹集後二首

黄壤讵知我白头徒忆君唯将老年泪一洒故人文遗文三十轴轴轴金玉声龙门原上土埋骨不埋名

和微之四月一日作

四月一日天花稀叶陰薄泥新燕影?蜜熟蜂声乐麦风低冉冉稻水平漠漠芳节或蹉跎游心稍牢落春华信为美夏景亦未恶颭浪嫩青荷熏栏晚红药吴宫好风月越郡多楼阁两地诚可怜其奈久离索

吴中好风景二首

吴中好风景八月如三月水荇叶仍香木莲花未歇海天微雨散江郭纖埃灭暑退衣服乾潮生船舫活两衙渐多暇亭午初无热骑吏语使君正是游时节

吴中好风景风景无朝暮晓色万家烟秋声八月树舟移管弦动桥拥旌旗驻改号齐云楼重开武丘路况当丰岁熟好是欢游处州民劝使君且莫抛官去

答刘禹锡白太守行

吏满六百石昔贤辄去之秩登二千石今我方罢归我秩讶已多我归慙已迟犹胜尘土下终老无休期卧乞百日告起吟五篇诗【谓将罢官自咏五首】朝与府吏别暮与州民辞去年到郡时麦穗黄离离今年去郡日稻花白霏霏为郡已周岁半岁罹旱饥襦袴无一片甘棠无一枝何乃老与幼泣别尽沾衣下慙苏人泪上愧刘君辞

附白太守行 刘禹锡

闻有白太守抛官归旧谿苏州十万户尽作婴儿啼太守驻行舟阊门草萋萋挥袂谢啼者依然两眉低朱户非不崇我心如重狴华池非不清意在寥廓栖夸者窃所怪贤者默思齐我为太守行题在隐起珪

别苏州

浩浩姑苏民郁郁长洲城来慙荷宠命去愧无能名青紫行将吏班白列黎甿一时临水拜十里随舟行钱筵犹未收征棹不可停稍隔烟树色尚闻丝竹声怅望武丘路沈吟泚水亭还乡信有兴去郡能无情

卯时酒

佛法赞醍醐仙方夸沆【何党切】漉【奚介切】未如卯时酒神速功力陪一盃置掌上三咽入腹内煦若春贯肠暄如日炙背岂独肢体畅仍加志气大当时遗形骸竟日忘冠带似游华胥国疑反混元代一性既完全万机皆破碎半醒思往来往来吁可怪宠辱忧喜闲惶惶二十载前年辞紫闼今岁抛皂盖去矣鱼返泉超然蝉离蜕是非莫分别行止无疑碍浩气贮胸中青云委身外扪心私自语自语谁能会五十年来心未如今日泰况兹盃中物行坐长相对

自问行何迟

前月发京口今辰次淮涯二旬四百里自问行何迟还乡无他计罢郡有余资进不慕富贵退未忧寒饥以此易过日腾腾何所为逢山辄倚棹遇寺多题诗酒醒夜深後睡足日高时眼底一无事心中百不知想到京国日懒放亦如斯何必冒风水促促赴程归

除日答梦得同发楚州

共作千里伴俱为一郡回岁阴中路尽乡思先春来山雪晚犹在淮冰晴欲开归欵吟可作休恋主人杯

问杨琼

古人唱歌兼唱情今人唱歌唯唱声欲说向君君不会试将此语问杨琼

有感三首

鬓发已斑白衣绶方朱紫穷贱当壮年富荣临暮齿车舆红尘合第宅青烟起彼来此须去品物之常理第宅非吾庐逆旅暂留止子孙非我有委蜕而已矣有如蚕造茧又似花生子子结花暗凋茧成蚕老死悲哉可奈何举世皆如此

莫养瘦马驹莫教小妓女後事在目前不信君看取马肥快行走妓长能歌舞三年五岁闲已闻换一主借问新旧主谁乐谁辛苦请君大带上把笔书此语

往事勿追思追思多悲怆来事勿相迎相迎已惆怅不如兀然坐不如塌然卧食来即开口睡来即合眼二事最关身安寝加餐饭忘怀即行止委命随修短更若有兴来狂歌酒一盞

宿荥阳

生长在荥阳少小辞乡曲迢迢四十载复向荥阳宿去时十一二今年五十六追思儿戏时宛然如在目旧居失处所故里无宗族岂唯变市朝兼亦迁陵谷独有溱洧水无情依旧绿

经溱洧

落日驻行骑沈吟怀古情郑风变已尽溱洧至今清不见士与女亦无芍药名

就花枝

就花枝移酒海今朝不醉明朝悔且筭欢娱逐日来任他容鬓随年改醉翻衫袖抛小令笑掷骰盘呼大采自量气力与心情三五年闲犹得在

喜雨

圃旱忧葵堇农旱忧禾菽人各有所私我旱忧松竹松乾竹焦死眷眷在心目洒叶溉其根汲水劳僮仆油云忽东起凉雨凄相续似面洗垢尘如头得膏沐千柯习习润万叶欣欣绿十日浇灌功不如一霖【莫白切】霖【莫卜切】方知宰生灵何异活草木所以圣与贤同心调玉烛

题道宗上人十韵【并序】

普济寺律大德宗上人法堂中有故相国郑司徒归尚书陆刑部元少尹及今吏部郑相中书韦相钱左丞诗览其题皆与上人唱酬阅其人皆朝贤省其文皆义语予始知上人之文为义作为法作为方便智作为解脱性作不为诗而作也知上人者云尔恐不知上人者谓为护国法振灵一皎然之徒与故予题二十句以解之如来说偈赞菩萨着论议是故宗律师以诗为

佛事一音无差别四句有诠次欲使第一流皆知不二义精洁沾戒体闲淡藏禅味从容恣语言缥缈离文字旁延邦国彦上达王公贵先以诗句牵後令入佛智人多爱师句我独知师意不似休上人空多碧云思

寄皇甫宾客

名利既两忘形体方自遂卧掩罗雀门无人惊我睡睡足抖擞衣闲步中庭地食饱摩挲腹心头无一事除却玄晏翁何人知此味

寄庾侍郎

一双华亭鹤数片太湖石巉巉苍玉峯矫矫青云翮是时岁云暮淡薄烟景夕庭霜封石棱池雪印鹤迹幽致竟谁别闲静聊自适怀哉庾顺之好是今宵客

寄崔少监

微微西风生稍稍东方明入秋神骨爽琴晓丝桐清弹为古宫调玉水寒泠泠自觉弦指下不是寻常声须臾羣动息掩琴坐空庭直至日出後犹得心和平惜哉意未已不使崔君听

醉题沈子明壁

不爱君池东十丛菊不爱君池南万竿竹爱君帘下唱歌人色似芙蓉声似玉我有阳关君未闻若闻亦应愁杀君

劝酒

劝君一杯君莫辞劝君两杯君莫疑劝君三杯君始知面上今日老昨日心中醉时胜醒时天地迢迢自长久白兔赤乌相趲走身後堆金挂北斗不如生前一樽酒君不见春明门外天欲明喧喧歌哭半死生游人驻马出不得白輶素车争路行归去来头已白典钱将用买酒吃

落花

留春春不住春归人寂寞厌风风不定风起花萧索既兴风前叹重命花下酌劝君尝绿醕教人拾红萼桃飘火焰焰梨堕雪漠漠独有病眼花春风吹不落

对镜吟

白头老人照镜时掩镜沈吟吟旧诗二十年前一茎白如今变作满头丝【余二十年前尝有诗云白发生一茎朝来明镜里勿言一茎少满头从此始今则满头矣】吟罢回头索杯酒醉

来屈指数亲知老於我者多穷贱设使身存寒且饥少於我者半为土墓树已抽三五枝我今幸得见头白禄俸不薄官不卑眼前有酒心无苦只合欢娱不合悲

耳顺吟寄敦诗梦得

三十四五慾牵七十八十百病纏五十六十却不恶恬淡清静心安然已过爱贪声利後犹在病羸昏耄前未无筋力寻山水尚有心情听管弦闲开新酒尝数盞醉忆旧诗吟一篇敦诗梦得且相劝不用嫌他耳顺年

别羶帐火炉

忆昨腊月天北风三尺雪年老不禁寒夜长安可彻赖有青羶帐风前自张设复此红火炉雪中相暖热如鱼入渊水似兔藏深穴婉软蛰鳞苏温炖冻肌活方安陰惨夕遽变阳和节无奈时候迁岂是恩情絶哉?【诘念切】逐日卷香燎随灰灭离恨属三春佳期在十月但令此身健不作多时别

六年春赠分司东都诸公【时为河南尹】

我为同州牧内愧无才术忝擢恩已多遭逢幸非一偶当谷贱岁适值民安日郡县狱空虚乡间盗奔逸其闲最幸者朝夕多分秩行接鸳鹭羣坐成芝兰室时联拜表骑闲动题诗笔夜雪秉烛游春风携榼出花教莺点检柳付风排比法酒淡清浆含桃嫋红实洛童调金管卢女铿瑶瑟黛惨歌思深腰凝舞拍密每因同醉乐自觉忘衰疾始悟肘後方不如盃中物生涯随日过世事何时毕老子苦乖慵希君数牵率

九日代罗樊二妓招舒著作【齐梁格】

罗敷敛双袂樊姬献一盃不见舒员外秋菊为谁开

忆旧游【寄刘苏州】

忆旧游旧游安在哉旧游之人半白首旧游之地多苍苔江南旧游凡几处就中最忆吴江隈长洲苑绿柳万树齐云楼春酒一盃阊门晓严旗鼓出臯桥夕開船舫回修蛾慢脸灯下醉急管繁弦头上催六七年前狂烂熳三千里外思徘徊李娟张态一春梦周五殷三归夜台虎丘月色为谁好娃宫花枝应自开赖得刘郎解吟咏江山气色合归来【娟态苏州妓名周殷苏州从事】

答崔宾客晦叔十二月四日见寄【来篇云共相呼唤醉归来】

今岁日余二十六来岁年登六十二尚不能忧眼下身因何更算人闲事居士忘筌默默坐先

生枕麴昏昏睡早晚相从归醉乡醉乡去此无多地

劝我酒

劝我酒我不辞请君歌歌莫迟歌声长辞亦切此辞听者堪愁絶洛阳儿女面似花河南大尹头如雪

赠韦处士六年夏大热旱

骄阳连毒暑动植皆枯槁旱日乾密云炎烟焦茂草少壮犹困苦况予病且老脱无白梅檀何以除热恼【华严经云以白梅檀涂身能除一切热恼而得清凉也】汗巾束头鬓羶食熏襟抱始觉韦山人休粮散发好

白氏长庆集卷二十一

卷二十二

钦定四库全书

白氏长庆集卷二十二

唐白居易撰

格诗杂体【凡六十首】

和微之诗二十三首【并序】

微之又以近作二十三首寄来命仆继和其闲疵?四百字车斜二十篇者流皆韵剧辞殚瓌奇怪譎又题云奉烦只此一度乞不见辞若欲定霸取威置仆於穷地耳大凡依次用韵韵同而意殊约体为文文成而理胜此足下素所长者仆何有焉今足下果用所长过蒙见窘然敌则气作急则计生四十二章麾扫并毕不知大敌以为如何夫劘石破山先观鑿迹发矢中的兼听弦声以足下来章惟求相困故老仆报语不觉大夸况曩者唱酬近来因继已十六卷凡千余首矣其为敌也当今不见其为多也从古未闻所谓天下英雄唯使君与操耳戏及此者亦欲三千里外一破愁颜勿示他人以取笑谗乐天白

和晨霞【此後在上都作】

君歌仙氏真我歌慈氏真慈氏发真念念此阎浮人左命大迦叶右召桓提因千万化菩萨百亿诸鬼神上自非相顶下及风水轮胎卵湿化类蠢蠢难具陈弘愿在救拔大悲忘辛勤无论善不善岂间冤与亲抉开生盲眼摆去烦恼尘烛以智慧日洒之甘露津千界一时度万法无与隣借问晨霞子何如朝玉宸

和送刘道士游天台

闻君梦游仙轻举超世雾握持尊皇节统卫吏兵军灵旗星月象天衣龙凤纹佩服交带籙讽吟藁珠文闾宫缥缈闲钧乐依稀闻斋心谒西母瞑拜朝东君烟霏子晋裾霞烂麻姑裙倏忽别真侣怅望随归云人生同大梦梦与觉谁分况此梦中梦悠哉何足云假如金阙顶设使银河瀆既未出三界犹应在五蘊饮咽日月精茹嚼沆瀣芬尚是色香味六尘之所熏仙中有天仙首出梦幻羣慈光一照烛奥法相緼縕不知万龄暮不见三光曛一性自了了万缘徒纷纷苦海不能漂劫火不能焚此是竺乾教先生垂典坟

和栢沐寄道友

栲沐事朝谒中门初动关盛服去尚早假寐须臾间钟声发东寺夜色藏南山停骖待五漏人马同时闲高星粲金粟落月沈玉环出门向关路坦坦无阻艰始出里北閤稍转市西闌晨烛照朝服紫烂复朱殷由来朝廷士一入多不还因循掷白日积渐凋朱颜青云已难致碧落安能攀但且知止足尚可销忧患

和祝苍华【苍华发神名】

日居复月诸环回照下土使我玄云发化为素丝缕禀质本羸劣养生仍莽卤痛饮困连宵悲吟饥过午遂令头上发种种无尺五根稀比黍苗梢细同钗股岂是乏膏沐非关栲风雨最为悲伤多心焦衰落苦余者能有几落者不可数秃似鹄填河堕如乌解羽苍华何用祝苦辞亦休吐正如剃头僧岂要巾冠主

和我年三首

我年五十七荣名得几许甲乙三道科苏杭两州主才能本浅薄心力虚劳苦可能随衆人终老於尘土我年五十七归去诚已迟历官十五政数若珠累累野萍始宾荐场苗初繁维因读管萧书窃慕大有为及遭荣遇来乃觉才力羸黄纸诏频草朱轮车载脂妻孥及仆使皆免寒与饥省躬私自愧知我者微之永怀山阴守未遂嵩阳期如何坐留滞头白江之湄

我年五十七荣名得非少报国竟何如谋身犹未了昔尝速官谤恩大而惩小一黜鹤辞轩七年鱼在沼将枯鳞再跃经铄翮重矫白日上昭昭青云高渺渺平生颇同病老大宜相晓紫绶足可荣白头不为夭夙怀慕箕颍晚节期松筱何当阙下来同拜陈情表

和三月三十日四十韵

送春君何在君在山阴署忆我苏杭时春游亦多处为君歌往事岂敢辞劳虑莫怪言语狂须知酬答遽江南腊月半水冻凝如瘀寒景尚苍茫和风已吹嘘女墙城似竈鴈齿桥如锯鱼尾上瀟沦草芽生沮洳律迟太簇管日缓羲和驭布泽木龙催迎春土牛助雨师习习洒云将飘翥四野万里晴千山一时曙杭土丽且康苏民富而庶善恶有惩劝刚柔无吐茹两衙少辞牒四境稀书疏俗以劳俸安政因闲暇着仙亭日登眺虎丘时游豫【望仙亭在杭虎丘寺在苏】寻幽驻旌轩选胜回宾御舟移溪鸟避乐作林猿覩池古莫耶沈石奇罗刹踞【剑池在苏州罗刹石在杭州】水苗泥易耨畚粟灰难锄紫蕨抽出畦白莲埋在淤菱花红带黯温叶黄含菸【楚辞云叶菸色而就黄】镜动波颭菱雪回风旋絮手经攀桂馥齿为尝梅楚坐并船脚欹行多马蹄踣圣贤清浊醉水陆鲜肥饫鱼膾芥酱调水葵盐豉絮【敕虑反】虽微五袴咏幸免兆人诅但令乐不荒何必游无倨吴苑仆寻罢越城公尚据旧游几客存新宴谁人与莫空文举酒强下何曾筇江上易优游城中多毁誉分应当自尽事勿求人恕我既无子孙君仍毕婚娶久为云雨别终拟江湖去范蠡有扁舟陶潜有篮輦两心苦相忆两口遥相语最恨七年春春来各一处

和寄乐天

贤愚类相交人情之大率然自古今来几人号胶漆近闻屈指数元某与白乙旁爱及弟兄中权避家室松筠与金石未足喻坚密在车如轮辕在身如肘腋又如风云会天使相召匹不似势利交有名而无实顷我在杭岁值君之越日望愁来仪迟宴惜流景疾坐耀黄金带酌醕醑玉质酣歌口不停狂舞衣相拂平生赏心事施展十未一会笑始哑哑离嗟乃唧唧钱筵才收拾征棹遽排比後恨苦縣縣前欢何卒卒居人色惨淡行子心纡郁风袂去时挥云帆望中失宿醒和别思目眩心忽忽病魂黯黯销老泪凄其出别君只如昨芳岁换六七俱是官家身後期难自必【籍田赋云难望岁而自必】

和寄问刘白【时梦得与乐天方舟西上】

正与刘梦得醉笑大开口适值此诗来欢喜君知否遂令高卷幕兼遣重添酒起望会稽云东南一回首爱君金玉句举世谁人有功用随日新资材本天授吟哦不能散自午将及酉遂留梦得眠匡牀宿东牖

和新楼北园偶集从孙公度周巡官韩秀才卢秀才范处士小饮郑侍御判官周刘二从事皆先归

闻君新楼宴下对北园花主人既贤豪宾客皆才华初筵日未高中饮景已斜天地为幕席富贵如泥沙嵇刘陶阮徒不足置齿牙卧瓮鄙毕卓落帽嗤孟嘉芳草供枕藉乱莺助諠譁醉乡得道路狂海无津涯一岁春又尽百年期不赊同醉君勿辞独醒古所嗟销愁若沃雪破闷如割瓜称觴起为寿此乐无以加歌声凝贯珠舞袖飘乱麻相公谓四座今日非自夸有奴善吹笙有婢弹琵琶十指纖若笋双鬟鬋如鵷履舄起交杂盃盘散纷拏归去勿拥遏倒载逃难遮明日宴东武後日游若耶岂独相公乐讴歌千万家

和除夜作

君赋此诗夜穷陰岁之余我和此诗日微和春之初老知顔状改病觉肢体虚头上毛发短口中牙齿疎一落老病界难逃生死墟况此促促世与君多索居君在浙江东荣驾方伯輿我在魏阙下谬乘大夫车妻孥常各饱奴婢亦盈庐唯是利人事比君全不如我统十郎官君领百吏胥我掌四曹局君管十乡闾君为父母君大惠在资储我为刀笔吏小恶乃诛锄君提七郡籍我按三尺书俱已佩金印尝同趋玉除外宠信非薄中怀何不摅恩光未报答日月空居诸磊落尝许君局促应笑予所以自知分欲先歌归欤

和知非

因君知非问詮较天下事第一莫若禅第二无如醉禅能泯人我醉可忘荣悴与君次第言为我少留意儒教重礼法道家养神气重礼足滋彰养神多避忌不如学神定中有甚深味旷廓

了如空澄凝胜於睡屏除默默念销尽悠悠思春无伤春心秋无感秋泪坐成真谛乐如受空王赐既得脱尘劳兼应离慙愧除禅其次醉此说非无谓一酌机即忘三盃性咸遂逐臣去室妇降虏败军帅思苦膏火煎忧深局鏖秘须凭百杯沃莫惜千金费便似罩中鱼脱飞生两翅劝君虽老大逢酒莫回避不然即学禅两途同一致

和晓望

休吟稽山晓听咏秦城旦鸣鸡初有声宿鸟犹未散丁丁漏向尽冬冬鼓过半南山青沈沈东方白漫漫街心若流水城角如断岸星河稍隅落宫阙方轮焕朝车雷四合骑火星一贯赫奕冠盖盛荧煌朱紫烂沙堤亘墓池【子城东北低下处旧号虾蟆池】市路遶龙断白日忽照耀红尘纷散乱贵教过客避荣任行人看祥烟满虚空春色无边畔鴈行候暑刻龙尾登霄汉台殿暖宜攀风光晴可翫草铺地茵褥云卷天帏幔鷲杂佩锵锵花遶衣粲粲何言终日乐独起临风叹我同心人一别春七换相望山隔碍欲去官羁绊何日到江东超然似张翰

和李势女

減一分太短增一分太长不朱面若花不粉肌如霜色为天下艳心乃女中郎自言重不幸家破身未亡人各有一死此死职所当忍将先人体与主为疣疮妾死主意快从此两无妨愿信赤心语速即白刃光南郡忽感激却立舍锋鋌抚背称阿姊【与姊同祖似切】归我如归乡竟以恩信待岂止猜妬忘由来几上肉不足挥干将南郡死已久骨枯墓苍苍愿於墓上头立石镌此章劝诫天下妇不令陰胜阳

和酬郑侍御东阳春闷放怀追越游见寄

君得嘉鱼置宴席乐如南有嘉鱼时劲气森爽竹竿竦妍文灿烂芙蓉披载笔在幕名已重补袞於朝官尚卑一緘疏入掩谷永三都赋成排左思自言拜辞主人後离心荡扬风前旗东南门馆别经岁春眼怅望秋心悲【已上叙嘉鱼】昨日嘉鱼来访我方驾同出何所之乐游原头春尚早百舌新语声裊裊日趣花忙向南拆风催柳急从东吹流年 恍未饶我美景鲜妍来为谁红尘三条界阡陌碧草千里铺郊畿余霞断时绮幅裂斜云展处罗文纚暮钟远近声互动暝鸟高下飞追随酒酣将归未能去怅然回望天四垂生何足养嵇着论途何足泣杨涟湏胡不花下伴春醉满酌绿酒听黄鹂嘉鱼点头时一叹听我此言不知疲语终兴尽各分散东西轩骑分逶迤此诗勿遣闲人见见恐与他为笑资白首旧寮知我者凭君一咏向周师【周判官师范苏杭旧判官去范字吁韵】

和自劝二首

稀稀疎疎遶篱竹窄窄狭狭向阳屋屋中有一曝背翁委置形骸如土木日暮半炉熨炭火夜深一盞纱笼烛不知有益及民无二十年来食官禄就暖移盘檐下食防寒拥被帷中宿秋官月俸八九万岂徒遣尔身温足勤操丹笔念黄沙莫使饥寒囚滞狱

急景凋年急於水念此揽衣中夜起门无宿客共谁言
煖酒挑灯对妻子自饮数杯妻一盞余酌分张与儿女微酣静坐未能眠
风霰萧萧打窗纸自问有何才与术入为丞郎出刺史争如寿命短复长
岂得营营心不止请看韦孔与钱崔半月之间四人死【韦中书孔京兆钱尚书崔华州十五日闲相次而逝】

和雨中花

真宰倒持生杀柄闲物命长人短命松枝上鹤蓍下龟千年不死仍无病
人生不得似龟鹤少去老来同旦暝何异花开旦暝闲未落仍遭风雨横
草得经年菜连月唯花不与多时节一年三百六十日花能几日供攀折
桃李无言难自诉黄鸝解语凭君说鸝虽为说不分明叶底枝头漫饶舌

和晨兴因报问龟儿

冬旦寒惨澹云日无晶辉当此岁暮感见君晨兴诗君诗亦多苦苦在兄
远离我苦不在远纏绵肝与脾西院病孀妇後牀孤侄儿黄昏一恸後夜半
十起时病眠两行泪悲鬓万茎丝咽絶五脏脉瘦消百骸脂双目失一目
四肢断两肢不如溘然逝安用半活为谁谓茶蘼苦茶蘼甘如飴谁谓汤火
热汤火冷如澌前时君寄诗忧念问阿龟喉燥声气窒经年无报辞及覩晨
兴句未吟先涕垂因兹涟洳际一吐心中悲茫茫四海闲此苦唯君知我去
四千里使我告诉谁仰头向青天但见鴈南飞凭鴈寄一语为我达微之
弦絶有续胶树斩可接枝唯我中肠断应无连得期

和朝回与王铉师游南山下

蔼蔼春景余峩峩夏云初躩躩退朝骑飘飏随风裾晨从四丞相入拜白玉
除暮与一道士出寻青谿居吏隐本齐致朝野孰云殊道在有中适机忘无
外虞但愧烟霄上鸾凤为吾徒又慙云林闲鸥鹤不我疎坐倾数杯酒卧枕
一卷书兴酣头兀兀睡觉心于于以此送日月问师为何如

和尝新酒

空腹尝新酒偶成卯时醉醉来拥褐裘直至斋时睡睡酣不语笑真寝无梦
寐殆欲忘形骸詎知属天地醒余和未散起坐澹无事举臂一欠伸引琴弹秋思

和顺之琴者

陰陰花院月耿耿兰房烛中有弄琴人声貌俱如玉清冷石泉引雅澹风松曲
遂使君子心不爱凡丝竹

感旧写真

李放写我真写来二十载莫问真何如画亦销光彩朱颜与玄鬓日夜改复改无嗟貌遽非且喜身犹在

授太子宾客归洛【自此後东都作】

南省去拂衣东都来掩扉病将老齐至心与身同归白首外缘少红尘前事非怀哉紫芝叟千载心相依

秋池二首

身闲无所为心闲无所思况当故园夜复此新秋池闇鸟栖後桥明月出时菱风香散漫桂露光参差静境多独得幽怀竟谁知悠然心中语自问来何迟

朝衣薄且健晚簟清仍滑社近燕影稀雨余蝉声歇闲中得诗境此境幽难说露荷珠自倾风竹玉相戛谁能一同宿共翫新秋月暑退凉早归池边好时节

中隐

大隐住朝市小隐入丘樊丘樊太冷落朝市太嚣諠不如作中隐隐在留司官似出复似处非忙亦非闲不劳心与力又免饥与寒终岁无公事随月有俸钱君若好登临城南有秋山君若爱游荡城东有春园君若欲一醉时出赴宾筵洛中多君子可以恣欢言君若欲高卧但自深掩关亦无车马客造次到门前人生处一世其道难两全贱即苦冻馁贵则多忧患唯此中隐士致身吉且安穷通与丰约正在四者闲

问秋光

殷卿领北镇崔尹开南幕外事信为荣中怀未必乐何如不才者兀兀无所作不引窗下琴即举池上酌淡交唯对水老伴无如鹤自适颇从容旁观诚濩落身心转恬泰烟景弥淡泊回首语秋光东来应不错

引泉

一为止足限二为衰疾牵邴罢不因事陶归非待年归来嵩洛下闭户何翛然静扫林下地闲疏池畔泉伊流狭似带洛石大如拳谁教明月下为我声溅溅竟夕舟中坐有时桥上眠何用施屏障水竹绕牀前

知足吟【和崔十八未贫作】

不种一陇田仓中有余粟不采一株桑箱中有余服官闲离忧责身泰无羁束中人百户税宾客一年禄樽中不乏酒篱下仍多菊是物皆有余非心无所欲吟君未贫作因歌知足曲自问此时心不足何时足

酬集贤刘郎中对月见寄兼怀元浙东

月在洛阳天天高净如水下有白头人擘衣中夜起思远镜亭上光深书殿里眇然三处心相去各千里

太湖石

远望老嵯峨近观怪嶽崑才高八九尺势若千万寻嵌空华阳洞重叠屏山岑邈矣仙掌迴呀然劒门深形质冠今古气色通晴陰未秋已瑟瑟欲雨先沈沈天姿信为异时用非所任磨刀不如砺捣帛不如砧何乃主人意重之如万金岂伊造物者独能知我心

偶作二首

扰扰贪生人几何不夭閼遑遑爱名人几何能贵达伊余信多幸拖紫垂白发身为三品官年已五十八筋骸虽早衰尚未苦羸憊资产虽不丰亦不甚贫竭登山力犹在遇酒兴时发无事日月长不羈天地濶安身有处所适意无时节解带松下风抱琴池上月人间所重者相印将军钺谋虑系安危威权主生杀焦心一身苦炙手旁人热未必方寸闲得如吾快活

日出起盥栉振衣入道场寂然无他念但对一炉香日高始就食食亦非膏粱精粗随所有亦足饱充肠日午脱巾簪燕息窗下牀清风飒然至卧可致羲皇日西引杖屨散步游林塘或饮茶一盏或吟诗一章日入多不食有时唯命觴何以送闲夜一曲秋霓裳一日分五时作息率有常自喜老後健不嫌闲中忙是非一以贯身世交相忘若问此何许此是无何乡

葺池上旧亭

池月夜凄凉池风晓萧飒欲入池上冬先葺池中合向暖窗户开迎寒帘幕合苔封旧瓦木水照新朱蜡软火深土炉香醪小瓷榼中有独宿翁一灯对一榻

崔十八新池

爱君新小池池色无人知见底月明夜无波风定时忽看不似水一泊稀琉璃

翫止水

动者乐流水静者乐止水利物不如流鉴形不如止凄清早霜降淅沥微风起中面红叶开四

隅绿萍委广狭八九丈湾环有涯涘浅深三四尺洞彻无表里净分鹤翘足澄见鱼掉尾迎眸洗眼尘隔胷荡心滓定将禅不别明与诚相似清能律贪夫淡可交君子岂唯空狎翫亦取相伦拟欲识静者心心源只如此

闻崔十八宿于新昌弊宅时予亦宿崔家依仁新亭一宵偶同两兴暗合因而成咏聊以写怀

陋巷掩弊庐高居敞华屋新昌七株松依仁万茎竹松前月台白竹下风池绿君向我斋眠我在君亭宿平生有微尚彼此多幽独何必求主人两心聊自足

日长

日长昼加餐夜短朝余睡春来寝食闲虽老犹有味林塘得芳景园曲生幽致爱水多棹舟惜花不扫地幸无眼下病且向樽前醉身外何足言人闲本无事

三月三十日作

今朝三月尽寂寞春事毕黄鸟渐无声朱樱新结实临风独长叹此叹意非一半百过九年艳阳残一日随年减欢笑逐日添衰疾且遣花下歌送此盃中物

慵不能

架上非无书眼慵不能看匣中亦有琴手慵不能弹腰慵不能带头慵不能冠午後恣情寝午时随事餐一餐终日饱一寝至夜安饥寒亦闲事况乃不饥寒

晨兴

宿鸟动前林晨光上东屋铜炉添早香纱笼灭残烛头醒风稍愈眼饱睡初足起坐兀无思叩齿三十六何以解宿斋一杯云母粥

朝课

平甃白石渠静扫青苔院池上好风来新荷大如扇小亭中何有素琴对黄卷藥珠讽数篇秋思弹一遍从容朝课毕方与客相见

天竺寺七叶堂避暑

郁郁复郁郁伏热何时毕行入七叶堂烦暑随步失檐雨稍霏微窗风正萧瑟清宵一觉睡可以销百疾

香山寺石楼潭夜浴

炎光昼方炽暑气宵弥毒摇扇风甚微褰裳汗霏霖起向月中行来就潭中浴平石为浴牀洼石为浴斛绡巾薄露顶草屨轻乘足清凉咏而归归上石楼宿

嗟发落

朝亦嗟发落暮亦嗟发落落尽诚可嗟尽来亦不恶既不劳洗沐又不劳梳掠最宜湿暑天头轻无髻缚脱置垢巾幘解去尘纓络银瓶贮寒泉当顶倾一勺有如醍醐灌坐受清凉乐因悟自在僧亦资於剃削

安稳眠

家虽日渐贫犹未苦饥冻身虽日渐老幸无急病痛眼逢闇处合心向闲时用既得安稳眠亦无颠倒梦

池上夜境

晴空星月落池塘澄鲜净绿表里光露簟清莹迎夜滑风襟萧洒先秋凉无人惊处野禽下新睡觉时幽草香但问尘埃能去否濯纓何必向沧浪

书绅

仕有职役劳农有畎畊勤优哉分司叟心力无苦辛岁晚头又白自问何欣欣新酒始开瓮旧谷犹满囷吾尝静自思往往夜达晨何以送吾老何以安吾贫岁计莫如谷饱则不干人日计莫如醉醉则兼忘身诚知有道理未敢劝交亲恐为人所哂聊自书诸绅

秋游平泉赠韦处士闲禅师

秋景引闲步山游不知疲杖藜舍舆马十里与僧期昔尝忧六十四体不支持今来已及此犹未苦衰羸【予往年有诗云三十气大壮四十多是非六十年太老四体不支持今故云】心兴遇境发身力因行知寻云到起处爱泉听滴时南村韦处士西寺闲禅师山头与涧底闻健且相随

游坊口悬泉偶题石上【时为河南尹】

济源山水好老尹知之久常日听人言今秋入吾手孔山刀劒立沁水龙蛇走危磴上悬泉澄湾转坊口虚明见深底净绿无纖垢仙棹浪悠扬尘纓风抖擞岩寒松柏短石古莓苔厚锦座纓高低翠屏张左右虽无安石妓不乏文举酒谈笑逐身来管弦随事有时逢杖锡客或值垂

纶叟相与澹忘归自辰将及酉公门欲返驾溪路犹回首早晚重来游心期罢官後

对火翫雪

平生所心爱爱火兼怜雪火是腊天春雪为陰夜月鹅毛纷正堕兽炭敲初折盈尺白盐寒满炉红玉热稍宜杯酌动渐引笙歌发但识欢来由不知醉时节银盘堆柳絮罗袖转琼屑共愁明日销便作经年别

六年寒食洛下宴游赠冯李二少尹

丰年寒食节美景洛阳城三尹皆强健七日尽晴明东郊蹋青草南园攀紫荆风拆海榴艳露坠木兰英假开春未老宴合日屡倾珠翠混花影管弦藏水声佳会不易得良辰亦难并听吟歌暂辍看舞杯徐行米价贱如土酒味浓於饴【徐盈切】此时不尽醉但恐负平生殷勤二曹长各捧一银觥

苦热中寄舒员外

何堪日衰病复此时炎燠厌对俗杯盘倦听凡丝竹藤牀铺晚雪角枕截寒玉安得清瘦人新秋夜同宿非君固不可何夕枉高躅

闲夕

一声早蝉发数点新萤度兰缸耿无烟筠簟清有露未归後房寝且下前轩步斜月入低廊凉风满高树放怀常自适遇境多成趣何法使之然心中无细故

寄情

灼灼早春梅东南枝最早持来翫未足花向手中老芳香销掌握怅望生怀抱岂无後开花念此先开好舒员外游香山寺数日不归兼辱尺书大夸胜事时正值坐衙虑囚之际走笔题长句以赠之

香山石楼倚天开翠屏碧立波环回黄菊繁时好客到碧云合处佳人来【谓遗英旧二妓与舒君同游】酡颜一笑夭桃绽清唼数声寒玉哀轩骑透迟棹容与留连三日不能回白头老尹府中坐早衙才退暮衙催庭前阶上何所有累囚成贯案成堆岂无池塘长秋草亦有丝竹生尘埃今日清光昨夜月竟无人来劝一杯

早冬游王屋自灵都抵阳台上方望天坛偶吟成章寄温谷周尊师中书李相公

霜降山水清王屋十月时石泉碧漾漾岩树红离离朝为灵都游暮有阳台期飘然世尘外鸾

鹤如可追忽念公程尽复慙身力衰天坛在天半欲上心迟迟尝闻此游者隐客与损之各抱
贵仙骨俱非泥垢姿二人相顾言彼此称男儿若不为松乔即须作臯夔今果如其语光彩双
葳蕤一人佩金印一人翳玉芝我来高其事咏叹偶成诗为君题石上欲使故山知

吴宫辞

淡红花帔浅檀蛾睡脸初开似剪波坐对珠笼闲理曲琵琶鹦鹉语相和

白氏长庆集卷二十二

卷二十三

<集部,别集类,汉至五代,白氏长庆集>

钦定四库全书

白氏长庆集卷二十三

唐白居易撰

律诗【凡一百首】

元微之除浙东观察使喜得杭越隣州先赠长句【十七首并与微之和答】

稽山镜水欢游地犀带金章荣贵身官职比君虽较小封疆与我且为隣郡楼对翫千峯月江界平分两岸春杭越风光诗酒主相看更合是何人

席上荅微之

我住浙江西君去浙江东勿言一水隔便与千里同富贵无人劝君酒今宵为我尽杯中

荅微之上船後留别

烛下尊前一分手舟中岸上两回头归来虚白堂中梦合眼先应到越州

荅微之泊西陵驿见寄

烟波尽处一点白应是西陵古驿台知在台边望不见暮潮空送渡船回

荅微之夸越州州宅

贺上人回得报书大夸州宅似仙居厌看冯翊风沙久喜见兰亭烟景初日出旌旗生气色月明楼阁在空虚知君暗数江南郡除却余杭尽不如

微之重夸州居其落句有西州罗刹之谑因嘲兹石聊以寄怀

君问西州城下事醉中叠纸为君书嵌空石面标罗刹压捺潮头敌子胥神鬼曾鞭犹不动波

涛虽打欲何如谁知太守心相似抵滞坚顽两有余

张十八员外以新诗二十五首见寄郡楼月下吟翫通夕因题?後封寄微之

秦城南省清秋夜江郡东楼明月时去我三千六百里得君二十五篇诗阳春曲调高难和淡水交情老始知坐到天明吟未足重封转寄与微之

酬微之【微之题云郡务稍简因得整集旧诗并连缀刚削封章谏草繁委籍笥仅踰百轴偶成自叹兼寄乐天】

满篋填箱唱和诗少年为戏老成悲声声丽曲敲寒玉句句妍辞綴色丝吟翫独当明月夜伤嗟同是白头时由来才命相磨折天遣无儿欲怨谁【微之句云天遣两家无嗣子欲将文字付谁人故以此荅之】

余思未尽加为六韵重寄微之

海内声华并在身篋中文字絶无伦【美微之也】遥知独对封章草忽忆同为献纳臣走笔往来盈卷轴【予与微之前後寄和诗数百篇近代无如此多有也】除官递互掌丝纶【予除中书舍人微之撰制词微之除翰林学士予撰制词】制从长庆辞高古【微之长庆初知制诰文格高古始变俗体继者効之也】诗到元和体变新【衆称元白为千字律诗或号元和格】各有文姬才稚齿【蔡邕无儿有女琰字文姬】俱无通子继余尘【陶潜小儿名通子】琴书何必求王粲与女犹胜与外人

荅微之咏怀见寄

合中同直前春事船里相逢昨日情分袂二年劳梦寐并牀三宿话平生紫微北畔辞宫阙沧海西头对郡城聚散穷通何足道醉来一曲放歌行

酬微之夸镜湖

我嗟身老岁方徂君更官高兴转孤军门郡合曾闲否禹穴耶溪得到无酒盞省陪波卷白骰盘思共彩呼卢一泓镜水谁能美自有胷中万顷湖【微之诗云孙园虎寺随宜看不必遥遥羡镜湖故以此戏言荅之】

雪中即事荅微之

连夜江云黄惨澹平明山雪白馍糊银河沙涨三千里梅岭花排一万株北市风生飘散麩东楼日出照凝酥谁家高士关门户何处行人失道途舞鹤庭前毛稍定捣衣砧上练新铺戏团稚女呵红手愁坐衰翁对白须压瘴一州除疾苦呈丰万井尽欢娱润含玉德怀君子寒助霜

威忆大夫莫道烟波一水隔何妨气候两乡殊越中地暖多成雨还有瑶台琼树无

醉封诗筒寄微之

一生休戚与穷通处处相随事事同未死又怜沧海郡无儿俱作白头翁展眉只仰三杯後代
面唯凭五字中为向两州邮吏道莫辞来去递诗筒

除夜寄微之

鬓毛不觉白毵毵【苏含切】一事无成百不堪共惜盛时辞阙下同嗟除夜在江南家山泉
石寻常忆世路风波子细谙老校於君合先退明年半百又加三

苏州李中丞以元日郡齐感怀诗寄微之及予辄依来篇七言八韵走笔奉荅兼呈微之

白首余杭白太守落魄抛名来已久一辞渭北故园春再把江南新岁酒杯前笑歌徒勉强镜
里形容渐衰朽领郡惭当潦倒年隣州喜得平生友长洲草接松江岸曲水花连镜湖口老去
还能痛饮无春来曾作闲游否凭莺传语报李六倩鴈将书与元九莫嗟一日日催人且贵一
年年入手

早春西湖闲游怅然兴怀忆与微之同赏因思在越官重事殷镜湖之游或恐未暇偶成十八
韵寄微之

上马复呼宾湖边景气新管弦三数事骑从十余人立换登山屐行携漉酒巾逢花看当妓遇
草坐为茵西日笼黄柳东风荡白苹小桥装鴈齿轻浪翫鱼鳞画舫牵徐转银船酌慢巡野情
遗世累醉态任天真彼此年将老平生分最亲高天从所愿远地得为隣云树分三驿烟波限
一津翻嗟寸步隔却厌尺书频浙右称雄镇山陰委重臣贵垂长紫绶荣驾大朱轮出动刀枪
队归生道路尘鴈惊弓易散鸥怕鼓难驯百吏瞻相面千夫捧拥身自然闲兴少应负镜湖春

荅微之见寄【时在郡楼对雪】

可怜风景浙东西先数余杭次会稽禹庙未胜天竺寺钱湖不羨若耶溪摆尘野鹤春毛暖拍
水沙鸥湿翅低更对雪楼君爱否红栏碧甃点银泥

祭社宵兴灯前偶作

城头传鼓角灯下整衣冠夜镜藏须白秋泉漱齿寒欲将闲送老须着病辞官更待年终後支
持归计看

闲卧

尽日前轩卧神闲境亦空有山当枕上无事到心中帘卷侵牀日屏遮入座风望春春未到应在海门东

新春江次

浦乾潮未应堤湿冻初销粉片粧梅朵金丝刷柳条鸭头新緑水鴈齿小红桥莫怪珂声碎春来五马骄

春题湖上

湖上春来似画图乱峯围绕水平铺松排山面千重翠月点波心一颗珠碧毯线头抽早稻青罗裙带展新蒲未能抛得杭州去一半勾留是此湖

早春忆微之

昏昏老与病相和感物思君叹复歌声早鸡先知夜短色浓柳最占春多沙头雨染斑斑草水面风驱瑟瑟波可道眼前光景恶其如难见故人何

失鹤

失为庭前雪飞因海上风九霄应得侣三夜不归笼声断碧云外影沉明月中郡斋从此後谁伴白头翁

自感

宴游寝食渐无味杯酒管弦徒绕身宾客欢娱僮仆饱始知官职为他人

得湖州崔十八使君书喜与杭越隣郡因成长句代贺兼寄微之

三郡何因此结缘贞元科第忝同年故情欢喜开书後旧事思量在眼前越国封疆吞碧海杭城楼阁入青烟吴兴卑小君应屈为是蓬萊最後仙【贞元初同登科崔君名最在後当时崔自咏云人间不会云闲事应笑蓬萊最後仙】

同诸客携酒早看樱桃花

晓报樱桃发春携酒客过緑飴【徐盈切】粘盞杓红雪压枝柯天色晴明少人生事故多停杯替花语不醉拟如何

柳絮

三月尽时头白日与春老别更依依凭莺为向杨花道绊惹春风莫放归

早饮湖州酒寄崔使君

一榼扶头酒泓澄泻玉壶十分蘸甲酌潏灏满银盃捧出光华动尝看气味殊手中稀琥珀舌上冷醍醐瓶里有时尽江边无处沽不知崔太守更有寄来无

病中书事

三载卧山城闲知节物情莺多过春语蝉不待秋鸣气嗽因寒发风痰欲雨生病身无所用唯解卜陰晴与微之唱和来去常以竹筒贮诗陈协律美而成篇因以此荅

拣得琅玕截作筒緘题章句写心胷随风每喜飞如鸟渡水常忧化作龙粉节坚如太守信霜筠冷称大夫容烦君赞咏心知愧鱼目骊珠同一封

醉戏诸妓

席上争飞使君酒歌中多唱舍人诗不知明日休官後逐我东山去是谁

北院

北院人稀到东牕地最偏竹烟行竈上石壁卧房前性拙身多暇心慵事少缘还如病居士唯置一牀眠

酬周协律

五十钱塘守应为送老官濫蒙辞客爱犹作近臣看菑落愁须饮琵琶闷遣弹白头虽强醉不似少年欢

题石上人

腾腾兀兀在人间贵贱贤愚尽往还羶膩筵中唯饮酒歌钟会处独思山存神不许三尸住混俗无妨两鬓斑除却余杭白太守何人更解爱君闲

诗解

新篇日日成不是爱声名旧句时时改无妨悦性情但令长守郡不觉却归城祇拟江湖上吟哦过一生

潮

早潮才落晚潮来一月周流六十回不独光陰朝复暮杭州老去被潮催

闻歌妓唱严郎中诗因以絶句寄之【严前为郡守】

已留旧政布中和又付新词与艳歌但是人家有遗爱就中苏小感恩多

柘枝妓

平铺一合锦筵开连击三声画鼓催红蜡烛移桃叶起紫罗衫动柘枝来带垂钿胯花腰重?转金铃雪面回看即曲终留不住云飘雨送向阳台

急乐世辞

正抽碧线绣红罗忽听黄莺敛翠蛾秋思冬愁春怅望大都不称意时多

天竺寺送坚上人归庐山

锡杖登高寺香炉忆旧峯偶来舟不系忽去鸟无踪岂要留离偈宁劳动别容与师俱是梦梦里暂相逢

除官赴阙留赠微之

去年十月半君来过浙东今年五月尽我发向关中两乡默默心相别一水盈盈路不通从此津人应省事寂寥无复通诗筒

留题郡斋

吟山歌水嘲风月便是三年官满时春为醉眠多闭阁秋因晴望暂褰帷更无一事移风俗唯化州民解咏诗

别州民

耆老遮归路壶浆满别筵甘棠无一树那得泪潸然税重多贫户农饥足旱田唯留一湖水与汝救凶年【今春增筑钱塘湖堤贮水以防天旱故云】

留题天竺灵隐两寺

在郡六百日入山十二回宿因月桂落醉为海榴开【天竺尝有月中桂子落灵隐多海石榴花也】黄纸除书到青宫诏命催僧徒多怅望宾从亦徘徊寺閤烟埋竹林香雨落梅别桥怜白石辞洞恋青苔【石桥在天竺明洞在灵隐】渐出松间路犹飞马上杯谁教冷泉水送我下山来

西湖留别

征途行色惨风烟祖帐离声咽管弦翠黛不须留五马皇恩只许住三年綠藤陰下铺歌席红藕花中泊妓船处处回头尽堪恋就中难别是湖边

重寄别微之

凭仗江波寄一辞不须惆怅报微之犹胜往岁峡中别灊潏堆边招手时

重题别东楼

东楼胜事我偏知气象多随昏旦移湖卷衣裳白重叠山张屏障綠参差海仙楼塔晴方出江女笙箫夜始吹春雨星攒寻蟹火秋风霞飈弄涛旗【余杭风俗每寒食雨後夜凉家家持烛寻蟹动盈万人每岁八月迎涛弄水者悉举旗帜焉】宴宜云髻新梳後曲爱霓裳未拍时太守三年嘲不尽郡斋空作百篇诗

别周军事

主人头白官仍冷去後怜君是底人试谒会稽元相去不妨相见却殷勤

看常州柘枝赠贾使君

莫惜新衣舞柘枝也从尘污汗沾垂料君即却归朝去不见银泥衫故时

汴河路有感

三十年前路孤舟重往还绕身新眷属举目旧乡关事去唯留水人非但见山啼襟与愁鬓此日两成斑

埭桥旧业

别业埭城北抛来二十春改移新迳路变换旧村隣有税田畴薄无官弟侄贫田园何用问强半属他人

茅城驿

汴河无景思秋日又凄凄地薄桑麻瘦村贫屋舍低早苗多闲草浊水半和泥最是萧条处茅城驿向西

河陰夜泊忆微之

忆君我正泊行舟望我君应上郡楼万里月明同此夜黄河东面海西头

杭州回舫

自别钱塘山水後不多饮酒懒吟诗欲将此意凭回棹报与西湖风月知

途中题山泉

泱泱涌岩穴濺濺出洞门向东应入海从此不归源似叶飘辞树如云断别根吾身亦如此何日返乡园

欲到东洛得杨使君书因以此报

向公心切向财疎淮上休官洛下居三郡政能从独步十年生计复何如使君滩上久分手别驾渡头先得书且喜平安又相见其余外事尽室虚

洛下寓居

秋馆清凉日书因解闷看夜牕幽独处琴不为人弹游宴慵多废趋朝老渐难禅僧教断酒道士劝休官渭曲庄犹在钱塘俸尚残如能便归去亦不至饥寒

味道

叩齿晨兴秋院静焚香宴坐晚牕深七篇真诰论仙事一卷檀经说佛心此日尽知前境妄多生曾被外尘侵自嫌习性犹残处爱咏闲诗好听琴

好听琴

本性好丝桐尘机闻即空一声来耳里万事离心中清畅堪销疾恬和好养蒙尤宜听三乐安慰白头翁

爱咏诗

辞章讽咏成千首心行归依向一乘坐倚绳牀闲自念前生应是一诗僧

酬皇甫庶子见寄

掌纶不称君应笑典郡无能我自知别诏忽惊新命出同寮偶与夙心期春坊潇洒优闲地秋
鬓苍浪老大时独占二疎应未可龙楼见拟覓分司

卧疾

闲官卧疾絶经过居处萧条近洛河水北水南秋月夜管弦声少杵声多

远师

东宫白庶子南寺远禅师何处遥相见心无一事时

问远师

荤羶停夜食吟咏散秋怀笑问东林老诗应不破斋

小院酒醒

酒醒闲独步小院夜深凉一领新秋簟三间明月廊未收残盞杓初换热衣裳好是幽眠处松
陰六尺牀

赠侯三郎中

老爱东都好寄身足泉多竹少埃尘年丰最喜唯贫客秋冷先知是瘦人幸有琴书堪作伴苦
无田宅可为隣洛中纵未长居得且与苏田游过春

求分司东都寄牛相公十韵

忽忽心如梦星星鬓似丝纵贫长有酒虽老未抛诗俭薄身都惯疎顽性颇宜饭粗糲亦饱被
暖起常迟万里归何得三年伴是谁华亭鹤不去天竺石相随【余罢杭州得华亭鹤天竺石
同载而归】王尹贵将马田家卖与池开门闲坐日遶水独行时懒慢交游许衰羸相府知官
寮幸无事可惜不分司

酬杨八

君以旷怀宜静境我因蹇步称闲官闭门足病非高士劳作云心鹤眼看

履道新居二十韵

履道坊西角官河曲北头林园四隣好风景一家秋门闭深沉树池通浅沮【秋夜反】沟拔青松直上铺碧水平流篱菊黄金合牕筠緑玉稠疑连紫阳洞似到白苹洲僧至多同宿宾来辄少留岂无诗引兴兼有酒销忧移榻临平岸携茶上小舟果穿闻鸟喙萍破见鱼游地与尘相远人将境共幽泛潭菱点镜沉浦月生鈎厨晓烟孤起庭寒雨半收老饥初爱粥瘦冷早披裘洛下招新隐秦中忘旧游辞章留凤阁班籍寄龙楼病慙官曹静闲慙俸禄优琴书中有得衣食外何求济世才无取谋身智不周应须共心语万事一时休

九日思杭州旧游寄周判官及诸客

忽忆郡南山顶上昔时同醉是今辰笙歌委曲声延耳金翠动摇光照身风景不随宫相去欢娱应逐使君新江山宾客皆如旧唯是当筵换主人

秋晚

烟景澹蒙蒙池边微有风觉寒蛩近壁知暝鹤归笼长貌随年改衰情与物同夜来霜厚薄梨叶半低红

分司

散帙留司殊有味最宜病拙不才身行香拜表为公事碧洛青嵩当主人已出闲游多到夜却归慵卧又经旬钱塘五马留三匹还拟骑游揽扰春

河南王尹【一作王仆射】初到以诗代书先问之

别来王阁老三岁似须?鬓上斑多少杯前兴有无官从分紧慢情莫问荣枯许入朱门否篮舆一病夫

池西亭

朱栏映晚树金魄落秋池还似钱塘夜西楼月出时

临池闲卧

小竹围庭匝平池与砌连闲多临水坐老爱向阳眠营役抛身外幽奇送枕前谁家卧牀脚解系钓鱼船

吾庐

吾庐不独贮妻儿自觉年侵身力衰
眼下营求容足地心中准拟挂冠时
新昌小院松当户履道幽居竹遶池
莫道两都空有宅林泉风月是家资

题新居寄宣州崔相公【所居南隣即崔家池】

门庭有水巷无尘好称闲官作主人
冷似雀罗虽少客寬於蜗舍足容身
疎通竹径将迎月扫掠莎台欲待春
济世料君归未得南园北曲谩为隣

忆杭州梅花因叙旧游寄萧协律

三年闲闷在余杭曾为梅花醉几場
伍相庙边繁似雪孤山园里丽如粧
蹋随游骑心长惜折赠佳人手亦香
赏自初开直至落欢因小饮便成狂
薛刘相次埋新壠沈谢双飞出故乡
【薛刘二客沈谢二妓皆当时歌酒之侶】
歌伴酒徒零散尽唯残头白老萧郎

病中辱张常侍题集贤院诗因以继和

天禄阁门开甘泉侍从回图书皆帝籍
寮友尽仙才骑省通中掖龙楼隔上台
犹怜病宫相诗寄洛阳来

早春晚归

晚归骑马过天津沙白桥红返照新
草色连延多隙地鼓声闲缓少忙人
还如南国饶沟水不似西京足路尘
金谷风光依旧在无人管领石家春

赠杨使君

曾嗟放逐同巴峡且喜归还会洛阳
时命到来须作用功名未立莫思量
银銜叱拨欺风雪金屑琵琶费酒浆
更待城东桃李发共君沉醉两三場

赠皇甫庶子

何因散地共徘徊人道君才我不才
骑少马蹄生易蹶用稀印鑱涩难开
妻知年老添衣絮婢报天寒拨酒醅
更媿小胥谄拜表单衫冲雪夜深来

池上竹下作

穿篱遶舍碧逶迤十亩闲居半是池
食饱窗闲新睡後脚轻林下独行时
水能性淡为吾友竹解心虚即我师
何必悠悠人世上劳心费目觅亲知

闲出觅春戏赠诸郎官

年来数出觅风光亦不全闲亦不忙
放鞚体安骑稳马隔袍身暖照晴阳
迎春日日添诗思送老时时放酒狂
除却髭须白一色其余未伏少年郎

别春炉

煖阁春初入温炉兴稍阑晚风犹冷在夜火
且留看独宿相依久多情欲别难
谁能共天语长遣四时寒

泛小?二首【?龙脊切】

水一塘?一只?头漾漾知风起?背萧萧知雨滴
醉卧?中欲醒时忽疑身是江南客
?缓进水平流一茎竹篙剔?尾两幅青幕覆?
头亚竹乱藤多照岸如从凤口向湖洲

梦行简

天气妍和水色鲜闲吟独步小桥边
池塘草绿无佳句虚卧春窗梦阿怜

题新居呈王尹兼简府中三掾

敝宅须重葺贫家乏美财桥凭川守造
树倩府僚栽朱板新犹湿红英暖渐开
仍期更?酒倚槛看花来

云和

非琴非瑟亦非箏拨柱推弦调未成
欲散白头千万恨只消红袖两三声

春老

欲随年少强游春自觉风光不属身
歌舞屏风花障上几时曾画白头人

春雪过皇甫家

晚来篮輦雪中回喜遇君家门正开
唯要主人青眼待琴诗谈笑自将来

崔侍御以孩子三日记其所生诗见示因以二絶和之

洞房门上挂桑弧香水盆中浴凤雏还似初生三日魄嫦娥满月即成珠

爱惜肯将同宝玉喜欢应胜得王侯弄璋诗句多才思愁杀无儿老邓攸

与皇甫庶子同游城东

闲游何必多徒侣相劝时时举一杯博望苑中无职役建春门外足池台绿油剪叶蒲新长红蜡粘枝杏欲开白马朱衣两宫相可怜天气出城来

洛城东花下作

记得旧诗章花多数洛阳【旧诗云洛阳城东面今来花似雪又云更待城东桃李发又云花满洛阳城】及逢枝似雪已是鬓成霜向後光阴促从前事意忙无因重年少何计驻时芳欲送愁离面须倾酒入肠白头无籍在醉倒亦何妨

晚春寄微之并崔湖州

洛阳陌上少交亲履道城边欲暮春崔在吴兴元在越出门骑马觅何人

城东闲行因题尉迟司业水阁

闲遶洛阳城无人知姓名病乘篮輦出老着茜【仓见切染红草】衫行处处花相引时时酒一倾借君溪阁上醉咏两三声

寄皇甫七

孟夏爱吾庐陶潜语不虚花樽飘落酒风案展开书隣女偷新果家僮漉【卢谷切】小鱼不知皇甫七池上兴何如

访皇甫七

上马行数里逢花倾一杯更无停泊处还是觅君来

白氏长庆集卷二十三

卷二十四

钦定四库全书

白氏长庆集卷二十四

唐白居易撰

律诗【凡一百首】

除苏州刺史别洛城东花

乱雪千花落新丝两鬓生老除吴郡守春别洛阳城江上今重去城东更一行别花何用伴劝酒有残鶯

奉和汴州令狐令公二十二韵

客有东征者夷门一落帆二年方得到五日未为淹【相府领镇隔年居易方到既到陪奉游宴凡经五日】在浚旌重葺游梁馆更添心因好善乐貌为礼贤谦俗阜知敦劝民安见察廉仁风扇【平声】道路陰雨膏【去声】闾阎文律操将柄兵机钓得铃碧幢油叶叶红旆火檐檐景象春加丽威容晓助严枪森赤豹尾纛吒【丑亚切】黑龙髯门静尘初敛城昏日半衔选幽开后院占胜坐前檐平展丝头毯【吐敢切】高褰锦额帘雷槌柘枝鼓雪摆胡腾衫髮滑歌钗坠粧光舞汗沾回灯花簇簇过酒玉纖纖饌盛盘心殢醅浓盞底粘陆珍熊掌烂海味蟹螯咸福履千夫祝形仪四座瞻羊公长在岷傳說莫归岩【盖祝者诗意也】眷爱人人遍风情事事兼犹嫌客不醉同赋夜厌厌

船夜援琴

鸟栖鱼不动月照夜江深身外都无事舟中只有琴七弦为益友两耳是知音心静即声淡其间无古今

答刘和州禹锡

换印虽频命未通历阳湖上又秋风不教才展休明代为罚诗争造化功我亦思归田舍下君应厌卧郡斋中好相收拾为闲伴年齿官班约畧同

渡淮

淮水东南濶无风渡亦难孤烟生乍直远树望多圆春浪棹声急夕阳帆影残清流宜映月今夜重吟看

赴苏州至常州答贾舍人

杭城隔岁转苏台还拥前时五马回厌见簿书先眼合喜逢杯酒暂眉开未酬恩宠年空去欲立功名命不来一别承明三领郡甘从人道是粗才

去岁罢杭州今春领吴郡慙无善政聊写鄙怀兼寄三相公

为问三丞相如何秉国钧那将最剧郡付与苦慵人岂有吟诗客堪为持节臣不才空饱暖无惠及饥贫昨卧南城月今行北境春铅刀磨欲尽银印换何频杭老遮车辙吴童扫路尘虚迎复虚送慙见两州民

宣武令狐相公以诗寄赠传播吴中聊奉短章用伸酬谢

新诗传咏忽纷纷楚老吴娃耳遍闻尽解呼为好才子不知官是上将军辞人命薄多无位战将功高少有文谢眺篇章韩信钺一生双得不如君

自咏

形容瘦薄诗情苦岂是人间有相人只合一生眠白屋何因三度拥朱轮金章未佩虽非贵银榼常携亦不贫唯是无儿头早白被天磨折恰平均

吟前篇因寄微之

君顔贵茂不清羸君句雄华不苦悲何事遣君还似我髭须早白亦无儿

紫薇花

紫薇花对紫薇翁名目虽同貌不同独占芳菲当夏景不将顔色托春风浔阳官舍双高树兴善僧庭一大丛何似苏州安置处花堂栏下月明中

自到郡斋仅经旬日方专公务未及宴游偷闲走笔题二十四韵兼寄常州贾舍人湖州崔郎中仍呈吴中诸客

渭北离乡客江南守土臣涉途初改月入境已经旬甲郡标天下环封极海滨版图十万户兵籍五千人自顾才能少何堪宠命频冒荣慙印绶虚獎负丝纶【除苏州制云藏於已为道义施於物为政能在公形骨鯁之志闔境有袴襦之乐】候病须通脉防流要塞津救烦无若静

补拙莫如勤削使科条简摊令赋役均以兹为报効安敢不躬亲襦袴提於手韦弦佩在绅敢辞称俗吏且愿活疲民常【常州】未徵黄霸湖【湖州】犹借寇恂愧无铛脚政【河北三郡相隣皆有善政时为铛脚刺史见唐书】徒忝大牙隣制诰夸黄绢【美贾常州也】诗篇占白苹【美崔吴兴也】铜符抛不得【自谓也】琼树见无因警寐钟传夜催衙鼓报晨唯知对胥吏未暇接亲宾色变云迎夏声残鸟过春麦风非逐扇梅雨异随轮武寺山如故【武丘寺也】王楼月自新【郡内东南楼名也】池塘闲长草丝竹废生尘暑遣烧神酎晴教舞茵待还公事了亦拟乐吾身

题笼鹤

经旬不饮酒踰月未闻歌岂是风情少其如尘事多虎丘慙客问娃馆妬人过莫笑笼中鹤相看几何

答客问杭州

为我踟蹰停酒盏与君约畧说杭州山名天竺堆青黛湖号钱塘泻緑油大屋檐多装鴈齿小航亦画龙头所嗟水路无三百官系何因得再游

登阊门闲望

阊门四望郁苍苍始觉州雄土俗强十万夫家供课税五千子弟守封疆阖闾城碧铺秋草乌鹊桥红带夕阳处处楼前飘管吹家家门外泊舟航云埋虎寺山藏色月耀娃宫水放光曾赏钱塘兼茂苑今来未敢苦夸张

代诸妓赠送周判官

妓筵今夜别姑苏客棹明朝向镜湖莫泛扁舟寻范蠡且随五马觅罗敷兰亭月破能回否娃馆秋凉却到无好与使君为老伴归来休染白髭须

秋寄微之十二韵

娃馆松江北稽城浙水东屈君为长吏伴我作衰翁旌旆知非远烟云望不通忙多对酒榼兴少阅诗筒【比在杭州两浙唱和诗赠答於筒中逋往来】淡白秋来日疎凉雨後风余霞数片绮新月一张弓影满衰桐树香凋晚蕙丛饥啼春谷鸟寒怨络丝虫览镜头虽白听歌耳未聋老愁从此遣醉笑与谁同清旦方堆案黄昏始退公可怜朝暮景销在两衙中

池上早秋

荷芰緑参差新秋水满池早凉生北檻残照下东篱露饱蝉声懒风乾柳意衰过潘二十岁何

必更愁悲

郡西亭偶咏

常爱西亭面北林公私尘事不能侵
共闲作伴无如鹤与老相宜只有琴
莫遣是非分作界须教吏隐合为心
可怜此道人皆见但要修行功用深

故衫

闇淡绯衫称老身半披半曳出朱门
袖中吴郡新诗本襟上杭州旧酒痕
残色过梅看向尽故香因洗嗅犹存
曾经烂熳三年着欲弃空箱似少恩

郡中夜听李山人弹三乐

风琴秋拂匣月户夜开关荣启先生乐
姑苏太守闲传声千古後得意一时闲
却怪锺期耳唯听水与山

东城桂三首【并序】

苏之东城古吴都城也今为樵牧之場
有桂一株生乎城下惜其不得地因赋
三絶句以唁之

子墮本从天竺寺根盘今在闔閭城
当时应逐南风落落向人间取次生
【旧说杭州天竺寺每岁秋中有月桂
子墮】

霜雪压多虽不死荆榛长疾欲相埋
长忧落在樵人手卖作苏州一束柴

遥知天上桂花孤试问嫦娥更要无
月宫幸有闲田地何不中央种两株

闻行简恩赐章服喜成长句寄之

吾年五十加朝散尔亦今年赐服章
齿髮恰同知命岁官衔俱是客曹郎
【予与行简俱年五十始着绯皆是主
客郎官】荣传锦帐花联萼彩动绫
袍鴈趣行【绯多以鴈衔瑞莎为之也】
大抵着绯宜老大莫嫌秋鬓数茎霜

唤笙歌

露坠萎花槿风吹败叶荷老心欢乐
少秋眼感伤多芳岁今如此衰翁可
奈何犹应不如醉试遣唤笙歌

对酒吟

一抛学士笔三佩使君符未换银青绶唯添雪白须公门衙退掩妓席客来铺履舄从相近讴吟任所须金銜嘶五马钿带舞双姝不得当年有犹胜到老无合声歌汉月齐手拍吴歊今夜还先醉应烦红袖扶

偶饮

三盏醺醺四体融妓亭檐下夕阳中千声方响敲相续一曲才和宴未终今日心情如往日秋风气味似春风唯憎小吏樽前报遁去衙时水五筒

早发赴洞庭舟中作

阊门曙色欲苍苍星月高低宿水光棹举影摇灯烛动舟移声拽管弦长渐看海树红生日遥见包山白带霜出郭已行十五里唯销一曲慢霓裳

宿湖中

水天向晚碧沉沉树影霞光重叠深浸月冷波千顷练苞霜新橘万株金幸无案牍何妨醉纵有笙歌不废吟十只画舫何处宿洞庭山脚太湖心

拣贡橘书情

洞庭贡橘拣宜精太守勤王请自行珠颗形容随日长琼浆气味得霜成登山敢惜驽骀力望阙难伸蝼蚁情疎贱无由亲跪献愿凭朱实表丹诚

夜泛阳坞入明月湾即事寄崔湖州

湖山处处好淹留最爱东湾北坞头掩映橘林千点火泓澄潭水一盆油龙头画舸衔明月鹊脚红旗蘸碧流为报茶山崔太守与君各是一家游【尝美吴兴每春茶山之游泊入太湖美意减矣故云】

泛太湖书事寄微之

烟渚云帆处处通飘然舟似入虚空玉杯浅酌巡初匝金管徐吹曲未终黄夹缬林寒有叶碧琉璃水净无风避旗飞鹭翩翩白惊鼓跳鱼拨刺红涧雪压多松偃蹇岩泉滴久石玲珑书为故事留湖上【所见胜景多记在湖中石上】吟作新诗寄浙东军府威容从道盛江山气色定知同报君一事君应美五宿澄波皓月中

题新馆

曾为白社羁游子今作朱门醉饱身
十万户州尤觉贵二千石禄敢言贫
重裘每念单衣士兼味尝思旅食人
新馆寒来多少客欲回歌酒暖风尘

西楼喜雪命宴

宿云黄惨澹晓雪白飘飏散面遮槐市
堆花压柳桥四郊铺缟素万室甃琼瑶
银榼携桑落金炉上丽谯光迎舞妓动
寒近醉人销歌乐虽盈耳慙无五袴谣

新栽梅

池边新种七株梅欲到花时点捡来
莫怕长洲桃李妬今年好为使君开

酬刘和州戏赠

钱塘山水接苏台两地褰帷愧不才
政事素无争学得风情旧有且将来
双蛾解佩啼相送五马鸣珂笑却回
不似刘郎无景行长抛春恨在天台

戏和贾常州醉中二絶句

闻道毘陵诗酒兴近来积渐学姑苏
【遏合切网从上掩之也】头新令从偷去刮骨清吟得侣无

越调管吹留客曲吴吟诗送煖寒杯
娃宫无限风流事好遣孙心哲学来

岁暮寄微之三首

微之别久能无叹知退书稀岂免愁
甲子百年过半後光陰一岁欲终头
池水晓合胶船底楼雪晴销露瓦沟
自觉欢情随日减苏州心不及杭州

荣进虽频退亦频与君才命不调匀
若不九重中掌事即须千里外抛身
紫垣南北厅曾对沧海东西郡又隣
唯欠结庐嵩洛下一时归去作闲人

白头岁暮苦相思除却悲吟无可为
枕上从妨一夜睡灯前读尽十年诗
【读前後唱和诗】龙鍾校正骑驴日
顛顚通江司马时【通州江州】若并
如今是全活纒朱拖紫且开眉
岁日家宴戏示弟侄等兼呈张侍御
二十八丈殷判官二十三兄

弟妹妻孥小侄甥娇痴弄我助欢情
岁盞後推蓝尾酒春盘先劝胶牙饴
【徐盈切】形骸潦

倒虽堪叹骨肉团圆亦可荣犹有夸张少年处笑呼张丈唤殷兄

正月三日闲行

黄鹂巷口莺欲语乌鹊河头冰欲销【黄鹂坊名乌鹊河名】绿浪东西南北水红栏三百九十桥【苏之官桥之数】鸳鸯荡漾双双翅杨柳交加万万条借问春风来早晚只从前日到今朝

夜归

逐胜移朝宴留欢放晚衙宾寮多谢客骑从半吴娃到处销春景归时及月华城阴一道直烛焰两行斜东吹先催柳南霜不杀花臯桥夜沽酒灯火是谁家

自叹

岂独年相迫兼为病所侵春来痰气动老去嗽声深眼暗犹操笔头斑未挂簪因循过日月真是俗人心

郡中闲独寄微之及崔湖州

少年宾旅非吾辈晚岁簪纓束我身酒散更无同宿客诗成长作独吟人苹洲会面知何日镜水离心又一春两处也应相忆在官高年长少情亲

小舫

小舫一艘新造了轻装梁柱庑安篷深坊静岸游应遍浅水低桥去尽通黄柳影笼随棹月白苹香起打头风慢牵欲傍樱桃泊借问谁家花最红

马坠一强出赠同座

足伤遭马坠腰重倩人擡抵合牕间卧何因花下来坐依桃叶妓行呷地黄杯强出非他意东风落尽梅夜闻贾常州崔湖州茶山境会想羡欢宴因寄此诗

遥闻境会茶山夜珠翠歌钟俱遶身盘下中分两州界灯前合【音合】作一家春青娥递舞应争妙紫笋齐尝各鬪新自叹花时北牕下蒲黄酒对病眠人【时马坠损腰正劝蒲黄酒】酬微之开拆新楼初毕相报未联见戏之作

海山郁郁石棱棱新豁高居正好登南临赡部三千界东对蓬宫十二层报我楼成秋望月把君诗读夜回灯无妨却有他心眼粧点亭台即不能

病中多雨逢寒食

水国多陰常懶出老夫饒病愛閑眠三旬卧度鶯花月一半春銷風雨天薄暮何人吹簫築新晴几处縛秋千彩繩芳樹長如旧唯是年年換少年

清明夜

好風朧月清明夜碧砌紅軒刺史家獨遶回廊行復歇遙听弦管暗看花

蘇州柳

金谷園中黃嫋娜曲江亭畔碧婆娑老來處處行應徧不似蘇州柳最多絮扑白頭條拂面使君無計奈春何【婆娑一作毵娑】

三月二十八日贈周判官

一春惆悵殘三日醉問周郎憶得無柳絮送人鶯勸酒去年今日別東都

偶作

紅杏初生葉青梅已綴枝闌珊花落後寂寞酒醒時坐悶低眉久行慵舉足遲少年君莫怪頭白自應知重答劉和州【來篇云蘇州刺史例能詩西掖吟來替左司又云若共吳王鬪百草不如唯是欠西施】

分無佳麗敵西施敢有文章替左司隨分笙歌聊自樂等閑篇咏被人知花邊妓引尋香徑月下僧留宿劒池可惜當時好風景吳王應不解吟詩【采香徑在館娃宮】

奉送三兄

少年曾管二千兵昼听笙歌夜斫營自反丘園頭盡白每逢旗鼓眼猶明杭州暮醉連牀卧吳郡春游并馬行自愧阿連官職慢只教兄作使君兄

城上夜宴

留春不住登城望惜夜相將秉燭游風月萬家河兩岸笙歌一曲郡西樓詩听越客吟何苦酒被吳娃勸不休從道人生都是夢夢中歡笑亦勝愁

重題小舫贈周從事兼戲微之

细蓬青篴织鱼鳞小眼红腮衬麴尘阔狭才容从事座高低恰称使君身舞筵须拣腰轻女仙棹难胜骨重人不似镜湖廉使出高樯大艗【音匾】鬧惊春

吴樱桃

含桃最说出东吴香色鲜浓气味殊洽恰举头千万颗婆娑拂面两三株鸟偷飞处?将火人摘争时蹋破珠可惜风吹兼雨打明朝後日即应无

春尽劝客酒

林下春将尽池边日半斜樱桃落砌颗夜合隔帘花尝酒留闲客行茶使小娃残杯劝不饮留醉向谁家仲夏斋居偶题八韵寄微之及崔湖州

腥血与葷蔬停来一月余肌肤虽瘦损方寸任清虚体适通宵坐头慵隔日梳眼前无俗物身外即僧居水榭风来远松廊雨过初褰帘放巢燕投食施池鱼久别闲游伴频劳问疾书不知湖与越吏隐兴何如

官宅

红紫共纷纷祇承老使君移舟木兰棹行酒石榴裙水色窗窗见花香院院闻恋他官舍住双鬓白如云

六月三日夜闻蝉

荷香清露坠柳动好风生微月初三夜新蝉第一声乍闻愁北客静听忆东京我有竹林宅别来蝉再鸣不知池上月谁拨小舡行

莲石

青石一两片白莲三四枝寄将东洛去心与物相随石倚风前树莲栽月下池遥知安置处预想发荣时领郡来何远还乡去已迟莫言千里别岁晚有心期

眼病二首

散乱空中千片雪蒙笼物上一重纱纵逢晴景如看雾不是春天亦见花【已上四句皆病眼中所见者】僧说客尘来眼界医言风眩在肝家两头治疗何曾瘥药力微茫佛力賒眼藏损伤来已久病根牢固去应难医师尽劝先停酒道侣多教早罢官案上谩铺龙树论盒中虚捻决明丸人间方药应无益争得金篦试刮看

题东武丘寺六韵

香刹看非远祇园入始深龙蟠松矫矫玉立竹森森怪石千僧坐灵池一剑沉海当亭两面山在寺中心酒熟凭花劝诗成倩鸟吟寄言轩冕客此地好抽簪

夜游西武丘寺八韵

不厌西丘寺闲来即一过舟?转云岛楼阁出烟萝路入青松影门临白月波鱼跳惊秉烛猿觑怪鸣珂摇曳双红旆娉婷十翠娥【容满蝉态等十妓从游也】香花助罗绮钟梵避笙歌领郡时将久游山数几何一年十二度非少亦非多

咏怀

苏杭自昔称名郡牧守当今当好官两地江山蹋得遍五年风月咏将残几时酒盏曾抛却何处花枝不把看白髮满头归得也诗情酒兴渐阑珊【将残一作来残】

重咏

日觉双眸暗年惊两鬓苍病应无处避老更不宜忙徇俗心情少休官道理长今秋归去定何必重思量

百日假满

心中久有归田计身上都无济世才长告初从百日满故乡元约一年回马辞辕下头高举鹤出笼中翅大开但拂衣行莫回顾的无官职趣人来

九日寄微之

眼闇头风事事妨遶篱新菊为谁黄闲游日久心慵倦痛饮年深肺损伤吴郡两回逢九月越州四度见重阳怕飞杯酒多分数厌听笙歌旧曲章蟋蟀声寒初过雨茱萸色浅未经霜去秋共数登高会又被今年减一场

题报恩寺

好是清凉地都无系绊身晚晴宜野寺秋景属闲人净石堪敷坐寒泉可濯巾自慙容鬢上犹带郡庭尘

晚起

卧听冬冬衙鼓声起迟睡足长心情华簪脱後头虽白堆案抛来眼校明闲上篮輦乘兴出醉
回花舫信风行明朝更濯尘缨去闻道松江水最清

自思益寺次楞伽寺作

朝从思益峯游後晚到楞伽寺歇时照水姿容虽已老上山筋力未全衰行逢禅客多相问坐
倚渔舟一自思犹去悬车十五载休官非早亦非迟

松江亭携乐观渔宴宿

震泽平芜岸松江落叶波在官常梦想为客始经过水面排罾网?头簇绮罗朝盘鱸红鲤夜烛
舞青娥鴈断知风急潮平见月多繁丝与促管不解和渔歌

宿灵岩寺上院

高高白月上青林客去僧归独夜深羣血屏除唯对酒歌钟放散只留琴更无俗物当人眼但
有泉声洗我心最爱晓亭东望好太湖烟水绿沉沉

酬别周从事二首

腰痛拜迎人客倦眼昏勾押簿书难辞官归去缘衰病莫作陶潜范蠡看

洛下田园久抛掷吴中歌酒莫留连嵩阳云树伊川月已校归迟四五年

武丘寺路【去年重开寺路桃李莲荷约种二千株】

自开山寺路水陆往来频银勒牵骄马花?载丽人芰荷生欲遍桃李种仍新好住湖堤上长留
一道春齐云楼晚望偶题十韵兼呈冯侍御周殷二协律【楼在苏州】

潦倒宦情尽萧条芳岁阑欲辞南国去重上北城看复叠江山壮平铺井邑宽人稠过杨府坊
闾半长安挿雾峯头没穿霞日脚残水光红漾漾树色绿漫漫约畧留遗爱殷勤念旧欢病抛
官职易老别友朋难九月全无热西风亦未寒齐云楼北面半日凭栏干

河亭晴望【九月八日】

风转云头敛烟销水面开晴虹桥影出秋鴈橹声来郡静官初罢乡遥信未回明朝是重九谁
劝菊花杯

留别微之

干时久与本心违悟道深知前事非犹厌劳形辞郡印那将趣伴着朝衣五千言里教知足三百篇中劝式微少室云边伊水畔比君校老合先归

自喜

自喜天教我少缘家徒行计两翩翩身兼妻子都三口鹤与琴书共一船僮仆减来无冗食资粮算外有余钱携将贮作丘中费犹免饥寒得数年

武丘寺路宴留别诸妓

银泥裙映锦障泥画舸停桡马簇蹄清管曲终鹦鹉语红旗影动?【蒲拨切】?【河干切蕃中马】嘶渐消醉色朱颜浅欲语离情翠黛低莫忘使君吟咏处女坟湖北虎丘西【??一本作泼汗】

江上对酒二首

酒助疎顽性琴资缓慢情有慵将送老无智可劳生忽忽忘机坐伧伧任运行家乡安处是那独在神京久贮沧浪意初辞桎梏身昏昏常带酒默默不膺人坐稳便箕踞眠多爱欠伸客来存礼数始着白纶巾

望亭驿酬别周判官

何事出长洲连宵饮不休醒应难作别欢渐少於愁灯火穿村市笙歌上驿楼何言五十里已不属苏州见小侄龟儿咏灯诗并腊娘制衣因寄行简

已知腊子能裁服复报龟儿解咏灯巧妇才人常薄命莫教男女苦多能

酒筵上答张居士

但要前程减无妨外相同虽过酒肆上不离道场中弦管声非实花钿色是空何人知此义唯有净名翁

鹦鹉

陇西鹦鹉到江东养得经年觜渐红常恐思归先剪翅每因餽食渐开笼人怜巧语情虽重鸟忆高飞意不同应似朱门歌舞妓深藏牢闭後房中

听琵琶妓弹略略

腕软拨头轻新教略略成四弦千遍语一曲万重情法向师边得能从意上生莫欺江外手别是一家声

写新诗寄微之偶题卷後

写了吟看满卷愁浅红牋纸小银钩未容寄与微之去已被人传到越州

宝历二年八月三十日夜梦後作

尘缨忽解诚堪喜世网重来未可知莫忘全吴馆中梦岭南泥雨步行时

与梦得同登栖灵塔

半月悠悠在广陵何楼何塔不同登共怜筋力犹堪在上到栖灵第九层

梦苏州水阁寄冯侍御

扬州驿里梦苏州梦到花桥水阁头觉後不知冯侍御此中昨夜共谁游

喜罢郡

五年两郡亦堪嗟偷出游山走看花自此光陰为已有从前日月属官家樽前免被催迎使枕上休闻报坐衙睡到午时欢到夜回看官职是泥沙

答次休上人【来篇云门有余霞千万首何方一句乞闲人】

姓白使君无丽句名休座主有新文禪心不合生分别莫爱余霞嫌碧云

白氏长庆集卷二十四

卷二十五

<集部,别集类,汉至五代,白氏长庆集>

钦定四库全书

白氏长庆集卷二十五

唐白居易撰

律诗【凡一百首】

感悟妄缘题如上人壁

自从为駉童直至作衰翁所好随年异为忙终日同
弄沙成佛塔鏤玉谒王宫彼此皆儿戏须臾即色空
有营非了义无着是真宗兼恐勤修道犹应在妄中

思子台有感二首【凡题思子台者皆罪江充予观祸胎不独在此偶以二絶句辩之】

曾家机上闻投杼尹氏园中见掇蜂但以恩情生隙罅何人不解作江充

闇生魑魅蠹生虫何异谗生疑阻中但使武皇心似烛江充不敢作江充

赋得边城角

边角两三枝霜天陇上儿望乡相并立向月一时吹
战马头皆举征人手尽垂呜呜三奏罢城上展旌旗

忆洛中所居

忽忆东都宅春来事宛然雪销行径里水上卧房前
厌绿栽黄竹嫌红种白莲醉教鸕送酒闲遣鹤看
幸是林园主慙为食禄牵宦情薄似纸乡思急如弦
岂合姑苏守归休更待年

想归田园

恋他朝市求何事想取丘园乐此身千首恶诗吟
过日一壶好酒醉消春归乡年亦非全老罢郡家
仍未苦贫快活不知如我者人间能有几人

琴茶

兀兀寄形羣动内陶陶任性一生闲自抛官後春多醉不读书来老更闲琴里知闻唯緑水茶中故旧是蒙山穷通行止长相伴谁道吾今无往还

赠楚州郭使君

淮水东南第一州山围雉堞月当楼黄金印绶悬腰底白雪歌诗落笔头笑看儿童骑竹马醉携宾客上仙舟当家美事堆身上何啻林宗与细侯

和郭使君题枸杞

山阳太守政严明吏静人安无犬惊不知灵药根成狗怪得时闻吠夜声

初到洛阳闲游

汉庭重少身宜退洛下闲居迹可逃趋伴入朝应老丑寻春放醉尚粗豪诗携彩纸新装卷酒典绯花旧赐袍曾在东方千骑上至今躑躅马头高

醉赠刘二十八使君

为我引杯添酒饮与君把筋击盘歌诗称国手徒为尔命压人头不奈何举眼风光长寂寞满朝官职独蹉跎亦知合被才名折二十三年折太多

太湖石

烟翠三秋色波涛万古痕削成青玉片截断碧云根风气通岩穴苔文护洞门三峯具体小应是华山孙

过敷水

垂鞭欲渡罗敷水处分鸣驄且缓驱秦氏双蛾久冥寞苏台五马尚踟蹰村童店女仰头笑今日使君真是愚

南院

林院无情绪经春不一开杨花飞作穗榆荚落成堆壮气从中减流年逐後催只应如过客病去老迎来

闲咏

步月怜清景眠松爱緑陰早年诗思苦晚岁道情深夜学禅多坐秋牵兴暂吟悠然两事外无处更留心初授秘监拜赐金紫闲吟小酌偶写所怀

紫袍新秘监白首旧书生鬓雪人间壽腰金世上荣子孙无可念产业不能营酒引眼前兴诗留身後名闲倾三数酌醉咏十余声便是羲皇代先从心太平

新昌闲居招杨郎中兄弟

纱巾角枕病眠翁忙少闲多谁与同但有双松当砌下更无一事到心中金章紫绶看如梦皂盖朱轮别似空暑月贫家何所有客来唯赠北窗风

秘省後厅

槐花雨润新秋地桐叶风翻欲夜天尽日後厅无一事白头老监枕书眠

松斋偶兴

置心思虑外灭迹是非间约俸为生计随官换往还耳烦闻晓角眼醒见秋山赖此松檐下朝回半日闲和杨郎中贺杨仆射致仕後杨侍郎门生合宴席上作

业重关西继大名恩深阙下遂高情祥鱣降伴趋庭鲤贺燕飞和出谷鷖范蠡舟中无子弟疎家席上欠门生可怜玉树连桃李从古无如此会荣

松下琴赠客

松寂风初定琴清夜欲阑偶因羣动息试拨一声看寡鹤当徽怨秋泉应指寒慙君此倾听本不为君弹

秋斋

晨起秋斋冷萧条称病容清风两牕竹白露一庭松阮籍谋身拙嵇康向事慵生涯别处浩气在心膺

涂山寺独游

野径行无伴僧房宿有期涂山来去熟唯是马蹄知

登观音台望城

百千家似围棋局十二街如种菜畦遥认微微入朝火一条星宿五门西

登灵应台北望

临高始见人寰小对远方知色界空回首却归朝市去一稊米落太仓中

酬裴相公题兴化小池见招长句

为爱小塘招散客不嫌老监与新诗山公倒载无妨学范蠡扁舟未要追蓬断偶飘桃李径鸥
惊误拂凤凰池敢辞课拙酬高韵一勺争禁万顷陂

闲行

五十年来思虑熟忙人应未胜闲人林园傲逸真成贵衣食单疎不是贫专掌图书无过地遍
寻山水自由身傥年七十犹强健尚得闲行十五春

闲出

兀兀出门何处去新昌街晚树陰斜马蹄知意缘行熟不向杨家即庾家

与僧智如夜话

懒钝尤知命幽栖渐得朋门闲无谒客室静有禅僧炉向初冬火笼停半夜灯忧劳缘智巧自
喜百无能

忆庐山旧隐及洛下新居

形骸傴俛班行内骨肉勾留俸禄中无奈攀缘随手长亦知恩爱到头空草堂久闭庐山下竹
院新抛洛水东自是未能归去得世间谁要白须翁

晚寒

急景流如箭凄风利似刀暝催鸡翅敛寒束树枝高缩水浓和酒加絺厚絮袍可怜冬计毕煖
卧醉陶陶

偶眠

放杯书案上枕臂火炉前老爱寻思事慵多取次眠妻教卸乌帽婢与展青氍便是屏风樣何
劳画古贤华城西北雉堞最高崔相公首创楼台钱左丞继种花果合为胜境题在雅篇岁暮
独游怅然成咏【时华州未除刺史】

高居称君子潇洒四无隣丞相栋梁久使君桃李新凝情看丽句驻步想清尘况是寒天客楼
空无主人

奉使涂中戏赠张常侍

早风吹土满长衢驿骑星轺尽疾驱共笑篮舁亦称使日驰一驿向东都

有小白马乘馭多时奉使东行至稠桑驿溘然而毙足可惊伤不能忘情题二十韵

能骤复能驰翩翩白马儿毛寒一团雪鬃薄万条丝皂盖春行日骊驹晓促时双旌前独步五
马内偏骑芳草承蹄叶垂杨拂顶枝跨将迎好客惜不换妖姬慢鞚游萧寺闲驱醉习池睡来
乘作梦兴发倚成诗鞭为驯难下鞍缘稳不离北归还共到东使亦相随赭白何曾变玄黄岂
得知嘶风觉声急蹋雪怪行迟昨夜犹刍秣今朝尚絷维卧槽应不起顾主遂长辞尘灭駸駸
迹霜留皎皎姿度关形未改过隙影难追念倍燕求骏情深项别骝银收鈎臆带金卸络头羈
何处埋奇骨谁家觅弊帷稠桑驿门外吟罢涕双垂

题喷玉泉【泉在壽安山下高百余尺直泻潭中】

泉喷声如玉潭澄色似空练垂青嶂上珠写緑盆中溜滴三秋雨寒生六月风何时此岩下来
作濯缨翁

酬皇甫宾客

闲官兼慢使着处易停轮况欲逢新岁仍初见故人冒寒寻到洛待煖始归秦亦拟同攜手城
东略看春

种白莲

吴中白藕洛中栽莫恋江南花懒开万里攜归尔知否红蕉朱槿不将来

答苏庶子

偶作关东使重陪洛下游病来从断酒老去可禁愁欵曲偏青眼蹉跎各白头蓬山闲气味依
约似龙楼

答尉迟少监水阁重宴

人情依旧岁华新今日重招往日宾
鸡黍重回千里驾林园闇换四年春
水轩平写琉璃镜草岸斜铺翡翠茵
闻道经营费心力忍教成後属他人【时主人欲卖林亭】

和刘郎中伤鄂姬

不独君嗟我亦嗟西风北雪杀南花
不知月夜魂归处鹦鹉洲头第几家【姬鄂人也】

赠东邻王十三

攜手池边月开襟竹下风驱愁知酒力破
睡见茶功居处东西接年顏老少同能来为伴否
伊上作渔翁

早春同刘郎中寄宣武令狐相公

梁园不到一年强遥想清吟对緑觴更有何人
能饮酌新添几卷好篇章马头拂柳时回轡
豹尾穿花暂亚枪谁引相公开口笑不逢白监与刘郎

寄太原李相公

闻道北都今一变政和军乐万人安
绮罗二八围宾榻组练三千夹将坛
蝉鬓应夸丞相少貂裘不觉太原寒
世间大有虚荣贵百岁无君一日欢

雪中寄令狐相公兼呈梦得

兔园春雪梁王会想对金罍咏玉尘
今日相如身在此不知客右坐何人

出使在途所骑马死改乘肩輦将归长安偶咏旅怀寄太原李相公

驿路崎岖况雪寒欲登篮輦一长叹
风光不见桃花骑尘土空留杏叶鞍
丧乘独归殊不易脱骖相赠岂为难
并州好马应无数不怕旌旄试觅看

有双鹤留在洛中忽见刘郎中依然鸣顾刘因为鹤叹二篇寄予予以二絶句答之

辞乡远隔华亭水逐我来栖缙岭云
慙愧稻粱长不饱未曾回眼向鸡羣

荒草院中池水畔衔恩不去又经春
见君惊喜双回顾应为吟声似主人

宿窦使君庄水亭

使君何在在江东池柳初黄杏欲红
有兴即来闲便宿不知谁是主人翁

龙门下作

龙门涧下濯尘缨拟作闲人过此生
筋力不将诸处用登山临水咏诗行

姚侍御见过戏赠

晚起春寒慵裹头客来池上偶同游
东台御史多提举莫按金章系布裘

履道春居

微雨洒园林新晴好一寻低风洗池面
斜日拆花心暝助岚阴重春添水色深
不如陶省事犹抱有弦琴

题洛中第宅

水木谁家宅门高占地宽悬鱼挂青甃
行马护朱栏春榭笼烟煖秋庭鏤月寒
松胶粘琥珀筠粉扑琅玕试问池台主
多为将相官终身不曾到唯展宅图看

寄殷协律【多叙江南旧游】

五岁优游同过日一朝消散似浮云
琴诗酒伴皆抛我雪月花时最忆君
几度听鸡歌白日亦曾骑马咏红裙
【予在杭州日有歌云听唱黄鸡与白日
又有诗云着红骑马是何人】吴娘暮雨
萧萧曲自别江南更不闻【江南吴二娘
曲词云暮雨萧萧郎不归】

洛下诸客就宅相送偶题西亭

几榻临池坐轩车冒雪过交亲致杯酒
僮仆解笙歌流岁行将晚浮荣得几多
林泉应问我不住意如何

答林泉

好住旧林泉回头一怅然渐知吾潦倒
深愧尔留连欲作栖云计须营种黍钱
更容求一郡不得亦归田将发洛中枉
令狐相公手札兼辱二篇宠行以长句答之

尺素忽惊来梓泽双金不惜送蓬山
八行落泊飞云雨五字枪鏑动佩环玉韵乍听堪醒酒银

鈎细读当披顏收藏便作终身宝何啻三年怀袖间

临都驿答梦得六言二首

杨子津头月下临都驿里灯前昨日老於前日去年春似今年

谢守归为秘监冯公老作郎官前事不须问着新诗且更吟看

喜钱左丞再除华州以诗伸贺

左辖辍中台门东委上才彤檐经宿到绦帐及春开民望恳难夺天心慈易回那知不隔岁重借寇恂来

和钱华州题少华清光絕句

高情雅韵三峯守主领清光管白云自笑亦曾为刺史苏州肥膩不如君

送陕府王大夫

金马门前回剑佩铁牛城下拥旌旗他时万一为交代留取甘棠三两枝

代迎春花招刘郎中

幸与松筠相近栽不随桃李一时开杏园岂敢妨君去未有花时且看来

翫迎春花赠杨郎中

金英翠萼带春寒黄色花中有几般凭君语向游人道莫作蔓菁花眼看

闲出

身外无羈束心中少是非被花留便住逢酒醉方归人事行时少官曹入日稀春寒游正好稳马薄绵衣

座中赠卢判官

把酒承花花落频花香酒味相和春莫言不是江南会虚白亭中旧主人

曲江有感

曲江西岸又春风万树花前一老翁遇酒逢花还且醉若论惆怅事何穷

杏园花下赠刘郎中

怪君把酒偏惆怅曾是贞元花下人自别花来多少事东风二十四回春

花前有感兼呈崔相公刘郎中

落花如雪鬓如霜醉把花看益自伤少日为名多检束长年无兴可颠狂四时轮转春常少百刻支分夜苦长何事同生壬子岁老於崔相及刘郎【余与崔刘年同独早衰白】微之就拜尚书居易续除刑部因书贺意兼咏离怀

我为宪部入南宫君作尚书镇浙东老去一时成白首别来七度换春风簪缨假合虚名在筋力销磨实事空远地官高亲故少些些谈笑与谁同

喜与韦左丞同入南省因叙旧以赠之

早年同遇陶钧主利钝精粗共在熔【宪宗朝与韦同入翰林】金剑淬来长透匣铅刀磨尽不成锋差肩北省慙非据接武南宫幸再容跛鼃虽迟骐驎疾何妨中路亦相逢

伊州

老去将何散老愁新教小玉唱伊州亦应不得多年听未教成时已白头

早朝

鼓动出新昌鸡鸣赴建章翩翩稳鞍马楚楚健衣裳宫漏传残夜城陰送早凉月堤槐露气风烛桦烟香双阙龙相对千官鴈一行汉庭方尚少慙叹鬓如霜

答裴相公乞鹤

警露声音好冲天相貌殊终宜向辽廓不称在泥涂白首劳为伴朱门幸见呼不知疎野性解爱凤池无

晚从省归

朝回北阙值清晨晚出南宫送暮春入去丞郎非散秩归来诗酒是闲人犹思泉石多成梦尚叹簪裾未离身终是不如山下去心头眼底两无尘

北牕闲坐

虚牕两丛竹静室一炉香门外红尘合城中白日忙无烦寻道士不要学仙方自有延年术心闲岁月长

酬严给事【闻玉蘂花下有游仙絶句】

羸女偷乘风去时洞中潜歇弄琼枝不缘啼鸟春饶舌青琐仙郎可得知

京路

西来为看秦山雪东去缘寻洛苑春来去腾腾两京路闲行除我更无人

华州西

每逢人静慵多歇不计程行困即眠上得篮輦未能去春风敷水店门前

从陕至东京

从陕至东京山低路渐平风光四百里车马十三程花共垂鞭看杯多并饔倾笙歌与谈笑随分自将行

送春

银花凿落从君劝金屑琵琶为我弹不独送春兼送老更尝一酌更听看

宿杜曲花下

觅得花干树携来酒一壶懒归兼拟宿未醉岂劳扶但惜春将晚宁愁日渐晡篮輦为卧舍漆盃【卢谷切】是行厨斑竹盛茶柜红泥罨饭炉眼前无所阙身外更何须小面琵琶婢苍头鬻策奴从君饱富贵曾作此游无

逢旧

久别偶相逢俱疑似梦中即今欢乐事放盞又成空

绣妇叹

连枝花样绣罗襦本拟新年餉小姑自觉逢春饶怅望谁能每日趁工夫针头不解愁眉结线

缕难穿泪脸珠虽凭绣牀都不绣同牀绣伴得知无

春词

低花树映小粧楼春入眉心两点愁斜倚栏干背鸚鵡思量何事不回头

恨词

翠黛眉低敛红珠泪闇销曾来恨人意不省似今朝

山石榴花十二韵

晔晔复煌煌花中无比方艳天宜小院条短称低廊本是山头物今为砌下芳千丛相向背万
朵互低昂照灼连朱檻玲瓏映粉墙风来添意态日出助晶光渐绽臙脂萼犹含琴轸房离披
乱剪彩斑駁未匀粧绦焰灯干炷红裙妓一行此时逢国色何处觅天香恐合栽金阙思将献
玉皇好差青鸟使封作百花王

送敏中归豳宁幕

六十衰翁儿女悲傍人应笑尔应知弟兄垂老相逢日杯酒临欢欲散时前路加飧须努力今
宵尽醉莫推辞司徒知我难为别直过秋归未讶迟

宴散

小宴追凉散平桥步月回笙歌归院落灯火下楼台残暑蝉催尽新秋鴈带来将何迎睡兴临
卧举残杯

人定

人定月朧明香消枕簟清翠屏遮烛影红袖下帘声坐久吟方罢眠初梦未成谁家教鸚鵡故
故语相惊

池上

嫋嫋凉风动凄凄寒露零兰衰花始白荷破叶犹青独立栖沙鹤双飞照水萤若为寥落境仍
值酒初醒

池窗

池晚莲芳谢 牕秋竹意深 更无人作伴 唯对一张琴

花酒

香醕【铺杯切】 浅酌浮如蚁 云鬓新梳薄 似蝉为报洛城花 酒道莫辞送老二三年

题崔常侍济源庄

谷口谁家住 云扃鏤竹泉 主人何处去 萝薜换貂蝉 籍在金闺内 班排玉扆前 诚知忆山水 归得是何年

认春戏呈冯少尹李郎中陈主簿

认得春风先到处 西园南面水东头 柳初变 後条犹重 花未开 时枝已稠 闇助醉欢 寻绿酒 潜添睡兴 着红楼 知君未别阳和意 直待春深始拟游

魏堤有怀

魏王堤下水 声似使君滩 惆怅回头听 踟蹰立马看 荡风波眼急 翻雪浪心寒 忆得瞿塘事 重吟行路难

柘枝词

柳闇长廊合 花深小院开 苍头铺锦褥 皓腕捧银杯 绣帽珠稠缀 香衫袖窄裁 将军拄球杖 看按柘枝来

代梦得吟

後来变化三分贵 同辈凋零大半无 世上争先从尽汝 人间鬪在不如吾 竿头已到应难久 局势虽迟未必输 不见山苗与林叶 迎春先绿亦先枯

寄答周协律【来诗多叙苏州旧游】

故人叙旧寄新篇 惆怅江南到眼前 闇想楼台万余里 不闻歌吹一周年 桥头谁更看新月 池畔犹应泊旧船 最忆後亭杯酒散 红屏风掩绿窗眠

白氏长庆集卷二十五

卷二十六

钦定四库全书

白氏长庆集卷二十六

唐白居易撰

律诗【五言七言凡一百首】

太和戊申岁大有年诏赐百寮出城观稼谨书盛事以俟采诗

清晨承诏命丰岁閱田间膏雨抽苗足凉风吐穗初早禾黄错落晚稻绿扶疎好入诗家咏宜
令史馆书散为万姓食堆作九年储莫道如云稼今秋云不如

赠悼怀太子挽歌辞二首【奉诏撰进】

竹马书薨岁铜龙表葬时永言窀穸事全用少阳仪壽夭由天命哀荣出圣慈恭闻褒赠诏轸
念在与夷剪叶藩封早承华册命尊笙歌辞洛苑风雪蔽梁园鹵簿凌霜宿铭旌向月翻宫寮
不逮事哭送出都门

雨中招张司业宿

过夏衣香润迎秋簟色鲜斜支花石枕卧咏药珠篇泥泞非游日陰沉好睡天能来同宿否听
雨对牀眠

和集贤刘学士早朝作

吟君昨日早朝诗金御炉前唤仗时烟吐白龙头宛转扇开青雉尾参差暂留春殿多称屈合
入纶闈即可知从此摩霄去非晚鬓间未有一茎丝

送陕州王司马建赴任【建善诗者】

陕西司马去何如养静资贫两有余公事闲忙同少尹料钱多少敌尚书祗携美酒为行伴唯
作新诗趣下车自有铁牛无咏者料君投刃必应虚

对琴待月

竹院新晴夜松牕未卧时共琴为老伴与月有秋期玉轸临风久金波出雾迟幽音待清景唯是我心知

杨家南亭

小亭门向月斜开满地凉风满地苔此院好弹秋思处终须一夜抱琴来

早寒

黄叶聚墙角青苔围柱根被经霜後薄镜遇雨来昏半卷寒檐幕斜开暖阁门迎冬兼送老只仰酒盈樽

斋月静居

病来心静一无思老去身闲百不为忽忽眼尘犹爱睡些些口业尚夸诗荤腥每断斋居月香火常亲宴坐时万虑消停百神泰唯应寂寞杀三尸

宿裴相公兴化池亭【兼蒙借船舫游泛】

林亭一出宿风尘忘却平津是要津松阁晴看山色近石渠秋放水声新孙弘阁闇无闲客傅说舟忙不借人何似抡才济川外别开池馆待交亲

和刘郎中望终南山秋雪

遍览古今集都无秋雪诗阳春先唱後陰岭未消时草讶霜凝重松疑鹤散迟清光莫独占亦对白云司

广府胡尚书频寄诗因答絕句

尚书清白临南海虽饮贪泉心不回唯向诗中得珠玉时时寄到帝乡来

送鹤与裴相临别赠诗

司空爱尔尔须知不信听吟送鹤诗羽翮势高宁惜别稻粱恩厚莫愁饥夜栖少共鸡争树晓浴先饶凤占池稳上青云勿回顾的应胜在白家时

令狐相公拜尚书後有喜从镇归朝之作刘郎中先和因以继之

车骑新从梁苑回履声佩响入中台风池望在终重去龙节功成且纳来金勒最宜乘雪出玉

觴何必待花开尚书首唱郎中和不计官资只计才

送河南尹冯学士赴任

石渠金谷中间路轩骑翩翩十日程清洛饮水添苦节碧嵩看雪助高情谩夸河北操旄钺莫
羨江西拥旆旌【时新除二镇节度】何似府寮京令外别教三十六峯迎

读鄂公传

高卧深居不见人功名抖擞似灰尘唯留一部清商乐月下风前伴老身

赋得乌夜啼

城上归时晚庭前宿处危月明无叶树霜滑有风枝啼涩饥喉咽飞低冻翅垂画堂鹦鹉鸟冷
暖不相知

镜换杯

欲将珠匣青铜镜换取金樽白玉卮镜里老来无避处樽前愁至有消时茶能散闷为功浅萱
纵忘忧得力迟不是杜康神用速十分一盏便开眉

冬夜闻虫

虫声冬思苦於秋不解愁人闻亦愁我是老翁听不畏少年莫听白君头

双鹦鹉

緑衣整顿双栖起红觜分明对语时始觉琵琶弦莽卤方知吉了舌参差郑牛识字吾常叹【
谚云郑玄家牛触墙成八字】丁鹤能歌尔亦知若称白家鹦鹉鸟笼中兼合解吟诗

赠朱道士

仪容白皙上仙郎方寸清虚内道場两翼化生因服药三尸卧死为休粮醺坛北向宵占斗寝
室东开早纳阳尽日窗间更无事唯烧一炷降真香

昨以拙诗十首寄西川杜相公相公亦以新作十首惠然报示首数虽等工拙不伦重以一章
用伸答谢

诗家律手在成都权与寻常将相殊剪裁五言兼用钺陶钧六义别开炉惊人卷轴须知有随

事文章不道无篇数虽同光价异十鱼目换十骊珠

和令狐相公新於郡内栽竹百竿拆壁开轩旦夕对玩偶题七言五韵

梁园修竹旧传名久废年深竹不生千畝荒凉寻未得百竿青翠种新成墙开乍见重添兴
静时闻别有情烟叶蒙笼侵夜色风枝萧飒欲秋声更登楼望尤堪重千万人家无一茎【汴
州人家并无竹】

重答汝州李六使君见和忆吴中旧游五首

为忆娃宫与虎丘翫君新作不能休蜀笺写出篇篇好吴调吟时句句愁洛下林园终共住江
南风月会重游【先与李六有此二句之约】由来事过多堪惜何况苏州胜汝州【李前刺
苏州故有是句】

见殷尧藩侍御忆江南诗三十首诗中多叙苏杭胜事余尝典二郡因继和之

江南名郡数苏杭写在殷家三十章君是旅人犹苦忆我为刺史更难忘境牵吟咏真诗国兴
入笙歌好醉乡为念旧游终一去扁舟直拟到沧浪

闻新蝉赠刘二十八

蝉发一声时槐花带两枝只应催我老兼遣报君知白髮生头速青云入手迟无过一杯酒相
劝数开眉

赠王山人

玉芝观里王居士服气飡霞善养身夜後不闻龟喘息秋来唯长鹤精神容顏尽怪长如故名
姓多疑不是真贵重荣华轻壽命知君闷见世间人

和刘郎中学士题集贤阁

朱阁青山高庑齐与君才子作诗题傍闻大内笙歌近下视诸司屋舍低万卷图书天禄上一
条风景月华西欲知丞相优贤意百步新廊不蹋泥

观幻

有起皆因灭无睽不暂同从欢终作戚转苦又成空次第花生眼须臾竹过风更无寻觅处鸟
迹印空中

病假中龐少尹携鱼酒相过

宦情牢落年将暮病假联縣日渐深被老相催虽白首与春无分未甘心闲停茶碗从容语醉把花枝取次吟劳动故人龐阁老提鱼携酒远相寻

听田顺儿歌

戛玉敲冰声未停嫌云不遏入青冥争得黄金满衫袖一时抛与断年听

听曹刚琵琶兼示重莲

拨拨弦弦意不同胡啼番语两玲珑谁能截得曹刚手插向重莲衣袖中

酬令狐相公春日寻花见寄六韵

病卧帝王州花时不得游老应随日至春肯为人留粉坏杏将谢火繁桃尚稠白飘僧院地红落酒家楼空里雪相似晚来风不休吟君怅望句如到曲江头

和刘郎中曲江春望见示

芳景多游客衰翁独在家肺伤妨饮酒眼痛忌看花寺路随江曲宫墙夹树斜羡君犹壮健不枉度年华

送东都留守令狐尚书赴任

翠华黄屋未东巡碧洛青嵩付大臣地称高情多水竹山宜闲望少风尘龙门即拟为游客金谷先凭作主人歌酒家家花处处莫空管领上阳春

自题新昌居止因招杨郎中小饮

地偏坊远巷仍斜最近东头是白家宿雨长齐隣舍柳晴光照出夹城花春风小榼三升酒寒食深炉一碗茶能到南园同醉否笙歌随分有些些

南园试小乐

小园斑駁花初发新乐铮鏦教欲成红萼紫房皆手植苍头碧玉尽家生高调管色吹银字慢拽歌词唱渭城不饮一杯听一曲将何安慰老心情

和微之春日投简阳明洞天五十韵

青阳行已半白日坐将徂越国强仍大稽城高且孤利饶盐煮海名胜水澄湖牛斗天垂象台明地展图【天台四明二山】瓌奇填市井佳丽溢闾閭【当何切】句践遗风霸西施旧俗姝船头龙夭矫桥脚兽睢盱乡味玕蜆蚶时鲜贵鸕鶿语言诸夏异衣服一方殊捣练蛾眉婢鸣榔蛙角奴江清敌伊洛山翠胜荆巫华表双栖鹤联墙几点乌烟波分渡口云树接城隅涧远松如画洲平水似铺緑科秧早稻紫笋折新芦暖蹋泥中藕香寻石上蒲雨来萌尽达雷後蛰全苏柳眼黄丝纈花房绦?珠林风新竹折野烧【失照切】老桑枯带鞞【丁可切垂下貌】长枝蕙钱穿短贯榆暄和生野菜卑湿长街芜女浣纱相伴儿烹鲤一呼山魃啼稚子林狖挂山都产业论蚕蚁孳生计鸭雏泉岩雪飘洒苔壁锦漫糊堰限舟航路堤通车马途耶溪?回合禹庙径盘纒洞穴何因凿星槎谁与刳石凹【於交切】仙药臼峯峭佛香炉去为投金简来因挈玉壶贵仍招客宿健未要人扶闻望贤丞相仪形美丈夫前驱驻旌旆偏坐列笙竽刺史旗翻隼尚书履曳鳧学禅超後有观妙造虚无髻里传僧宝环中得道枢登楼诗八咏置砚赋三都捧拥罗将绮趋跄紫与朱庙谟藏稷卨兵略贮孙吴令下三军整风高四海趋千家得慈母六郡事严姑重士过三哺轻财抵一铢送觥歌宛转嘲妓笑卢胡佐饮时炮鼈蠲醒数鱸鲈醉乡虽咫尺乐事亦须臾若不中贤圣何由外智愚伊予一生志我尔百年躯江上三千里城中十二衢出多无伴侣归只是妻孥白首青山约抽身去得无

酬郑侍御多雨春空过诗三十韵【次用本韵】

南雨来多滞东风动即狂月行离毕急龙走召云忙鬼转雷车响蛇腾电策光浸淫天似漏沮洳地成疮惨淡陰烟白空蒙宿雾黄闇遮千里目闷结九回肠寂寞羈臣馆深沉思妇房镜昏鸾灭影衣润麝消香兰湿难纫佩花凋易落粧沾黄莺翅重滋緑草心长紫陌皆泥泞黄污共森茫恐霖成怪沴望霁剧禎祥楚柳腰肢嬾【丁可切】湘筠涕泪滂书昏疑是夜陰盛胜於阳居士巾皆垫行人盖尽张跳蛙还屡出移蚁欲深藏端坐交游废闲行去步妨愁生垂白叟恼杀蹋青娘变海常须虑为鱼慎勿忘此时方共惧何处可相将【此以下叙浙东政事】已望东溟祷仍封北户禳却思逢旱魃谁喜见商羊预怕为蚕病先忧作麦伤惠应施浹洽政岂假揄扬祀典修咸秩农书振满牀丹诚期恳苦白日会昭彰賑廩调饥户苦城备坏墙且当营岁事宁暇惜年芳德胜令灾弭人安在吏良尚书心若此不枉系金章

和春深二十首

何处春深好春深富贵家马为中路鸟妓作後庭花罗绮驱论队金银用短车眼前何所苦唯苦日西斜何处春深好春深贫贱家荒凉三径草冷落四隣花奴困归佣力妻愁出赁车途穷平路险举足剧褒斜何处春深好春深执政家凤池添砚水鸡树落衣花诏借当衢宅恩容上殿车延英开对久门与日西斜何处春深好春深方镇家通犀排带胯瑞鹤勘袍花飞絮冲球马垂杨拂妓车戎装拜春设左握宝刀斜何处春深好春深刺史家陰繁棠布叶岐秀麦分花五疋鸣珂马双轮画轼车和风引行乐叶叶隼旟斜何处春深好春深学士家凤书裁五色马鬣剪三花蜡炬开明火银台赐物车相逢不敢揖彼此帽低斜何处春深好春深女学家惯看温室树饱识浴堂花御印提随仗香牋把下车宋家宫樣髻一片緑云斜何处春深好春深御史家絮紫骢马尾蝶绕绣衣花破柱行持斧埋轮立驻车入班遥认得鱼贯一行斜何处春深

好春深迁客家一杯寒食酒万里故园花炎瘴蒸如火光陰走似车为忧鵬鸟至只恐日光斜
何处春深好春深经业家唯求太常第不管曲江花折桂名慙郢收萤志慕车官場泥铺处最
怕寸陰斜何处春深好春深隐士家野衣裁薜叶山饭晒松花兰索纫幽佩蒲轮驻软车林间
箕踞坐白眼向人斜何处春深好春深渔父家松湾随棹月桃浦落船花投饵移轻楫牵轮转
小车萧萧芦叶里风起钓丝斜何处春深好春深潮户家涛翻三月雪浪喷四时花曳练驰千
马惊雷走万车余波落何处江转富阳斜何处春深好春深痛饮家十分杯里物五色眼前花
舖歎眠糟瓮流涎见麴车中山一沉醉千度日西斜何处春深好春深上已家兰亭席上酒曲
洛?边花弄水游童棹湔裾小妇车齐桡争渡处一匹锦标斜何处春深好春深寒食家玲珑镂
鸡子宛转彩球花碧草追游骑红尘拜扫车秋千细腰女摇曳逐风斜何处春深好春深博奕
家一先争破眼六聚鬪成花鼓应投壶马兵冲象戏车弹碁局上事最妙是长斜何处春深好
春深嫁女家紫排襦上雉黄贴鬓边花转烛初移障鸣环欲上车青衣传氍毹锦绣一条斜何
处春深好春深娶妇家两行笼里烛一树扇间花宾拜登华席亲迎障幃车催粧诗未了星斗
渐倾斜何处春深好春深妓女家眉欺杨柳叶裙妬石榴花兰麝熏行被金铜钉坐车杭州苏
小小人道最天斜

咏家醪十韵

独醒从古笑灵均长醉如今敦伯伦旧法依稀传自杜【杜康】新方要妙得於陈【陈郎中
岵传受此法】井泉王相资重九麴蘖精灵用上寅【水用九月九日麴用七月上寅】酿糯
岂劳炊范黍撇筭何假漉陶巾常嫌竹叶犹凡浊始觉榴花不正真瓮揭闻时香酷烈甃封贮
後味甘辛捧疑明水从空化饮似阳和满腹春色洞玉壶无表里光摇金盞有精神能消忙事
成闲事转得忧人作乐人应是世间贤圣物与君还往拟终身

鹤池二首

高竹笼前无伴侣乱鸡羣里有风标低头乍恐丹砂落晒翅常疑白雪消转觉鸚鵡毛色下苦
嫌鸚鵡语声娇临风一唳思何事怅望青田云水遥

池中此鹤鹤中稀恐是辽东老令威带雪松枝翹膝胫放花菱片綴毛衣低回且向林间宿奋
迅终须天外飞若问故巢知处在主人相恋未能归

对酒五首

巧拙贤愚相是非何如一醉尽忘机君知天地中寬窄鵬鸞皇各自飞

蜗牛角上争何事石火光中寄此身随富随贫且欢乐不开口笑是痴人

丹砂见火去无迹白髮泥人来不休赖有酒仙相暖热松乔醉即到前头

百岁无多时壮健一春能几日晴明相逢且莫推辞醉听唱阳关第四声【第四声劝君更尽一杯酒西出阳关无故人】

昨日低眉问疾来今朝收泪吊人回眼前流例君看取且遣琵琶送一杯

僧院花

欲悟色空为佛事故栽芳树在僧家细看便是华严偈方便风开智慧花

老戒

我有白头戒闻於韩侍郎老多忧活计病更恋班行鑱铄夸身健周遮说话长不知吾免否两鬓已成霜

洛桥寒食日作十韵

上苑风烟好中桥道路平蹴球尘不起泼火雨新晴宿醉头仍重晨游眼乍明老慵虽省事春诱尚多情遇客踟蹰立寻花取次行连钱嚼金勒凿落写银罍府酝伤教送官娃喜要迎舞腰那及柳歌舌不如鶯乡国真堪恋光陰可合轻三年过寒食尽在洛阳城

快活

可惜鶯啼花落处一壶浊酒送残春可怜月好风凉夜一部清商伴老身饱食安眠消日月闲谈冷笑接交亲谁知将相王侯外别有优游快活人

送令狐相公赴太原

六纛双旌万铁衣并分旧路满光辉青衫书记何年去红旆将军昨日归诗作马蹄随笔走猎酣鹰翅伴觥飞北都莫作多时计再为苍生入紫微

不出

檐前新叶覆残花席上余杯对早茶好是老身销日处谁能骑马傍人家

惜落花

夜来风雨急无复旧花林枝上三分落园中二寸深日斜啼鸟思春尽老人心莫怪添盃饮情多酒不禁

老病

昼听笙歌夜醉眠若非月下即花前如今老病须知分不负春来二十年

忆晦叔

游山弄水携诗卷看月寻花把酒盃六事尽思君作伴几时归到洛阳来

送徐州高仆射赴镇

大红旆引碧幢旌新拜将军指点行战将易求何足贵书生难得始堪荣离筵歌舞花丛散候
骑刀枪雪队迎应笑蹉跎白头尹风尘唯管洛阳城

琴酒

耳根得听琴初畅心地忘机酒半酣若使后期兼解醉应言四乐不言三

听幽兰

琴中古曲是幽兰为我殷懃更弄看欲得身心俱静好自弹不及听人弹

六年秋重题白莲

素房含露玉冠鲜绀叶摇风钿扇圆本是吴州供进藕今为伊水寄生莲移根到此三千里结
子经今六七年不独池中花故旧兼乘旧日采花船

元相公挽词三首

铭旌官重威仪盛骑吹声繁卤簿长後魏帝孙唐宰相六年七月葬咸阳

墓门已闭笳箫去唯有夫人哭不休苍苍露草咸阳壠此是千秋第一秋

送葬万人皆惨澹反虞驷马亦悲鸣琴书劒佩谁收拾三岁遗孤新学行

卧听法曲霓裳

金磬玉笙和已久牙牀角枕睡常迟朦胧闲梦初成後宛转柔声入破时乐可理心应不谬酒
能陶性信无疑起尝残酌听余曲斜背银缸半下帷

结之

欢爱今何在悲啼亦是空同为一夜梦共过十年中

五凤楼晚望【六年八月十日作】

晴阳晚照湿烟销五凤楼高天沆寥野绿全经朝雨洗林红半被暮云烧龙门翠黛眉相对伊水黄金线一条自入秋来风景好就中最好是今朝

寄刘苏州

去年八月哭微之今年八月哭敦诗何堪老泪交流日多是秋风摇落时泣罢几回深自念情来一倍苦相思同年同病同心事除却苏州更是谁

送客

病上篮舆相送来衰容秋思两悠哉凉风嫋嫋吹槐子却请行人劝一盃

秋思

夕照红於烧晴空碧胜蓝兽形云不一弓势月初三鴈思来天北砧愁满水南萧条愁气味未老已深谙

酬梦得秋夕不寐见寄

碧簟绦纱帐夜凉风景清病闻和药气渴听碾茶声露竹偷灯影烟松护月明何言千里隔秋思一时生

题周家歌者

清紧如敲玉深圆似转簧一声肠一断能有几多肠

忆梦得

齿髮各蹉跎疎慵与病和爱花心在否见酒兴如何年长风情少官高俗虑多几时红烛下闻唱竹枝歌

赠同座

春黛双蛾嫩秋蓬两鬓侵
谋欢身太晚恨老意弥深
薄解灯前舞尤能醉後吟
花丛便不入犹自未甘心

夜招晦叔

庭草留霜池结冰黄昏钟絶冻云凝
碧氍毹上正飘雪红火炉前初炷灯
高调秦箏一两弄小花蜜榼二三升
为君更奏湘神曲夜就依来能不能

戏答皇甫监【时皇甫监初丧偶】

寒宵劝酒君须饮君是孤眠七十身
莫道非人身不煖十分一盞煖於人

和杨师皋伤小姬英英

自从娇駮【鱼骇切】一相依共见杨花七度飞
玳瑁牀空收枕席琵琶弦断倚屏帏
人间有梦何曾入泉下无家岂是归
坟上少啼留取泪明年寒食更沾衣

池边即事

氍毹胡琴出塞曲兰塘越棹弄潮声
何言此处同风月蓊北江南万里情

闻乐感隣

老去亲朋零落尽秋来弦管感伤多
尚书宅畔悲隣笛廷尉门前叹雀罗
緑綺窗空分妓女綵纱帐掩罢笙歌
欢娱未足身先去争奈书生薄命何

白氏长庆集卷二十六

卷二十七

<集部,别集类,汉至五代,白氏长庆集>

钦定四库全书

白氏长庆集卷二十七

唐白居易撰

律诗【五言七言凡九十首】

戊申岁暮咏怀三首

穷冬月末两三日半百年过六七时龙尾趲朝无气力牛头参道有心期荣华外物终须悟老病傍人岂得知犹被妻儿教渐退莫求致仕且分司

唯生一女才十二祇欠三年未六旬?嫁累轻何怕老饥寒心惯不忧贫紫泥丹笔皆经手赤绂金章尽到身更拟踟蹰觅何事不归嵩洛作闲人

七年囚闭作笼禽但愿开笼便入林幸得展张今日翅不能?负昔时心人间祸福愚难料世上风波老不禁万一差池似前事又应追悔不抽簪

赠梦得

心中万事不思量坐倚屏风卧向阳渐觉咏诗犹老丑岂宜凭酒更麤狂头垂白髮我思退脚踏青云君欲忙只有今春相伴在花前?醉两三场

想东游五十韵【并序】

太和三年春予病免官後忆游浙右数郡兼思到越一访微之故两浙之间一物以上想皆在目吟且成篇不能自休盈五百字亦犹孙兴公想天台山而赋之也海内时无事江南岁有秋生民皆乐业地主尽贤侯郊静销戎马城高逼斗牛平河七百里沃壤二三州【自常及杭凡三百里】坐有湖山趣行无风浪忧食宁妨解纜寝不废乘流泉石谙天竺烟霞识虎丘【天竺虎丘寺领郡时旧游最熟处】余芳认兰泽遗咏思苹洲【古诗云兰泽多芳草又柳恹诗云洲汀采白苹】菡萏红涂粉菰蒲绿泼油鳞差渔户舍绮错稻田沟紫洞藏仙窟玄泉贮怪湫精神昂老鹤姿彩媚潜蚪【大谢诗云潜蚪媚幽姿】静阅天工妙闲窥物状幽投竿出比

目擲果下獼猴味苦蓮心小漿甜蔗節稠橘苞從自結藕孔是誰鏤【先侯切】逐日移潮信
隨風變棹謳逋夫交烈火候更次鳴驄梵塔形疑踊【重玄閣】閶門勢欲浮【吳閶門】客
迎携酒榼僧待置茶瓿小宴閑談笑初筵雅獻酬稍催朱蜡炬徐動碧牙籌圓盞飛蓮子長裾
曳石榴栢枝隨畫鼓調笑從香球幕揚雲飄檻帘褰月露鈎舞繁紅袖去歌切翠眉愁弦管寧
容歇盃盤未許收良晨宜醕酎卒歲好優游鰾縷鮮仍細蓴絲滑且柔飽飧爲日計穩睡是身
謀名愧空虛得官知止足休自嫌猶屑屑衆笑太悠悠物表疎形役人寰足悔尤蛾須遠燈燭
兔勿近?罽幻世春來夢浮生水上沕百憂中莫入一醉外何求未死痴王湛無兒老鄧攸蜀琴
安膝上周易在牀頭去去無程客行行不系舟勞君頻問訊勸我少淹留【自此後并屬微之】
】雲雨多分散關山苦阻修一吟江月別七見日星周【昔在杭州別微之微之留詩云明朝
又向江頭別月落潮平是去時】珠玉傳新什鵷鸞念故俦懸旌心宛轉束楚意綢繆駘舫粧
青雀官槽?紫騮鏡湖期遠泛禹穴約冥搜預掃題詩壁先開望海樓飲思親履舄宿憶并衾裯
志氣吾衰也風情子在不應須相見後別作一家游【吾衰子在并出家語】

病免後喜除賓客

卧在漳濱滿十旬起爲商皓伴三人從今且莫嫌身病不病何由索得身

長樂亭留別

灞滻風烟函谷路曾經幾度別長安昔時蹙促爲遷客今日從容自去官優詔幸分四皓秩祖
筵慙繼二疎歡塵纓世網重重縛回顧方知出得難

陝府王大夫相迎偶贈

紫微閣老自多情白首園公豈要迎伴我綠槐陰下歇向君紅旆影前行綸巾髮少渾歆仄簾
輦肩齊甚穩平但問主人留幾日分司賓客去無程

別陝州王司馬

笙歌惆悵欲爲別風景闌珊初過春爭得遣君詩不苦黃河岸上白頭人

將至東都先寄令狐留守

黃鳥無聲葉滿枝閑吟想到洛城時昔逢金谷三春盡恨拜銅樓一月遲詩境忽來還自得醉
鄉潛去與誰期東都添個狂賓客先報壺觴風月知

答崔十八見寄

明朝欲見琴樽伴洗拭金盃拂玉徽君乞曹州刺史替我拋刑部侍郎歸倚瘡老馬收蹄立避

箭高鸿尽翅飞岂料洛阳风月夜故人垂老得相依

赠皇甫宾客

轻衣稳马槐陰路渐近东来渐少尘耳闇久憎闻俗事眼明初喜见闲人昔曾对作承华相今复连为博望宾始信淡交宜久远与君转老转相亲

归履道宅

驿吏引藤輦家童开竹扉往时多暂住今日是长归眼下有衣食耳边无是非不论贫与富饮水亦应肥

问江南物

归来未及问生涯先问江南物在耶引手摩挲青石笋回头点检白莲花苏州访故龙头闇王尹桥倾鴈齿斜别有夜深惆怅事月明双鹤在裴家

萧庶子相过

半日停车马何人在白家殷懃萧庶子爱酒不嫌茶

答尉迟少尹问所须

乍到频劳问所须所须非玉亦非珠爱君水阁宜闲咏每有诗成许去无

咏闲

但有闲销日都无事系怀朝眠因客起午饭伴僧斋树合陰交户池分水夹阶就中今夜好风月似江淮

同崔十八寄元浙东王陕州

未能同隐云林下且复相招禄仕闲随月有钱胜卖药终年无事抵归山镜湖水远何由泛棠树枝高不易攀惆怅八科残四在两人荣闇两人闲

答苏庶子月夜闻家僮奏乐见赠

墙西明月水东亭一曲霓裳按小伶不敢邀君无别意弦生管涩未堪听

偶吟

里巷多通水林园尽不扃松身为外户池面是中庭元氏诗三帙陈家酒一瓶醉来狂发咏隣女映篱听

白莲池泛舟

白藕新花照水开红窗小舫信风回谁教一片江南兴逐我殷懃万里来

池上即事

行寻磴石引新泉坐看修桥补钓船緑竹挂衣凉处歇清风展簟困时眠身闲当贵真天爵官散无忧即地仙林下水边无厌日便堪终老岂论年

酬裴相公见寄二絶

习静心方泰劳生事渐稀可怜安稳地舍此欲何归一双垂翅鹤数首解嘲文揔是迂闲物争堪伴相君

答梦得闻蝉见寄

开缄思浩然独咏晚风前人貌非前日蝉声似去年槐花新雨後柳影欲秋天听罢无他计相思又一篇

令狐尚书许过弊居先赠长句

不矜轩冕爱林泉许到池头一醉眠已遣平治行药迳兼教扫拂钓鱼船应将笔砚随诗主定有笙歌伴酒仙祇候高情无别物苍苔石笋白花莲

自题

老宜官冷静贫赖俸优饶热月无堆案寒天不趁朝傍看应寂寞自觉甚逍遥徒对盈樽酒兼无愁可销

答崔十八

劳将白叟比黄公今古由来事不同我有商山君未见清泉白石在胷中

偶咏

御热蕉衣健扶羸竹杖轻诵经凭槛立散药遶廊行暝槿无风落秋虫欲雨鸣身闲当将息病亦有心情

答苏六

但喜暑随三伏去不如秋送二毛来更无别计相宽慰故遣阳关劝一盃

秋游

下马闲行伊水头凉风清景胜春游何事古今诗句里不多说着洛阳秋

偶作

张翰一杯酒荣期三乐歌聪明伤混沌烦恼污头陀簟冷秋生早堦闲日上多近来门更静无雀可张罗

游平泉赠晦叔

照水容虽老登山力未衰欲眠先命酒暂歇亦吟诗且喜身无缚终慙鬓有丝回头语闲伴闲校十年迟

不出门

不出门来又数旬将何销日与谁亲鹤笼开处见君子书卷展时逢古人自静其心延壽命无求於物长精神能行便是真修道何必降魔调伏身

叹鹤病

右翅低垂左胫伤可怜风貌甚昂藏亦知白日青天好未要高飞且养疮

临都驿送崔十八

勿言临都五六里扶病出城相送来莫道长安一步地马头西去几时回与君後会知何处为我今朝尽一杯

对镜

三分鬓髮二分丝晓镜秋容相对时去作忙官应太老退为闲叟未全迟静中得味何须道稳处安身更莫疑若使至今黄绮在闻吾此语亦分司

劝酒十四首【并序】

予分秩东都居多暇日闲来辄饮醉後辄吟苦无词章不成謡咏每发一意则成一篇凡十四篇皆主於酒聊以自劝故以何处难忘酒不如来饮酒命篇

何处难忘酒七首

何处难忘酒长安喜气新初登高第後乍作好官人省壁明张榜朝衣稳称身此时无一盏争奈帝城春何处难忘酒天涯话旧情青云俱不达白髮遞相惊二十年前别三千里外行此时无一盏何以叙平生何处难忘酒朱门美少年春分花发後寒食月明前小院回罗绮深房理管弦此时无一盏争过艳阳天何处难忘酒霜庭老病翁闇声啼蟋蟀乾叶落梧桐鬢为愁先白顔因醉暂红此时无一盏何计奈秋风何处难忘酒军功第一高还乡随露布半路授旌旄玉柱剥葱手金章烂椹袍此时无一盏何以骋雄豪何处难忘酒青门送别多敛襟收涕泪簇马听笙歌烟树灞陵岸风尘长乐坡此时无一盏争奈去留何何处难忘酒逐臣归故园赦书逢驿骑贺客出都门半面瘴烟色满衫乡泪痕此时无一盏何物可招魂

不如来饮酒七首

莫隐深山去君应到自嫌齿伤朝水冷貌苦夜霜严渔去风生浦樵归雪满岩不如来饮酒相对醉厌厌莫作农夫去君应见自愁迎春犁瘦地趁晚餒羸牛数被官加税稀逢岁有秋不如来饮酒相伴醉悠悠莫作商人去恓惶君未谙雪霜行塞北风水宿江南藏镪百千万沉舟十二三不如来饮酒仰面醉酣酣莫事长征去辛勤难具论何曾画麟阁祇是老辕门虬虱衣中物刀枪面上痕不如来饮酒合眼醉昏昏莫学长生去仙方悞杀君那将薤上露拟待鹤边云矻矻皆烧药累累尽作坟不如来饮酒闲坐醉醺醺莫上青云去青云足爱憎自贤夸智慧相糾鬪功能鱼烂缘吞饵蛾燹为扑灯不如来饮酒任性醉腾腾莫入红尘去令人心力劳相争两蜗角所得一牛毛且灭嗔中火休磨笑里刀不如来饮酒稳卧醉陶陶

和令狐相公寄刘郎中兼见示长句

日月天衢仰面看尚淹池凤滞台鸾碧幢千里空移镇赤笔三年未转官别後纵吟终少兴病来虽饮不多欢酒军诗敌如相遇临老犹能一据鞍

即事

见月连宵坐闻风尽日眠室香罗药气笼煖焙茶烟鹤啄新晴地鸡栖薄暮天自看淘酒米倚杖小池前

期宿客不至

风飘雨洒帘帷故竹映松遮灯火深宿客不来嫌冷落一樽酒对一张琴

问移竹

问君移竹意如何慎勿排行但间窠多种少栽皆有意大都少校不如多

重阳席上赋白菊

满园花菊郁金黄中有孤丛色似霜还似今朝歌酒席白头翁入少年场

偶吟二首

眼下有衣兼有食心中无喜亦无忧正如身後有何事应向人问无所求静念道经深闭目闲迎禅客小低头犹残少许云泉兴一岁龙门数度游

晴教晒药泥茶竈闲看科松洗竹林活计纵贫长净洁池亭虽小颇幽深厨香炊黍调和酒牕暖安弦拂拭琴老去生涯祇如此更无余事可劳心

何处春先到

何处春先到桥东水北头冻花开未得冷酒着难醒就日移轻榻遮风展小屏不劳人劝醉鸂鶒语渐丁宁

勉闲游

天时人事常多故一岁春能几处游不是尘埃便风雨若非疾病即悲愁贫穷心苦多无兴富贵身忙不自由唯有分司官恰好闲游虽老未能休

寄两银榼与裴侍郎因题二绝

贫无好物堪为信双榼虽轻意不轻愿奉谢公池上酌丹心绿酒一时倾

惯和麴蘖堪盛否重用盐梅试洗看小器不知容几许襄阳米贱酒升宽【银匠洗银多以盐花梅浆也】

小桥柳

细水涓涓似泪流日西惆怅小桥头衰杨叶尽空枝在犹被霜风吹不休

哭微之二首

八月凉风吹白幕寝门廊下哭微之妻孥朋友来相吊唯道皇天无所知

文章卓犖生无敌风骨英灵歿有神哭送咸阳北原上可能随例作灰尘

马上晚吟

人少街荒已寂寥风多尘起重萧条上阳落叶飘宫树中渡流澌拥渭桥出早冒寒衣校薄归迟侵黑酒全消如今不是闲行日日短天陰坊曲遥

醉中重留梦得

刘郎刘郎莫先起苏台苏台隔云水酒盞来从一百分马头去便三千里

雪夜喜李郎中见访兼酬所赠

可怜今夜鹅毛雪引得高情鹤氅人红蜡烛前明似昼青氊帐里暖如春十分满盞黄金液一尺中庭白玉尘对此欲留君便宿诗情酒分合相亲

任老

不愁陌上春光尽亦任庭前日影斜面黑眼昏头雪白老应无可更增加

劝欢

火急欢娱慎勿迟眼看老病悔难追樽前花下歌筵里会有求来不得时

答王尚书问履道池旧桥

虹梁鴈齿随年换素板朱栏逐日修但恨尚书能久别莫忘州守不频游重移旧柱开中眼乱种新花拥两头李郭小船何足问待君乘过济川舟

晚归府

晚从履道来归府街路虽长尹不嫌马上凉於牀上坐綠槐风透紫蕉衫

从龙潭寺至少林寺题赠同游者

山屐田衣六七贤
攀芳蹋翠弄潺湲
九龙潭月落杯酒三品松风飘管弦
强健且宜游胜地清凉不觉过炎天
始知驾鹤乘云外别有逍遥地上仙

夜从法王寺下归岳寺

双刹夹虚空
緑云一径通
似从忉利下如过剑门中
灯光初合笙歌曲未终
可怜师子座昇出净名翁

宿龙潭寺

夜上九潭谁是伴
云随飞盖月随盃
明年尚作三川守此地兼将歌舞来

嵩阳观夜奏霓裳

开元遗曲自凄凉
况近秋天调是商
爱者谁人唯白尹奏时何处是嵩阳
迴临山月声弥怨散入松风韵更长
子晋少姨闻定怪人闲亦便有霓裳

过元家履信宅

鸡犬丧家分散後
林园失主寂寥时
落花不语空辞树流水无情自入池
风荡欃【伊甸切】船初破漏雨淋歌阁
欲倾欹前庭後院伤心事唯是春风秋月知

和杜録事题红叶

寒山十月旦霜叶一时新
似烧非因火如花不待春
连行排綵帟乱落剪红巾
解驻篮輦看风前唯两人
题崔常侍济上别墅【时常侍以长告罢归今故先报泉石】

求荣争宠任纷纷
脱弃金貂祗有君
散员疎去未为贵小邑陶休何足云
山色好当晴後见泉声宜向醉中闻
主人忆尔尔知否抛却青云归白云

过温尚书旧庄

白石青泉抛济口
碧幢红旆照河阳
村人都不知时事犹自呼为处士庄

天坛峯下赠杜録事

年顔气力渐衰残
王屋中峯欲上难
顶上将探小有洞【小有洞在天坛顶上】
喉中须咽大还丹【时杜方炼伏火砂次】
河车九转宜精鍊火候三年在好看他日药成分一粒与君先去扫天坛

贈僧五首

鉢塔院如大師【師年八十三登壇秉律凡六十年每歲於師處授几關戒者九度】

百千萬劫菩提種八十三年功德林若不秉持僧行苦將何報答佛恩深慈悲不瞬諸天眼清淨無塵几地心每歲入關蒙九授殷懃一戒重千金

神照上人【照以說壇為佛事】

心如定水隨形應口似懸河逐病治曾向衆中先禮拜西方去日莫相遺

自遠禪師【遠以無事為佛事】

自出家來長自在緣身一衲一繩牀令人見即心無事每一相逢是道場

宗實上人【實即樊司空之子舍官位妻子出家】

榮華恩愛棄成唾戒定真如和作香今古雖殊同一法瞿曇拋却轉輪王

清閑上人【自蜀入洛於長壽寺說法度人】

梓潼眷屬何年別長壽壇場近日開應是蜀人皆度了法輪移向洛中來

彈秋思

信意閑彈秋思時調清聲直韻疎遲近來漸喜無人聽琴格高低心自知

自詠

隨宜飲食聊充腹取次衣裘亦煖身未必得年非瘦薄無妨長福是單貧老龜豈羨犧牲飽蟠木寧爭桃李春隨分自安心自斷是非何用問閑人

分司初到洛中偶題六韻兼戲呈馮尹

相府念多病春宮容不才官銜依口得俸祿逐身來白首林園在紅塵車馬回招呼新客旅掃掠舊池台小舫宜携樂新荷好盃盃不知金谷主早晚賀筵開

春風

春风先发苑中梅，樱杏桃梨次第开。
荠花榆荚深村里，亦道春风为我来。

白氏长庆集卷二十七

卷二十八

钦定四库全书

白氏长庆集卷二十八

唐白居易撰

律诗【五言七言凡一百首】

洛阳春

洛阳陌上春长在昔别今来二十年唯觅少年心不得其余万事尽依然

恨去年

老去犹耽酒春来不着家去年来校晚不见洛阳花

早出晚归

早起或因携酒出晚归多是看花回若抛风景长闲坐自问东京作底来

魏王堤

花寒懒发鸟慵啼信马闲行到日西何处未春先有思柳条无力魏王堤

尝黄醅新耐忆微之

世间好物黄醅酒天下闲人白侍郎爱向卯时谋洽乐亦曾酉日放麤狂醉来枕麴贫如富【诗云一醉日富】身後堆金有若亡元九计程殊未到瓮头一盏共谁尝

劝行乐

少年信美何曾久春到虽迟不再逢劝笑胜愁歌胜哭请君莫道等头空

老慵

岂是交亲向我疎老慵自爱闭门居近来渐喜知闻断免恼嵇康索报书

酬别微之【临都驿醉後作】

泮头峡口钱塘岸三别都经二十年且喜筋骸俱健在勿嫌须鬓各皤然君归北阙朝天帝我住东京作地仙博望自来非弃置承明重入莫拘牵醉收盃杓停灯语寒展衾裯对枕眠犹被分司官系绊送君不得过甘泉予与微之老而无子发於言叹着在诗篇今年冬各有一子戏作二什一以相贺一以自嘲

常忧到老都无子何况新生又是儿陰德自然宜有庆【于公陰德其後蕃昌】皇天可得道无知【皇天无知伯道无儿】一园水竹今为主【微之履信新居多水竹也】百卷文章更付谁【微之文集凡一百卷】莫虑鵷雏无浴处即应重入凤凰池

五十八翁方有後静思堪喜亦堪嗟一珠甚少还慙蚌八子虽多不羨鸦秋月晚生丹桂实春风新长紫兰芽持盃祝愿无他语慎勿愚顽似汝爷

自问

年来私自问何故不归京佩玉腰无力看花眼不明老慵难发遣春病易滋生赖有弹琴女时时听一声

晚桃花

一树红桃亚【低也】拂池竹遮松?晚开时非因斜日无由见不是闲人岂得知寒地生材遗校易贫家养女嫁常迟春深欲落谁怜惜白侍郎来折一枝

夜调琴忆崔少卿

今夜调琴忽有情欲弹惆怅忆崔卿何人解爱中徽上秋思头边八九声

阿崔

谢病卧东都羸然一老夫孤单同伯道迟暮过商瞿岂料鬓成雪方看掌弄珠已衰宁望有虽晚亦胜无兰入前春梦桑悬昨日弧里闾多庆贺亲戚共欢娱赋荆新胎髮香綳小绣襦玉芽开手爪酥颧点肌肤弓冶将传汝琴书勿坠吾未能知壽夭何暇虑贤愚乳气初离殼啼声渐变雏何时能反哺供养白头乌

赠邻里往还

问予何故独安然免被饥寒婚嫁牵骨肉都卢无十口粮储依约有三年但能抖擞人间事便是逍遥地上仙唯恐往还相厌贱南家饮酒北家眠

王子晋庙

子晋庙前山月明人闻往往夜吹笙鸾吟凤唱听无拍多似霓裳散序声

晚起

起晚怜春暖归迟爱月明放慵长饱睡闻健且间行北阙停朝簿西方入社名唯吟一句偈无念是无生

酬皇甫宾客

玄晏家风黄绮身深居高卧养精神性慵无病常称病心足虽贫不道贫竹院君闲销永日花亭我醉送残春自嫌诗酒犹多兴若比先生是俗人

池上赠韦山人

新竹夹平流新荷拂小舟衆皆嫌好拙谁肯伴闲游客为忙多去僧因饭暂留独怜韦处士尽日共悠悠

无梦

老眼花前?春衣雨後寒旧诗多忘却新酒且尝看拙定於身稳慵应趣伴难渐销名利想无梦到长安

对小潭寄远上人

小潭澄见底闲客坐开襟借问不流水何如无念心彼惟清且浅此乃寂而深是义谁能答明朝问道林

闲吟二首

留司老宾客春尽兴如何官寺行香少僧房寄宿多闲倾一盏酒醉听两声歌忆得陶潜语羲皇无以过闲游来早晚已得一周年嵩洛供云水朝廷乞俸钱长譔时独酌饱食後安眠闻道山榴发明朝向玉泉

独游玉泉寺【三月三十日】

云树玉泉寺肩舁【云俱切】半日程更无人作伴祇共酒同行新叶千万影残鷺三两声闲游竟未足春尽有余情

晚出寻人不遇

篮輦不乘乘晚凉相寻不遇亦无妨轻衣稳马槐陰下自要闲行一两坊

苦热

头痛汗盈巾连宵复达晨不堪逢苦热犹赖是闲人朝客应烦倦农夫更苦辛始慙当此日得作自由身

销暑

何以销烦暑端居一院中眼前无长物窗下有清风热散由心静凉生为室空此时身自得难更与人同

行香归

出作行香客归如坐夏僧牀前双草屨檐下一纱灯佩委腰无力冠欹髮不胜鸾台龙尾道合尽少年登同王十七庶子李六员外郑二侍御同年四人游龙门有感而作

一曲悲歌酒一樽同年零落几人存世如阅水应堪叹名似浮云岂足论各从禄仕休明代共感平生知己恩今日与君重上处龙门不是旧龙门

池上小宴问程秀才

洛下园林好自知江南景物闇相随净淘红粒罽【乌感切】香饭薄切紫鳞烹水葵雨滴篷声青雀舫浪摇花影白莲池停盃一问苏州客何似吴松江上时

桥亭卯饮

卯时偶饮斋时卧林下高桥桥上亭松影过窗眠始觉竹风吹面醉初醒就荷叶上包鱼鮓当石渠中浸酒瓶生计悠悠身兀兀甘从妻唤作刘伶

舟中夜坐

潭边霁後多清景桥下凉来足好风秋鹤一双?一只夜深相伴月明中

戏和微之答竇七行军之作【依本韵】

旌钺从囊鞬宾僚礼数全夔龙来要地鵷鹭下辽天赭汗骑骄马青蛾舞醉仙合成江上作散
到洛中传陋巷能无酒贫池亦有船春装秋未寄谩道有闲钱

闲忙

奔走朝行内栖迟林墅间多因病後退少及健时还斑白霜侵鬓苍黄日下山闲忙俱过日忙
校不如闲

西风

西风来几日一叶已先飞新霁乘轻屐初凉换熟衣浅渠销慢水疎竹漏斜晖薄暮青苔巷家
僮引鹤归

题西亭

多见朱门富贵人林园未毕即无身我今幸作西亭主已见池塘五度春

观游鱼

遶池闲步看鱼游正值儿童弄钓舟一种爱鱼心各异我来施食尔垂钩

看采莲

小桃闲上小莲船半采红莲半白莲不似江南恶风浪芙蓉池在卧牀前

看采菱

菱池如镜净无波白点花稀青角多时唱一声新水调谩人道是采菱歌

夭老

早世身如风里烛暮年髮似镜中丝谁人断得人间事少夭堪伤老又悲

秋池

洗浪清风透水霜水边闲坐一绳牀眼尘心垢见皆尽不是秋池是道场

登天宫阁

午时乘兴出薄暮未能还
高上烟中阁平看雪後山
委形羣动里任性一生闲
洛下多闲客其中我最闲

新雪二首【寄杨舍人】

不思北省烟霄地不忆南宫风月天
唯忆静恭杨阁老小园新雪煖炉前

不思朱雀街东鼓不忆青龙寺後钟
唯忆夜深新雪後新昌台上七株松

日高卧

怕寒放懒日高卧临老谁言牵率身
夹幕绕房深似洞重裯衬枕暖於春
小青衣动桃根起嫩緑醅【铺杯切】
浮竹叶新未裹头前倾一盏何如冲雪趣朝人

和微之任校书郎日过三乡

三乡过日君年几今日君年五十余
不独年催身亦变校书郎变作尚书

和微之十七与君别及胧月花枝之咏

别时十七今头白恼乱君心三十年
垂老休吟花月句恐君更结後身缘

和微之叹槿花

朝荣殊可惜暮落实堪嗟
若向花中比犹应胜眼花

思往喜今

忆除司马向江州及此凡经十五秋
虽在簪裾从俗累半寻山水是闲游
谪居终带乡关思领郡犹分邦国忧
争似如今作宾客都无一念到心头

题平泉薛家雪堆庄

怪石千年应自结灵泉一带是谁开
蹙为宛转青蛇项喷作玲珑白雪堆
赤日旱天长看雨玄陰腊月亦闻雷
所嗟地去都门远不得肩舁【云俱切】
每日来

和微之道保生三日

相看鬓似丝始作弄璋诗且有承家望谁论得力时莫兴三日叹犹胜七年迟【子老微之七岁】我未能忘喜君应不合悲嘉名称道保乞姓号崔儿但恐持相并兼葭琼树枝

哭皇甫七郎中【湜】

志业过玄晏词华似禰衡多材非福禄薄命是聪明不得人间寿还留身後名涉江文一首便可敌公卿【持正奇文甚多涉江一章尤着】

晚起

烂漫朝眠後频伸晚起时煖炉生火早寒镜裹头迟融雪煎香茗调酥煮乳糜慵懒还自晒快活亦谁知酒性温无毒琴声淡不悲荣公三乐外仍弄小男儿

疑梦二首

莫惊宠辱虚忧喜莫计恩讐浪苦辛黄帝孔丘无处问安知不是梦中身

鹿疑郑相终难辨蝶化庄生讵可知假使如今不是梦能长於梦几多时

夜宴惜别

笙歌旖旎曲终头转作离声满坐愁筝怨朱弦从此断烛啼红泪为谁流夜长似岁欢宜尽醉未如泥饮莫休何况鸡鸣即须别门前风雨冷修修

归来二周岁

归来二周岁二岁似须臾池藕重生叶林鸦再引雏时丰实仓廩春暖葺庖厨更作三年计三年身健无

吾土

身心安处为吾土岂限长安与洛阳水竹花前谋活计琴诗酒里到家乡荣先生老何妨乐楚接舆歌未必狂不用将金买庄宅城东无主是春光

题岐王旧山池石壁

树深藤老竹回环石壁重重锦翠斑俗客看来犹解爱忙人到此亦须闲况当霁景凉风後如在千岩万壑间黄绮更归何处去洛阳城内有商山

病眼花

头风目眩乘衰老祇有增加岂有瘳【传云有加而无瘳】花发眼中犹足怪柳生肘上亦须休大窠罗绮看才辨小字文书见便愁必若不能分黑白却应无悔复无尤

早饮醉中除河南尹敕到

雪拥衡门水满池温炉卯後煖寒时緑醕新酎尝初醉黄纸除书到不知厚俸自来诚忝滥老身欲起尚迟疑应须了却丘中计女嫁男?三迳资

除夜

病眼少眠非守岁老心多感又临春火销灯尽天明後便是平头六十人

府西池

柳无气力枝先动池有波纹水尽开今日不知谁计会春风春水一时来

天津桥

津桥东北斗亭西到此令人诗思迷眉月晚生神女浦脸波春傍窈娘堤柳丝嫋嫋风燥出草缕茸茸雨剪齐报道前驱少呼喝恐惊黄鸟不成啼

不准拟二首

篮輦腾腾一老夫褐裘乌帽白髭须早衰饶病多蔬食筋力消磨合有无不准拟身年六十上山仍未要人扶

又

忆昔谪居炎瘴地巴猿引哭虎随行多於贾谊长沙苦【予自左迁江峡凡经七年】小校潘安白髮生不准拟身年六十游春犹自有心情

府中夜赏

樱桃厅院春偏好石井栏堂夜更幽白粉墙头花半出绯纱烛下水平流闲留宾客尝新酒醉领笙歌上小舟舞袖颺?棹容与忽疑身是梦中游

府西池北新葺水斋即事招宾偶题十六韵

缭绕府西面潺湲池北头凿开明月峡决破白苹洲清浅漪澜急寅缘浦屿幽直冲行径断平入卧斋流石叠青棱玉波翻白片鸥喷时千点雨澄处一泓油絶境应难别同心岂易求少逢人爱翫多是我淹留夹岸铺长簟当轩泊小舟枕前看鹤浴牀下见鱼游洞户斜开扇疎帘半上钩紫浮萍泛泛碧亚竹修修读罢书仍展暮终局未收午茶能散睡卯酒善消愁檐雨晚初霁窗风凉欲休谁能伴老尹时复一闲游

哭崔儿

掌珠一颗儿三岁鬓雪千茎父六旬岂料汝先为异物常忧吾不见成人悲肠自断非因剑啼眼加昏不是尘怀抱又空天默默依前重作邓攸身

初丧崔儿报微之晦叔

书报微之晦叔知欲题崔字泪先垂世间此恨偏敦我【敦音堆见诗句】天下何人不哭儿蝉老悲鸣抛蛻後龙眠惊觉失珠时文章千帙官三品身後传谁庇廕谁

府斋感怀酬梦得【时初丧崔儿梦得以诗相安云从此期君比琼树一枝吹折一枝生故有此落句以报之】

府伶呼唤争先到家醞提携动辄随合是人生开眼日自当年老敛眉时丹砂链作三铢土玄髮看成一把丝劳寄新诗远安慰不闻枯树更生枝

斋居

香火多相对荤腥久不尝黄蓍数匙粥赤箭一瓯汤厚俸将何用闲居不可忘明年官满後拟买雪堆庄

与诸道者同游二室至九龙潭作

喜逢二室游仙子厌作三川守土臣举手摩挲潭上石开襟抖擞府中尘他日终为独往客今朝未是自由身若言尹是嵩山主三十六峯应笑人

履道池上作

家池动作经旬别松竹琴鱼好在无树暗小桥藏巧妇渠荒新叶长慈姑不因车马时时到岂觉林园日日芜犹喜春深公事少每来花下得踟蹰

六十拜河南尹

六十河南尹前途足可知老应无处避病不与人期幸遇芳菲日犹当强健时万金何假藉一盞莫推辞流水光陰急浮云富贵迟人间若无酒尽合鬢成丝

重修府西水亭院

因下疏为沼随高筑作台龙门分水入金谷取花栽遶岸行初匝凭轩立未回园西有池位留与後人开

与诸公同出城观稼

老尹醉醺醺来随年少羣不忧头似雪但喜稼如云岁望千箱积秋怜五谷分何人知帝力尧舜正为君

水堂醉卧问杜三十一

问君洛下住多年何处春流最可怜为问魏王堤岸下何如同德寺门前无妨水色堪间翫不得泉声伴醉眠那似此堂帘幕底连明连夜碧潺湲

岁暮言怀

职与才相背心将口自言磨铅教切玉驱鹤遣乘轩只合居岩窟何因入府门年终若无替转恐负君恩

座中戏呈诸少年

衰容禁得无多酒秋鬢新添几许霜纵有风情应淡薄假如老健莫夸张兴来吟咏从成癖饮後酣歌少放狂不为倚官兼挟势因何入得少年场

雪後早过天津桥偶呈诸客

官桥晴雪晓峩峩老尹行吟独一过紫绶相辉应不恶白须同色复如何悠扬短景凋年急牢落衰情感事多犹赖洛中饶醉客时时?我唤笙歌

新制绫袄成感而有咏

水波纹袄造新成绫软絺匀温复轻晨兴好拥向阳坐晚出宜披蹋雪行鹤氅毳疎无实事木棉花冷得虚名宴安往往欢侵夜卧稳昏昏睡到明百姓多寒无可救一身独暖亦何情心中为念农桑苦耳里时闻饥冻声争得大裘长万丈与君都盖洛阳城

早春雪後贈洛陽李長官長水鄭明府二同年

獻歲晴和風景新
銅駝街郭暖無塵
府亭共賀三川雪
縣道分行百里春
朱紱洛陽官位屈
青袍長水俸錢貧
有何功德紆金紫
若比同年是幸人

醉吟

醉來忘渴復忘飢
冠帶形骸杳若遺
耳底齋鐘初過後
心頭卯酒未消時
臨風朗詠從人聽
看雪閑行任馬遲
應被衆疑公事慢
承前府尹不吟詩

府酒五絕

變法

自慙到府來
周歲惠愛威棱
一事無唯是改張
官酒法漸從濁水
作醞醕

招客

日午微風且暮寒
春風冷峭雪乾殘
碧氍毹下紅爐畔
試為來嘗一盞看

辨味

甘露太甜非正味
醴泉雖潔不芳馨
盃中此物何人別
柔旨之中有典刑

自勸

憶昔羈貧應舉年
脫衣典酒曲江邊
十千一斗猶賒飲
何況官供不著錢

諭妓

燭淚夜粘桃葉袖
酒痕春污石榴裙
莫辭辛苦供歡宴
老後思量悔煞君

晚歸早出

筋力年年減
風光日日新
退衙歸逼夜
拜表出侵晨
何處台無月
誰家池不春
莫言無勝地
自是少聞人
坐厭推囚案
行嫌引馬塵
几時辭府印
却作自由身

南龍興寺殘雪

南龙兴寺春晴後缓步徐吟遶四廊老趣风花应不称闲寻松雪正相当吏人引从多乘輦宾客逢迎少下堂不拟人间更求事些些疎懒亦何妨

天宫阁早春

天宫高阁上何频每上令人耳目新前日晚登缘看雪今朝晴望为迎春林鶯何处吟箏柱墙柳谁家晒麴尘可惜三川虚作主风光不属白头人

履道居三首

莫嫌地窄林亭小莫厌家贫活计微大有高门鑲寬宅主人到老不曾归

东里素帷犹未彻南隣丹旆又新悬衡门蜗舍自惭愧收得身来已五年

世事平分衆所知何尝苦乐不相随唯余耽酒狂歌客只有乐时无苦时

和梦得冬日晨兴

漏传初五点鸡报第三声帐下从容起窗间矚聰【呼骨切】明照书灯未灭煖酒火重生理曲弦歌动先闻唱渭城

雪夜对酒招客

帐小青氊暖盃香缘蚁新醉怜今夜月欢忆去年人闇落灯花烬闲生草座尘殷懃报弦管明日有嘉宾

赠晦叔忆梦得

自别崔公四五秋因何临老转风流归来不说秦中事歇定唯谋洛下游酒面浮花应是喜歌眉敛黛不关愁得君更有无厌意犹恨樽前欠老刘

醉後重赠晦叔

老伴知君少欢情向我偏无论疎与数相见辄欣然各以诗成癖俱因酒得仙笑回青眼语醉并白头眠岂是今投分多疑宿结缘人间更何事携手送衰年

睡觉

星河耿耿漏絲絲月闇灯微欲曙天转枕频伸书帐下披裘箕踞火炉前老眠早觉常残夜病

力先衰不待年五欲已销诸念息世间无境可勾牵

白氏长庆集卷二十八

卷二十九

<集部,别集类,汉至五代,白氏长庆集>

钦定四库全书

白氏长庆集卷二十九

唐白居易撰

律诗【凡四十七首】

咏兴五首【并序】

七年四月予罢河南府归履道第庐舍自给衣储自充无欲无营或歌或舞颓然自适盖河洛间一幸人也遇兴发咏偶成五章各以首句命为题目

解印出公府

解印出公府抖擞尘土衣百吏放尔散双鹤随我归归来履道宅下马入柴扉马嘶返旧?鹤舞还故池鸡犬何忻忻隣里亦依依年顔老去日生计胜前时有帛御冬寒有谷防岁饥饱於东方朔乐於荣启期人生且如此此外吾不知

出府归吾庐

出府归吾庐静然安且逸更无客干谒时有僧问疾家僮十余人?马三四匹慵发经旬卧兴来连日出出游爱何处嵩碧伊瑟瑟况有清和天正当疎散日身闲自为贵何必居荣秩心足即非贫岂唯金满室吾观权势者苦以身徇物炙手外炎炎履水中栗栗朝饥口忘味夕惕心忧失但有富贵名而无富贵实

池上有小舟

池上有小舟舟中有胡牀牀前有新酒独酌还独尝熏若春日气皎如秋水光可洗机巧心可荡尘垢肠岸曲舟行迟一曲进一觴未知几曲醉醉入无何乡寅缘潭岛间水竹深青苍身闲心无事白日为我长我若未忘世虽闲心亦忙世若未忘我虽退身难藏我今异於是身世交相忘

四月池水满

四月池水满龟游鱼跃出吾亦爱吾池池边开一室人鱼虽异族其乐归於一旦与尔为徒道
遥同过日尔无羡沧海蒲藻可委质吾亦忘青云衡茅足容膝况吾与尔辈本非蛟龙匹假如
云雨来祗是池中物

小庭亦有月

小庭亦有月小院亦有花可怜好风景不解嫌贫家菱角执笙簧谷儿抹琵琶红绡信手舞紫
绡随意歌【菱谷紫红皆小臧获名也】村歌与社舞客哂主人夸但问乐不乐岂在钟鼓多
客告暮将归主称日未斜请客稍深酌愿见朱颜酡客知主意厚分数随後加堂上烛未秉座
中冠已峨左顾短红袖右命小青娥长跪谢贵客蓬门劳见过客散有余兴醉卧独吟哦幕天
而席地谁奈刘伶何

秋凉间卧

残暑昼犹长早凉秋尚嫩露荷散清香风竹含疎韵幽闲竟日卧衰病无人问薄暮宅门前槐
花深一寸

酬思黯相公见过弊居戏赠

轩盖光照地行人为徘徊呼传君子出乃是故人来访我入穷巷引君登小台台前多竹树池
上无尘埃贫家何所有新酒两三盃欸曲语上马从容复迟回留守不外宿日斜宫漏催但留
金刀赠未接玉山颓家醪不敢惜待君来即开村妓不辞出恐君鞭【丑忍切大笑也】然哈
【呼来切】

再授宾客分司

优稳四皓官清崇三品列伊予再尘忝内愧非才哲俸钱七八万给受无虚月分命在东司又
不劳朝谒既资间养疾亦赖慵藏拙宾友得从容琴觴恣怡悦乘篮城中去系马花前歇六游
金谷春五看龙门雪吾若默无语安知吾快活吾欲更尽言复恐人豪夺应为时所笑古惜分
司阙但问适意无岂论官冷热

把酒

把酒仰问天古今谁不死所贵未死间少忧多欢喜穷通谅在天忧喜即由已是故达道人去
彼而取此勿言未富贵久忝居禄仕借问宗族间几人拖金紫勿忧渐衰老且喜加年纪试数
班行中几人及暮齿朝飧不过饱五鼎徒为尔夕寝止求安一衾而已矣此外皆长物於我云
相似有子不留金何况兼无子

首夏

林静蚊未生池静蛙未鸣景长天气好竟日和且清春禽余哢在夏木新陰成兀尔水边坐翛然桥上行自问一何适身闲官不轻料钱随月用生计逐日营食饱慙伯夷酒足愧渊明【陶潜诗云饮酒常不足】壽倍顏氏子富百黔娄生有一即为乐况吾四者并所以私自慰虽老有心情

代鹤

我本海上鹤偶逢江南客感君一顾恩同来洛阳陌洛阳寡族类皎皎唯两翼貌是天与高色非日浴白主人诚可恋其奈轩庭窄饮啄杂鸡羣年深损标格故乡渺何处云水重重隔谁念深笼中七换摩天翮

立秋夕有怀梦得

露簟荻竹青风扇蒲葵轻一与故人别再见新蝉鸣是夕凉飈起闲境入幽情回灯见栖鹤隔竹闻吹笙夜茶一两杓秋吟三数声所思渺千里云水长洲城

哭崔常侍晦叔

顽贱一拳石精珍百链金名价既相远交分何其深中诚一以合外物不能侵逖迤二十年间与世同浮沉晚有退闲约白首归云林垂老忽相失悲哉口语心春日嵩高阳秋夜清洛陰丘园共谁卜山水共谁寻风月共谁赏诗篇共谁吟花开共谁看酒熟共谁斟惠死庄杜口锤殛师废琴道理使之然从古非独今吾道自此孤我情安可任唯将病眼泪一洒秋风襟

新秋晓兴

浊暑忽已退清宵未全长晨缸耿残焰宿阁凝微香喔喔鸡下树辉辉日上梁枕低茵席软卧稳身入牀睡足景犹早起初风乍凉展张小屏障收拾生衣裳还有惆怅事迟迟未能忘拂镜梳白髮可怜冰照霜

秋日与张宾客舒著作同游龙门醉中狂歌凡二百三十八字

秋天高高秋光清秋风嫋嫋秋虫鸣嵩峯余霞锦绮卷伊水细浪鳞甲生洛阳闲客知无数少出游山多在城商岭老人自追逐蓬丘逸士相逢迎南出鼎门十八里庄店迢迢桥道平不寒不热好时节鞍马稳快衣衫轻并辔踟蹰下西岸扣舷容与遶中汀开怀旷达无所系触目胜絶不可名荷衰欲黄荇犹绿鱼乐自跃鸥不惊翠藻蔓长孔雀尾彩船櫓急寒鴈声家醪一壶白玉液野花数把黄金英昼游四看西日暮夜话三及东方明暂停盃觴辍吟咏我有狂言君试听丈夫一生有二志兼济独善难得并不能救疗生民病即须先濯尘土纓况吾头白眼已

闇终日戚促何所成不如展眉开口笑龙门醉卧香山行

履信池樱桃岛上醉後走笔送别舒员外兼寄宗正李卿考功崔郎中

樱桃岛前春去春花万枝忽忆与宗卿闲饮日又忆与考功狂醉时岁晚无花空有叶风吹满地乾重叠蹋叶悲秋复忆春池边树下重殷勤今朝一酌临寒水此地三回别故人櫻桃花来春千万朵来春共谁花下坐不论崔李上青云明日舒三亦抛我

秋池独泛

萧疎秋竹篱清浅秋风池一只短舫艇一张斑鹿皮皮上有野叟手中持酒卮半酣箕踞坐自问身为谁严子垂钓日苏门长啸时悠然意自得意外何人知

冬日早起闲咏

水塘耀初旭风竹飘余霰幽境虽目前不因闲不见晨起对炉香道经寻两卷晚坐拂琴尘秋思弹一遍此外更无事开樽时自劝何必东风来一盃春上面

岁暮

惨澹岁云暮穷陰动经旬霜风裂人面冰雪摧车轮而我当是时独不知苦辛晨炊廩有米夕爨厨有薪夹帽长覆耳重裘寛裹身加之一盃酒煦妪如阳春洛城士与庶比屋多饥贫何处炉有火谁家甑无尘如我饱煖者百人无一人安得不惭愧放歌聊自陈

南池早春有怀

朝游北桥上晚憩南塘畔西日雪全消东风冰尽泮簌簌【申之切】鱼尾掉瞥瞥【匹灭切】鹅毛换泥暖草芽生沙虚泉脉散晴芳冒苔岛宿润侵蒲岸洛下日初长江南春欲半时光共抛擲人事堪嗟叹倚棹忽寻思去年池上伴

古意

脉脉复脉脉美人千里隔不见来几时瑶草三四碧玉琴声悄悄鸾镜尘冪冪昔为连理枝今作分飞翮寄书多不达加饭终无益心肠不自寛衣带何由窄

山游示小妓

双鬟垂未合三十才过半本是绮罗人今为山水伴春泉共辉弄好树同攀翫笑容花底迷酒思风前乱红凝舞袖急黛惨歌声缓莫唱杨柳枝无肠与君断

神照禅师同宿

八年三月晦山梨花满枝龙门水西寺夜与远公期晏坐自相对密语谁得知前後际断处一念不生时

张常侍相访

西亭晚寂寞鶯散柳陰繁水户帘不卷风牀席自翻忽闻车马客来访蓬蒿门况是张常侍安得不开樽

早夏游宴

虽慵兴犹在虽老心犹健昨日山水游今朝花酒宴山榴艳似火玉蘂飘如霰荣落逐瞬?炎凉随刻变未收木绵褥已动蒲葵扇且喜物与人年年得相见

感白莲花

白白芙蓉花本生吴江渚不与红者杂色类自区分谁移尔至此姑苏白使君初来苦顛顚久乃芳氛氲月月叶换叶年年根生根陈根与故叶销化成泥尘化者日已远来者日复新一为池中物永别江南春忽想西凉州中有天宝民埋没汉父祖孳生胡子孙已忘乡土恋岂念君亲恩生人尚复尔草木何足云

咏所乐

兽乐在山谷鱼乐在陂池虫乐在深草鸟乐在高枝所乐虽不同同归适其宜不以彼易此况论是与非而我何所乐所乐在分司分司有何乐乐哉人不知官优有禄料职散无羈縻懒与道相近钝将闲自随昨朝拜表回今晚行香归归来北窗下解巾脱尘衣冷泉灌我顶暖水濯四肢体中幸无疾卧任清风吹心中又无事坐任白日移或开书一篇或引酒一卮但得如今日终身无厌时

思旧

间日一思旧旧游如目前再思今何在零落归下泉退之服硫黄一病讫不痊微之链秋石未老身溘然杜子得丹诀终日断腥羶崔君夸药力经冬不衣绵或疾或暴夭悉不过中年唯予不服食老命反迟延况在少壮时亦为嗜欲牵但耽葷与血不识汞【胡孔切】与铅饥来吞热物渴来饮寒泉诗役五脏神酒汨三丹田随日合破坏至今粗完全齿牙未缺落肢体尚轻便已开第七秩饱食仍安眠且进盃中物其余皆付天

寄卢少卿

老海心不乱庄戒形太劳生命既能保死籍亦可逃嘉肴与旨酒信是腐腸膏艳声与丽色真为伐性刀补养在积功如裘集衆毛将欲致千里可得差一毫【心不乱形太劳至差一毫皆出老庄及诸道书仙方禁诫】顏回何为者簞瓢才自给肥醲不到口年不登三十张苍何为者染爱浩无际妾媵填後房竟壽百余岁苍壽有何德回天有何辜谁谓具圣体不如肥瓠躯遂使世俗心多疑仙道书寄问卢先生此理当何如

池上清晨候皇甫郎中

晓景丽未热晨飈鲜且凉池幽緑苹合霜洁白莲香深扫竹间迳静拂松下牀玉柄鹤翎扇银鬕云母浆屏除无俗物瞻望唯清光何人拟相访羸女从萧郎

咏怀

我知世无幻了无干世意世知我无堪亦无责我事由兹两相忘因得长自遂自遂意何如闲官在闲地闲地唯东都东都少名利闲官是宾客宾客无牵累嵇康日日懒毕卓时时醉酒肆夜深归僧房日高睡形安不劳苦神泰无忧畏从官三十年无如今气味鸿虽脱罗弋鹤尚居禄位唯此未忘怀有时犹内愧

北窗三友

今日北窗下自问何所为欣然得三友三友者为谁琴罢辄举酒酒罢辄吟诗三友通相引循环无已时一弹惬中心一咏畅四肢犹恐中有间以醉弥缝之岂独吾拙好古人多若斯嗜诗有渊明嗜琴有启期嗜酒有伯伦三人皆吾师或乏儋石储或穿带索衣弦歌复觴咏乐道知所归三师去已远高风不可追三友游甚熟无日不相随左掷白玉卮右拂黄金徽兴酣不叠纸走笔操狂词谁能持此词为我谢亲知纵未以为是岂以我为非

吟四虽【杂言】

酒酣後歌歇时请君添一酌听我吟四虽年虽老犹少於韦长史命虽薄犹胜於郑长水眼虽病犹明於徐郎中家虽贫犹富於郭庶子省躬审分何侥幸值酒逢歌且欢喜忘荣知足委天和亦应得尽生生理【分司同官中韦长史绩年七十余郭庶子求贫苦最甚徐郎中晦因疾丧明予为河南尹时见同年郑俞始受长水县令因叹四子而成此篇也】

裴侍中晋公以集贤林亭即事诗二十六韵见赠猥蒙徵和才拙词繁广为五百言以伸酬献

三江路千里五湖天一涯何如集贤地中有平津池池胜主见觉景新人未知竹森翠琅玕水深洞琉璃水竹以为质质立而文随文之者何人公来亲指麾疏凿出人意结构得地宜灵襟一搜索胜概无遁遗因下张沼沚依高筑阶基嵩峯见数片伊水分一支南溪修且直长波碧逶迤北馆壮复丽倒影红参差东岛号晨光泉曜迎朝曦西岭名夕阳香暖留落晖前有水心

亭动荡架涟漪後有开阖堂寒温变天时幽泉镜泓澄怪石山欹危春葩雪漠漠夏果朱离离
主人命方舟宛在水中坻亲宾次第至酒乐前後施解缆始登泛山游仍水嬉沿洄无滞碍向
背穷幽奇瞥过远桥下飘旋深涧陲管弦去缥缈罗绮来霏微棹风逐舞回梁尘随歌飞宴余
日云暮醉客未放归高声索彩牋大笑催金卮唱和笔走疾问答盃行迟一咏清两耳一酣畅
四肢主客忘贵贱不知俱是谁客有诗魔者吟哦不知疲乞公残纸墨一扫狂歌词维云社稷
臣赫赫文武姿十授丞相印五建大将旗四朝致勋华一身冠皐夔去年才七十决赴悬车期
公志不可夺君恩亦难希从容就中道俛僊来保厘貂蝉虽未脱鸾凰已不羁历徵今与古独
步无等夷陆贾功业少二疏官秩卑乘舟范蠡惧辟谷留侯饥岂若公今日身安家国肥羊祜
在汉南空留砚首碑柳恽在江南祇赋汀洲诗谢安入东山但说携蛾眉山简醉高阳唯闻倒
接?岂如公今日余力兼有之愿公壽如山安乐长在兹愿我比蒲稗永得相因依【谢灵运诗
云蒲稗相因依】

晚归香山寺因咏所怀

我年日已老我身日已闲闲出都门望但见水与山关塞碧岩岩伊流清潺潺中有古精舍轩
户无扃关岸草歇可藉迳萝行可攀朝随浮云出夕与飞鸟还吾道本迂拙世途多险艰尝闻
嵇吕辈尤悔生疎顽巢悟入箕颍皓知返商巔岂唯乐肥遁聊复祛忧患吾亦从此去终老伊
嵩间

张常侍池凉夜闲讌赠诸公

竹桥新月上水岸凉风至对月五六人管弦三两事留连池上酌欵曲城外意或啸或讴吟谁
知此间味回看市朝客矻矻趋名利朝忙少游宴夕困多眠睡清凉属吾徒相逢勿辞醉

和皇甫郎中秋晓同登天宫阁言怀六韵

碧天忽已高白日犹未短玲珑晓楼阁清脆秋丝管张翰一盃酣嵇康终日懒尘中足忧累云
外多疎散病木斧斤遗冥鸿羈縻断逍遥二三子永愿为闲伴

送吕漳州

今朝一盃酒言送漳州牧半自要闲游爱花怜草緑花前下鞍马草上携丝竹行客饮数盃主
人歌一曲端居惜风景屡出劳僮仆独醉似无名借君作题目

短歌行

世人求富贵多为身嗜欲盛衰不自由得失常相逐问君少年日苦学将干禄负笈尘中游抱
书雪前宿布衾不周体藜茹才充腹三十登宦途五十被朝服奴温已挟纊马肥初食粟未敢
议欢游尚为名检束耳目聒閤後堂上调丝竹牙齿缺落时盘中堆酒肉彼来此已去外余中

不足少壮与荣华相避如寒燠青云去地远白日终天速从古无奈何短歌听一曲

咏怀

高人乐丘园中人慕官职一事尚难成两途安可得遑遑干世者多苦时命塞亦有爱间人又为穷饿逼我今幸双遂禄仕兼游息未尝羨荣华不省劳心力妻孥与婢仆亦免愁衣食所以吾一家面无忧喜色

府西亭纳凉归

避暑府西亭晚归有闲思夏浅蝉未多綠槐陰满地带寬衫解领马稳人拢辔面上有凉风眼前无俗事路经府门过落日照官次牵连縲绁囚奔走尘埃吏低眉悄不语谁复知兹意忆得五年前晚衙时气味

老热

一饱百情足一酣万事休何人不衰老我老心无忧仕者拘职役农者劳田畴何人不苦热我热身自由卧风北窗下坐月南池头脑凉脱乌帽足热濯清流慵发昼高枕兴来夜泛舟何乃有余适祗缘无过求或问诸亲友乐天是与不亦无别言语多道天悠悠悠悠君不知此味深且幽但恐君知後亦来从我游

新秋喜凉因寄兵部杨侍郎

外强火未退中锐金方战一夕风雨来炎凉随数变徐徐炎景度稍稍凉飈扇枕簟忽凄清巾裳亦轻健老夫纳秋候心体殊安便睡足一屈伸搔首摩挲面褰帘对池竹幽寂如僧院俯观游鱼羣仰数浮云片闲忙各有趣彼此宁相见昨日间慕巢召对延英殿

懒放二首呈刘梦得吴方之

青衣报平旦呼我起盥栉今早天气寒郎君应不出又无宾客至何以销闲日已向微阳前暖酒开诗帙朝怜一牀日暮爱一炉火牀暖日高眠炉温夜深坐雀罗门懒出鹤髮头慵裹除却刘与吴何人来问我

六十六

病知心力减老觉光陰速五十八归来今年六十六鬢丝千万白池草八九綠童稚尽成人园林半乔木看山倚高户引水穿深竹虽有潺湲声至今聽未足

三适赠道友

褐绌袍厚暖卧盖行坐披紫氍履宽稳蹇步颇相宜足适已忘履身适已忘衣况我心又适兼忘是与非三适今为一怡怡复熙熙禅那不动处混沌未凿时此固不可说为君强言之

洛阳春赠刘李二宾客【齐梁格】

水南冠盖地城东桃李园雪消洛阳堰春入永通门淑景方霭霭游人稍喧喧年丰酒浆贱日晏歌吹繁中有老朝客华髮映朱轩从容三两人藉草开一樽樽前春可惜身外事勿论明日期何处杏花游赵村【洛城东有赵村杏花千余树】

寒食

人老何所乐乐在归乡国我归故园来九度逢寒食故园在何处池馆东城侧四隣梨花时二月伊水色岂独好风生仍多旧亲戚出去恣欢游归来聊燕息有官供禄俸无事劳心力但恐优稳多微躬销不得

和裴令公一日日一年年杂言见赠

一日日作老翁一年年过春风公心不以贵隔我我散唯将闲伴公我无才能忝高秩合是人间闲散物公有功德在生民何因得作自由身前日魏王潭上宴连夜今日午桥池头游拂晨山客砚前吟待月野人樽前醉送春不敢与公闲中争第一亦应占得第二第三人

白氏长庆集卷二十九

卷三十

钦定四库全书

白氏长庆集卷三十

唐白居易撰

格诗【凡四十七首】

题裴晋公女几山刻石诗後【并序】

裴侍中晋公出讨淮西时过女几山下刻石题诗末句云待平贼垒报天子莫指仙山示武夫果如所言克期平贼由是淮蔡迄今底宁殆二十年人安生业夫嗟叹不足则咏歌之故居易作诗二百言继题公之篇末欲使采诗者修史者後之往来观者知公之功德本末前後也

何处画功业何处题诗篇麒麟高阁上女几小山前尔後多少时四朝二十年贼骨化为土贼垒犁为田一从贼垒平陈蔡民晏然骡军成牛户【蔡寇号骡子军陈蔡闲农骁锐者人畜牛皆呼为牛户】鬼火变人?生子已嫁娶种桑亦丝绵皆云公之德欲报无由缘公今在何处守都镇三川旧宅留永乐新居开集贤公今在何官被衮珥貂蝉战袍破犹在髀肉生欲圆襟怀转潇洒气力弥精坚登山不拄杖上马能掉鞭利泽浸入地福降自昇天昔号天下将今称地上仙勿追赤松游勿拍洪崖肩商山有遗老可以奉周旋

洛阳有愚叟

洛阳有愚叟白黑无分别浪迹虽似狂谋身亦不拙点检盘中饭非精亦非粦【郎达切】点检身上衣无余亦无阙天时方得所不寒复不热体气正调和饥仍不渴闲将酒壶出醉向人家歇野食或烹鲜寓眠多拥褐抱琴荣啓乐荷锄刘伶达放眼看青山任头生白发不知天地内更得几年活从此到终身尽为闲日月

饱食闲坐

红粒陆浑稻白鳞伊水鲂庖童呼我食饭热鱼鲜香筋筋适我口匙匙充我肠八珍与五鼎无复心思量扪腹起盥漱下阶振衣裳遶亭行数匝却上檐下床箕踞拥裘坐半身向日阳可怜饱暖味谁肯来同尝是岁太和八兵销时渐康朝廷重经术草泽搜贤良尧舜求理切夔龙啓沃忙怀才抱智者无不走遑遑唯此不才叟顽慵恋洛阳饱食不出门闲坐不下堂子弟多寂寞僮仆少精光衣食虽充给神意不扬扬为尔谋则短为吾谋甚长

闲居自题

门前有流水墙上多高树竹迳遶荷池萦回百余步波闲戏鱼鼈风静下鸥鹭寂无城市喧渺
有江湖趣吾庐在其上偃卧朝复暮洛下安一居山中亦慵去时逢过客爱问是谁家住此是
白家翁闭门终老处

览镜喜老

今朝览明镜须鬓尽成丝行年六十四安得不衰羸亲属惜我老相顾兴叹咨而我独微笑此
意何人知笑罢仍命酒掩镜捋白髭尔辈且安坐从容听我词生若不足恋老亦何足悲生若
苟可恋老即生多时不老即须夭不夭即须衰晚衰胜早夭此理决不疑古人亦有言浮生七
十稀我今欠六岁多幸或庶几傥得及此限何美荣啓期当喜不当叹更倾酒一卮

风雪中所作

岁暮风动地夜寒雪连天老夫何处宿煖帐温罍前两重褐绮衾一领花丛蘊粥熟呼不起日
高安稳眠是时心与身了无闲事牵以此度风雪闲居来六年忽思远游客复想早朝士蹋冻
侵夜行凌寒未明起心为身君父身为心臣子不得身自由皆为心所使我心既知足我身自
安止方寸语形骸我应不负尔

对琴酒

西窗明且暖晚坐卷书帷琴匣拂开后酒瓶添满时角樽白螺盏玉轸黄金徽未及弹与酌相
对已依依泠泠秋泉韵贮在龙凤池油油春云心一杯可致之自古有琴酒得此味者稀祗应
康与籍及我三心知

雪中晏起偶咏所怀兼呈张常侍韦庶子皇甫郎中杂言

穷陰苍苍雪雰雰雪深没胫泥埋轮东家典钱归碍夜南家贯米出凌晨我独何者无此弊复
帐重衾暖若春怕寒放懒不肯动日高睡足方频伸瓶中有酒罍有炭瓮中有饭庖有薪奴温
婢饱身晏起致兹快活良有因上无臯陶伯益廊庙材的不能匡君辅国活生民下无巢父许
由箕颍操又不能食薇饮水自苦辛君不见南山悠悠多白云又不见西京浩浩唯红尘红尘
閤热白云冷好於冷热中闲安置身三年徽幸忝洛尹两任优稳为商宾非贤非愚非智慧不
贵不富不贱贫冉冉老去过六十腾腾闲来经七春不知张韦与皇甫私唤我作何如人

和裴侍中南园静兴见示

池馆清且幽高怀亦如此有时帘动风尽日桥照水静将鹤为伴闲与云相似何必学留侯崎
岖觅松子

春寒

今朝春气寒自问何所欲酥煖薤白酒乳和地黄粥岂唯厌馋口亦可调病腹助酌有枯鱼佐
飧兼旨蓄省躬念前哲醉饱多慚耻君不闻靖节先生樽长空广文先生饭不足

菩提寺上方晚望香山寺寄舒员外

晚登西宝刹晴望东精舍反照转楼台辉辉似图画冰浮水明灭雪压松偃亚石阁僧上来云
汀鴈飞下西京闢於市东洛闲如社曾忆旧游无香山明月夜

二月一日作赠韦七庶子

园杏红萼拆庭兰紫芽出不觉春已深今朝二月一去冬病疮痍将养遵医术今春入道場清
净依僧律尝闻圣贤语所慎斋与疾遂使爱酒人停盃一百日明朝二月二疾平斋复毕应须
挈一壺寻花觅韦七

犬鸛

晚来天气好散步中门前门前何所有偶覩犬与鸛鸛饱淩风飞犬暖向日眠腹舒稳贴地翅
凝【去声】高摩天上无罗弋忧下无羈锁牵见彼物遂性我亦心适然心适复何为一咏逍
遥篇此仍着於适尚未能忘言

梦刘二十八因诗问之

昨夜梦梦得初觉思踟躕忽忘来汝郡犹疑在吴都吴都三千里汝郡二百余非梦亦不见近
与远何殊尚能齐近远焉用论荣枯但问寝与食近日两何如病後能吟否春来曾醉无楼台
与风景汝又何如苏相思一相报勿复慵为书

闲吟

贫穷汲汲求衣食富贵营营役心力人生不富即贫穷光陰易过闲难得我今幸在穷富间虽
在朝廷不入山看雪寻花翫风月洛阳城里七年闲

西行

衣裘不单薄车马不羸弱蔼蔼三月天闲行亦不恶寿安流水館硤石青山郭官道柳陰陰行
宫花漠漠常闻俗间语有钱在处乐我虽非富人亦不苦寂寞家僮解弦管骑从携盃杓时向
春风前歇鞍开一酌

东归

翩翩平肩輿中有醉老夫膝上展诗卷竿头悬酒壶食宿无定程仆马多缓驱临水歇半日望山倾一盃藉草坐嵬峩【并上声】攀花行踟蹰风将景共暖体与心同舒始悟有营者居家如在途方知无系者在道如安居前夕宿三堂【三堂在虢】今旦游申湖【申湖在陕】残春三百里送我归东都

途中作

早起上肩輿一盃平旦醉晚愁下肩舁一觉残春睡身不经营物心不思量事但恐绮与里只如吾气味

小台

新树低如帐小台平如掌六尺白藤牀一茎青竹杖风飘竹皮落苔印鹤迹上幽境与谁同闲人自来往

睡後茶兴忆杨同州

昨晚饮太多嵬峩【并上声】连宵醉今朝飧又饱烂熯移时睡睡足摩挲眼眼前无一事信脚遶池行偶然得幽致婆娑緑陰树斑駁青苔地此处置绳牀傍边洗茶器白瓷瓯甚洁红鑪炭方炽沫下麴尘香花浮鱼眼沸盛来有佳色咽罢余芳气不见杨慕巢谁人知此味

题文集柜

破柏作书柜柜牢柏复坚收贮谁家集题云白乐天我生业文字自幼及老年前後七十卷小大三千篇诚知终散失未忍遽弃捐自开自鑰闭置在书帷前身是邓伯道世无王仲宣只应分付女留与外孙传

旱热二首

彤云散不雨赫日吁可畏端坐犹挥汗出门岂容易忽思公府内青衫折腰吏复想驿路中红尘走马使征夫更辛苦逐客弥顛顛日入尚趋程宵分不遑寐安知北窗叟偃卧风颭【悉合切又音立】至簟拂碧龙鳞扇摇白鹤翅岂唯身所得兼示心无事谁言苦热天元有清凉地勃勃旱尘气炎炎赤日光飞禽颭将坠行人渴欲狂壮者不耐饥饥火烧其腸肥者不禁热喘急汗如浆此时方自悟老瘦亦何妨肉轻足健逸发少头清凉薄食不饥渴端居省衣裳数匙梁饭冷一领绡衫香持此聊过日焉知畏景长

偶作二首

战马春放归农牛冬歇息何独徇名人终身役心力来者殊未已去者不知还我今悟已晚六十方退闲犹胜不悟者老死红尘间

名无高与卑未得多健美事无小与大已得多厌贱如此常自苦反此或自安此理知甚易此道行甚难勿信人虚语君当事上看

池上作【西溪南潭皆池中胜处也】

西溪风生竹森森南潭萍开水沉沉丛翠万竿湘岸色空碧一泊松江心浦派萦回误远近桥岛向背迷窥临澄澜方丈若万顷倒影咫尺如千寻泛然独游邈然坐坐念行思思古今菟裘不闻有泉沼西河亦恐无云林岂如白翁退老地树高竹密池塘深华亭双鹤白矫矫太湖四石青岑岑眼前尽日更无客膝上此时唯有琴洛阳冠盖自相索谁肯来此同抽簪

何处堪避暑

何处堪避暑林间背日楼何处好追凉池上随风舟日高饥始食食竟饱还游游罢睡一觉觉来茶一瓯眼明见青山耳醒闻碧流脱袜闲濯足解巾快搔头如此来几时已过六七秋从心至百骸无一不自由拙退是其分荣耀非所求虽被世间笑终无身外忧此语君莫怪静思吾亦愁如何三伏月杨尹谪?州

诏下

昨日诏下去罪人今日诏下得贤臣进退者谁非我事世间宠辱常纷纷我心与世两相忘时事虽闻如不闻但喜今年饱饭吃洛阳禾稼如秋云更倾一樽歌一曲不独忘世兼忘身

七月一日作

七月一日天秋生履道里闲居见清景高兴从此始林间暑雨歇池上凉风起桥竹碧鲜鲜岸莎青靡靡苍然古磐石清浅平流水何言中门前便是深山里双僮侍坐卧一杖扶行止饥闻麻粥香渴觉云汤美【胡麻粥云母汤】平生所好物今日多在此此外更何思市朝心已矣

开襟

开襟何处好竹下池边地余热体犹烦早凉风有味黄萎槐蘂结红破莲芳坠无奈每年秋先来入衰思

自宾客迁太子少傅分司

头上渐无发耳间新有毫形容逐日老官秩随年高优饶又加俸闲稳仍分曹饮食免藜藿居

处非蓬蒿何言家尚贫银榼提绿醪勿谓身未贵金章照紫袍诚合知止足岂宜更贪饕默然心自问於国有何劳

自在

杲杲冬日光明暖真可爱移榻向阳坐拥裘仍解带小奴搥我足小婢搥我背自问我为谁胡然独安泰安泰良有以与君论梗槩心了事未了饥寒迫於外事了心未了念虑煎於内我今实多幸事与心和会内外及中间了然无一碍所以日阳中向君言自在

咏史【九年十一月作】

秦磨利刀斩李斯齐烧沸鼎烹酈其可怜黄绮入商洛闲卧白云歌紫芝彼为菹醢机上尽此作鸾凤天外飞去者逍遥来者死乃知祸福非天为

因梦有悟

交友沦歿尽悠悠劳梦思平生所厚者昨夜梦见之梦中几许事枕上无多时款曲数盃酒从容一局碁【碁酒皆梦中所见事】初见韦尚书【弘景】金紫何辉辉中遇李侍郎【建】笑言甚怡怡终为崔常侍【玄亮】意色苦依依一夕三改变梦心不惊疑此事人尽怪此理谁得知我粗知此理闻於竺乾师识行妄分别智隐迷是非若转识为智菩提其庶几

春游

上马临出门出门复逡巡回头问妻子应怪春游频诚知春游频其奈老大身朱颜去复去白髮新更新请君屈十指为我数交亲大限年百岁几人及七旬我今六十五走若下坡轮假使得七十祇有五度春逢春不游乐但恐是痴人

题天竺南院赠闲元旻清四上人

杂芳闲草合繁绿岩树新山深景候晚四月有余春竹寺过微雨石迳无纤尘白衣一居士方袍四道人地是佛国土人非俗交亲城中山下别相送亦殷勤

哭师臯

南康丹旆引魂回洛阳篮舁【云俱切】送葬来北邙原边草树畔月苦烟愁夜过半妻孥兄弟号一声十二人腸一时断往者何人送者谁乐天哭别师臯时平生分义向人尽今日哀冤唯我知我知何益徒垂泪篮舁回竿马回轡何日重闻扫市歌谁家收得琵琶妓【师臯醉後善歌扫市词又有小妓工琵琶不知今落在何处】萧萧风树白杨影苍苍露草青蒿气更就坟边哭一声与君此别终天地

隐几赠客

宦情本淡薄年貌又老丑紫绶与金章於予亦何有有时独隐几荅【音塔】然无所偶卧枕一卷书起尝一盃酒书将引昏睡酒用扶衰朽客到忽已酣脱巾坐搔首疎顽倚老病容恕慙交友忽思庄生言亦拟鞭其後

夏日作

葛衣疎且单纱帽轻复寛一衣与一帽可以过炎天止於便吾体何必被罗纨宿雨林笋嫩晨露园葵鲜烹葵炮嫩笋可以备朝飧止於适吾口何必饫腥羶饭讫盥漱已扪腹方果然婆娑庭前步安稳窗下眠外养物不费内归心不烦不费用难尽不烦神易安庶几无夭阏【阿葛切】得以终天年

晚凉偶咏

日下西墙西风来北窗北中有逐凉人单牀独栖息飘萧过云雨摇曳归飞翼新叶多好陰初筠有佳色幽深小池館优稳闲官职不爱勿复论爱亦不易得

酬牛相公宫城早秋寓言见示兼呈梦得时梦得有疾

七月中气後金与火交争一闻白雪唱暑退清风生碧树未摇落寒蝉始悲鸣夜凉枕簟滑秋燥衣巾轻疎受老慵出刘桢疾未平何人伴公醉新月上宫城

小台晚坐忆梦得

汲泉洒小台台上无纖埃解带面西坐轻襟随风开晚凉闲兴动忆同倾一盃月明候柴户藜杖何时来

种桃歌

食桃种其核一年核生芽二年长枝叶三年桃有花忆昨五六岁灼灼盛芬华迨兹八九载有减而无加去春已稀少今春渐无多明年後年後芳意当如何命酒树下饮停盃拾余葩因桃忽自感悲吒成狂歌

狂言示诸侄

世欺不识字我忝攻文笔世欺不得官我忝居班秩人老多病苦我今幸无疾人老多忧累我今婚嫁毕心安不移转身泰无牵率所以十年来形神闲且逸况当垂老岁所要无多物一裘煖过冬一饭饱终日勿言舍宅小不过寝一室何用鞍马多不能骑两匹如我优幸身人中十

有七如我知足心人中百无一傍观愚亦见当已贤多失不敢论他人狂言示诸侄

偶以拙诗数首寄呈裴少尹侍郎蒙以盛制四篇一时酬和重投长句美而谢之

投君之文甚荒芜数篇价直一束刍报我之章何璀璨累累四贯骊龙珠毛诗三百篇後得文
选六十卷中无一麋丽龟絶报赛五鹿连柱难支梧高兴独因秋日尽清吟多与好风俱银钩
金错两殊重宜上屏风张座隅

白氏长庆集卷三十

卷三十一

<集部,别集类,汉至五代,白氏长庆集>

钦定四库全书

白氏长庆集卷三十一

唐白居易撰

律诗【凡一百首】

六年冬暮赠崔常侍晦叔【时为河南尹】

鬓毛霜一色光景水争流易过唯冬日难销是老愁香开绿蚁酒煖拥褐绫裘已共崔君约樽
前倒即休

戏招诸客

黄醅【铺不切】绿醅【私吕切】迎冬熟绛帐红罽逐夜开谁道洛中多逸客不将书唤不
曾来

十二月二十三日作兼呈晦叔

案头历日虽未尽向後唯残六七行牀下酒瓶虽不满犹应醉得两三场病身不许依年老拙
宦虚教逐日忙闻健偷闲且勤饮一杯之外莫思量

七年元日对酒五首

庆吊经过懒逢迎跪拜迟不因时节日岂觉此时衰衆老忧添岁余衰喜入春年开第七秩屈
指几多人三杯蓝尾酒一櫟【弋涉切】胶牙饧【徐盈切】除却崔常侍无人共我争

今朝吴与洛相忆一欣然梦得君知否俱过本命年【余与苏州刘郎中同壬子岁今年六十二】

同岁崔何在同年杜又无【余与吏部崔相公甲子同岁与循州杜相公及第同年秋冬二人
俱逝】应无藏避处只有且欢娱

七年春题府厅

潦倒守三川因循涉四年推诚废鈎距示耻用蒲鞭以此称公事将何销俸钱虽非好官职岁久亦妨贤早春醉吟寄太原令狐相公苏州刘郎中

雪夜闲游多秉烛花时颺出亦提壶别来少遇新诗敌老去难逢旧饮徒大振威名降北虏勤行惠化活东吴不知歌酒腾腾兴得似河南醉尹无

洛下送牛相公出镇淮南

北阙至东京风光十六程坐移丞相阁春入广陵城红旆拥双节白须无一茎万人开路看百吏立班迎阍外君弥重樽前我亦荣何须身自得将相是门生【元和初牛相公应制策登第三等予为翰林考核官】

箏

云髻飘萧绿花颜旖旎红双眸剪秋水十指剥春葱楚艳为门阀秦声是女工甲鸣银珣【丁历切】璫【郎狄切】柱触玉玲珑猿苦啼嫌月鸾娇语?【乃礼切】风移愁来手底送恨入弦中赵瑟清相似胡琴闇不同慢弹回断鴈急奏转飞蓬霜佩锵还委冰泉咽复通珠联千拍碎刀截一声终倚丽精神定矜能意态融歇时情不断休去思无穷灯下青春夜樽前白首翁且听应得在老耳未多聾

洛中春游呈诸亲友

莫叹年将暮须怜岁又新府中三遇腊洛下五逢春春树花珠颗春塘水麴尘春娃无气力春马有精神【咏春游一时之态】并辔鞭徐动连盘酒慢巡经过旧邻里追逐好交亲笑语销闲日酣歌送老身一生欢乐事亦不少於人

酬舒三员外见赠长句

自请假来多少日五旬光景但须臾已判到老为狂客不分当春作病夫杨柳花飘新白雪櫻桃子缀小红珠头风不敢多多饮能酌三分相劝无

将归一絕

欲去公门返野扉预思泉竹已依依更怜家醞迎春熟一瓮醍醐待我归

罢府归旧居【自此後重授宾客归履道宅作】

陋巷乘篮入朱门挂印回腰间抛组绶纓上拂尘埃屈曲闲池沼无非手自开青苍好竹树亦是眼看栽石片擡琴匣松枝阁酒杯此生终老处昨日却归来

睡觉偶吟

官初罢後归来夜天欲明前睡觉时起坐思量更无事身心安乐复谁知

问支琴石

疑因星陨空中落叹被泥埋涧底沉天上定应胜地上支机未必及支琴提携拂拭知恩否虽不能言合有心

自喜

身慵难勉强性拙易迟回布被辰时起柴门午後开忙驱能者去闲逐钝人来自喜谁能会无才胜有才裴常侍以题蔷薇架十八韵见示因广为三十韵以和之

托质依高架攒华对小堂晚开春去後独秀院中央霁景朱明早芳时白昼长穠因天与色丽共日争光剪碧排千萼研朱染万房烟条涂石绿粉蘂扑雌黄根动彤云涌枝摇赤羽翔九微灯炫转七宝帐荧煌淑气熏行径清陰接步廊照梁迷藻梲耀壁变雕墙烂若蕤【徂红切】然火殷於叶得霜臙脂含笑脸苏合裊【於业切】衣香浹洽濡晨露玲珑漏夕阳合罗排勘缣【胡结切】醉晕浅深粧乍见疑回面遥看误断肠风朝舞飞燕雨夜泣萧娘桃李慙无语芝兰让不芳山榴何细碎石竹苦寻常蕙惨偃栏避莲羞映浦藏怯教蕉叶战妬得柳花狂岂可轻嘲咏应须痛比方画幙风自展绣幪【先谏切】盖谁张翠锦挑成字丹砂印着行猩猩凝血点瑟瑟蹙金匡散乱菱红片尖纖嫩紫芒触僧飘毳褐留妓冒罗裳寡和阳春曲多情骑省郎缘夸美颜色引出好文章东顾辞仁里【语曰里仁为美又裴君所居名仁和里】西归入帝乡假如君爱杀留着莫移将【裴君题诗之次而常侍诏到唱和未竟而轩骑西归故云】

感旧诗卷

夜深吟罢一长吁老泪灯前湿白须二十年前旧诗卷十人酬和九人无

酬李二十侍郎

笋老兰长花渐稀衰翁相对惜芳菲残莺着雨慵休啖落絮无风凝不飞行掇木芽供野食坐牵萝蔓挂朝衣十年分手今同醉醉未如泥莫道归

和梦得【梦得来诗云谩读图书四十车年年为郡老天涯一生不得文章力百口空为饱煖

家】

纶阁沉沉无宠命
苏台籍籍有能声
岂唯不得清文力
但恐空传冗吏名
郎署回翔何水部
江湖留滞谢宣城
所嗟非独君如此
自古才难共命争

赠草堂宗密上人

吾师道与佛相应
念念无为法法能
口藏宣传十二部
心台照耀百千灯
尽离文字非中道
长住虚空是小乘
少有人知菩萨行
世间只是重高僧

喜照密闲实四上人见过

紫袍朝士白髯翁
与俗乖疎与道通
官秩三回分洛下
交游一半在僧中
臭帑【农都切】世界
终须出香火
因缘久愿同斋後
将何充供养
西轩泉石北窗风

赠皇甫六张十五李二十三宾客

昨日三川新罢守
今年四皓尽分司
幸陪散秩闲居日
好是登山临水时
家未苦贫常醖酒
身虽衰病尚吟诗
龙门泉石香山月
早晚同游报一期

微之敦诗晦叔相次长逝岿然自伤因成二絶

并失鸕鸕侣
空留麋鹿身
只应嵩洛下
长作独游人
长夜君先去
残年我几何
秋风满衫泪
泉下故人多

池上闲咏

青莎台上起书楼
緑藻潭中系钓舟
日晚爱行深竹里
月明多上小桥头
暫尝新酒还成醉
亦出中门便当游
一部清商聊送老
白须萧飒管弦秋

凉风叹

昨夜凉风又飒然
萤飘叶坠卧牀前
逢秋莫叹须知分
已过潘安三十年

和高仆射罢节度让尚书授少保分司喜遂游山水之作

暫辞八座罢双旌
便作登山临水行
能以忠贞酬重任
不将富贵碍高情
朱门出去簪纓从
綵帟归来歌吹迎
鞍辔闇装光满马
何人信道是书生

送考功崔郎中赴阙

称意新官又少年秋凉身健好朝天青云上了无多路却要徐驱稳着鞭

重修香山寺毕题二十二韵以纪之

阙塞龙门口只园鹫【音就】岭头曾随减劫坏今遇胜缘修再莹新金刹重装旧石楼病僧皆引起忙客亦淹留四望穷沙界孤标出赡州地图铺雒邑天柱倚松丘两面苍苍?中心瑟瑟流波翻八滩雪堰护一潭油台殿朝弥丽房廊夜更幽千花高下塔一叶往来舟岫合云初吐林开雾半收静闻樵子语远听棹郎讴官散殊无事身闲甚自由吟来携笔砚宿去抱衾裯霁月当窗白凉风满簟秋烟香封药竈泉冷洗茶瓯南祖心应学西方社可投先宜知止足次要悟浮休觉路随方乐迷涂到老愁须除爱名障莫作恋家囚便合穷年住何言竟日游可怜终老地此是我菟【土故切】裘

送杨八给事赴常州

无嗟别青琐且喜拥朱轮五十得三品百千无一人须勤念黎庶莫苦忆交亲此外无过醉毗陵何限春

闻歌者唱微之诗

新诗絶笔声名歇旧卷生尘篋笥深时向歌中闻一句未容倾耳已伤心

醉送李二十常侍赴镇浙东

靖安客舍花枝下共脱青衫典浊醪今日洛桥还醉别金杯翻污麒麟袍喧阗夙驾君脂辖酩酊离筵我藉糟好去商山紫芝伴珊瑚鞭动马头高

醉别程秀才

五度龙门点额回却缘多艺复多才贫泥客路粘难出愁琐乡心掣不开何必更游京国去不如且入醉乡来吴弦楚调潇湘弄为我殷勤送一杯【程生善琴尤能沉湘曲】

自咏

白衣居士紫芝仙半醉行歌半坐禅今日维摩兼饮酒当时绮季不请钱等闲池上留宾客随事灯前有管弦但问此身销得否分司气味不论年

把酒思闲事二首

把酒思闲事春愁谁最深乞钱羈客面落第举人心月下低眉立灯前抱膝吟凭君劝一醉胜与万黄金把酒思闲事春娇何处多试鞍新白马弄镜小青娥掌上初教舞花前欲按歌凭君劝一醉劝了问如何

衰荷

白露凋花花不残凉风吹叶叶初乾无人解爱萧条境更遶衰藂【徂红切】一匝看

池上送考功崔郎中兼别房寮二妓

文昌列宿徵还日洛浦行云放散时鵷鹭上天花逐水无因再会白家池

自问

依仁台废悲风晚履信池荒宿草春【晦叔亭台在依仁微之池馆在履信】自问老身骑马出洛阳城里覓何人

送陈许高仆射赴镇

敦诗閱礼中军帅重士轻财大丈夫常与师徒同苦乐不教亲故隔荣枯花钿坐遶黄金印丝竹行随白玉壶商皓老狂唯爱醉时时能寄酒钱无

青氍毹二十韵

合聚千羊毳【蚩瑞切】施张百子毵【司马迁书云张空毵】骨盘边柳健色染塞蓝鲜北制因戎剋南移逐虏迁汰风吹不动御雨湿弥坚有顶中央耸无隅四向圆傍通门豁尔内密气温然远别关山外初安庭户前影孤明月夜价重苦寒年软暖围氍毹【土敢切】枪撻束管弦最宜霜後地偏称雪中天侧置低歌座平铺小舞筵闲多揭帘入醉便拥袍眠铁檠【渠京切】移灯背银囊带火悬深藏晓兰焰闇贮宿香烟兽炭休亲近狐裘可弃捐砚温融冻墨瓶煖变春泉蕙帐徒招隐茅庵浪坐禅贫僧应叹羨寒士定留连宾客於中接儿孙向後传王家夸旧物未及此青氍【王子敬语偷儿云青氍我家旧物】

答梦得秋日书怀见寄

幸免非常病甘当本分衰眼昏灯最觉腰瘦带先知树叶霜红日髭须雪白时悲愁缘欲老老过却无悲

同诸客题于家公主旧宅

平阳旧宅少人游应是游人到即愁春谷鸟啼桃李院络丝虫怨凤皇楼台倾滑石犹残砌帘断珍珠不满钩闻道至今萧史在髭须雪白向明州

答梦得八月十五夜翫月见寄

南国碧云客东京白首翁松江初有月伊水正无风远思两乡断清光千里同不知娃馆上何侣石楼中【其夜余在龙门石楼上望月】

初冬早起寄梦得

起戴乌纱帽行披白布裘醺温先煖酒手冷未梳头早起烟霜白初寒鸟雀愁诗成遣谁和还是寄苏州

秋夜听高调凉州

楼上金风声渐紧月中银字韵初调促张弦柱吹高管一曲凉州入汧【音血又音决】寥

香山寺二絶

空门寂静老夫闲伴鸟随云往复还家醞满瓶书满架半移生计入香山

爱风岩上攀松盖恋月潭边坐石棱且共云泉结缘境他生当作此山僧

送舒著作重授省郎赴阙

三岁相依在洛都游花宴月饱欢娱惜别笙歌多怨咽愿留轩盖少踟蹰剑磨光彩依前出鹏举风云逐後驱从此求闲应不得更能重醉白家无

同诸客嘲雪中马上妓

珊瑚鞭撻【丁可切】马踟蹰引手低蛾索一盂腰为逆风成弱柳面因冲冷作凝酥银篦稳簪【作绀切】乌罗帽花檐宜乘叱拨驹雪里君看何所似王昭君妹写真图

喜刘苏州恩赐金紫遥想贺宴以诗庆之

海内姑苏太守贤恩加章绶岂徒然贺宾喜色欺杯酒醉妓欢声遏管弦鱼佩葦鳞光照地鹓衔瑞带势冲天莫嫌鬓上些些白金紫由来称长年

蓝田刘明府携酌相过与皇甫郎中卯时同饮醉後赠之

腊月九日煖寒客卯时十分空腹杯玄晏舞狂乌帽落蓝田醉倒玉山颓貌偷花色老慙去歌
蹋柳枝春闇来不为刘家贤圣物愁翁笑口大难开

刘苏州以华亭一鹤远寄以诗谢之

老鹤风姿异衰翁诗思深素毛如我鬓丹顶似君心松际雪相映鸡羣尘不侵殷勤远来意一
只重千金

早春忆苏州寄梦得

吴苑四时风景好就中偏好是春天霞光曙後殷於火水色晴来嫩似烟士女笙歌宜月下使
君金紫称花前诚知欢乐堪留恋其奈离乡已四年

尝新酒忆晦叔二首

樽里看无色杯中动有光自君抛我去此物共谁尝世上强欺弱人间醉胜醒自君抛我去此
语共谁听

负春

病来道士教调气老去山僧劝坐禅孤负春风杨柳曲去年断酒到今年

池上闲吟二首

高卧闲行自在身池边六见柳条新幸逢尧舜无为日得作羲皇向上人四皓再除犹且健三
州罢守未全贫莫愁客到无供给家醞香浓野菜春

非庄非宅非兰若竹树池亭十亩余非道非僧非俗吏褐裘乌帽闭门居梦游信意宁殊蝶心
乐身闲便是鱼虽未定知生与死其间胜负两何如

早春招张宾客

久雨初晴天气新风烟草树尽欣欣虽当冷落衰残日还有阳和暖活身池色溶溶蓝染水花
光焰焰火烧春商山老伴相收拾不用随他年少人

营闲事

自笑营闲事从朝到日斜浇畦引泉脉扫迳避兰芽暖变墙衣色晴催木笔花桃根知酒渴晚
送一瓯茶

感春

老思不禁春风光照眼新花房红鸟觜池浪碧鱼鳞倚棹谁为伴持杯自问身心情多少在六十二三人

春池上戏赠李郎中

满池春水何人爱唯我回看指侣君直侣按【奴回切】蓝新汁色与君南宅染罗裙

翫半开花赠皇甫郎中【八年寒食日池东小楼上作】

勿讶春来晚无嫌花发迟人怜全盛日我爱半开时紫蜡粘为蒂红苏点作蕤【如佳切】成都新夹缬【胡结切】梁汉碎臙脂树杪真珠颗墙头小女儿浅深粧駁落高下火参差蝶戏争香孕鸂鶒选稳枝好教郎作伴合共酒相随醉翫无胜此狂嘲更让谁犹残少年兴未是老人诗西日凭轻照东风莫杀吹明朝应烂漫後夜更离披林下遥相忆樽前闇有期衔杯嚼蘂思唯我与君知

池边

柳老香丝宛荷新钿扇圆残春深树里斜日小楼前醉遣收杯杓闲听理管弦池边更无事看补采莲?家酿新熟每尝辄醉妻侄等劝令少饮因成长句以谕之

君应怪我朝朝饮不说向君君不知身上幸无疼痛处瓮头正是撇尝时刘妻劝谏夫休醉王侄分疎叔不痴六十三翁头雪白假如醒黠欲何为

送常秀才下第东归

东归多旅恨西上少知音寒食看花眼春风落日心百忧当二月一醉直千金到处公卿席无辞酒盏深

且游

手里一杯满心中百事休春应唯仰醉老更不禁愁弄水回?尾寻花信马头眼看筋力减游得且须游

题王家庄临水柳亭

弱柳缘堤种虚亭压水开条疑逐风去波欲上阶来翠羽偷鱼入红腰学舞回春愁正无绪争不尽残杯

题令狐家木兰花

膩如玉指涂朱粉光似金刀剪紫霞从此时时春梦里应添一树女郎花

拜表回闲游

玉佩金章紫花绶紵衫藤带白纶巾晨兴拜表称朝士晚出游山作野人达磨传心令息念玄元留语遣同尘八关净戒斋销日一曲狂歌醉送春酒肆法堂方丈室其间岂是两般身

西街渠中种莲叠石颇有幽致偶题小楼

朱槛低墙上清流小阁前雇人栽菡萏买石造潺湲影落江心月声移谷口泉闲看卷帘坐醉听掩牕眠路笑淘官水家愁费料钱是非君莫问一对一翛然

晚春闲居杨工部寄诗杨常州寄茶同到因以长句答之

宿醒寂寞眠初起春意阑珊日又斜劝我加餐因早笋恨人休醉是残花闷吟工部新来句渴饮毗陵远到茶兄弟东西官职冷门前车马向谁家

玉泉寺南三里涧下多深红踯躅繁艳殊常感惜题诗以示游者

玉泉南涧花奇怪不似花丛似火堆今日多情唯我到每年无故为谁开宁辞辛苦行三里更有留连饮两杯犹有一般孤负事不将歌舞管弦来

早服云母散

晓服云英漱井华寥然身若在烟霞药销日晏三匙饭酒渴春深一碗茶每夜坐禅观水月有时行醉翫风花净名事理人难解身不出家心出家

三月晦日晚闻鸟声

晚来林鸟语殷勤似惜风光说向人遣脱破袍劳报暖催沽美酒敢辞贫声声劝醉应须醉一岁唯残半日春

早夏游平原回

夏早日初长南风草木香肩舆颇平稳涧路甚清凉紫蕨行看采青梅旋摘尝疗饥兼解渴一盏冷云浆

宿天竺寺回

野寺经三宿都城复一还家仍念婚嫁身尚系朝班潇洒秋临水沉吟晚下山长闲犹未得逐日且偷闲侍中晋公欲到东洛先蒙书问期宿龙门思往感今辄献长句

昔蒙兴化池头送【太和三年春居易授宾客分司东来特蒙侍中於兴化里池上宴送】今许龙门潭上期聚散但慙长见念荣枯安敢道相思功成名遂来虽久云卧山游去未迟闻说风情筋力在只如初破蔡州时

奉和晋公侍中蒙除留守行及洛师感悦发中斐然成咏

鸾凤翱翔在寥廓貂蝉潇洒出埃尘致成尧舜昇平代收得夔龙强健身抛掷功名还史册分张欢乐与交亲商山老皓虽休去终是留侯门下人

送刘五司马赴任硤州兼寄崔使君

位下才高多怨天刘兄道胜独恬然贫於杨子两三倍老过荣公六七年笔砚莫抛留压案簞瓢从陋也销钱郡丞自合当优礼何况夷陵太守贤

菩提寺上方晚眺

楼阁高低树浅深山光水色暝沉沉嵩烟半卷青绡幕伊浪平铺绿绮衾飞鸟灭时宜极目远风来处好开襟谁知不离簪纓内长得逍遥自在心

杨柳枝词八首

六么水调家家唱白雪梅花处处吹古歌旧曲君休听听取新翻杨柳枝

陶令门前四五树亚夫营里百千条何似东都正二月黄金枝映洛阳桥

依依嫋嫋复青青勾引春风无限情白雪花繁空扑地绿丝条弱不胜莺

红板江桥青酒旗馆娃宫暖日斜时可怜雨歇东风定万树千条各自垂

苏州杨柳任君夸更有钱塘胜馆娃若解多情小小绿杨深处是苏家

苏家小女旧知名杨柳风前别有情剥条盘作银环样卷叶吹为玉笛声

叶含浓露如啼眼枝嫋轻风似舞腰小树不禁攀折苦乞君留取两三条

人言柳叶似愁眉更有愁肠似柳丝柳丝挽断肠牵断彼此应无续得期

浪淘沙词六首

一泊沙来一泊去一重浪灭一重生相搅相淘无歇日会教山海一时平
白浪茫茫与海连平沙浩浩四无边暮去朝来淘不住遂令东海变桑田
青草湖中万里程黄梅雨里一人行愁见滩头夜泊处风翻闇浪打舡声
借问江潮与海水何似君情与妾心相恨不如潮有信相思始觉海非深
海底飞尘终日有山头化石岂无时谁道小郎抛小妇船头一去没回期
随波逐浪到天涯迁客生还有几家却到帝乡重富贵请君莫忘浪淘沙
白氏长庆集卷三十一

卷三十二

钦定四库全书

白氏长庆集卷三十二

唐白居易撰

律诗【凡八十二首】

读老子

言者不如知者默此语吾闻於老君若道老君是知者缘何自着五千文

读庄子

庄生齐物同归一我道同中有不同遂性逍遥虽一致鸾凰终较胜虵虫

读禅经

须知诸相皆非相若住无余却有余言下忘言一时了梦中说梦两重虚空花岂得兼求果物
焰如何更觅鱼掇动是禅禅是动不禅不动即如如

感兴二首

吉凶祸福有来由但要深知不要忧只见火光烧润屋不闻风浪覆虚舟名为公器无多取利
是身灾合少求虽异匏瓜难不食大都食足早宜休

鱼能深入宁忧钓鸟解高飞岂触罗热处先争炙手去悔时其奈噬脐何樽前诱得猩猩血幕
上偷安鷺鷥窠我有一言君记取世间自取苦人多

问鹤

乌鸢争食雀争窠独立池边风雪多尽日蹋冰翘一足不鸣不动意如何

代鹤答

鷹爪撚鸡鸡肋折鹄拳鵠鴈鴈头垂何如敛翅水边立飞上云松栖稳枝

闲卧有所思二首

向夕褰帘卧枕琴微凉入户起开襟偶因明月清风夜忽想迁臣逐客心何处投荒初恐惧谁人遶泽正悲吟始知洛下分司坐一日安闲直万金

权门要路是身灾散地闲居少祸胎今日怜君岭南去当时笑我洛中来虫全性命缘无毒木尽天年为不才大抵吉凶多自致李斯一去二疏回

喜闲

潇洒伊嵩下优游黄绮间未曾一日闷已得六年闲鱼鸟为徒侣烟霞是往还伴僧禅闭目迎客笑开颜兴发宵游寺慵时昼掩关夜来风月好悔不宿香山

诗酒琴人例多薄命予酷好三事雅当此科而所得已多为幸斯甚偶成狂咏聊写愧怀

爱琴爱酒爱诗客多贱多穷多苦辛中散步兵终不贵孟郊张籍过於贫一之已叹关於命三者何堪并在身只合飘零随草木谁教凌厉出风尘荣名厚禄二千石乐饮闲游三十春何得无厌时咄咄犹言薄命不如人

寄明州于驸马使君三絶句

有花有酒有笙歌其奈难逢亲故何近海饶风春足雨白须太守闷时多

平阳音乐随都尉留滞三年在浙东吴越声邪无法用莫教偷入管弦中

何郎小妓歌喉好严老呼为一串珠【严尚书与于驸马诗云莫损歌喉一串珠】海味腥咸损声气听看犹得断肠无

闲卧

薄食当斋戒散班同隐沦佛容为弟子天许作闲人唯置牀临水都无物近身清风散发卧兼不要纱巾春早秋初因时即事兼寄浙东李侍郎

春早秋初昼夜长可怜天气好年光和风细动帘帷暖清露微凝枕簟凉窗下晓眠初减被池边晚坐乍移牀闲从蕙草侵堦绿静任槐花满地黄理曲管弦闻後院熨衣灯火映深房四时新景何人别遥忆多情李侍郎

新秋喜凉

过得炎蒸月尤宜老病身衣裳朝不润枕簟夜相亲楼月纖纖早波风嫋嫋新光陰与时节先感是诗人

初夏闲吟兼呈韦宾客

孟夏清和月东都闲散官体中无病痛眼下未饥寒世事闻常闷交游见即欢杯觞留客切妓乐取人寬雪鬢随身老云心着处安此中殊有味试说向君看

哭崔二十四常侍【崔好酒放歌忘怀生死知疾不起自为志文】

貂冠初别九重门马鬣新封四尺坟薤露歌词非白雪旌铭官爵是浮云伯伦每置随身鍤元亮先为自祭文莫道高风无继者一千年内有崔君

奉酬侍中夏中雨後游城南庄见示八韵

岛树间林岫云收雨气残四山岚色重五月水声寒老鹤两三只新篁千万竿化成天竺寺移得子陵滩心觉闲弥贵身缘健更欢帝将风后待人作谢公看用里年虽老高阳兴未阑佳辰不见召争免趣杯盘【来诗云何处趣杯盘】

送兖州崔大夫驸马赴镇

戚里夸为贤驸马儒家认作好诗人鲁侯不得辜风景沂水年年有暮春

少年问

少年怪我问如何何事朝朝醉复歌号作乐天应不错忧愁时少乐时多

问少年

千首诗堆青玉案十分酒写白金盂回头却问诸年少作个狂夫得了无

代琵琶弟子谢女师曹供奉寄新调弄谱

琵琶师在九重城忽得书来喜且惊一纸展看非旧谱四弦翻出是新声蕤宾掩抑娇多怨散水玲珑峭更清珠颗泪沾金扞拨红粧弟子不胜情【蕤宾散水皆新调名】

代林园戏赠【裴侍中新修集贤宅成池館甚盛数往游宴醉归自戏耳】

南院今秋游宴少西坊近日往来频假如宰相池亭好作客何如作主人

戏答林园

岂独西坊来往频偷闲处处作游人衡门虽是栖迟地不可终朝鏖老身

重戏赠

集贤池馆从他盛履道林亭勿自轻往往归来嫌窄小年年为主莫无情

重戏答

小水低亭自可亲大池高馆不关身林园莫妬裴家好憎故怜新岂是人

早秋登天宫寺阁赠诸客

天宫阁上醉萧辰丝管闲听酒慢巡为向凉风清景道今朝属我两三人

晓上天津桥闲望偶逢卢郎中张员外携酒同倾

上阳宫里晓钟後天津桥头残月前空濶境疑非下界飘飏身似在寥天星河隐映初生日楼阁葱茏半出烟此处相逢倾一盏始知地上有神仙

八月十五夜同诸客翫月

月好共传唯此夜境闲皆道是东都嵩山表里千重雪洛水高低两颗珠清景难逢宜爱惜白头相劝强欢娱诚知亦有来年会保得晴明强健无

对晚开夜合花赠皇甫郎中

移晚按一月花迟过半年红开杪秋日翠合欲昏天白露滴未死凉风吹更鲜後时谁肯顾唯我与君怜

醉游平泉

狂歌箕踞酒樽前眼不看人面向天洛客最闲唯有我一年四度到平泉

题赠平泉韦徵君拾遗

箕颍千年後唯君得古风位留丹陛上身入白云中躁静心相背高低迹不同笼鸡与梁燕不信有冥鸿

酬皇甫郎中对新菊花见忆

爱菊高人吟逸韵悲秋病客感衰怀黄花助兴方携酒红叶添愁正满阶居士荤腥今已断仙郎杯杓为谁排愧君相忆东篱下拟废重阳一日斋

夜宴醉後留献裴侍中

九烛台前十二姝主人留醉甚欢娱翩翩舞袖双飞蝶宛转歌声一索珠坐久欲醒还酩酊夜深初散又踟蹰南山宾客东山妓此会人间曾有无

和韦庶子远坊赴宴未夜先归之作兼呈裴员外【员外亦爱先逃归】

促席留欢日未曛远坊归思已纷纷无妨按辔行乘月何必逃杯走似云银烛忽抛杨柳曲金鞍潜送石榴裙到时常晚归时早笑乐三分狡一分

集贤池答侍中问

主人晚入皇城宿问客徘徊何所须池月幸闲无用处今宵能借客游无

杨柳枝二十韵【杨柳枝洛下新声也洛之小妓有善歌之者词章音韵听可动人故赋之】

小妓携桃叶新歌蹋柳枝粧成剪烛後醉起拂衫时绣履娇行缓花筵笑上迟身轻委回雪罗薄透凝脂笙引簧频煖箏催柱数移乐童翻怨调才子与妍词便想人如树先将发比丝风条摇两带烟叶贴双眉口动樱桃破鬟低翡翠垂枝柔腰嫋娜荑嫩手葳蕤唳鹤晴呼侣哀猿夜叫儿玉敲音历历珠贯字累累袖为收声点钗因赴节遗重重遍头别一一拍心知塞北愁攀折江南苦别离黄遮金谷岸绿映杏园池春惜芳华好秋怜颜色衰取来歌里唱胜向笛中吹曲罢那能别情多不自持纒头无别物一首断肠诗

答皇甫十郎中秋深酒熟见忆

烟景冷苍茫秋深夜夜霜为思池上酌先觉瓮头香未暇倾巾漉还应染指尝醍醐慙气味琥珀让晶光若许陪歌席须容散道场月终斋戒毕犹及菊花黄

老去

老去愧妻儿冬来有劝词煖寒从饮酒冲冷少吟诗战胜心还壮斋勤体校羸由来世间法损

益合相随

送宗实上人游江南

忽辞洛下缘何事拟向江南住几时每过渡头伤问法无妨菩萨是?师

和同州杨侍郎夸柘枝见寄

细吟冯翊使君诗忆作余杭太守时君有一般输我事柘枝看校十年迟

冬初酒熟二首

霜繁脆庭柳风利剪池荷月色晓弥苦鸟声寒更多秋怀久寥落冬计又如何一瓮新醕酒萍
浮春水波酒熟无来客因成独酌谣人间老黄绮地上散松乔忽忽醒还醉悠悠暮复朝残年
多少在尽付此中销

送姚杭州赴任因思旧游二首

与君细话杭州事为我留心莫等闲闲里固宜勤抚恤楼台亦要数跻攀笙歌缥缈虚空里风
月依稀梦想间且喜诗人重管领遥飞一盞贺江山

渺渺钱塘路几千想君到後事依然静逢竺寺猿偷橘闲看苏家女采莲故妓数人凭问讯新
诗两首倩留传舍人虽健无多兴老校当时八九年

寄李相公

渐老只谋欢虽贫不要官唯求造化力试为驻春看

冬日平泉路晚归

山路难行日易斜烟村霜树欲栖鷗夜归不到应闲事热饮三杯即是家

利仁北街作

草色班班春雨晴利仁坊北面西行踟蹰立马缘何事认得张家歌吹声

洛阳堰闲行

洛阳堰上新晴日长夏门前欲暮春遇酒即沽逢树歇七年此地作闲人

过永宁

村杏野桃繁似雪行人不醉为谁开赖逢山县卢明府引我花前劝一杯

往年稠桑曾丧白马题诗厅壁今来尚存又复感怀更题絶句

路傍埋骨蒿草合壁上题诗尘藓生马死七年犹怅望自知无乃太多情

罗敷水

野店东头花落处一条流水号罗敷芳魂艳骨知何在春草茫茫墓亦无

路逢青州王大夫赴镇立马赠别

大旆拥金羁书生得者稀何劳问官职岂不见光辉赫赫人争看翩翩马欲飞不期前岁尹驻节语依依【前年春予为河南尹王为少尹】

和杨同州寒食乾坑会後闻杨工部欲到知予与工部有宿醒

夜饮归常晚朝眠起更迟举头中酒後引手索茶时拂枕青长袖欹簪白接?宿醒无兴味先是肺神知和刘汝州酬侍中见寄长句因书集贤坊胜事戏而问之

洛川汝海封畿接履道集贤来往频一复时程虽不远百余步地更相亲【汝去洛程一宿履道集贤两宅相去一百三十步】朱门陪宴多投辖青眼留欢任吐茵闻道郡斋还有酒风前月下对何人

池上二絶

山僧对碁坐局上竹陰清映竹无人见时闻下子声

小娃撑小艇偷采白莲回不解藏踪迹浮萍一道开

白羽扇

素是自然色圆因裁制功飒如松起籁飘似鹤翻空盛夏不销雪终年无尽风引秋生手里藏月入怀中麈尾斑非正蒲葵陋不同何人称相对清瘦白须翁

五月斋戒罢宴彻乐闻韦宾客皇甫郎中饮会亦稀又知欲携酒馔出斋先以长句呈谢

妓房匣镜满红埃酒库封瓶生绿苔居士尔时缘护戒车公何事亦停杯散斋香火今朝散开素盘筵後日开随意往还君莫怪坐禅僧去饮徒来

闲园独赏【因梦得所寄蜂鹤之咏因成此篇以和之】

午後郊园静晴来景物新雨添山气色风借水精神永日若为度独游何所亲仙禽狎君子芳树倚佳人蚁鬪王争肉蜗移舍逐身蝶双知伉俪蜂分见君臣蠢蠕形虽小道遥性即均不知鹏与鷃相去几微尘

种柳三咏

白头种松桂早晚见成林不及栽杨柳明年便有陰春风为催促副取老人心

从君种杨柳夹水意如何准拟三年後青丝拂绿波仍教小楼上对唱柳枝歌

更想五年後千千条麴尘路傍深映月楼上闇藏春愁杀闲游客闻歌不见人

偶吟

好官病免曾三度散地归休已七年老自退闲非世弃贫蒙强健是天怜韦荆南去留春服王侍中来乞酒钱便得一年生计足与君美食复甘眠

池上即事

移牀避日依松竹解带当风挂薜萝钿砌池心绿苹合粉开花面白莲多久陰新霁宜丝管苦热初凉入绮罗家醞瓶空人客絕今宵争奈月明何

南塘暝兴

水色昏犹白霞光闇渐无风荷摇破扇波月动连珠蟋蟀啼相应鸳鸯宿不孤小僮频报夜归步尚踟蹰

小宅

小宅里间接疎篱鸡犬通渠分南巷水窗借北家风庾信园殊小陶潜屋不丰何劳问寬窄寬窄在心中

谕亲友

适情处处皆安乐大抵园林胜市朝
烦闇荣华犹易过优闲福禄更难销
自怜老大宜疎散却被交亲叹寂寥
终日相逢不相见两心相去一何遥

龙门送别皇甫泽州赴任韦山人南游

隼旟归洛知何日鹤驾还嵩莫过春
惆怅香山云水冷明朝便是独游人

刘苏州寄釀酒糯米李浙东寄杨柳枝舞衫偶因尝酒试衫辄成长句寄谢之

柳枝谩蹋试双袖桑落初香尝一杯
金屑醅浓吴米酿银泥衫稳越娃裁
舞时已觉愁眉展醉後仍教笑口开
慙愧故人怜寂寞三千里外寄欢来

诏授同州刺史病不赴任因咏所怀

同州慵不去此意复谁知诚爱俸钱厚
其如身力衰可怜病判案何似醉吟诗
劳逸悬相远行藏决不疑徒烦人劝谏
只合自寻思白发来无限青山去有期
野心惟怕闇家口莫愁饥卖却新昌宅
聊充送老资

寄杨六侍郎【时杨初授户部予不赴同州】

西户最荣君好去左冯虽稳我慵来
秋风一飭鲈鱼膾张翰摇头唤不回

韦七自太子宾客再除秘书监以长句贺而饯之【韦往年尝与予同为秘监】

离筵莫怆且同欢共贺新恩拜旧官
屈就商山伴麋鹿好归芸阁狎鸂鶒
落星石上苍苔古画鹤厅前白露寒
老监姓名题在壁相思试为拂尘看

酒熟忆皇甫十

新酒此时熟故人何日来自从金谷别
不见玉山颓疎索柳花盃寂寥荷叶杯
今冬问瓊帐雪里为谁开九年十一月
二十一日感事而作【其日独游香山寺】

祸福茫茫不可期大都早退自先知
当君白首同归日是我青山独往时
顾索素琴应不暇忆牵黄犬定难追
麒麟作脯龙为醢何似泥中曳尾龟

即事重题

重裘暖帽寬瓊履小阁低窗深地鑪
身稳心安眠未起西京朝士得知无

将归渭村先寄舍弟

一年年觉此身衰一日日知前事非咏月嘲风先要减登山临水亦宜稀子平嫁娶贫中毕元亮田园醉里归为报阿连寒食下与吾酿酒扫柴扉

看嵩洛有叹

今日看嵩洛回头叹世间荣华急如水忧患大於山见苦方知乐经忙始爱闲未闻笼里鸟飞出肯飞还

咏怀

随缘逐处便安闲不入朝廷不住山心似虚舟浮水上身同宿鸟寄林间尚平婚嫁了无累冯翊符章封却还【时阿罗初嫁及同州官吏放归】处分贫家残活计正如身後莫相关

咏老赠梦得

与君俱老也自问老何如眼涩夜先卧头慵朝未梳有时扶杖出尽日闭门居懒照新磨镜休看小字书情於故人重迹共少年疎唯是闲谈兴相逢尚有余

白氏长庆集卷三十二

卷三十三

<集部,别集类,汉至五代,白氏长庆集>

钦定四库全书

白氏长庆集卷三十三

唐白居易撰

律诗【凡一百首】

从同州刺史改授太子少傅分司

承华东署三分务履道西池七过春歌酒优游聊卒岁园林潇洒可终身留侯爵秩诚虚贵疏受生涯未苦贫月俸百千官二品朝廷雇我作闲人【张良疎受并为太子少傅】奉和裴令公新成午桥庄绿野堂即事

旧径开桃李新池凿凤凰只添丞相阁不改午桥庄远处尘埃少闲中日月长青山为外屏绿野是前堂引水多随势栽松不趁行年华玩风景春事看农桑花妬谢家妓兰偷荀令香游丝飘酒席瀑布溅琴床巢许终身稳萧曹到老忙千年落公便进退处中央【时裴加中书令】

自题小草亭

新结一茅茨规模俭且卑土阶全垒块山木半留皮阴合连藤架藂香近菊篱壁宜藜杖倚门称荻帘垂窻里风清夜檐间月好时留连尝酒客勾引坐禅师伴宿双栖鹤扶行一侍儿绿醅量盏饮红稻约升炊齷齪豪家笑酸寒富室欺陶庐闲自爱颜巷陋谁知蝼蚁谋深穴鷁鹳占小枝各随其分足焉用有余为

自咏

细故随缘尽形衰具体微鬪闲僧尚鬪较瘦鹤犹肥老遣寛裁袜寒教厚絮衣马从衔草辘鸡任啄笼飞只要天和在无令物性违自余君莫问何是复何非

新亭病後独坐招李侍郎公垂

新亭未有客竟日独何为趣暖泥茶竈防寒夹竹篱头风初定後眼闇欲明时浅把三分酒闲

题数句诗应须置两榻一榻待公垂

闲卧寄刘同州

软褥短屏风昏昏醉卧翁鼻香茶熟後腰暖日阳中伴老琴长在迎春酒不空可怜闲气味唯欠与君同

残酌晚飧

闲倾残酒後煖拥小氍毹时舞看新翻曲歌听自作词鱼香肥泼火饭细滑流匙除却慵馋外其余尽不知

喜见刘同州梦得

紫绶白髭须同年二老夫论心共牢落见面且欢娱酒好携来否诗多记得无应须为春^中五马少踟蹰

裴令公席上赠别梦得

年老官高多别离转难相见转相思雪销酒尽梁王起便是邹枚分散时

寻春题诸家园林

闻健朝朝出乘春处处^中天供闲日月人借好园林渐以狂为态都无闷到心平生身得所未省似而今

又题一絕

貌随年老欲何如兴遇春牵尚有余遥见人家花便入不论贵贱与亲疎

家园三絕

沧浪峡水子陵滩路远江深欲去难何似家池通小院卧房阶下插鱼竿

篱下先生时得醉瓮间吏部暂偷闲何如家酝双鱼榼雪夜花时长在前

鸳鸯怕捉竟难亲鸚鵡虽笼不着人何似家禽双白鹤闲行一步亦随身

老来生计

老来生计君看取白日游行夜醉吟陶令有田唯种黍邓家无子不留金人间荣耀因缘浅林下幽闲气味深烦虑渐销虚白长一年心胜一年心

早春题少室东岩

三十六峰晴雪销岚气生月留三夜宿春引四山行远草初含色寒禽未变声东岩最高石唯我有题名

早春即事

眼重朝眠足头轻宿酒醒阳光满前户雪水半中庭物变随天气春生逐地形北檐梅晚白东岸柳先青葱蘢抽羊角松巢堕鹤翎老来诗更拙吟罢少人听

叹春风兼赠李二十侍郎二绝

树根雪尽催花发池岸冰消放草生唯有须霜依旧白春风於我独无情

道场斋戒今初毕酒伴欢娱久不同不把一杯来劝我无情亦得似春风

春来频与李二宾客郭外同游因赠长句

风光引步酒开颜送老消春嵩洛间朝蹋落花相伴出暮随飞鸟一时还我为病叟诚宜退君是才臣岂合闲可惜济时心力在放教临水复登山

二月二日

二月二日新雨晴草芽菜甲一时生轻衫细马春年少十字津头一字行

春和令公绿野堂种花

绿野堂开占物华路人指道令公家令公桃李满天下何用堂前更种花

清明日登老君阁望洛城赠韩道士

风光烟火清明日歌哭悲欢城市间何事不随东洛水谁家又葬北邙山中桥车马长无已下渡舟航亦不闲冢墓累累人扰扰辽东怅望鹤飞还

三月三日

画堂三月初三日絮扑纱窗燕拂檐莲子数杯尝冷酒柘枝一曲试春衫阶临池面胜看镜户映花藜当下帘指点楼南玩新月玉钩素手两纖纖

雨中听琴者弹鹤操

双鹤分离一何苦连陰雨夜不堪闻莫教迁客孀妻听嗟叹悲啼?杀君

酬郑二司录与李六郎中寒食日相过同宴见赠【二人并是同年】

偶因冷节会嘉宾况是平生心所亲迎接须矜疎傅老只供莫笑阮家贫杯盘狼籍宜亲夜风景阑珊欲过春相对喜欢还怅望同年只有此三人

喜杨六侍御同宿

岸帻静言明月夜匡牀闲卧落花朝二三月里饶春睡七八年来不早朝浊水清尘难会合高鹏低鷃各逍遥眼看又上青云去更卜同衾一两宵

残春咏怀赠杨暮巢侍郎

位逾三品日【太子少傅官三品】年过六旬时【予今年六十五】不道官班下其如筋力衰犹怜好风景转重旧亲知少壮难重得欢娱且强为兴来池上酌醉出袖中诗静话开襟久闲吟放盏迟落花无限雪残鬓几多丝莫说伤心事春翁易酒悲

闲居春静

闲泊池州静掩扉老身慵出客来稀愁应暮雨留教住春被残鷃唤遣归揭瓮偷尝新熟酒開箱试着旧生衣冬裘夏葛相催促垂老光陰速似飞

春尽日天津桥醉吟偶呈李尹侍郎

宿雨洗天津无泥未有尘初晴迎早夏落照送残春兴发诗随口狂来酒寄身水边行嵬峨桥上立逡巡疎傅心情老吴公政化新三川徒有主风景属闲人

池上逐凉二首

青苔地上消残暑綠树陰前逐晚凉轻屐单衫薄纱帽浅池平岸痺【毗意切】藤床簪纓怪我情何薄泉石谙君味甚长徧问交亲为老计多言宜静不宜忙

窻间睡足休高枕水伴行来上小船棹遣秃头奴子拨茶教纖手侍儿煎门前便是红尘地林

外无非赤日天谁信好风清簟上更无一事但翛然

香山避暑二絕

六月滩声如猛雨香山楼北畅师房夜深起凭阑干立满耳潺湲满面凉

纱巾草履竹疎衣晚下香山蹋翠微一路凉风十八里卧乘篮輶睡中归

老夫

七八年来游洛都三分游伴二分无风前月下花园里处处唯残个老夫世事劳心非富贵人生实事是欢娱谁能逐我来闲坐时共酣歌倾一壶

香山卜居

老须为老计老计在抽簪山下初投足人间久息心乱藤遮石壁絕涧护云林若要深藏处无如此处深

无长物

莫讶家居窄无嫌活计贫只缘无长物始得作闲人青竹单床簟乌纱独幅巾其余皆称是亦足奉吾身宿香山寺酬广陵牛相公见寄【来诗云唯美东都白居易月明香积问禅师时牛相三表乞退有诏不许】

手札八行诗一篇无由相见但依然君匡圣主方行道我是空王正坐禅支许徒思游白月夔龙未放下青天应须且为苍生住犹去悬车十四年【牛相公今年五十七】

以诗代书寄户部杨侍郎劝买东邻王家宅

劝君买取东邻宅与我衡门相并开云映高峰当户牖月和伊水入池台林园亦要趣闲置筋力应须及健回莫学因循白宾客欲年六十始归来

赠谈客

上客清谈何亹亹幽人闲思自寥寥请君休说长安事膝上风清琴正调

初入香山院对月【太和六年秋作】

老住香山初到夜秋逢白月正圆时从今便是家山月试问清光知不知

题龙门堰西涧

东岸菊丛西岸柳柳阴烟合菊花开一条秋水琉璃色濶狭才容小舫回
除却悠悠白少傅何人解入此中来秋霖中奉裴令公见招早出赴会马上先寄六韵

雨闇三秋日泥深一尺时老人平旦出自欲问何之不是寻医药非干送别离
素书传好语绦帐赴佳期续借桃花马催迎杨柳姬只愁张録事罚我怪来迟

尝酒听歌招客

一瓮香醪新插刍双鬟小妓薄能讴管弦渐好新教得罗绮虽贫免外求
世上贪忙不觉苦人间除醉即须愁不知此事君知否君若知时从我游

八月三日作

露白月微明天凉景物清草头珠颗冷楼角玉钩生气爽衣裳健风疎砧杵鸣
夜衾香有思秋簟冷无情梦短眠频觉宵长起暂行烛凝临晓影虫怨欲寒声
槿老花先尽莲凋子始成四时无了日何用叹衰荣

病中赠南隣觅酒

头痛牙疼三日卧妻看煎药婢来扶今朝自按擡头语先问南隣有酒无

晓眠後寄杨户部

輭绌腰褥薄绵被凉冷秋天稳暖身一觉晓眠殊有味无因寄与早朝人

秋雨夜眠

凉冷三秋夜安闲一老翁卧迟灯灭後睡美雨声中灰宿温瓶火香添暖被
笼晓晴寒未起霜叶满阶红

喜梦得自冯翊归洛兼呈令公

上客新从左辅回高阳兴助洛阳才已将四海声名去又占三春风景来
甲子等头怜共老文章敌手莫相猜邹枚未用争诗酒且饮梁王贺喜杯

斋戒满夜戏招梦得

纱笼灯下道场前白日持斋夜坐禅无复更思身外事未能全尽世间缘明朝又拟亲杯酒今夕先闻理管弦方丈若能来问疾不妨兼有散花天

和令公问刘宾客归来称意无之作

水南秋一半风景未萧条早盖回沙苑蓝輦上洛桥闲尝黄菊酒醉唱紫芝谣称意那劳问请钱不早朝

酬梦得穷秋夜坐即事见寄

焰细灯将尽声遥漏正长老人秋向火小女夜缝裳菊悴篱经雨萍销水得霜今冬暖寒酒先拟共君尝偶于维扬牛相公处觅得箏箏未到先寄诗来走笔戏答【来诗云但愁封寄去魔物或惊禅】

楚匠饶巧思秦箏多好音如能会一面何啻直双金玉柱调须品朱弦染要深会教魔女弄不动是禅心

答梦得秋庭独坐见赠

林梢隐映夕阳残庭际萧疎夜气寒霜^二欲枯虫思急风枝未定鸟栖难容衰见镜同惆怅身健逢杯且喜欢应是天教相煖热一时垂老与闲官

长斋月满酒先与梦得对酌醉中同赴令公之宴戏赠梦得

斋宫前日满三旬酒榼今朝一拂尘乘兴还同访戴客解醒仍对姓刘人病心汤沃寒灰活老面花生朽木春若怕平原怪先醉知君未惯吐车茵

奉酬淮南牛相公思黯见寄二十四韵【每对双关分叙两意】

白老忘机客牛公济世贤鸥栖心恋水鹏举翅摩天累就优贤秩连操造化权贫司甚潇洒荣路自喧阗望苑三千日台阶十五年是人皆弃忘何物不陶甄【居易三任官寮皆分司东都于兹八载思黯出入外内凡十五年皆同平章事】蓝輦游嵩岭油幢镇海壖竹篙撑钓艇金甲拥楼船雪夜寻僧舍春朝列妓筵长斋俨香火密宴簇花钿自觉闲胜闹遥知醉笑禅是非未定会合杳无缘我正思杨府君应望洛川西来风嫋嫋南去雁连连日落龙门外潮生瓜步前秋同一时尽月共两乡圆旧眷交欢在新文气调全慙无白雪曲难答碧云篇金谷诗谁赏芜城赋衆传珠应晒鱼目鉞未伏龙泉远许惊魔物深情寄酒钱霜纨一百疋玉柱十三弦【思黯远寄箏来先寄诗云但愁封寄去魔物或惊禅仍与酒资同至】楚醪来樽里秦箏送耳边何时红烛下相对一陶然

吴秘监每有美酒独酌独醉但蒙诗报不以饮招辄此戏酬兼呈梦得

蓬山仙客下烟霄对酒唯吟独酌谣不怕道狂挥玉爵【记云饮玉爵者弗挥】亦曾乘兴换金貂【吴监前任散骑常侍】君称名士夸能饮【王孝伯云但常无事读离骚痛饮只可称名士】我是愚夫可见招【独酌谣云愚夫子不招】赖有伯伦为醉伴何愁不解傲松乔

酬梦得霜夜对月见怀

凄清冬夜景摇落长年情月带亲霜色碁和远雁声暖怜罍火近寒觉被衣轻枕上酬佳句诗成梦不成初冬月夜得皇甫泽州手扎并诗数篇因遣报书偶题长句

清冷玉韵两三章落箔银钩七八行心逐报书悬鴈足梦寻来路遶羊肠水南空地多明月山北天寒足早霜【履道所居在水南泽州在太行之北地也】最恨泼醅新熟酒迎君不得共君尝

雪中酒熟欲携访吴监先寄此诗

新雪对新酒忆同倾一杯自然须访戴不必待延枚【雪赋云延枚叟】陈榻无辞解袁门莫懒开笙歌与谈笑随事自将来

酬令公雪中见赠訝不与梦得同相访

雪似鹅毛飞散乱人披鹤氅立徘徊邹生枚叟非无兴唯待梁王召即来

题酒瓮呈梦得

若无清酒两三瓮争向白须千万茎麴蘖消愁真得力光陰催老苦无情凌烟阁上功无分伏火罍中药未成更拟共君何处去且来同作醉先生

迂叟

一辞魏阙就商宾散地闲居八九春初时被目为迂叟近日蒙呼作隐人冷煖俗情谙世路是非闲论任交亲应须绳墨机关外安置疎愚钝滞身

洛下闲居寄山南令狐相公

已收身向园林下犹寄名於禄仕间不锻嵇康弥懒静无金疏傅更贫闲支分门内余生计谢絶朝中旧往还唯是相君忘未得时思汉水梦巴山

惜春赠李尹

春色有时尽公门终日忙两衙但不阙一醉亦何妨芳树花团雪衰翁鬓扑霜知君倚年少未苦惜风光

对酒劝令公开春游宴

时泰岁丰无事日功成名遂自由身前头更有忘忧日向上应无快活人自去年来多事故从今日去少交亲宜须数数谋欢会好作开成第二春

与梦得偶同到敦诗宅感而题壁

山东才副苍生愿【汉书云山东出相】川上俄惊逝水波履道凄凉新宅第【敦诗宅在履道修造初成】宣城零落旧笙歌【崔家妓乐多归宣州也】园荒唯有薪堪采门冷兼无雀可罗今日相逢偶同到伤心不是故经过

杨六尚书新授东川节度使代妻戏贺兄嫂二絶

刘纲与妇共昇仙弄玉随夫亦上天何似沙哥领崔嫂碧油幢引向东川

金花银碗饶君用罨【遏合切】画罗衣尽嫂裁觅得黔娄为妹壻可能空寄蜀茶来

闲游即事

郊野游行熟村园次第过蓦山?浥涧蹋水渡伊河寒食青青草春风瑟瑟波逢人共杯酒随马有笙歌胜事经非少芳辰过亦多还须自知分不老拟如何

六十六

七十欠四岁此生那足论每因悲物故还且喜身存安得头长黑争教眼不昏交游成拱木婢仆见曾孙瘦觉腰金重衰怜鬓雪繁将何理老病应付与空门

池上早春即事招梦得

老更惊年改闲先觉日长晴熏榆荚黑春染柳梢黄云破山呈色冰融水放光低平稳舩舫轻暖好衣裳白角三升榼红茵六尺牀偶游难得伴独醉不成狂我有中心乐君无外事忙经过莫慵懒相去两三坊

因梦得题公垂所寄蜡烛因寄公垂

照梁初日光相似出水新莲艳不如却寄两条君令取明年双引入中书【宰相入朝举双烛余官各一】

令公南庄花柳正盛欲偷一赏先寄二篇

最忆楼花千万朵偏怜堤柳两三株拟提社酒携村妓擅入朱门莫怪无【映楼?花拂堤垂柳庄上最胜絶处故举以为对】

可惜亭台闲度日欲偷风景暂游春只愁花里莺饶舌飞入宫城报主人

春夜宴席上戏赠裴淄州

九十不衰真地仙【谓淄州也】六旬犹健亦天怜【予自谓也】今年相遇莺花月此夜同欢歌酒筵四座齐声和丝竹两家随分鬪金钿留君到晓无他意图向君前作少年

赠梦得

年顔老少与君同眼未全昏耳未聋放醉卧为春日伴趣欢行入少年丛?花借马烦川守弄水偷船恼令公闻道洛城人尽怪呼为刘白二狂翁

晚春欲携酒?沈四着作先以六韵寄之

病容衰惨澹芳景晚蹉跎无计留春得争能奈老何篇章慵报答杯讌喜经过顾我酒狂久负君诗债多【沈前後惠诗十余首春来多醉竟未酬答今故云尔】敢辞携绿蚁只愿见青娥最忆阳关唱真珠一串歌【沈有讴者善唱西出阳关无故人词】

开成二年三月三日河南尹李待价以人和岁稔将禊於洛滨前一日啓留守裴令公令公明日召太子少傅白居易太子宾客萧籍李仍叔刘禹锡前中书舍人郑居中国子司业裴恠河南少尹李道枢仓部郎中崔晋司封员外郎张可续驾部员外郎卢言虞部员外郎苗愔和州刺史裴俦淄州刺史裴洽检校礼部员外郎杨鲁士四门博士谈弘誉等一十五人合宴于舟中由斗亭历魏堤抵津桥登临沂沿自晨及暮簪组交映歌笑间发前水嬉而後妓乐左笔砚而右壶觞望之若仙观者如堵尽风光之赏极游泛之娱美景良辰赏心乐事尽得于今日矣若不记录谓洛无人晋公首赋一章铿然玉振顾谓四座继而和之居易举酒抽毫奉十二韵以献【座上作】

三月草萋萋黄莺歇又啼柳桥晴有絮沙路润无泥禊事修初毕游人到欲齐金钿耀桃李丝管駉鸕转岸回船尾临流簇马蹄闹翻扬子渡蹋破魏王堤妓接谢公宴诗陪荀令题舟同李膺泛醴为穆生携水引春心荡花牵醉眼迷尘街从鼓动烟树任鸦栖舞急红腰凝歌迟翠黛低夜归何用烛新月凤楼西

同梦得暮春寄贺东西川二杨尚书

龙节对持真可爱雁行相接更堪夸两川风景同三月千里江山属一家鲁卫定知连气色潘杨亦觉有光华【予与二公皆忝姻眷】应怜洛下分司伴冷宴闲游老看花

喜小楼西新柳抽条

一行弱柳前年种数尺柔条今日新渐欲拂他骑马客未多遮得上楼人须教碧玉羞眉黛莫与红桃作麴尘为报金堤千万树饶伊未敢苦争春

酒醒?梦得

料合同惆怅花残酒亦残醉心忘老易醒眼别春难独出虽慵懒相逢定喜欢还携小蛮去试觅老刘看【小蛮酒榼名也】

感事

服气崔常侍【晦叔】烧丹郑舍人【居中】常期生羽翼那忽化灰尘每遇凄凉事还思潦倒身唯知趁杯酒不解链金银睡适三尸性慵安五脏神无忧亦无喜六十六年春和裴令公南庄一絶【裴云野人不识中书令唤作陶家与谢家】

陶庐僻陋那堪比谢墅幽微不足攀何似嵩峰三十六长随申甫作家山

宅西有流水墙下构小楼临翫之时颇有幽趣因命歌酒聊以自娱独醉独吟偶题五絶

伊水分来不自由无人解爱为谁流家家抛向墙根底唯我栽莲越小楼

水色波文何所似麴尘罗带一条斜莫言罗带春无主自置楼来属白家

日灩水光摇素壁风飘树影拂朱栏皆言此处宜弦管试奏霓裳一曲看

霓裳试罢唱梁州红袖斜翻翠黛愁应是遥闻胜近听行人欲过尽回头

独醉还须得歌舞自娱何必要亲宾当时一部清商乐亦不长将乐外人

偶作

蓝舂出即忘归舍柴户昏犹未掩关闻客病时慙体健见人忙处觉心闲清凉秋寺行香去和暖春城拜表还木雁一篇须记取致身才与不才间

同梦得酬牛相公初到洛中小饮见赠【时牛相公辞罢扬州节度就拜东都留守】

淮南挥手抛红旆洛下回头向白云
政事堂中老丞相制科场里旧将军
宫城烟月饶全占关塞风光请半分
诗酒放狂犹得在莫欺白叟与刘君

幽居早秋闲咏

幽僻嚣尘外清凉水木间
卧风秋拂簟步月夜开关
且得身安泰从他世险艰
但休争要路不必入深山
轩鹤留何用泉鱼放不还
谁人知此味临老十年闲

和令狐仆射小饮听阮咸

掩抑复凄清非琴不是箏
还弹乐府曲别占阮家名
古调何人识初闻满座惊
落盘珠历历摇佩玉琤琤
似劝杯中物如含林下情
时移音律改岂是昔时声

烧药不成命酒独醉

白发逢秋王丹砂见火空
不能留姹女争免作衰翁
赖有杯中绿能为面上红
少年心不远只在半酣中

送庐郎中赴河东裴令公幕

别时暮雨洛桥岸到日凉风汾水波
荀令见君应问我为言秋草闭门多

送李滁州

君於觉路深留意我亦禅门薄致功
未悟病时须去病已知空後莫依空
白衣卧病嵩山下皁盖行春楚水东
谁道三年千里别两心同在道场中

长斋月满寄思黯

一日不见如三月一月相思如七年
似隔山河千里地仍当风雨九秋天
明朝斋满相寻去挈榼抱衾同醉眠

冬夜对酒寄皇甫十

霜杀中庭^一冰生後院池有风空动树
无叶可辞枝十月苦长夜百年强半时
新开一瓶酒那得不相思

岁除夜对酒

衰翁岁除夜对酒思悠然^ㄗ白经霜地云黄欲雪天醉依香枕坐慵傍暖罍眠洛下闲来久明朝是十年

白氏长庆集卷三十三

卷三十四

钦定四库全书

白氏长庆集卷三十四

唐白居易撰

律诗【凡七十五首】

司徒令公分守东洛移镇北都一心勤王三月成政形容盛德实在歌诗况辱知音敢不先唱
辄奉五言四十韵寄献以抒下情

天上中台正人间一品高【中书令上应中台司徒官一品】休明值尧舜勲业过萧曹始擅
文三捷【进士及第博学制策连登三科】终兼武六韬动人名赫赫忧国意忉忉荡蔡擒封
豕【吴元济也】平齐斩巨鳌【李师道也】两河收土宇四海定波涛宠重移官衾【自东
都留守授北京留守】恩新换阊旄保厘东宅静【周公召公东治洛宅】守护北门牢晋国
封疆濶并州士马豪胡兵惊赤帜边鴈避乌号令下流如水仁沾泽似膏路喧歌五袴军醉感
单醪将校森貔武宾僚俨雋髦客无烦夜柝吏不犯秋毫神在台骀助魂亡玃犹逃德星销彗
孛霖雨灭腥臊烽戍高临代关河远控洮汾云晴漠漠朔吹冷飐飐豹尾交牙戟蚪须捧佩刀
通天白犀带照地紫麟袍羌管吹杨柳燕姬酌蒲【普模切】萄【葡萄酒出太原】银含凿
落盞金屑琵琶槽遥想从军乐应忘报国劳紫微留北阙【中书令即紫微令也】緑野寄东
臯【緑野堂在东都午桥庄也】忽忆前时会多慙下客叨清宵陪讌话美景从游邀花月还
同赏琴诗雅自操朱弦拂宫徵洪笔振风骚近竹开方丈依林架桔槔春池八九曲画舫两三
艘径滑苔粘屐潭深水没蒿緑丝萦岸柳红粉映楼桃【皆午桥庄中佳境】为穆先陈醴【
居易每十斋日在会常蒙以二勒汤代酒也】招刘共藉糟【刘梦得也】舞鬟金翡翠歌颈
玉蛴螬盛德终难过明时岂易遭公虽慕张范【张良范蠡】帝未舍伊臯眷恋心方结踟蹰
首已搔鸾凰上寥廓燕雀住蓬蒿欲献文狂简徒烦思郁陶可怜四百字轻重抵鸿毛

和东川杨慕巢尚书府中独坐感戚在怀见寄十四韵【慕巢感戚?州弟丧逝感已之荣盛有
归洛之意故叙而和之也】

我是知君者君今意若何穷通时不定苦乐事相和东蜀欢殊渥西江叹逝波只缘荣贵极翻
使感伤多行断风惊鴈【慕巢及杨九杨十前年来兄弟三人各在一处】年侵日下坡片心
休惨戚双鬓已蹉跎紫绶黄金印青幢白玉珂老将荣补贴愁用道消磨外府饶盃酒中堂有
绮罗应须引满饮何不放狂歌锦水通巴峡香山对洛河将军驰铁马少傅步铜驼深契怜松
竹高情忆薜萝悬车年甚远未敢故相过

分司洛中多暇数与诸客宴游醉後狂吟偶成十韵因招梦得宾客兼呈思黯奇章公

性与时相远身将世两忘寄名朝士籍寓兴少年场老岂无谈笑贫犹有酒浆随时求伴侣逐日用风光数数游何爽些些病未妨天教荣啓乐人怨接輿狂改业为逋客移家住醉乡不论招梦得兼拟诱奇章要路风波险权门市井忙世间无可恋不是不思量

小岁日喜谈氏外孙女孩满月

今旦夫妻喜他人岂得知自嗟生女晚敢讶见孙迟物以稀为贵情因老更慈新年逢吉日满月乞名时桂燎熏花果兰汤洗玉肌怀中有可抱何必是男儿

闲吟赠皇甫郎中亲家翁【新与皇甫结婚】

谁能嗟叹光阴暮岂复忧愁活计贫忽忽不知头上事时时犹忆眼中人早为良友非交势晚接嘉姻不失亲最喜两家婚嫁毕一时抽得尚平身

梦得卧病携酒相寻先以此寄

病来知少客谁可以为娱日晏开门未秋寒有酒无自宜相慰问何必待招呼小疾无妨饮还须挈一壶

酬思黯戏赠【同用狂字】

锺乳三千两金钗十二行妬他心似火欺我鬓如霜【思黯自夸前後服锺乳三千两甚得力而歌舞之妓颇多来诗戏予羸老故戏答之】慰老资歌笑销愁仰酒浆眼看狂不得狂得且须狂

又戏答絶句【来句云不是道公狂不得恨公逢我不教狂】

狂夫与我世相忘故态些些亦不妨纵酒放歌聊自乐接輿争解教人狂

令狐相公与梦得交情素深眷予分亦不浅一闻薨逝相顾泫然旋有使来得前月未歿之前数日书及诗寄赠梦得哀吟悲叹寄情於诗诗成示予感而继和

緘题重叠语殷勤存歿交亲自此分前月使来犹理命今朝诗到是遗文银鈎见晚书无报玉树埋深哭不闻最感一行絶笔字尚言千万乐天君【令狐与梦得手扎後云见乐天君为伸千万之诚也】

洛下雪中频与刘李二宾客宴集因寄汴州李尚书

水南水北雪纷纷雪里欢游莫厌频日日闇来唯老病年年少去是交亲碧氍毹梅花湿红
燎爇香竹叶春今日邹枚俱在洛梁园置酒召何人

看梦得题答李侍郎诗诗中有文星之句因戏和之

看题锦绣报琼瓊俱是人天第一才好遣文星守躔次亦须防有客星来

闲适

禄俸优饶官不卑就中闲适是分司风光暖助游人处雨雪寒供饮宴时肥马轻裘还且有麤
歌薄酒亦相随微躬所要今皆得只是蹉跎得校迟

戏答思黯【思黯有能箏者以此戏之】

何时得见十三弦待取无云有月天愿得金波明似镜镜中照出月中仙

酬裴令公赠马相戏【裴诗云君若有心求逸足我还留意在名姝盖引妾换马戏意亦有所
属也】

安石风流无奈何欲将赤骥换青娥不辞便送东山去临老何人与唱歌

新岁赠梦得

暮齿忽将及同心私自怜渐衰宜减食已喜更加年紫绶行联袂蓝輦出比肩与君同甲子岁
酒合谁先

早春持斋答皇甫十见赠

正月晴和风气新纷纷已有醉游人帝城花笑长斋客三十年来负早春

戏赠梦得兼呈思黯

霜鬓莫欺今老矣【传曰今老矣无能为也】一杯莫笑便陶然陈郎中处为高户裴使君前
作少年【陈商郎中酒户?滴裴洽使君年九十余】顾我独狂多自哂与君同病最相怜月终
斋满谁开素须拟奇章置一筵

早春忆游思黯南庄因寄长句

南庄胜处心常忆借问轩车早晚游美景难忘竹廊下好风争奈柳桥头冰消见水多於地雪

霁看山尽入楼若待春深始同赏
莺残花落却堪愁

酬皇甫十早春对雪见赠

漠漠复霏霏东风散玉尘
明催竹窻晓寒退柳园春
绿醕香堪忆红罍暖可亲
忍心三两日莫作破斋人

奉和思黯自题南庄见示兼呈梦得

谢家别墅最新奇山展屏风花夹篱
晓月渐沉桥脚底晨光初照屋梁时
台头有酒莺呼客水面无尘风洗池
除却吟诗两闲客此中情状更谁知

送蕲春李十九使君赴郡

可怜官职好文词五十专城未是迟
晓月镜前无白发春风门外有红旗
郡中何处堪携酒席上谁人解和诗
唯共交亲开口笑知君不及洛阳时

自题酒库

野鹤一辞笼虚舟长任风送愁
还閒处移老入闲中身更求何事
天将富此翁此翁何处富酒库
不曾空【刘仁轨诗云天将富此翁以一醉为富也】

寒食日寄杨东川

不知杨六逢寒食作底欢娱过此辰
兜率寺高宜望月嘉陵江近好游春
蛮旗似火行随马蜀妓如花坐遶身
不使黔娄夫妇看夸张富贵向何人

醉後听唱桂花曲【诗云遥知天上桂花孤
试问嫦娥更有无月中幸有闲田地何不中央种
两株此曲韵怨切听辄感人故云尔】

桂华词意苦丁宁唱到嫦娥醉便醒
此是人间肠断曲莫教不得意人听

酬梦得以予五月长斋延僧徒絶宾友见戏十韵

宾客懒逢迎翛然池馆清
檐闲空鶯语林静未蝉鸣
荤血还休食杯觞亦罢倾
三春多放逸五月暂修行
香印朝烟细纱灯夕焰明
交游诸老师事古先生【竺乾古先生也】
禅後心弥寂斋来体更轻
不唯忘肉味兼拟灭风情
蒙以声闻待难将戏论争
虚空若有佛灵运恐先成
奉和裴令公三月上巳日游太原龙泉忆去岁禊洛见示之作【依来体杂言】

去岁暮春上巳共泛洛水中流今岁暮春上巳独立香山下头风光闲寂寂旌旆远悠悠丞相府归晋国太行山碍并州鹏背负天龟曳尾云泥不可得同游

又和令公新开龙泉晋水二池

旧有潢污泊今为白水塘【诗云方塘含白水】笙歌闻四面楼阁在中央春变烟波色晴添树木光龙泉信为美莫忘午桥庄

早夏晓兴赠梦得

窻明帘薄透朝光卧整巾簪起下牀背壁灯残经宿焰开箱衣带隔年香无情亦任他春去不醉争消得昼长一部清商一壶酒与君明日暖新堂

春日题乾元寺上方最高峰亭

危亭絶顶四无邻见尽三千世界春但觉虚空无障碍不知高下几由旬回看官路三条线却望都城一片尘宾客暂游无半日王侯不到便终身始知天造空闲境不为忙人富贵人

奉和思黯相公以李苏州所寄太湖石奇状絶伦因题二十韵见示兼呈梦得

错落复崔嵬苍然玉一堆峰駢仙掌出罅坼剑门开峭顶高危矣盘根下壮哉精神欺竹树气色压亭台隐起磷磷状凝成瑟瑟胚【铺杯切】廉棱露锋刃清越扣琼瑰【妬回切】岌嶮【鱼怯切】形将动巍峩势欲摧奇应潜鬼怪灵合蓄云雷黛润沾新雨斑明点古苔未曾栖鸟雀不肯染尘埃尖削琅玕笋洼【乌瓜切】剜【乌官切】玛瑙疊海神移碣石画障簇天台在世为尤物如人负逸才渡江一苇载入洛五丁推出处虽无意升沉亦有媒【媒为李苏州】拔从水府底置向相庭隈对称吟诗句看宜把酒杯终随金砺用不学玉山颓疏傅心偏爱园公眼屡回共嗟无此分虚管太湖来【居易与梦得俱典姑苏而不获此石】

奉和思黯相公雨後林园四韵见示

新晴夏景好复此池边地烟树緑含滋水风清有味便成林下隐都忘门前事骑吏引归轩始知身富贵晚夏闲居絶无宾客欲?梦得先寄此诗

鱼笋朝飡饱蕉纱暑服轻欲为窻下寝先傍水边行晴引鹤双舞秋生蝉一声无人解相访有酒共谁倾老更谙时事闲多见物情只因刘与白二叟自相迎

寄李蕲州

下车书奏龚黄课动笔诗传鲍谢风江郡讴谣夸杜母洛城欢会忆车公笛愁春尽梅花里簾

冷秋生薤叶中【蕲州出好笛并薤叶簟】不道蕲州歌酒少使君难称与谁同

忆江南词三首【此曲亦名谢秋娘每首五句】

江南好风景旧曾谙日出江花红似火春来江水绿如蓝能不忆江南

二

江南忆最忆是杭州山寺月中?桂子郡亭枕上看潮头何日更重游

三

江南忆其次忆吴宫吴酒一杯春竹叶吴娃双舞醉芙蓉早晚复相逢

酬思黯相公晚夏雨後感秋见赠

暮来朝去无歇期炎凉闇向雨中移夜长祇合愁人觉秋冷先应瘦客知两幅彩笺挥逸翰一声寒玉振清辞无忧无病身荣贵何故沉吟亦感时

久雨闲闷对酒偶吟

凄凄苦雨闇铜駝嫋嫋凉风起漕【在到切】河自夏及秋晴日少从朝至暮闷时多鹭临池立窥鱼笱【举後切】隼傍林飞拂雀罗赖有杯中神圣物百忧无奈十分何

雨後秋凉

夜来秋雨後秋气飒然新团扇先辞手生衣不着身更添砧引思难与簟相亲此境谁偏觉贫闲老瘦人

酬梦得早秋夜对月见寄

吾衰寡情趣君病懒经过其奈西楼上新秋明月何庭芜凄白露池色澹金波况是初长夜东城砧杵多

题谢公东山障子

贤愚共在浮生内贵贱同趋羣动间多见忙时已衰病少闻健日肯休闲鹰饥受縶【先结切】从难退鹤老乘轩亦不还唯有风流谢安石拂衣携妓入东山

谢杨东川寄衣服

年年衰老交游少处处萧条书信稀唯有巢兄不相忘春茶未断寄秋衣

咏怀寄皇甫朗之

老大多情足往还招僧待客夜开关学调气後衰中健不用心来閒处闲养病未能辞薄俸忘名何必入深山与君别有相知分同置身於木鴈间

东城晚归

一条邛杖悬龟榼双角吴童控马衔晚入东城谁识我短靴低帽白蕉衫

与梦得沽酒闲饮且约後期

少时犹不忧生计老後谁能惜酒钱共把十千沽一斗相看七十欠三年闲徵雅令穷经史醉听清吟胜管弦更待菊黄家醖熟共君一醉一陶然

与牛家妓乐雨夜合宴

玉管清弦声旖旎翠钗红袖坐参差两家合奏洞房夜八月连陰秋雨时歌脸有情凝睇久舞腰无力转裙迟人间欢乐无过此上界西方即不知

和杨六尚书喜两弟汉公转吴兴鲁士赐章服命宾开宴用庆恩荣赋长句见示

华筵贺客日纷纷剑外欢娱洛下闻朱绂宠光新照地彤檐喜气远凌云荣联花萼诗难和乐助埙篪酒易醺感美料应知我意今生此事不如君

自咏

须白面微红醺醺半醉中百年随手过万事转头空卧疾瘦居士行歌狂老翁仍闻好事者将我画屏风梦得相过援琴命酒因弹秋思偶咏所怀兼寄继之待价二相府

闲居静侣偶相招小饮初酣琴欲调我正风前弄秋思君应天上听云韶【云韶雅曲上多与宰相同听之】时和始见陶钧力物遂方知盛圣朝双凤栖梧鱼在藻飞沉随分各逍遥

九月八日酬皇甫十见赠

君方对酒缀诗章我正持斋坐道場处处追游虽不去时时吟咏亦无妨霜蓬旧鬓三分白露

菊新花一半黄惆怅东篱不同醉陶家明日是重阳

慕巢尚书书云室人欲为置一歌者非所安也以诗相报因而和之

东川已过二三春南国须求一两人富贵大都多老大欢娱大半为亲宾如愁翠黛应堪重买笑黄金莫诉贫他日相逢一杯酒樽前还要落梁尘

杪秋独夜

无限少年非我伴可怜清夜与谁同欢娱牢落中心少亲故凋零四面空红叶树飘风起後白须人立月明中前头更有萧条物老菊衰兰三两丛

凭李睦州访徐凝山人【凝即睦州之民也】

郡守轻诗客乡人薄钓翁解怜徐处士唯有李郎中

苏州故吏

江南故吏别来久今日池边识我无不独使君头似雪华亭鹤死白莲枯【莲鹤皆苏州同来】

得杨湖州书颇夸抚民接宾纵酒题诗因以絶句戏之

岂独爱民兼爱客不唯能饮又能文白苹洲上春传语柳使君输杨使君

天宫阁秋晴晚望

洛城秋霁後梵阁暮登时此日风烟好今秋节候迟霞光红泛艳树影碧参差莫虑言归晚牛家有宿期

酬梦得暮秋晴夜对月相忆

霁月光如练盈庭复满池秋深无热後夜浅未寒时露叶团荒菊风枝落病梨相思懒相访应是各年衰同梦得和思黯见赠来诗中先叙三人同讌之欢次有叹鬓发渐衰嫌孙子催老之意因酬妍唱兼吟鄙怀

醉伴腾腾白与刘何朝何夕不同游留连灯下明犹饮断送樽前倒即休催老莫嫌孙稚长加年须喜鬓毛秋教他伯道争存活无子无孙亦白头

听歌

管妙弦清歌入云老人合眼醉醺醺诚知不及当年听犹觉闻时胜不闻

三年冬随事铺设小堂寝处稍似稳暖因念衰病偶吟所怀

小宅非全陋中堂不甚卑聊堪会亲族足以贮妻儿暖帐迎冬设温罍向夜施裘新青兔褐褥
软白猿皮似鹿依深草如鸡宿稳枝逐身安枕席随事有屏帷病致衰残早贫营活计迟由来
蚕老後方是茧成时

初冬即事呈梦得

青毡帐暖喜微雪红地氍毹深宜早寒走笔小诗能与否泼醅新酒试尝看僧来乞食因留宿客
到开樽便共欢临老交亲零落尽希君恕我取人宽

自罢河南已换七尹每一入府怅然旧游因宿内厅偶题西壁兼呈韦尹常侍

每日河南府依然自到家杯尝七尹酒【七君酒味不同备尝之矣】树看十年花【即府中新
菓园】且健须欢喜虽衰莫叹嗟迎门无故吏侍坐有新娃暖阁谋宵宴寒庭放晚衙主人
留宿定一任夕阳斜

天寒晚起引酌咏怀寄许州王尚书汝州李常侍

叶覆冰池雪满山日高慵起未开关寒来更亦无过醉老後何由可得闲四海故交唯许汝十
年贫健是樊蛮相思莫忘樱桃会一放狂歌一破颜【樱桃时数与许汝二君欢会甚乐】

四年春

柳梢黄嫩草芽新又入开成第四春近日放慵多不出少年嫌老可相亲分司吉傅频过舍致
仕崔卿拟卜邻时辈推迁年事到往还多是白头人

白发

白发生来三十年而今须鬓尽皤然歌吟终日如狂叟衰疾多时似瘦仙八戒夜持香火印三
光朝念药珠篇其余便被春收拾不作闲游即醉眠

追欢偶作

追欢逐乐少间时补贴平生得事迟何处花开曾後看谁家酒熟不先知石楼月下吹芦管金

谷风前舞柳枝十听春啼变鸂舌三嫌老丑换蛾眉乐天一过难知分犹自咨嗟两鬓丝【芦管柳枝已下皆十年来洛中之事】

公垂尚书以白马见寄光洁稳善以诗谢之

翩翩白马称金羁领缀银花尾曳丝毛色鲜明人尽爱性灵驯善主偏知免将妾换慙来处试使奴牵欲上时不蹶不惊行步稳最宜山简醉中骑

西楼独立

身着白衣头似雪时时醉立小楼中路人回顾应相怪十一年来见此翁

书事咏怀

官俸将生计虽贫岂敢嫌金多输陆贾酒足胜陶潜【陶潜诗云常苦酒不足】牀暖僧敷坐楼晴妓卷帘日遭斋破用【每月常持十斋】春赖闰加添【是年闰正月也】老向欢弥切狂於饮不廉十年闲未足亦恐涉无厌

酬梦得比萱草见赠【来篇云唯君比萱草相见可忘忧】

杜康能散闷萱草解忘忧借问萱逢杜何如白见刘老衰胜少夭闲乐笑忙愁试问同年内何人得白刘

问皇甫十

苦乐心由我穷通命任他坐倾张翰酒行唱接舆歌荣盛傍看好优闲自适多知君能断事胜负两如何

早春独登天宫阁

天宫日暖阁门开独上迎春饮一杯无限游人遥怪我缘何最老最先来

送苏州李使君赴郡二絶句

忆抛印绶辞吴郡衰病当时已有余今日贺君兼自喜八回看换旧铜鱼【予自罢苏州及兹换八刺史也】

二

館娃宮深春日長【館娃宮今靈岩寺也】烏鵲橋高秋夜涼【烏鵲橋在蘇州南門】風月
不知人世變奉君直似奉吳王

長洲曲新詞

茂苑綺羅佳麗地女湖桃李艷陽時心奴已死胡容老後輩風流是阿誰

白氏長慶集卷三十四

卷三十五

<集部,别集类,汉至五代,白氏长庆集>

钦定四库全书

白氏长庆集卷三十五

唐白居易撰

律诗【一百首】

病中诗十五首

开成已未岁余蒲柳之年六十有八冬十月甲寅旦始得风痺之疾体癯【音关】目眩左足不支盖老病相乘时而至耳余早栖心释梵浪迹老庄因疾观身果有所得何则外形骸而内忘忧患先禅观而後顺鬻治旬月以还厥疾少间杜门高枕澹然安闲吟讽兴来亦不能遏因成十五首题为病中诗且贻所知兼用自广昔刘公干病漳浦谢康乐卧临川咸有篇章抒咏其志今引而序之者虑不知我者或加诮焉

初病风

六十八衰翁乘衰百疾攻朽株难免蠹空穴易来风肘痺宜生柳头旋剧转蓬恬然不动处虚白在胷中

枕上作

风疾侵袭临老头血凝筋滞不调柔甘从此後支离卧赖是从前烂熳游回思往事纷如梦转觉余生杳若浮浩气自能充静室惊飈何必荡虚舟腹空先进松花酒膝冷重装桂布裘若问乐天忧病否乐天知命了无忧

答闲上人问因何风疾

一床方丈向阳开劳动文殊问疾来欲界凡夫何足道四禅天始免风灾

病中五絕

世间生老病相随此事心中久自知今日行年将七十犹须慙愧病来迟

方寸成灰鬓作丝假如强健亦何为家无忧累身无事正是安闲好病时

李君墓上松应拱元相池头竹尽枯多幸乐天今始病不知合要苦治无【李元皆予执友也
杓直少予八岁即世已九年微之少予七年梦已八年矣今予始病得非幸乎】

目昏思寝即安眠足软妨行便坐禅身作医王心是药不劳和扁到门前

交亲不要苦相忧亦拟时时强出游但有心情何用脚陆乘肩舆水乘舟

送嵩客

登山临水分无期泉石烟霞今属谁君到嵩阳吟此句与教三十六峯知

罢灸

病身佛说将何喻变灭须臾岂不闻莫遣净名知我笑休将火艾灸浮云【维摩经云是身如
浮云须臾变灭也】

卖骆马

五年花下醉骑行临卖回头嘶一声项籍顾骓犹解叹乐天别骆岂无情

别柳枝

两枝杨柳小楼中婀娜多年伴醉翁明日放归归去後世间应不要春风

就暖偶酌戏诸诗酒旧侣

低屏软褥卧藤床昇向前轩就日阳一足任他为外物三盃自要沃中肠头风若见诗应愈齿
折仍夸笑不妨细酌徐吟犹得在旧游未必便相忘

岁暮呈思黯相公皇甫朗之及梦得尚书

岁暮皤然一老夫十分流辈九分无莫嫌身病人扶侍犹胜无身可遣扶

自解

房传往世为禅客【世传房太尉前生为禅僧与娄师德友善慕其为人故今生有娄之遗风也】王道前生应画师【王右丞相诗云宿世是词客前身应画师】我亦定中观宿命多生债负是歌诗不然何故狂吟咏病後多於未病时【已上病中十五首】

岁暮病怀赠梦得【时与梦得同患足疾】

十年四海故交亲零落唯残两病身共遣数奇从是命同教步蹇有何因眼随老减嫌长夜体待阳舒望早春新乐堂前旧池上相过亦不要他人

雪後过集贤裴令公旧宅有感

梁王捐馆後枚叟过门时有泪人还泣无情雪不知台亭留尽在宾客散何之唯有萧条鴈时来下故池

酬梦得贫居咏怀见赠

岁陰生计两蹉跎相顾悠悠醉且歌厨冷难留乌止屋【诗云瞻乌爰止于谁之屋言乌多止富家之屋也】门闲可与雀张罗病添庄舄吟声苦贫欠韩康药债多日望挥金贺新命【来篇云若有金挥胜二疏】俸钱依旧又如何【时梦得罢宾客除秘监禄俸略同故云】

酬梦得见喜疾瘳

暖卧摩绵褥晨倾药酒螺昏昏布裘底病醉睡相和末疾徒云尔【传云风淫末疾末谓四肢】余年有几何须知差与否相去校无多

夜闻箏中弹潇湘送神曲感旧

缥缈巫山女归来七八年殷勤湘水曲留在十三弦苦调吟还出深情咽不传万重云水思今夜月明前

感苏州旧舫

画梁朽折红窗破独立池边尽日看守得苏州舫烂此身争合不衰残

感旧石上字

闲拨船行旧池幽情往事复谁知太湖石上镌三字十五年前陈结之

见敏中初到邠宁秋日登城楼诗诗中颇多乡思因以寄和【从殿中侍御史出副邠宁】

想尔到边头萧条正值秋二年贫御史八月古邠州丝管闻虽乐风沙见亦愁望乡心若苦不用数登楼

斋戒

每日斋戒断荤腥渐觉尘劳染爱轻六贼定知无气色三尸应恨少恩情酒魔降伏终须尽诗债填还亦欲平从此始堪为弟子竺乾师是古先生

戏礼经老僧

香火一罏灯一盏白头夜礼佛名经何年饮着声闻酒直到如今醉未醒

近见慕巢尚书诗中屡有叹老思退之意又於洛下新置郊居然宠寄方深归心太速因以长句戏而谕之

近见诗中叹白发遥知阕外忆东都烟霞偷眼窥来久富贵粘身摆得无新置林园犹濩落未终婚嫁且踟蹰应须待到悬车岁然後东归伴老夫

对镜偶吟赠张道士抱元

闲来对镜自思量年貌衰残分所当白发万茎何所怪丹砂一粒不曾尝眼昏久被书料理肺渴多因酒损伤今日逢师虽已晚枕中治老有何方

病入新正

枕上惊新岁花前念旧欢是身老所逼非意病相干风月情犹在盃觞兴渐阑便休心未伏更试一春看

卧疾来早晚

卧疾来早晚悬悬将十旬婢能?本草犬不吠医人酒瓮全生醪【普卜切】歌筵半委尘风光还欲好争向枕前春

强起迎春戏寄思黯

杖策人扶废病身晴和强起一迎春他时蹇跛纵行得笑杀平原楼上人

梦得前所酬篇有链尽美少年之句因思往事兼咏今怀重以长句答之

链尽少年成白首忆初相识到今朝昔饶春桂长先折今伴寒松取後凋【昔登科第梦得多居先今同暮年洛下为老伴】生事纵贫犹可过风情虽老未全销声华宠命人皆得若个如君历七朝【梦得贞元中及今凡仕七朝也】

病後寒食

故纱绦帐旧青氍药酒醺醺引醉眠抖擞弊袍春晚後摩挲病脚日阳前行无筋力寻山水坐少精神听管弦抛掷风光负寒食曾来未省似今年

老病相仍以诗自解

荣枯忧喜与彭殇都似人间戏一場虫臂鼠肝犹不怪鸡肤鹤发复何伤昨因风发甘长往今遇阳和又小康还似远行装束了迟回且住亦何妨

皇甫郎中亲家翁赴任绛州宴送出城赠别

慕贤入室交先定结援通家好复成新妇不嫌贫活计娇孙同慰老心情洛桥歌酒今朝散绛路风烟几日行欲识离羣相恋意为君扶病出都城

春暖

风痹宜和暖春来脚校轻鶯留花下立鹤引水边行发少嫌巾重顔衰讶镜明不论亲与故自亦昧平生

残春晚起伴客笑谈

掩户下帘朝睡足一声黄鸟报残春披衣岸帻日高起两角青衣扶老身策杖强行过里巷引盃闲酌伴亲宾莫嫌病後妨谈笑犹恐多於不病人

送唐州崔使君侍亲赴任

连持使节历专城独贺崔侯最庆荣乌府一抛霜简去朱轮四从板輿行【崔郎中从殿中连典四郡皆侍亲赴任】发时正许沙鸥送到日方乘竹马迎唯虑郡斋宾友少数盃春酒共谁倾

春晚咏怀赠皇甫朗之

艳阳时节又蹉跎迟暮光陰复若何一岁平分春日少百年通计老时多多中更被愁牵引少里兼遭病折磨赖有消忧治闷药君家浓酎我狂歌

春尽日宴罢感事独吟【开成五年三月三十日作】

五年三月今朝尽客散筵空独掩扉病共乐天相伴住春随樊子一时归闲听鶯语移时立思逐杨花触处飞金带縆腰衫委地年年衰瘦不胜衣

病中辱崔宣城长句见寄兼有觥绮之赠因以四韵總而酬之

刘桢病发经春卧谢眺诗来尽日吟三道旧夸收片玉【昔予考制策崔君登科也】一章新喜获双金信题霞绮絨情重酒试银觥表分深科第门生满霄汉岁寒少得似君心前有别杨柳枝絕句梦得继和云春尽絮飞留不得随风好去落谁家又复戏答

柳老春深日又斜任他飞向别人家谁能更学孩童戏寻逐春风捉柳花

池上早夏

水积春塘晚陰交夏木繁舟船如野渡篱落似江村静拂琴牀席香开酒库门慵闲无一事时弄小娇孙谈氏外孙生三日喜是男偶吟诗篇兼戏呈梦得

玉芽珠颗小男儿罗荐兰汤浴罢时茱萸春来盈女手梧桐老去长孙枝庆传媒氏鵷先贺喜报谈家乌预知明日贫翁具鸡黍应须酬赛引鸕诗【前年谈氏外孙女初生梦得有贺诗云从此引驾维今幸是男前言似有徵故云】

开成大行皇帝挽歌词四首奉敕撰进

御宇恢皇化传家叶至公华夷臣妾内尧舜弟兄中制度移民俗文章变国风开成与贞观实录事多同晏驾辞双阙灵仪出九衢上云归碧落下席葬苍梧莫晚余尧历龟新啓夏图三朝联棣萼从古帝王无严恭七月礼哀恻万人心地感深秋气天愁结夕陰鼎湖龙渐远蒙汜日初沉唯有云韶乐长留治世音化成同轨表清平恩结连枝感圣明帝与九龄虽吉梦山呼万岁是虚声月低仪仗辞兰路风引笳箫入柏城老病龙髯攀不及东周退傅最伤情

时热少客因咏所怀

冠栉心多懒逢迎兴渐微况当时甚热幸遇客来稀湿洒池边地凉开竹下扉露牀青篾簟风架白蕉衣院静留僧宿楼空放妓归衰残强欢宴此事久知非

宣州崔大夫阁老忽以近诗数十首见示吟讽之下窃有所喜因成长句寄题郡斋

谢玄晖歿吟声寝郡阁寥寥笔砚闲无复新诗题壁上虚教远岫列窗间【谢宣城郡内诗云窗中列远岫】忽惊歌雪今朝至必恐文星昨夜还再喜宣城章句动飞觴遥贺敬亭山【谢

又有题敬亭山诗并见文选中】

足疾

足疾无加亦不瘳绵春历夏复经秋开顏且酌樽中酒代步多乘池上舟幸有眼前衣食在兼无身後子孙忧应须学取陶彭泽但委心形任去留

晚池泛舟遇景成咏赠吕处士

岸浅桥平池面寬飘然轻棹泛澄澜风宜扇引开怀入树爱舟行仰卧看别境客稀知不易能诗人少咏应难唯怜吕叟时相伴同把磻溪旧钓竿

梦微之

夜来携手梦同游晨起盈巾泪莫收漳浦老身三度病咸阳宿草八回秋君埋泉下泥销骨我寄人间雪满头阿卫韩郎相次去夜台茫昧得知不【阿卫微之男韩郎微之壻】

感秋咏意

炎凉迁次速如飞又脱生衣着熟衣遶壁闇蛩无限思恋巢寒鷺未能归须知流辈年年失莫叹衰容日日非旧语相传聊自慰世间七十老人稀

老病幽独偶吟所怀

眼渐昏昏耳渐聾满头霜雪半身风已将身出浮云外【维摩经云是身如浮云也】犹寄形於逆旅中觴咏罢来宾阁闭笙歌散後妓房空世缘俗念消除尽别是人间清静翁和杨尚书罢相後夏日游永安水亭兼招本曹杨侍郎同行

道行无喜退无忧舒卷如云得自由良冶动时为哲匠巨川济了作虚舟竹亭陰合偏宜夏水檻风凉不待秋遥爱翩翩双紫凤入同官署出同游

在家出家

衣食支吾婚嫁毕从今家事不相仍夜眠身是投林鸟朝饭心同乞食僧清唳数声松下鹤寒光一点竹间灯中宵入定跏趺坐女唤妻呼多不膺

夜凉

露白风清庭户凉老人先着夹衣裳舞腰歌袖抛何处唯对无弦琴一张

继之尚书自余病来寄遗非一又蒙览醉吟先生传题诗以美之今以此篇用伸酬谢

衰残与世日相疎惠好唯君分有余茶药赠多因病久衣裳寄早及寒初【所寄赠之物皆及时】交情郑重金相似诗韵清锵玉不如醉傅狂言人尽笑独知我者是尚书

五年秋病後独宿香山寺三絶句

经年不到龙门寺今夜何人知我情还向畅师房里宿新秋月色旧滩声

饮徒歌伴今何在雨散云飞尽不回从此香山风月夜只应长是一身来

石盆泉畔石楼头十二年来昼夜游更过今年年七十假如无病亦宜休

题香山新经堂招僧

烟满秋堂月满庭香花漠漠磬泠泠谁能来此寻真谛白老新开一藏经

偶题邓翁【公即给事中班之子也饥穷老病退居此村】

偶因携酒寻村客聊复回车访薜萝且值雪寒相慰问不妨春暖更经过翁居山下年空老我得人间事校多一种共翁头似雪翁无衣食自如何

早入皇城赠王留守仆射

津桥残月晓沉沉风露凄凉禁署深城柳宫槐谩摇落悲秋不到贵人心

寄题庐山旧草堂兼呈二林寺道侣

三十年前草堂主而今虽在鬓如丝登山寻水应无力不似江州司马时渐伏酒魔休放醉犹残口业未抛诗君行过到鑪峰下为报东林长老知【此诗凭钱知进侍御往题草堂中也】

改业

先生老去饮无兴居士病来闲有余犹觉醉吟多放逸不如禅坐更清虚【予先有醉吟先生传今故云】柘枝紫袖教丸药羯鼓苍头遣种蔬却被山僧戏相问一时改业意何如

山下留别佛光和尚

劳师送我下山行此别何人识此情我已七旬师九十当知後会在他生

山中五絕句【游嵩阳见五物各有所感感兴不同随兴而吟因成五絕】 岭上云

岭上白云朝未散田中青麦旱将枯自生自灭成何事能逐东风作雨无

石上苔

漠漠班班石上苔幽芳静绿絕纖埃路傍凡草荣遭遇曾得七香车辗来

林下樗

香檀文桂苦雕镌生理何曾得自全知我无材老樗否一枝不损尽天年

涧中鱼

海水桑田欲变时风涛翻覆沸天池鲸吞蛟鬪波成血深涧游鱼乐不知

洞中蝙蝠

千年鼠化白蝙蝠黑洞深藏避网罗远害全身诚得计一生幽闇又如何

自戏三絕句【闲卧独吟无人酬和聊假身心相戏往复偶成三章】

心问身

心问身云何泰然严冬暖被日高眠放君快活知恩否不早朝来十一年

身报心

心是身王身自宫君今居在我宫中是君家舍君须爱何事论恩自说功

心重答身

因我踈慵休罢早遣君安乐岁时多世间老苦人何限不放君闲奈我何

会昌元年春五絕句

病後喜过刘家

忽忆前年初病後此生甘分不衔盃谁能料得今春事又向刘家饮酒来

赠举之仆射【今春与仆射三为寒食之会】

鸡球饧【徐盈切】粥屡开筵谈笑讴吟间管弦一月三回寒食会春光应不负今年

卢尹贺梦得会中作

病闻川守贺筵开起伴尚书饮一盃任意少年长笑我老人自覓老人来

题朗之槐亭

春风可惜无多日家醞唯残软半瓶犹望君归同一醉篮舁早晚入槐亭

劝梦得酒

谁人功画麒麟阁何客新投魑魅乡两处荣枯君莫问残春更醉两三场

过裴令公宅二絶句【裴令公在日常同听杨柳枝歌每遇雪天无非招宴二物如故因成感情】

风吹杨柳出墙枝忆得同欢共醉时每到集贤坊地过不曾一度不低眉

梁王旧馆雪蒙蒙愁杀邹枚二老翁【此句兼属梦得】假使明朝深一尺亦无人到兔园中

百日假满少傅官停自喜言怀

长告今朝满十旬从兹萧洒便终身老嫌手重抛牙笏病喜头轻换角巾疏傅不朝悬组绶尚平无累毕婚姻人言世事何时了我是人间事了人

早热

畏景又加旱火云殊未收篱暄饥有雀池涸渴无鸥岸帻头仍痛褰裳汗亦流若为当此日迁客向炎州【时杨李二相各贬潮韶】

题崔少尹上林坊新居

坊静居新深且幽忽疑缩地到沧洲宅东篱缺嵩峰出堂後池开洛水流高下三层盘野径沿洄十里泛渔舟若能为客烹鸡黍愿伴田苏日日游

新涧亭

烟萝初合涧新开闲上西亭日几回老病归山应未得且移泉石就身来

对酒有怀寄李十九郎中

往年江外抛桃叶【结之也】去岁楼中别柳枝【樊蛮也】寂寞春来一盃酒此情唯有李君知吟君旧句情难忘风月何时是尽时【李君尝有悼故妓诗云直应人世无风月始是心中忘却时今故云】

杨六尚书频寄新诗诗中多有思闲相就之志因书鄙意报而谕之

君年殊未及悬车未合将闲逐老夫身健正宜金印绶位高方称白髭须若论尘事何由了但问云心自在无进退是非俱是梦丘中阙下亦何殊

偶吟自慰兼呈梦得【予与梦得甲子同今俱七十】

且喜同年满七旬莫嫌衰病莫嫌贫已为海内有名客又占世间长命人耳里声闻新将相眼前失尽故交亲尊荣富寿难兼得闲坐思量最要身

寄潮州继之

相府潮阳俱梦中梦中何者是穷通他时事过方应悟不独荣空辱亦空

雪暮偶与梦得同致仕裴宾客王尚书饮

黄昏惨惨雪霏霏白首相欢醉不归四个老人三百岁【裴年九十余王年八十余予与梦得俱七十合三百余岁可谓希有之会也】人间此会亦应稀

雪朝乘兴欲诣李司徒留守先以五韵戏之

夜寒生酒思晚雪引诗情热饮一两盏冷吟三五声铺花连地冻销玉畏天晴好拂乌巾出宜披鹤氅行梁园应有兴何不召邹生

赠思黯【前以履道新小滩诗寄思黯报章云请向归仁砌下看思黯归仁宅亦有小滩】

为怜清浅爱潺湲一日三回到水边若道归仁滩更好主人何故别三年

听歌六絶句

听都子歌【词云试问嫦娥更要无】

都子新歌有性灵一声格转已堪听更听唱到嫦娥字犹有樊家旧典型

乐世【一名六么】

管急弦繁拍渐稠绿腰宛转曲终头诚知乐世声声乐老病人听未免愁

水调【第五遍乃五言调调韵最切】

五言一遍最殷勤调少情多似有因不会当时翻曲意此身肠断为何人

想夫怜【王维右丞词云泰州一半夕阳开此句尤佳】

玉管朱弦莫急催容听歌送十分盃长爱夫怜第二句请君重唱夕阳开

何满子【开元中沧州有歌者何满子临刑进此曲以赎死上竟不免】

世传满子是人名临就刑时曲始成一曲四调歌八叠从头便是断肠声

离别难词

绿杨陌上送行人马去车回一望尘不觉别时红泪尽归来无泪可【可纻反】沾巾

闲乐

坐安卧稳舆平肩倚杖披衫遶四边空腹三盃卯後酒曲肱一觉醉中眠更无忙苦吟闲乐恐是人间自在天

白氏长庆集卷三十五

卷三十六

钦定四库全书

白氏长庆集卷三十六

唐白居易撰

半格诗【律诗附凡九十五首】

立秋夕凉风忽至炎暑稍消即事咏怀寄汴州节度使李二十尚书

嫋嫋檐树动好风西南来红缸霏微灭碧幌飘飏开披襟有余凉拂簟无纖埃但喜烦暑退不惜光阴催河秋稍清浅月午方徘徊或行或坐卧体适心悠哉美人在浚都旌旗绕楼台虽非沧溟阻难见如蓬莱蝉迎节又换鴈送书未回君位日宠重我年日摧颓无因风月下一举平生盃

开成二年夏闻新蝉赠梦得【十年来常与梦得索居同在洛下每闻蝉多有寄答今喜以此篇唱之】

十载与君别常感新蝉鸣今年共君听同在洛阳城噪处知林静闻时觉景清凉风忽嫋嫋秋思先秋生残槿花边立老槐陰下行虽无索居恨还动长年情且喜未聋耳年年闻此声

题牛相公归仁里宅新成小滩

平生见流水见此转留连况此朱门内君家新引泉伊流决一带洛石砌千拳与君三伏月满耳作潺湲深处碧磷磷浅处清溅溅碣岸束呜咽沙汀散沦涟翻浪雪不尽澄波空共鲜两崖灩澦口一泊潇湘天曾作天南客漂流六七年何山不?杖何水不停?巴峡声心里松江色眼前今朝小滩上能不思悠然

春日闲居三首

陶云爱吾庐吾亦爱吾屋屋中有琴书聊以慰幽独是时三月半花落庭芜绿舍上晨鸠鸣窗间春睡足睡足起闲坐景晏方栉沐今日非十斋庖童馈鱼肉饥来恣飡歠冷热随所欲饱竟快搔?筋骸无检束岂徒畅肢体兼欲遗耳目便可傲松乔何假盃中绿

广池春水平羣鱼恣游泳新林绿陰成衆鸟欣相鸣时我亦潇洒适无累与病鱼鸟人则殊同

归於遂性?思山梁雉时哉感孔圣圣人不得所慨然叹时命我今对鳞羽取乐成謡咏得所仍得时吾生一何幸

劳者不觉歌歌其劳苦事逸者不觉歌歌其逸乐意问我逸如何闲居多兴味问我乐如何闲官少忧累又问俸厚薄百千随月至又问年几何七十行欠二所得皆过望省躬良可媿马闲无羁绊鹤老有禄位设自为化工优饶只如是安得不歌咏默默受天赐

小阁闲坐

阁前竹萧萧阁下水潺潺拂簟卷帘坐清风生其闲静闻新蝉鸣远见飞鸟还但有巾挂壁而无客叩关二疎返故里四老归旧山吾亦适所愿求闲而得闲

游平泉宴浥涧宿香山石楼赠座客

逸少集兰亭季伦宴金谷金谷太繁华兰亭阙丝竹何如今日会浥涧平泉曲盃酒与管弦贫中随分足紫鲜林笋嫩红润园桃熟采摘助盘筵芳滋盈口腹闲吟暮云碧醉藉春草緑舞妙艶流风歌清叩寒玉古诗惜昼短劝我令秉烛是夜勿言归相携石楼宿

池上幽境

裊裊过水桥微微入林路幽境深谁知老身闲独步行行何所爱遇物自成趣平滑青盘石低密緑陰树石上一素琴树下双草屨此是荣先生坐禅三乐处

夏日闲放

时暑不出门亦无宾客至静室深下帘小庭新扫地褰裳复岸帻闲傲得自恣朝景枕簟清乘凉一觉睡午飡何所有鱼肉一两味夏服亦无多蕉纱三五事资身既给足长物徒烦费若比簞瓢人吾今太富贵

和思黯居守独饮偶醉见示六韵时梦得和篇先成颇为丽絶因添两韵继而美之

宫漏滴渐阑城乌啼复歇此时若不醉争奈千门月主人中夜起妓烛前罗列歌袂默收声舞鬟低赴节弦吟玉柱品酒透金盃热朱顔忽已 清奏犹未阕妍词黯先唱逸韵刘继发铿然双雅音金石相磨戛

和梦得洛中早春见赠七韵

衆皆赏春色君独怜春意春意竟如何老夫知此味烛余减夜漏衾暖添朝睡恬和台上风虚润池边地开迟花养艶语懒鶯含思似讶隔年斋如劝迎春醉何日同宴游心期二月二【此

日出斋故云】

櫻桃花下有感而作【开成三年春季美周宾客南池者】

蔼蔼美周宅櫻繁春日斜一为洛下客十见池上花烂漫岂无意为君占年华风光饶此树歌舞胜诸家失尽白头伴长成红粉娃停盃两相顾堪喜亦堪嗟【白头伴红粉娃皆有所属】

洗竹

布裘寒拥颈羶履温承足独立水池前久看洗霜竹先除老且病次去纖而曲剪弃犹可怜琅玕十余束青青复籊籊颇异凡草木依然若有情回头语僮仆小者截鱼竿大者编茅屋勿作簪与箕而令粪土辱

新沐浴

形适外无恙心恬内无忧夜来新沐浴肌发舒且柔寬裁夹乌帽厚絮长白裘裘温裹我足帽暖覆我头先进酒一盃次举粥一瓯半酣半饱时四体春悠悠是月岁陰暮惨冽天地愁白日冷无光黄河冻不流何处征戍行何人羈旅游穷途絕粮客寒狱无灯囚劳生彼何苦遂性我何忧抚心但自愧孰知其所由

三年除夜

晰晰燎火光氤氲酒香嗤嗤童稚戏迢迢岁夜长堂上书帙前长幼合成行以我年最长次第来称觞七十期渐近万缘心已忘不唯少欢乐兼亦无悲伤素屏应居士青衣侍孟光夫妻老相对各坐一绳牀【顾虎头画维摩居士图白衣素屏也】

自题小园

不鬪门馆华不鬪林园大但鬪为主人一坐十余载回看甲乙第列在都城内素垣夹朱门蔼蔼遥相对主人安在哉富贵去不回池乃为鱼凿林乃为禽栽何如小园主拄杖闲即来亲宾有时会琴酒连夜开以此聊自足不羨大池台

病中宴坐

有酒病不饮有诗慵不吟头眩【平声】罢垂鉤手痺休援琴竟日悄无事所居闲且深外安支离体中养希夷心牕户纳秋景竹木澄夕陰宴坐小池畔清风时动襟

戒药

促促急景中蠢蠢微尘里生涯有分限爱恋无终已早夭美中年中年美暮齿暮齿又贪生服食求不死朝吞太阳精夕吸秋石髓微福反成灾药误者多矣以之资嗜慾又望延甲子天人陰隲间亦恐无此理域中有真道所说不如此後身始身存吾闻诸老氏

赠梦得

前日君家饮昨日王家宴今日过我庐三日三会面当歌聊自放对酒交相劝为我尽一盃与君发三愿一愿世清平二愿身强健三愿临老头数与君相见

逸老【庄子云劳我以生逸我以老息我以死也】

白日下駸駸青天高浩浩人生在其中适时即为好劳我以少壮息我以衰老顺之多吉壽违之或凶夭我初五十八息老虽非早一闲十三年所得亦不少况加禄仕後衣食常温饱又从风疾来女嫁男婚了胷中一无事浩气凝襟抱飘若云信风乐於鱼在藻桑榆坐已暮钟漏行将晓皤然七十翁亦足称壽考筋骸本非实一束芭蕉草眷属偶相依一夕同栖鸟去何有顾恋住亦无忧恼生死尚复然其余安足道是故临老心冥然合玄造

遇物感兴因示子弟

圣择狂夫言俗信老人语我有老狂词听之吾语汝吾观器用中劒锐锋多伤吾观形骸内骨劲齿先亡寄言处世者不可苦刚强龟性愚且善鸠心钝无恶人贱拾支牀鹖欺擒暖脚寄言立身者不得全柔弱彼固罹祸难此未免忧患于何保终吉强弱刚柔间上遵周孔训旁鉴老庄言不唯鞭其後亦要軛其先

首夏南池独酌

春尽杂英歇夏初芳草深薰风自南至吹我池上林綠苹散还合頽鲤跳复沉新叶有佳色残鶯犹好音依然谢家物池酌对风琴慙无康乐作秉笔思沉吟境胜才思劣诗成不称心

官俸初罢亲故见忧以诗谕之

七年为少傅品高俸不薄乘轩已多慙况是一病鹤又及悬车岁筋力转衰弱岂以贫是忧尚为名所缚今春始病免纓组初摆落蝸甲有何知云心无所着困中残旧穀可备岁饥恶园中多新蔬未至食藜藿不求安师卜不问陈生药但对丘中琴时开池上酌信风舟不系掉尾鱼方乐亲友不我知而忧我寂寞【安与陈皆洛下艺术精者】

闲居偶吟招郑庶子皇甫郎中

自哂此迂叟少迂老更迂家计不一问园林聊自娱竹间琴一张池上酒一壶更无俗物到但

与秋光俱古石苍错落新泉碧紫纒焉用车马客即此是吾徒犹有所思人各在城一隅杳然
爱不见搔首方踟蹰玄晏风韵远子真云貌孤诚知厌朝市何必忆江湖能来小涧上一听潺
湲无

亭西墙下伊渠水中置石激流潺湲成韵颇有幽趣以诗记之

嵌巉崑石峭皎洁伊流清立为远峯势激作寒玉声夹岸罗密树面滩开小亭忽疑严子濑流
入洛阳城是时羣动息风静微月明高枕夜悄悄满耳秋泠泠终日临大道何人知此情此情
苟自惬亦不要人听

闲题家池寄王屋张道士

有石白磷磷有水清潺潺有叟头似雪婆娑乎其间进不趋要路退不入深山深山太濩落要
路多险艰不如家池上乐逸无忧患有食适吾口有酒 吾顔恍惚游醉乡希夷造玄关五千
言下悟十二年来闲富者我不顾贵者我不攀唯有天坛子时来一往还

李卢二中丞各创山居俱夸胜絶然去城稍远来往颇劳弊居新泉实在宇下偶题十五韵聊
戏二君

龙门苍石壁【李所有也】浥涧碧潭水【卢所有也】各在一山隅迢遥几十里清镜碧屏
风惜哉信为美爱而不得见亦与无相似闻君每来去矻矻事行李脂辖复裹粮心力颇劳止
未如我舍下石与泉甚迤逦复溅溅昼夜流不已洛石千万拳衬波铺锦绮海珉一两片激
濑含宫徵緑宜春濯足浄可朝漱齿遶砌紫鳞游拂帘白鸟起何言履道叟便是沧浪子君若
趣归程请君先到此愿以潺湲声洗君尘土耳

北牕竹石

一片瑟瑟石数竿青青竹向我如有情依然看不足况临北牕下复近西塘曲筠风散余清苔
雨含微緑有妻亦衰老无子方?独莫掩夜牕扉共渠相伴宿

饮後戏示弟子

吾为尔先生尔为吾弟子孔门有遗训复坐吾告尔先生饌酒食弟子服劳止孝敬不在他在
兹而已矣欲我少忧愁欲我多欢喜无如醞好酒酒须多且旨旨即宾可留多即鬻不耻吾更
有一言尔宜听入耳人老多忧贫人病多忧死我今虽老病所忧不在此忧在半酣时樽空坐
客起

闲坐看书贻诸少年

雨砌长寒芜风庭落秋果
牕闲有闲叟尽日看书坐
书中见往事历历知福祸
多取终厚亡疾驱必先堕
劝君少干名名为锢身锁
劝君少求利利是焚身火
我心知已久吾道无不可
所以雀罗门不能寂寞我

梦上山【时足疾未平】

夜梦上嵩山独携藜杖出千岩
与万壑游览皆周毕梦中足不病
健似少年日既悟神返初依然
旧形质始知形神内形病神无疾
形神两是幻梦悟俱非实昼行虽
蹇澁夜步颇安逸昼夜既平分
其间何得失

对酒闲吟赠同老者

人生七十稀我年幸过之远行将
尽路春梦欲觉时家事口不问世
名心不思老既不足叹病亦不能
治扶持仰奴仆将养信妻儿饥饱
进退食寒暄加减衣声妓放郑卫
裘马脱轻肥百事尽除去尚余酒
与诗兴来吟一篇吟罢酒一卮不
独适情性兼用扶衰羸云液洒六
腑阳和生四肢於中我自乐此外
吾不知寄问同老者舍此将安归
莫学蓬心叟胷中残是非

晚起闲行

皤然一老子拥裘仍隐几坐稳夜
忘眠卧安朝不起起来无可作闭
目时叩齿静对铜炉香暖漱银瓶
水午斋何俭洁饼与蔬而已西寺
讲楞伽闲行一随喜

香山居士写真诗【并序】

元和五年予为左拾遗翰林学士奉
诏写真於集贤殿御书院时年三十
七会昌二年罢太子少傅为白衣居
士又写真於香山寺藏经堂时年七
十一前後相望殆将三纪观今照昔
慨然自叹者久之形容非一世事几
变因题六十字以写所怀

昔作少学士图形入集贤今为老居
士写貌寄香山鹤毳变玄发鸡肤
换朱颜前形与後貌相去三十年勿
叹韶华子俄成皤叟仙请看东海水
亦变作桑田

二年三月五日斋毕开素当食偶吟赠妻弘农郡君

睡足肢体畅晨起开中堂初旭泛
帘幕微风拂衣裳二婢扶盥栉双
童舁簟牀庭东有茂树其下多陰
凉前月事斋戒昨日散道場以我久
蔬素加笾仍异粮鲂鳞白如雪蒸炙
加桂姜稻饭红似花调沃新酪浆佐
以脯醢味间之椒薤芳老怜口尚美
病喜鼻闻香娇駮三四孙索哺遶我
傍山妻未举案馋叟已先尝忆同牢
盂初家贫共糟糠今食且如此何必
烹猪羊况观姻族闲夫妻半存亡偕
老不易得白头何足伤食罢酒一盃
醉饱吟又狂緬想梁高士乐道喜文
章徒夸五噫作不解赠孟光

不出门

弥月不出门永日无来宾食饱更拂牀睡起一嚔伸轻簟白鸟羽新簟青箭筠方寸方丈室空然两无尘披衣腰不带散发头不巾袒跣北牕下葛天之遗民一日亦自足况得以终身不知天壤内目我为何人

感旧【并序】

故李侍郎杓直长庆元年春薨元相公微之太和六年秋薨崔侍郎晦叔太和七年夏薨刘尚书梦得会昌二年秋薨四君子子之执友也二十年间凋零共尽唯予衰病至今独存因咏悲怀题为感旧

晦叔坟荒草已陈梦得墓湿土犹新微之捐馆将一纪杓直归丘二十春城中虽有故第宅庭芜园废生荆榛篋中亦有旧书札纸穿字蠹成灰尘平生定交取人窄屈指相知唯五人四人先去我在後一枝蒲柳衰残身岂无晚岁新相识相识面亲心不亲人生莫美苦长命长命感旧多悲辛

送毛仙翁【江州司马时作】

仙翁已得道混迹寻岩泉肌肤冰雪莹衣服云霞鲜绀发丝并致韶容花共妍方瞳点玄漆高步凌飞烟几见桑海变莫知龟鹤年所憩九清外所游五岳巅轩昊旧为侣松乔难比肩每嗟人世人役役如狂颠孰能脱羈鞅尽遭名利牵貌随岁律换神逐光阴迁惟余负忧谴憔悴溢江壖衰鬓忽霜白愁肠如火煎羈旅坐多感徘徊私自怜晴眺五老峯玉洞多神仙何当悯湮厄授道安虚辱我师惠然来论道穷重玄浩荡八溟阔志泰心超然形骸既无束得丧亦都捐岂识椿菌异那知鹏鷃悬丹华既相付促景定当延玄功曷可报感极惟勤拳霓旌不肯驻又归武夷川语罢倏然别孤鹤昇遥天赋诗叙明德永续步虚篇

达哉乐天行

达哉达哉白乐天分司东都十三年七旬才满冠已挂半禄未及车先悬或伴游客春行乐或随山僧夜坐禅二年忘却问家事门庭多草厨少烟庖童朝告盐米尽侍婢暮诉衣裳穿妻孥不悦甥侄闷而我醉卧方陶然起来与尔画生计薄产处置有後先先卖南坊十亩园次卖东郭五顷田然後兼卖所居宅髣髴获缗二三千半与尔充衣食费半与吾供酒肉钱吾今已年七十一眼昏须白头风眩但恐此钱用不尽即先朝露归夜泉未归且住亦不恶饥飡乐饮安稳眠死生无可无不可达哉达哉白乐天

春池闲泛【已下律诗】

綠塘新水平红檻小舟轻解缆随风去开襟信意行浅怜清演漾深爱綠澄泓白扑柳飞絮红

浮桃落英古文科斗出新叶剪刀生树集鷺朋友云行鴈弟兄飞沉皆适性酣咏自怡情花助
银盃气松添玉軫声鱼跳何事乐鸥起复谁惊莫唱沧浪曲无尘可濯缨

池上寓兴二絕

濠梁庄惠漫相争未必人情知物情獭捕鱼来鱼跃出此非鱼乐是鱼惊

水浅鱼稀白鹭饥劳心瞪目待鱼时外容闲暇中心苦似是而非谁得知

宴後题府中水堂赠卢尹中丞【昔予为尹日创造之】

水斋岁久渐荒芜自愧甘棠无一株新酒客来方宴饮旧堂主在重欢娱莫言杨柳枝空老【
府妓有歌杨柳枝曲者因以名焉】直致櫻桃树已枯【府西有櫻桃厅因树为名今树亦枯
也】从我到君十一尹相看自置府来无【自予罢後至中丞凡十一尹也】

和敏中洛下即事【时敏中为殿中分司】

昨日池塘春草生阿连新有好诗成花园到处鷺呼入驄马游时客避行水暖鱼多似南国人
稀尘少胜西京洛中佳境应无限若欲谳知问老兄

送敏中新授户部员外郎西归

千里归程三伏天官新身健马翩翩行冲赤日加飡饭上到青云稳着鞭长庆老郎唯我在客
曹故事望君传前鸿後鴈行难续相去迢迢二十年【长庆初予为主客郎中知制诰迁中书
舍人去今二十一年也】

南侍御以石相赠助成水声因以絕句谢之

泉石磷磷声似琴闲眠静听洗尘心莫轻两片青苔石一夜潺湲直万金

闲居自题戏招宿客

水畔竹林边闲居二十年健常携酒出病即掩门眠解绶收朝佩褰裳出野?屏除身外物摆落
世闲缘报曙牕何早知秋簟最先微风深树里斜日小楼前渠口添新石篱根写乱泉欲招同
宿客谁解爱潺湲【西亭墙下泉石有声】李留守相公见过池上泛舟举酒话及翰林旧事
因成四韵以献之

引棹寻池岸移樽就菊丛何言济川後相访钓?中白首故情在青云往事空同时六学士五相
一渔翁

闰九月九日独饮

黄花丛畔绿樽前犹有些些旧管弦
偶遇闰秋重九日东篱独酌一陶然
自从九月持斋戒不醉重阳十五年
览卢子蒙侍御旧诗多与微之唱和感
今伤昔因赠子蒙题於卷後

早闻元九咏君诗恨与卢君相识迟
今日逢君开旧卷卷中多道赠微之
相看掩泪情难说别有伤心事岂知
闻道咸阳坟上树已抽三丈白杨枝

寒亭留客

今朝闲坐石亭中炉火销残樽又空
冷落若为留客住水池霜竹雪髯翁

新小滩

石浅沙平流水寒水边斜插一渔竿
江南客见生乡思道似严陵七里滩

和李中丞与李给事山居雪夜同宿小酌

宪府触邪羝豸角璫闾駁正犯龙鳞
【二人当官盛事为时所称也】那知
近地斋居客忽作深山同宿人一盞寒
灯云外夜数盃温酎雪中春林泉莫作
多時計谏猎登封忆旧臣

履道西门二首

履道西门有弊居池塘竹树遶吾庐
豪华肥壮虽无分饱暖安闲即有余
行竈朝香炊早饭小园春暖掇新蔬
夷齐黄绮夸芝蕨比我盘飧恐不如

履道西门独掩扉官休病退客来稀
亦知轩冕荣堪恋其奈田园老合归
跛鼃难随骐驎足伤禽莫趁凤凰飞
世间认得身人少今我虽愚亦庶几

偶吟

人生变改故无穷昔是朝官今野翁
久寄形於朱紫内渐抽身入蕙荷中
【荷衣蕙带皆楚词也】无情水任方
圆器不系舟随去住风犹有鲈鱼蓴
菜兴来春或拟往江东

雪夜小饮赠梦得

同为懒慢园林客共对萧条雨雪天
小酌酒巡销永夜大开口笑送残年
久将时背成遗老多被人呼作散仙
呼作散仙应有以曾看东海变桑田

岁暮夜长病中灯下闻卢尹夜宴以诗戏之且为来日张本也

荣闹兴多嫌昼短衰闲睡少觉明迟当君秉烛衔盃夜是我停飧服药时枕上愁吟堪发病府中欢笑胜寻医明朝强出须谋乐不拟车公更拟谁

病中数会张道士见讥以此荅之

亦知数出妨将息不可端居守寂寥病即药牕眠尽日兴来酒席坐通宵贤人易狎须勤饮姹【音妬】女难禁莫慢烧张道士输白道士一盃沆【下朗切】？【下戒切】便逍遥

卯饮

短屏风掩卧牀头乌帽青氈白氎【音牒】裘卯饮一盃眠一觉世间何事不悠悠

寄题余杭郡楼兼呈裴使君

官历二十政宦游三十秋江山与风月最忆是杭州北郭沙堤尾西湖石岸头绿觴春送客红烛夜回舟不敢言遗爱空知念旧游凭君吟此句题向望涛楼

杨六尚书留太湖石在洛下借置庭中因对举盃寄赠絶句

借君片石意何如置向庭中慰索居每就玉山倾一酌兴来如对醉尚书

喜入新年自咏【时年七十一】

白须如雪五朝臣又值新正第七旬老过占他蓝尾酒病余收得到头身销磨岁月成高位比类时流是幸人大历年中骑竹马几人得见会昌春

滩声

碧玉斑斑沙历历清流决决响泠泠自从造得滩声後玉管朱弦可要听

题石泉

殷勤傍石遶泉行不说何人知我情渐恐耳聋兼眼闇听泉看石不分明

送王卿使君赴任苏州因思花迎新使感旧游寄题郡中木兰西院一别

一别苏州十八载时光人事随年改不论竹马尽成人亦恐桑田半为海莺入故宫含意思花

迎新使生光彩为报江山风月知至今白使君犹在

出斋日喜皇甫十早访

三旬斋满欲衔盃平旦敲门门未开除朗之携一榼的应不是别人来

会昌二年春题池西小楼

花边春水水边楼一坐经今四十秋望月桥倾三遍换采莲?破五回修园林一半成乔木邻里三分作白头苏李冥蒙随烛灭陈樊漂泊逐萍流【苏庶子弘李中丞道枢及陈樊二妓十余年皆楼中歌酒中伴或歿或散独子在焉】虽贫眼下无妨乐纵病心中不与愁自笑灵光岿【缺规反】然在春来游得且须游

酬南洛阳早春见赠

物华春意尚迟回赖有东风昼夜催寒缁柳腰收未得暖熏花口噤初开【古诗云口噤不能开】欲披云雾联襟去先喜琼琚入袖来久病长斋诗老退争禁年少洛阳才

对新家醞翫自种花

香麴亲看造芳丛手自栽迎春报酒熟垂老看花开红蜡半含萼绿油新醞醅玲珑五六树潋灩两三盃恐有狂风起愁无好客来独酣还独语待取月明回

携酒往朗之庄居同饮

慵中又少经过处别後都无劝酒人不挈一壶相就醉若为将老度残春

以诗代书酬慕巢尚书见寄【慕巢书中颇切归休结侣之意故以此荅】

书意诗情不偶然若云梦想在林泉愿为愚谷烟霞侣思结空门香火缘每愧尚书情眷眷自怜居士病绵绵不知待得心期否老校於君六七年

春尽日

芳景销残暑气生感时思事坐含情无人开口共谁语有酒回头还自倾醉对数丛红芍药渴尝一盃绿昌明【蜀茶之名也】春归自遣莺留语好住林园三两声

招山僧

能入城中乞食否莫辞尘土污袈裟欲知住处东城下遶竹泉声是白家

夏日与闲禅师林下避暑

洛景墙西尘土红伴僧闲坐竹泉东綠萝潭上不见日白石滩边长有风熱鬧渐知随念尽清凉常愿与人同每因毒暑悲亲故多在炎方瘴海中【是岁潮韶等郡皆有亲友谪居】

题新涧亭兼酬寄朝中亲故见赠

何处披襟风快哉一亭临涧四门开金章紫绶辞腰去白石清泉就眼来自得所宜还独乐各行其志莫相哈禽鱼出得池笼後纵有人呼可更回

病中看经赠诸道侣

右眼昏花左足风金篦石水用无功【金篦刮眼病见涅盘经磁石水治风见外台方】不如回念三乘乐便得浮生百病空无子同居草庵下【见法华经】有妻偕老道場中何烦更请僧为侣月上新归侍病翁【时适谈氏女子自太原初归维摩诘有女名月上也】

游丰乐招提佛光三寺

竹鞋葵扇白绡巾林野为家云是身山寺每游多寄宿都城暂出即经旬汉容黄绮为逋客尧放巢由作外臣昨日制书临郡县不谈愚谷醉乡人

醉中得上都亲友书以予停俸多时忧问贫乏偶乘酒兴咏而报之

头白醉昏昏狂歌秋复春一生耽酒客五度弃官人【苏州刑部侍郎河南尹同州刺史太子少傅皆以病免也】异世陶元亮前生刘伯伦卧将琴作枕行以锺随身岁要衣三对年支穀一困园葵烹佐饭秋叶扫添薪没齿甘蔬食摇头谢缙绅自能抛爵禄终不恼交亲但得盃中绿从生甌上尘烦君问生计忧醒不忧贫

池畔逐凉

风清泉冷竹修修三伏炎天凉似秋黄犬引迎骑马客青衣扶下钓鱼舟衰容自觉宜闲坐蹇步谁能更远游料得此身终老处只应林下与滩头

池鹤八絕句

池上有鹤介然不羣乌鸛鸡鹅次第嘲噪诸禽似有所谓鹤亦时复一鸣予非冶长不通其意因戏与赠答以意斟酌之聊亦自取笑耳

鸡赠鹤

一声警露君能薄五德司晨我用多不会悠悠时俗士重君轻我意如何

鹤答鸡

尔争伉俪泥中鬪吾整羽仪松上栖不可遣他天下眼却轻野鹤重家鸡

乌赠鹤

与君白黑太分明纵不相亲莫见轻我每夜啼君怨别玉徽琴里忝同声【琴曲有乌夜啼别鹤怨】

鹤答乌

吾爱栖云上华表汝多攫肉下田中吾音中羽汝中角琴曲虽同调不同【别鹤怨在羽调乌夜啼在角调】

鸢赠鹤

君夸名鹤我名鸢君叫闻天我戾天更有与君相似处饥来一种啄腥羶

鹤答鸢

无妨自是莫相非清浊高低各有归鸢鹤羣中彩云里几时曾见喘鸢飞

鹅赠鹤

君因风送入青云我被人驱向鸭羣雪颈霜毛红网掌请看何处不如君

鹤答鹅

右军歿後欲何依只合随鸡逐鸭飞未必牺牲及吾辈大都我瘦胜君肥

谈氏小外孙玉童

外翁七十孙三岁笑指琴书欲遣传自念老夫今耄矣因思稚子更茫然中郎余祚鍾羊祜子幼能文似马迁才与不才争料得东牀空後且娇怜【谈氏初逝】

送後集往庐山东林寺兼寄云臯上人

後集寄将何处去故山迢递在匡庐旧僧独有云臯在三二年来不得书别後道情添几许
老来筋力又何如来生缘会应非远彼此年过七十余

客有说【客即李浙东也所说不能具録其事】

近有人从海上回海山深处见楼台中有仙龕虚一室多传此待乐天来

答客说

我学空门非学仙恐君此说是虚传海山不是吾归处归即应归兜率天【予晚年结弥勒上
生业故云】

哭刘尚书梦得二首

四海齐名白与刘百年交分两绸缪同贫同病退闲日一死一生临老头盃酒英雄君与操【
曹公曰天下英雄唯使君与操耳】文章微婉我知丘【仲尼云後世知丘者春秋又云春秋
之旨微而婉也】贤豪虽歿精灵在应共微之地下游

今日哭君吾道孤寝门泪满白髭须不知箭折弓何用兼恐唇亡齿亦枯窅窅穷泉埋宝玉駸
駸落景挂桑榆夜台暮齿期非远但问前头相见无

白氏长庆集卷三十六

卷三十七

<集部,别集类,汉至五代,白氏长庆集>

钦定四库全书

白氏长庆集卷三十七

唐白居易撰

律诗【五言七言凡一百首】

昨日复今辰

昨日复今辰悠悠七十春所经多故处却想似前身散秩优游老闲居清淨贫螺盃中有物鹤
髻上无尘解佩收朝带抽簪换野巾风仪与名号别是一生人

病疮

门有医来往庭无客送迎病销谈笑兴老足叹嗟声鹤伴临池立人扶下砌行脚疮春断酒那
得有心情

游赵村杏花

赵村红杏每年开十五年来看几回七十三人难再到今春来是别花来

刑部尚书致仕

十五年来洛下居道缘俗累两何如迷路心回因向佛窟途事了是悬车全家遯世曾无闷半
俸资身亦有余唯是名衔人不会毗耶长者白尚书

初致仕後戏酬留守牛相公【并呈分司诸寮友】

南北东西无所羈挂冠自在胜分司探花尝酒多先到拜表行香尽不知炮笋烹鱼饱後拥
袍枕臂醉眠时报君一语君应笑兼亦无心羨保厘

问诸亲友

七十人难到过三更较稀占花租野寺定酒典朝衣趣醉春多出贪欢夜未归不知亲故口道我是耶非

戏问牛司徒

抖擞尘缨捋白须半酣扶起问司徒不知诏下悬车後醉舞狂歌有例无

不与老为期

不与老为期因何两鬓丝才应免夭促便已及衰羸昨夜梦何在明朝身不知百忧非我所三乐是吾师闭日常闲坐低头每静思存神机虑息养气语言迟行亦携诗篋眠多枕酒卮自慙无一事少有不安时

开龙门八节石滩诗二首【并序】

东都龙门潭之南有八节滩九峭石?筏过此例及破伤舟人楫师推挽束缚大寒之月裸跣水中饥冻有声闻於终夜予尝有愿力及则救之会昌四年有悲智僧道遇适同发心经营开凿贫者出力仁者施财於戏从古有碍之险未来无穷之苦忽乎一旦尽除去之兹吾所用适愿快心拔苦施乐者耳岂独以功德福报为意哉因作二诗刻题石上以其地属寺事因僧故多引僧言见志

铁凿金鎚殷若雷八滩九石劒棱摧竹篙桂楫飞如箭百筏千艘鱼贯来振锡导师凭衆力挥金退傅施家财他时相逐西方去莫虑尘沙路不开

七十三翁旦暮身誓开险路作通津夜舟过此无倾覆朝脰从今免苦辛十里叱滩变河汉八寒陰狱化阳春【八寒地狱见佛名及涅槃经故以八节滩为比】我身虽殁心长在閻施慈悲与後人

闲坐

婆娑放鸡犬嬉戏任儿童闲坐槐陰下开襟向晚风沍麻池水里?枣日阳中人物何相称居然田舍翁

酬寄牛相公同宿话旧劝酒见赠

每来政事堂中宿共忆华阳观里时日暮独归愁米尽泥深同出借驴骑交游今日唯残我富贵当年更有谁彼此相看头雪白一杯可合重推辞

道場独坐

整顿衣巾拂净牀一瓶秋水一鑪香不论烦恼先须去直到菩提亦拟忘朝谒久停收劒佩宴游渐罢废壶觞世间无用残年处只合逍遥坐道場

偶作寄朗之

历想为官日无如刺史时欢娱接宾客饱暖及妻儿自到东都後安闲更得宜分司胜刺史致仕胜分司何况园林下欣然得朗之仰名同旧识为乐即新知有雪先相访无花不作期鬪醪乾酿酒夸妙细吟诗里巷千来往都门五别离岐分两回首书到一开眉叶落槐亭院水生竹阁池雀罗谁问讯鹤氅罢追随身与心俱病容将力共衰老来多健忘唯不忘相思

狂吟七言十四韵

亦知世是休明世自想身非富贵身但恐人间为长物不如林下作遗民游依二室成三友住近双林当四邻性海澄淳平少浪心田洒扫净无尘香山闲宿一千夜梓泽连游十六春是客相逢皆故旧无僧每见不殷勤药停有喜闲销疾金尽无忧醉忘贫补绽衣裳愧妻女支持酒肉赖交亲俸随日计钱盈贯禄逐年支粟满囷【尚书致仕请半俸百斛钱五十千岁给禄粟二千石焉】洛堰鱼鲜供取足游村果熟馈争新诗章人与传千首壽命天教过七旬点检一生微幸事东都除我更无人

喜裴涛使君携诗见访醉中戏赠

忽闻扣户醉吟声不觉停盃倒屣迎共放诗狂同酒癖与君别是一亲情

得潮州杨相公继之书并诗以此寄之

诗情书意两殷勤来自天南瘴海滨初覩银钩还启齿细啗琼什欲沾巾凤池隔絶三千里蜗舍沉冥十五春唯有新昌故园月至今分照两乡人【凤池属杨相也蜗舍自谓也】

宿府池西亭

池上平桥桥下亭夜深睡觉上桥行白头老尹重来宿十五年前旧月明

闲眠

暖牀斜卧日曛腰一觉闲眠百病销尽日一餐茶两碗更无所要到明朝

杨柳枝词

【云溪友议居易有妓樊素善歌小蛮善舞尝为诗曰櫻桃樊素口杨柳小蛮腰年既高迈而

小蛮方丰艳因杨柳词以托意云】

一树春风千万枝嫩於金色软於丝永丰西角荒园里尽日无人属阿谁

诏取永丰柳植禁苑感赋

【又云宣宗朝国乐唱前词上问谁作永丰在何处左右具以对遂因东使命取永丰柳两枝植於禁中居易感上知其名且好尚风雅又为诗一章】

一树衰残委泥土双枝荣耀植天庭定知玄象今春後柳宿光中添两星

附河南尹卢贞和

一树依依在永丰两枝飞去杳无踪玉皇曾采人间曲应逐歌声入九重

斋居春久感事遣怀

斋戒坐三旬笙歌发四邻月明停酒夜眼暗看花人赖学空为观深知念是尘犹思闲语笑未忘旧交亲久作龙门主多为兔苑宾水嬉歌尽日雪宴烛通晨事事皆过分时时自问身风光抛得也七十四年春

每见吕南二郎中新文辄窃有所叹惜因成长句以咏所怀

双金百鍊少人知纵我知君徒尔为望梅阁老无妨渴【二贤词藻瞻丽衆多以予曾忝制诰故呼阁老】画饼尚书不救饥【自喻戏无益也】白日回头看又晚青云举足蹶何迟壮年可惜虚销掷遣把闲杯吟咏诗

胡吉郑刘卢张等六贤皆多年壽予亦次焉偶於弊居合成尚齿之会七老相顾既醉甚欢静而思之此会稀有因成七言六韵以纪之传好事者

七人五百七十岁拖紫纓朱垂白须手里无金莫嗟叹樽中有酒且欢娱诗吟两句神犹王酒饮三杯气尚麤嵬峩狂歌教婢拍婆娑醉舞遣孙扶天年高过二疎傳人数多於四皓图除却三山五天竺人间此会更应无【三仙山五天竺国多有壽者】

前怀州司马安定胡杲年八十九

卫尉卿致仕冯翊吉皎年八十六

前右龙武军长史荥阳郑据年八十四

前磁州刺史广平刘真年八十二

前侍御史内供奉官范阳卢真年八十一前永州刺史清河张浑年七十四

刑部尚书致仕太原白居易年七十四

已上七人合五百七十岁会昌五年三月二十一日於白家履道宅同宴宴罢赋诗时秘书监狄兼謩河南尹卢贞以年未七十虽与会而不及列

欢喜二偈

得老加年诚可喜当春对酒亦宜欢心中别有欢喜事开得龙门八节滩

眼闇头旋耳重听【平声】唯余心口尚醒醒今朝欢喜缘何事礼彻佛名百部经

闲居贫活计

冠盖闲居少簪瓢陋巷深称家开户牖量力置园林俭薄身都惯营为力不任饥烹一斤肉暖卧两重衾樽有陶潜酒囊无陆贾金莫嫌贫活计更富即劳心

赠诸少年

少年莫笑我蹉跎听我狂翁一曲歌入手荣名取虽少关心稳事得还多老慙退马沾刍秣【谓致仕半俸也】高喜归鸿脱弋罗官给俸钱天与壽些些贫病奈吾何

感所见

巧者焦劳智者愁愚翁何喜复何忧莫嫌山木无人用大胜笼禽不自由网外老鸡因断尾盘中鲜脍为吞钩谁人会我心中事冷笑时时一掉头

寄黔州马常侍

闲看双节信为贵乐饮一杯谁与同可惜风情与心力五年抛掷在黔中

和李相公留守题漕上新桥六韵【同用黎字】

选石铺新路安桥压古堤似从银汉下落傍玉川西影定栏杆倒标高华表齐烟开虹半见月冷鹤双栖材映夔龙小功嫌元凯低从容济世後余力及黔黎

闲居

风雨萧条秋少客门庭冷静昼多关金羁络马近卖却罗袖柳枝寻放还书卷畧寻聊取睡酒杯浅把粗开顏眼昏入夜休看月脚重经春不上山心静无妨喧处寂机忘兼觉梦中闲是非爱恶销停尽唯寄空身在世间

新秋夜雨

蟋蟀暮啾啾光陰不少留松檐半夜雨风幌满牀秋曙早灯犹在凉初簟未收新晴好天气谁伴老人游

春眠

枕低被暖身安稳日照房门帐未开还有少年春气味时时颺到梦中来

喜老自嘲

面黑头雪白自嫌还自怜毛龟蓍下老蝙蝠鼠中仙名籍同逋客衣装类古贤裘轻被白氎【徒协切】靴暖蹋乌氍周易休开卦陶琴不上弦任从人弃掷自与我周旋铁马因疲退铅刀以钝全行开第八秩可谓尽天年【时俗谓七十已上为开第八秩】

能无愧

十两新绵褐披行暖似春一團香絮枕倚坐稳於人婢仆遣他尝药草儿孙与我拂衣巾回看左右能无愧养活枯残废退身

河阳石尚书破回鹘迎贵主过上党射鹭 绘画为图猥蒙见示称叹不足以诗美之

塞北虏郊随手破山东贼垒掉鞭收乌孙公主归秦地白马将军入潞州劒拔青鳞蛇尾活弦抨赤羽火星流须知鸟目犹难漏【尚书将入潞府偶逢水鸟鹭 引弓射之一发中目三军踊跃其事上闻诏下美之】纵有天狼岂足忧画角三声刁斗晓清商一部管弦秋他时麟阁图勲业更合何人居上头

自咏老身示诸家属

壽及七十五俸沾五十千夫妻偕老日甥侄聚居年粥美尝新米袍温换故绵家居虽濩落眷属幸团圆置榻素屏下移炉青帐前书听孙子读汤看侍儿煎走笔还诗债抽衣当药钱支分闲事了爬背向阳眠

自问此心呈诸老伴

朝问此心何所思暮问此心何所为不入公门慵敛手不看人面免低眉居士室闲眠得所少年場上饮非宜闲谈亶亶留诸老美醞徐徐进一卮心未曾求过分事身常少有不安时此心除自谋身外更问其余尽不知

六年立春日人日作

二日立春人七日盘蔬饼餌逐时新年方吉郑犹为少家比刘韩未是贫乡园节岁应堪重亲故欢游莫厌频试作循潮封眼想何由得见洛阳春【分司致仕官中吉傅郑谔议最老韩庶子刘员外尤贫循潮封三郡迁客皆洛下旧游也】

斋居偶作

童子装炉火行添一炷香老翁持麈尾坐拂半张牀卷幔看天色移斋近日阳甘鲜新饼果稳暖旧衣裳止足安生理优闲乐性場是非一以遣动静百无妨岂有物相累兼无情可忘不须忧老病心是自医王

咏身

自中风来三历闰【病风八年凡三闰矣】从悬车後几逢春周南留滞称遗老【见太史公传】汉上羸残号半人【见习凿齿传】薄有文章传子弟断无书札答交亲余年自问将何用恐是人间?长身

予与山南王仆射起淮南李仆射绅事历五朝踰三纪海内年辈今唯三人荣路虽殊交情不替聊题长句寄举之公垂二相公

故交海内只三人二坐岩廊一卧云老爱诗书还似我荣兼将相不如君百年胶漆初心在万里烟霄中路分阿阁鸾凰野田鹤何人信道旧同羣

读道德经

玄元皇帝着遗文乌角先生仰後尘金玉满堂非已物子孙委蜕是他人世间尽不关吾事天下无亲於我身只有一身宜爱护少教水炭逼心神

禽虫十二章【并序】

庄列寓言风骚比兴多假虫鸟以为筌蹄故诗义始於关雎鹊巢道说先乎鲲鹏蜩鷃之类是也予闲居乘兴偶作一十二章颇类志怪放言每章可致一哂一哂之外亦有以自警其衰耄

封执之惑焉顷如此作多与故人微之梦得共之微之梦得尝云此乃九奏中新声八珍中异味也有旨哉有旨哉今则独吟想二君在目能无恨乎

鷺违戍已鵲避岁兹事因何羽族知疑有凤凰颁鸟历一时一日不参差【不知其然也鷺銜泥常避戍已日鵲巢口常避太岁验之皆信】水中科斗长成蛙林下桑虫老作蛾蛙跳蛾舞仰头笑焉用鯢鵬鳞羽多【齐物也】

江鱼羣从称妻妾塞鴈聯行号弟兄但恐世闲真眷属亲疎亦是强为名【故名也江沱闲有鱼每游辄三如媵随妻一先二後土人号为婢妾鱼礼云鴈兄弟行】

蚕老茧成不庇身蜂饥蜜熟属他人须知年老忧家者恐是二虫虚苦辛【自警也】

阿阁鸛鸾田舍乌妍蚩贵贱两悬殊如何闭向深笼里一种摧颓触四隅【有所感也】

兽中刀枪多怒吼鸟遭罗弋尽哀鸣羔羊口在缘何事閤死屠门无一声【有所悲也】

螭螟杀敌蚊巢上蚩触交争蜗角中应似诸天观下界一微尘内鬪英雄【自照也】

蠨蛸网上胃蜉蝣反覆相持死始休何异浮生临老日一弹指顷报恩雠【诫报也】

蚁王化饭为臣妾螺母偷虫作子孙彼此假名非本物其闲何怨复何恩

豆苗鹿嚼解乌毒艾叶雀銜夺鷺巢鸟兽不曾看本草谙知药性是谁教【尝猎者说云鹿若中箭发即嚼豆叶食之多消解箭毒多用乌头故云乌毒又鷺恶艾雀欲夺其巢先采一艾致其巢辄避去因而有之】

一鼠得仙生羽翼衆鼠相看有羨色岂知飞上未半空已作乌鸢口中食

鹅乳养雏遗在水鱼心想子变成鳞细微幽隐何穷事知者唯应是圣人【鹅放乳水中不能离羣雏从而食之皆饱而去之又如鱼想子子成鱼并是佛经中说】

白氏长庆集卷三十七

卷三十八

钦定四库全书

白氏长庆集卷三十八

唐白居易撰

诗赋【凡十五首】

动静交相养赋【并序】

居易常见今之立身从事者有失於动有失於静由斯动静俱不得其时与理也因述其所以然用自儆导命曰动静交相养赋云

天地有常道万物有常性道不可以终静济之以动性不可以终动济之以静养之则两全而交利不养之则两伤而交病故圣人取诸震以发身受诸复而知命所以庄子曰智养恬易曰蒙养正吾观天文其中有程日明则月晦日晦则月明明晦交养昼夜乃成吾观岁功其中有信阳进则陰退阳退则陰进进退交养寒暑乃顺且躁者本於静也斯则躁为民静为君以民养君教化之根则动养静之道斯存且有者生於无也斯则无为母有为子以母养子生成之理则静养动之理明矣所以动之为用在气为春在鸟为飞在舟为楫在弩为机不有动也静将畴依所以静之为用在虫为蛰在水为止在门为键在轮为柅不有静也动奚资始则知动兮静所伏静兮动所倚吾何以知交养之然哉以此有以见人之生於世出处相济必有时而行非匏瓜不可以长系人之善其身枉直相循必有时而屈故尺蠖不可以长伸嗟夫今之人知动之可以成功不知非其时动必为凶知静之可以立德不知非其理静亦为贼大矣哉动静之际圣人其难之先之则过时後之则不及时交养之间不容毫厘故老氏观妙顔氏知几噫非二君子吾谁与归

泛渭赋【并序】

右丞相高公之掌贡举也予以乡贡进士举及第左丞相郑公之领选部也予以书判拔萃选登科十九年天子并命二公对掌钧轴朝野无事人物甚安明年春予为校书郎始徙家秦中卜居於渭上上乐时和岁稔万物得其宜下乐名遂官闲一身得其所既美二公佐清朝之理又荷二公垂特达之恩发於嗟叹流於咏譔予时泛舟于渭因为泛渭赋以导其意词曰

亭亭华山下有人跂兮望兮爱彼三峯之白云泛泛渭水上有舟沿兮泝兮爱彼百里之清流以我为太平之人兮得於斯而优游又感阳春之气熙熙兮乐天和不而忧曰予生之年兮时

哉时哉当皇唐受命之九叶兮华与夷而无氛埃及帝纘位之二纪兮命高与郑为盐梅二贤兮爰立四门兮大开凡读儒书与履儒行者率充赋而四来虽片艺而必收兮故不弃予之小才感再遇於知己必慙忤以徘徊登予名於太常署予职於兰台台有兰兮阁有芸芳菲菲其可袞备一官而无一事又不维而不縈家去省兮百里每三旬而一入川有渭兮山有华澹悠悠其可赏目白云兮漱清泉其或偃而或仰门去渭兮百步常一日而三往夜分兮叩舷天无云兮水无烟迟迟兮明月波澹灩兮棹寅缘日暮兮舟泊草萋萋兮沙漠漠习习兮春风岸柳动兮渚花落发浩歌以长引举浊醪而缓酌春冉冉其将尽予何为乎不乐鸟乐兮云际鸣嚶嚶兮飞??【以智切羣行貌】鱼乐兮泉底髻拨拨兮尾濺濺我乐兮圣代心融融兮神泄泄伊万物各乐其乐者由圣贤之相契贤致圣於无为圣致贤於既济凝为和兮聚五福发为春兮消六沴不我後兮不我先适当我兮生之代彼鳞虫兮与羽族咸知乐而不知惠我为人兮最灵所以媿贤相而荷圣帝乐乎乐乎泛于渭兮咏而归聊逍遥以卒岁

伤远行赋

贞元十五年春吾兄吏於浮梁分微禄以归养命予负米而还乡出郊野兮愁予夫何道路之茫茫茫茫兮二千五百自鄱阳而归洛阳朝济乎大江暮登乎高冈山有险兮路屈曲甚孟门与太行枫林鬱其百寻涵瘴烟之苍苍其中閭其无人唯鷓鴣之飞翔水有含沙之毒虫山有当路之虎狼况乎云雷作而风雨晦忽 【乌感切】霭兮不见日阳涉泥泞兮仆夫重膇陟崔嵬兮征马玄黄步一步兮不可进独中路兮傍徨噫昔我往兮春草始芳今我来兮秋风其凉独行踽踽兮惜昼短孤宿??兮愁夜长况太夫人抱疾而在堂自我行役凉夙夜而忧伤惟母念子之心心可测而可量虽割慈而不言终蘊结乎中腸曰有弟兮侍左右固就养而无方虽温清之靡阙讎当我之在傍无羽翼以轻举美归云之飞扬惟昼夜与寝食之心曷其弭忘投山馆以寓宿夜緜緜而未央独展转而不寐候东方之晨光虽则驱征车而遵归路犹自流乡泪之浪浪

宣州试射中正鹄赋【以诸侯立诚衆士知训为韵任不依次用韵限三百五十字已上成】

圣人弦木为弧剡木为矢唯弧矢之用也中正鹄而已矣是谓武之经礼之纪故王者务以选诸侯诸侯用而贡多士将俾乎礼无秕稗位有降杀广塲辟而堵墙开射夫同而钟鼓诚有致国用充岁贡使技痒者出於羣艺成者推於衆在乎矢不虚发弓不再控射绎志也信念兹而在兹鹄小鸟焉取难中而能中乃设五正张三侯叶吉日於清昼顺杀气於素秋礼事展乐容修既五善而斯备将百中而是求於是诚心内蘊庄容外奋升降揖让合君子之令仪进退周旋伸先生之彝训故礼举而义得且无声而有问及夫观者全 【步闷切】入射者挺立矢既挟弓既执抗大侯欬决拾指正则掌内必取料鹄乃彀中所及雕弧乍满当昼而明月弯弯银镞急飞不夜而流星熠熠其一发也騞若彻札其再中也 【普伯切】如贯笠玉霜降而弓力调金风劲而弦声急愜羣心而踊跃骇衆目而翕习若然者安知不能空弯而鴈惊虚引而猿泣者也矧乃正其色温如栗如游於艺匪疾匪徐妙能曲尽勇可贾余岂不以志正形直心庄体舒不出范兮信得礼之大者无失鹄也岂反身而求诸斯盖弓矢合规格止有仪必气盈而神王宁心讐而力疲则知善射者在乎合礼合乐不必乎饮羽在乎和容和志不必乎主

皮夫如是则射之礼射之义虽百世而可知

窗中列远岫诗【题中以平声为韵】

天静秋山好窗开晓翠通遥怜峯窈窕不隔竹朦胧万点当虚室千重叠远空列檐攒秀气缘隙助清风碧爱新晴後明宜反照中宣城郡斋在望与古时同

省试性习相远近赋【以君子之所慎焉为韵依次用限三百五十字已上成中书侍郎高郢下试贞元十六年二月十四日及第第四人】

噫下自人上达君德以慎立而性由习分习则生常将俾夫善恶区别慎之在始必辩乎是非纠纷原夫性相近者岂不以有教无类其归於一揆习相远者岂不以殊途异致乃差於千里昏明波注导为愚智之源邪正岐分开成理乱之轨安得不稽其本谋其始观所恒察所以考成败而取舍审臧否而行止俾流遁者返迷涂於骚人积习者遵要道於君子且夫德莫德於老氏乃曰道是从矣圣莫圣於宣尼亦曰非生知之则知德在修身将见素而抱朴圣由志学必切问而近思在乎积艺业於黍累慎言行於毫厘故得其门志弥笃兮性弥近矣由其径习愈精兮道愈远而其旨可显其义可举勿谓习之近徇迹而相背重阻勿谓性之远反真而相去几许亦犹一源????别随混澄而或浊或清一气脉分任吹煦而为寒为暑是以君子稽古於时习之初辩惑於成性之所然则性者中之和习者外之徇中和思於驯致外徇戒於妄进非所习而习则性伤得所习而习则性顺故圣与狂由乎念与罔念福与祸在乎慎与不慎慎之义莫匪乎率道为本见善而迁观诚伪於既往审进退於未然故得之则至性大同若水济水也失之则衆心不等犹面隔面焉诚哉性习之说吾将以为教先

玉水记方流诗【以流字为韵六十字成】

良璞含章久寒泉彻底幽矩浮光灏灏方折浪悠悠凌乱波纹异萦回水性柔似风摇浅濑疑月落清流潏潏应傍达藏真岂上浮玉人如不记沦弃即千秋

求玄珠赋【以玄非智求珠以真得为韵】

至乎哉玄珠之为物也渊渊緜緜不知其然存乎视聽之表生乎天地之先其中有象与道相全求之者刳其心俾损之又损得之者反其性乃玄之又玄玄无音听之则希珠无体抟之则微故以音而求之者妄以体而得之者非倏尔去焉将窅冥而齐往忽乎来矣与罔象而同归是以圣人之求玄珠也损明圣薄仁义索之惟艰失之孔易莫不以心忘心以智去智其难得也剧乎剖巨蚌之胎其难求也甚乎待骊龙之睡夫惟不皦不昧至明至幽必致之於驯致岂求之於躁求性失则遗若合浦之徙去心虚潜至同夜光之闇投斯乃动为道枢静为心符至光不耀至真不渝察之无形谓其有而非有应之有信谓其无而非无故立喻比夫至宝强名谓之玄珠名不徒尔喻必有以以不凝滯为圆以无瑕疵为美盖外明者不若内明之理纯白者不若虚白之旨藏於身不藏於川在乎心不在乎水然则颐其神保其真虽无胥求之必臻

役其识徇其惑虽没齿求之不得则知珠者无形之形玄者无色之色亦何必游赤水之上造崑丘之侧苟悟漆园之言可臻玄珠之极

汉高皇帝亲斩白蛇赋【以题为韵依次用】

高皇帝将欲戡时难拨祸乱乃耀圣武奋英断提神劒於手中斩灵蛇於泽畔何精诚之潜发信天地之幽赞卒能灭强楚降暴秦创王业於炎汉於时瓜割区宇蜂起英豪以坚甲利兵相视以壮图锐气相高皆欲定四海之汹汹救万姓之嗷嗷帝既心闚咸阳气王芒砀率卒晨往纵徒夜亡有大蛇兮出山穴亘路傍凝白虹之精彩被素龙之文章鳞甲晶以雪色睛眸赭其电光聳其身形蜿蜒而莫犯举其首势矫矫而靡亢勇夫闻之而挫锐壮士覩之而摧刚於是行者告于高皇帝乃奋布衣挺干将攘臂直进瞋目高骧一呼而猛气咆 再叱而?姿抑扬观其将斩未斩之际虵方欲纵毒螫肆猛噬我则审其计度其势口噪雷霆手操锋锐凜龙顔而色作振虎威而声厉荷天之灵啓神之契举刃一挥溘然而毙不知我者谓我斩白蛇知我者谓我斩白帝於是洒雨血摧霜鳞涂野草溅路尘嗟乎神化将穷不能保其命首尾虽在不能卫其身盛矣哉圣人之草昧经纶应乎天顺乎人制勅敌必示以乃武乃文静灾祸不可以弗躬弗亲若夫龙泉黯黯秋水湛湛苟非斯劒虵不可斩天威煌煌神武洸洸苟非我主虵不可当是知人在威不在衆我王也万夫之防器在利不在大斯劒也三尺之长于以讐万物于以威八方?数既终闇素灵之夜哭嗜欲将至知赤帝之道昌繇是气吞豪杰威振幽遐素车降而三秦归德朱旗建而六合为家彼戮鲸鲵与截犀兕未若我提青剑而斩白蛇

大巧若拙赋【以随物成器巧在乎中为韵依次用】

巧之小者有为可得而闚巧之大者无迹不可得而知盖取之於巽授之以随动而有度举必合规故曰大巧若拙其义在斯尔乃抡材於山木审器於轨物将务乎心匠之忖度不在乎手泽之翦拂故为栋者资其自天之端为轮者取其因地之屈其公也於物无情其正也依法有程既游艺而功立亦居肆而事成大小存乎目击材无所弃取舍资乎指顾物莫能争然後任道弘用随形制器信无为而为因所利而利不凝滯於物必简易於事亦犹善从政者物得其宜能官人者才适其位嘉其尺度有则绳墨无挠工非剗削自得不矜之能器靡雕?谁识无心之巧衆谓之拙以其因物不改我为之巧以其成功不宰不改故物全不宰故功倍遇以神也郢人之术攸同合乎道焉老氏之言斯在噫舟车器异杞梓材殊罔枉柄以凿罔破圆为觚必将考广狭以分寸审剗方以规模则物不能以长短隐材不能以曲直诬是谓心之术也岂虑手之伤乎且夫大盈若冲大明若蒙是以大巧弃其末工则知巧在乎不违天真非劳形於木人之内巧在乎无枉物情非役神於棘刺之中岂徒与班倕之辈骋技而校功哉【情一作性】

鸡距笔赋【以中山兔毫作之尤妙为韵任不依次用】

足之健兮有鸡足毛之劲兮有兔毛就足之中奋发者利距在毛之内秀出者长毫合为手笔正得其要象彼足距曲尽其妙圆而直始造意於蒙恬利而銛终骋能於逸少斯则创因智士

传在良工拔毫为锋截竹为筒视其端若武安君之头锐窥其管如玄元氏之心空岂不以中山之明视劲而迅汝陰之翰音勇而?一毛不成采衆毫於三穴之内四者可弃取锐武於五德之中双美是合两揆而同故不得兔毫无以成起草之用不名鸡距无以表入木之功及夫亲手泽随指顾秉以律动有度染松烟之墨洒鹅毛之素莫不画为屈铁点成垂露若用之交战则摧敌而先鸣若用之草圣则擅場而独步察所以稽其故虽云任物以用长亦在假名而善喻向使但随物弃不与人遇则距蓄缩於晨鸡毫摧残於寒兔又安得取名於彼移用在兹映赤筦状紺趾乍举对红笺疑锦臆初披辍翰停毫既象乎翹足就栖之夕挥芒拂锐又似乎奋拳引鬪之时苟名实之相副信动静而似之其用不困其美无俦因草为号者质陋折蒲而书者体柔彼皆琐细此实殊尤是以搦之而变成金距书之而化作银钩夫然则董狐操可以修为良史宣尼握可以删定春秋其不象鸡之羽者鄙其轻薄不取鸡之冠者恶其软弱斯距也如剑如戟可击可搏将壮我之毫芒必假尔之锋锷遂使见之者书狂发秉之者笔力作挫万物而人文成草八行而鸟迹落缥囊盛处类藏锥之沈潜團扇或书同舞镜之挥霍儒有学书临水负笈登山含毫既至握管回还过兔园而易感望鸡树以难攀愿争雄於爪距之下冀得隺於笔砚之间

黑龙饮渭赋【以出为汉祥下饮渭水为韵】

龙为四灵之长渭居八水之一饮亶亶之清流落彬彬之玄质忽兮下降赅然跃出首蜿蜒以涌烟鳞错落而点漆动而无悔爰作瑞於秦川应必有徵乃效灵於汉日观其攸止察其所为行藏不忒动静有仪晴眸炫耀文彩陆离跃於泉於焉表异守其黑所以标奇或隐或见时行时止顺冬夏而无乖应昏明而有以於是稽大易按前史符圣人之昌运飞而在天表王者之休徵下而饮水尔乃降长川俯高岸气默默以黯黯光璨璨而烂烂闻之者心骇而屏息覩之者目 而改观一呼一吸而声起风雷或跃或腾而势超云汉观夫莫智匪常莫黑至祥契昌期於南面合正色於北方拖尾回翔擘波腾骧饮清澜之浩浩动素浪之汤汤顿颌而碎珠迸落奋髯而细雨飞扬警水府兮鱣鮪奔走骇泉室兮蛟鼉伏藏玄云从而浅深一色白日照而左右交光且彼候时出处凭虚上下度弱水而斯驭去鼎湖而是驾闻茂先之剑飞见长房之杖化岂若此炎精冥契水德潜稟玄甲黯以凝黛文章斐兮摛锦逼而察也类天马出水而游远而望之疑晴虹截涧而饮已而负苍天去清渭排冥冥之寥廓反浩浩之元气则知水物之灵鳞虫之贵盛矣哉抑斯龙之所谓

敢谏鼓赋【以圣人来谏诤之道为韵】

鼓者工所制谏者君所命鼓因谏设发为治世之音谏以鼓来悬作经邦之柄纳其臣於忠直致其君於明圣将使内外必闻上下交正於是乎唐尧得以为盛治者也至矣哉君至公而灭私臣有犯而无欺讽谏者於焉尽节献纳者由是正辞言之者无罪击之者有时故謇謇匪躬道之行也鼙鼙【音渊】不已声以发之始也土鼓增华蕢桴改造外扬音以应物中含虚而体道不窳不撝【胡挂切】由巧者之作为大鸣小鸣随直臣之击考有若坎其缶於宛丘之下又如殷其雷在南山之隈音锵锵以铿【音汤】鞀响容与以徘徊傲於帝心四聪之耳必达纳诸人听七诤之臣乃来故用於朝朝无面从之患行於国国无居下之讪洋洋盈耳幽赞

逆耳之言坎坎动心明啓沃心之諫且夫鼓之为用也或备於乐悬或施於戎政以谐八音节奏以明三军号令未若备察朝阙发挥庭诤声闻於外以彰我主圣臣良道在其中以表我上忠下敬然则义之与比德必有隣将善旌而并建与谤木而俱陈是必闻其声则知有献替之士聆其响不独思将帅之臣嗟乎舍之则声寢用之则气振虽声气之在鼓终用舍之由人

君子不器赋【以用之则行无施不可为韵】

君子哉道本生知德唯天纵抱乎不器之器成乎有用之用不器者通理而黄中有用者致远而任重盖由识包权变理蘊通明业非学致器异琢成审其时有道舒而无道卷慎其德舍之藏而用之行语其小能立诚以修辞论其大能救物而济时以之理心则一身独善以之从政则庶绩咸熙既居家而必达亦在邦而允厘彼子贡虽贤唯称瑚璉之器彦辅信美空标水镜之姿是谓非求备者有何足以多之岂如我顺乎通塞含乎语默何用不臧何响不克施之乃伊吕事业蓄之则庄老道德虽应物而不滞终饰躬而有则若止水之在器任器方圆如良工之用材随材曲直原夫根淳精於妙有完元和於虚受内弘道而惟新外济用而可久鄙斗筭之奚算晒挈瓶之固守何器量之差殊在性情之能否岂不以神为玄枢智为心符全其神则为而勿有虚其心则用当其无故动与时合静与道俱时或用之必开臧武之智道不行也则守甯子之愚至乎哉冥心无我无可而无可应用不疲无为而无不为信大成而大受非小惠而小知故庶类曲从则轮辕适用若一隅偏执则凿枘难施是以易尚随时礼贵从宜盛矣哉君子斯焉取斯

赋赋【以赋者古诗之流为韵】

赋者古诗之流也始草创於荀宋渐恢张於贾马永生乎水初变本於典坟青出於蓝复增华於风雅而後谐四声祛八病信斯文之美者我国家恐文道寢衰颂声凌迟乃举多士命有司酌遗风於三代明变雅於一时全取其名则号之为赋杂用其体亦不出乎诗四始尽在六义无遗是谓艺文之敝策述作之元龟观夫义类错综词采舒布文谐宫律言中章句华而不艷美而有度雅音浏亮必先体物以成章逸思飘飏不独登高而能赋其工者究笔精穷指趣何慙两京於班固其妙者抽秘思骋妍词岂谢三都於左思掩黄绢之丽藻吐白凤之奇姿振金声於寰海增纸价於京师则长扬羽猎之徒胡为比也景福灵光之作未足多之所谓立意为先能文为主炳如绩【一作绘】素铎若钟鼓郁郁哉溢目之黼黻洋洋乎盈耳之韶護信可以?铎风骚超轶今古者也今吾君网罗六艺淘汰九流微才无忽片善是求况赋者雅之列颂之俦可以润色鸿业可以发挥皇猷客有自谓握灵蛇之珠者岂可弃之而不收

白氏长庆集卷三十八

卷三十九

钦定四库全书

白氏长庆集卷三十九

唐白居易撰

铭赞箴谣偈【凡二十一首】

续座右铭【并序】

崔子玉座右铭余窃慕之虽未能尽行常书屋壁然其间似有未尽者因续为座右铭云

勿慕贵与富勿忧贱与贫自问道何如贵贱安足云闻毁勿戚戚闻誉勿欣欣自顾行何如毁誉安足论无以意傲物以远辱於人无以色求事以自重其身游与邪分岐居与正为隣於中有取舍此外无疎亲修外以及内静养和与真养内不遗外动率义与仁千里始足下高山起微尘吾道亦如此行之贵日新不敢规他人聊自书诸绅终身且自勗身歿貽後昆後昆苟反是非我之子孙

驹虞画赞【并序】

驹虞仁瑞之兽也其所感所食暨形状质文孙氏瑞应图具载其事元和元年夏有以驹虞图赠予者予爱其外猛而威内仁而信又嗟旷代不覩引笔赞之词云尔孟山有兽仁心毛质不践生刍不食生物有道则见非时不出三季已还退藏於密我闻其名徵之於书不识其形得之於图白质黑文貌首虎躯是耶非耶孰知之乎已矣夫已矣夫前不见往者後不见来者吁嗟乎驹虞

獬豸赞【并序獬读陌白豹也】

獬豸者象鼻犀目牛尾虎足生南方山谷中寝其皮辟瘟图其形辟邪予旧病头风每寢息常以小屏卫其首适遇画工偶令写之按山海经此兽食铁与铜不食他物因有所感遂为赞曰

邈哉奇兽生于南国其名曰獬豸非铁不食昔在上古人心忠质征伐教令自天子出剑戟省用铜铁美溢獬豸当是时饱食终日三代以降王法不一铄铁为兵范铜为佛佛像日益兵刃日滋何山不剡何谷不隳铄铜寸铁罔有子遗悲哉彼獬豸无乃馁而呜呼非獬豸之悲惟时之悲

画鵬赞【并序】

壽安令白昊予宗兄也得丹青之妙传写之要毛羣羽族尤是所长长庆元年以画鵬贖予予爱之因题赞云鸞禽之英黑鵬丁丁钩缀八爪劒插六翎想入心匠写从笔精不卵不雏一日而成轩然将飞戛然欲鸣毛动骨活神来着形始知造物不必杳冥但获天机则与化争韩干之马籍籍知名薛稷之鹤翩翩有声研工核能较真鬪灵岂无他人不如我兄

续虞人箴【元和十五年】

唐受天命十有二圣业业惕惕咸勤於政鸟生深林兽在丰草春蒐冬狩取之以道鸟兽虫鱼各遂其生君民朝野亦克用宁在昔玄祖厥训孔彰驰骋畋猎俾心发狂何以验之曰羿与康曾不是诚终然覆亡故我列圣监彼前王虽有畋游乐不至荒高祖方猎苏长进言不满十旬未足为欢上心忽悟为之辍畋故武德业垂二百年降及宋璟亦谏玄宗温顔听纳献替从容及璟趋出鵠死怀中故开元事播於无穷噫逐兽于野走马于路岂不快哉銜橛可惧噫夜归禁苑朝出皇都岂不乐哉寇戎可虞臣非兽臣不当献箴辄思出位敢谏从禽蝼蚁命小安危计深苟裨万一臣死甘心

三謡【并序】

予庐山草堂中有朱藤杖一蟠木几一素屏风二时多杖藤而行隐几而坐掩屏而卧宴息之暇笔砚在前偶为三謡各导其意亦犹座右陋室铭之类尔

蟠木謡

蟠木蟠木有似我身不中乎器无用於人下拥肿而上鳞菌桷不桷兮轮不轮天子建明堂兮既非梁栋诸侯斲大辂兮材又不中唯我病夫或有所用用尔为几承吾臂支吾颐而已矣不伤尔性不枉尔理尔怏怏为几之外无所用尔尔既不材吾亦不材胡为乎人间徘徊蟠木蟠木吾与汝归草堂去来

素屏謡

素屏素屏胡为乎不文不饰不丹不青当世岂无李阳冰之篆字张旭之笔迹边鸾之花鸟张藻之松石吾不令加一点一画於其上欲尔保真而全白吾於香炉峯下置草堂二屏倚在东西墙夜如明月入我室【一作怀】晓如白云围我牀我心久养浩然气亦欲与尔表里相辉光尔不见当今甲第与王宫织成步障锦屏风缀珠?钿贴云母五金七宝相玲珑贵豪待此方悦目晏然寢卧乎其中素屏素屏物各有所宜用各有所施尔今木为骨兮纸为面舍吾草堂欲何之

朱藤謡

朱藤朱藤温如红玉直如朱绳自我得尔以为杖大有裨於股肱前年左迁东南万里交游别我於国门亲友送我於滄水登高山兮车倒轮摧渡汉水兮马踟躕开中途不进部曲多回唯此朱藤实随我来瘴疠之乡无人之地扶卫衰病驱呵魑魅吾独一身赖尔为二或水或陆自北徂南泥黏【泥占切】雪滑足力不堪吾本两足得尔为三紫霄峯头黄石岩下松门石磴不通輿马吾与尔披云拨水环山绕野二年蹋遍匡庐间未尝一步而相舍虽有佳子弟良友朋扶危助蹇不如朱藤嗟乎穷既若是通复何如吾不以常杖待尔尔勿以常人望吾朱藤朱藤吾虽青云之上黄泥之下誓不弃尔於斯须

无可奈何歌

无可奈何兮白日走而朱颜颓少日往而老日催生者不住兮死者不回况乎宠辱丰頽之外物又何常不十去而一来去不可挽兮来不可推无可奈何兮已焉哉惟天长而地久前无始兮後无终嗟吾生之几何寄瞬息乎其中又如太仓之稊米委一粒於万锺何不与道逍遥委化从容纵心放志泄泄融融胡为乎分爱恶於生死繫忧喜於穷通倔强其骨髓齟齬其心胷合冰炭以交战祗自苦兮厥躬彼造物者云何不为此与化者云何不随或煦或吹或盛或衰虽千变与万化委一顺以贯之为彼何非为此何是谁冥此心梦蝶之子何祸非福何吉非凶谁达此观丧马之翁俾吾为秋毫之杪吾亦自足不见其小俾吾为泰山之阿吾亦无余不见其多是以达人静则眇然与陰合迹动则浩然与阳同波委顺而已孰知其他时耶命耶吾其无奈彼何委耶顺耶彼亦无奈吾何夫两无奈何然後能冥至顺而合太和故吾所以饮太和扣至顺而为无可奈何之歌

自诲

乐天乐天来与汝言汝宜拳拳终身行焉物有万类锢人如鎖事有万感热人如火万类邇来鎖汝形骸使汝未老形枯如柴万感邇至火汝心怀使汝未死心化为灰乐天乐天可不大哀汝胡不惩往而念来人生百岁七十稀设使与汝七十期汝今年已四十四却後二十六年能几时汝不思二十五六年来事疾速倏忽如一寐往日来日皆瞥然胡为自苦於其间乐天乐天可不大哀而今而後汝宜饥而食渴而饮昼而兴夜而寝无浪喜无妄忧病则卧死则休此中是汝家此中是汝乡汝何舍此而去自取其遑遑遑遑兮欲安往哉乐天乐天归去来

八渐偈【并序】

唐贞元十九年秋八月有大师曰凝公迁化於东都圣善寺鉢塔院越明年二月有东来客白居易作八渐偈偈六句四言以讚之初居易常求心要於师师赐我八言焉曰观曰觉曰定曰慧曰明曰通曰济曰舍繇是入於耳贯於心达於性於兹三四年矣呜呼今师之报身则化师之八言不化至哉八言实无生忍观之渐门也故自观至舍次而讚之广一言为一偈谓之八渐偈盖欲以发挥师之心教且明居易不敢失坠也既而升於堂礼於床跪而唱泣而去偈曰

观偈

以心中眼观心外相从何而有从何而丧观之又观则辨真妄

觉偈

惟真常在为妄所蒙真妄苟辩觉生其中不离妄有而得真空

定偈

真若不灭妄即不起六根之源湛如止水是为禅定乃脱生死

慧偈

慧之以定定犹有繫济之以慧慧则无滞如珠在盘盘定珠慧

明偈

定慧相合合而後明照彼万物物无遯形如大圆镜有应无情

通偈

慧至乃明明则不寐明至乃通通则无碍无碍者何变化自在

济偈

通力不常应念而变变相非有随求而见是大慈悲以一济万

舍偈

衆苦既济大悲亦舍苦既非真悲亦是假是故衆生实无度者

绣阿弥陀佛赞【并序】

绣西方阿弥陀佛一躯女弟子京兆杜氏奉为妣范阳县太君卢夫人八月十一日忌辰所造也五彩庄严一心恭敬愿追冥福誓报慈恩赞曰

善始一念千念相属绣始一缕万缕相续功绩成就相好具足金身螺髻玉毫紺目报罔极恩荐无量福

绣观音菩萨赞【并序】

故尚书膳部郎中太原白府君讳行简妻京兆杜氏奉为府君祥斋敬绣救苦观音菩萨一躯
长五尺二寸濶一尺八寸纫针缕彩络金缀珠衆色彰施诸相具足发弘愿於哀恳荐景福於
幽灵稽首焚香跪而赞曰集万缕兮积千针勤十指兮一心呜呼监悲诚而介冥福实有望於
观音

画水月菩萨赞

淨綠水上虚白光中一觀其相万缘皆空弟子居易誓心归依生生劫劫长为我师

白氏长庆集卷三十九

卷四十

钦定四库全书

白氏长庆集卷四十

唐白居易撰

哀祭文【凡十四首】

哀二良文【并序】

丞相陇西公出镇于汴州军司马御史大夫陆长源实左右之二年而军用宁司空南阳公作藩于徐州军副使祠部员外郎郑通诚实先後之三年而民用康暨十五年春陇西薨浹辰而师乱大夫以直道及祸十六年夏南阳薨翌日而难作员外以危行遇害惜乎大夫人之望也员外国之良也咸克洁于身俭于家勤于邦又申之以言行文学智谋政事故其历要官参剧务如刀劒发鏘割而无滞如钟磬在悬动而有声识者以为异时登天子股肱耳目之任必能经德秉哲绍复陇西南阳之事业以藩辅王家呜呼善人宜将锺奕叶之庆而不免及身之祸天乎报施之朕何其昧欤昔诗人有黄鸟之章以哀三良不得其死今斯文亦以哀二良名其篇云

伊大化之无形兮浩浩而茫茫中有祸身兮若机之张梁之乱兮陆受其毒徐之难兮郑罗其殃惟善人兮邦之纪纲邦之瘁兮而人先亡谓天之恶下民兮胡为生此忠良谓天之爱下民兮胡为生此豺狼我欲阶冥冥问苍苍苍苍之不可问兮俾我心之靈【迄力切】伤悲夫而今而後吾知夫天难忱而命靡常

祭城北门文【为濠州刺史作】

某年月日某官某敬以醴币祭于外城北门某闻北鄘四门之神有水旱之灾於是乎禋之今年春天作淫雨将害于农垫于民惟城积陰之气惟北太陰之位是用昭告于城之北门惟门有神裁之某以天子休命殿于是邦大惧天厉之不时俾黎民阻饥敢以正辞告神神若之何不听敢以至诚感神神若之何不吊尚克陰沴不作时阳咸若百穀用成庶民用宁实惟鄘之神门之灵於戏北鄘北门之神明听斯言罔俾雨水昏垫以作某之忧神之羞

祭符离六兄文

维贞元十七年某月某日从祖弟居易等谨祭于符离主簿六兄之灵呜呼圣忘情愚不及情

情所鍾者唯居易與兄豈不以親莫愛於弟兄別莫痛於死生斯親也而有斯別也孰能不哀
從中來而失聲去年春居易南游兄亦東適黟歙之間欣然一覲相顧笑語相勉行役中路遽
別情甚感激孰知此別為生死隔矧兄遇疾于路路無藥石歸全于家家無金帛環堵之室不
容吊客稚齒之子未知哀戚自古孔懷之痛亦莫我之與劇古人有言神福仁天福敬又曰惡
有余殃善有余慶惟兄道源乎太和德根乎至性以孝友肥其身以仁信羶其行而位不登於
再命年不及於知命何報施之我欺俾吾兄之不幸嗚呼已焉哉既卜遠日既宅新阡春草之
中畫為墓田澧水南岸符離東偏其地則迓其別終天惟弟與家人僣拜哭於車前魂兮有知
監斯文歆斯筵知居易之心茆茆然

祭楊夫人文

維元和二年歲次戊子八月辛亥朔十九日己巳將仕郎守左拾遺翰林學士太原白居易謹
以清酌庶羞之奠敬祭于陳氏楊夫人之靈惟夫人柔明治性溫惠保身靜修言容動中規度
泊承訓師氏作嫔良人茂四德而蘭幽有香潔百行而玉立無玷發為淑問着為芳猷姻族有
輝閨闈是式噫福仁何昧積慶無徵宜享永年遽歸長夜浮生若此永痛如何嗚呼生必有涯
人誰不沒所甚感者其唯情乎故事劇者情易鍾感深者理難遣夫人雖宜其室竟未辭家蓄
和順之誠不得施於娣姒蘊孝敬之德不得展於舅姑有志莫伸何恨過此況一嬰沈痼自夏
徂秋伏枕七旬姊妹視疾歸櫟千里弟兄主喪凋桃李之花夫遠不見失乳哺之愛女小未知
乃使哀情倍鍾血屬洛川迢遞秦野蒼茫日慘不光云愁無色姊妹且病親老尤慈哭別一聲
聞者腸斷居易早聆懿范近接嘉姻維私之眷每深有恻之情何已敬陳薄奠庶鑑悲誠尚飡

祭小弟文

維元和八年歲次癸巳二月某朔二十五日仲兄居易季兄行簡以清酌之奠致祭于亡弟金
剛奴嗚呼川水一逝不復再還手足一斷無因重連惟吾與爾其苦亦然黃墟白日相見無緣
每一念至腸熱骨酸如以刀火刺灼心肝況爾之生生也不夭苗而不秀九歲夭焉昔叔賓爾
澧南古原今改葬爾渭北新阡祔先茔之北次就卑位於東偏冀神魂之不孤庶窀穸之永安
嗚呼自爾舍我歸於下泉日來月往二十二年吾等罪逆不孝殃罰所延一別爾後再罹凶艱
灰心垢面泣血漣漣松檟之下其生尚殘昔爾孤於地下今我孤於人間與其偷生而孤苦不
若就死而團圓欲自決以毀滅又傷孝於歸全進退不可中心煩冤仰天一號痛苦萬端嗚呼
爾魂在几爾骨在棺吾親奠酌於爾牀前苟神理之有知豈不聞吾此言尚飡

祭烏江十五兄文【時在宣城】

維貞元十五年七月七日從祖弟居易謹以清酌庶羞之奠敬祭于故烏江主簿十五兄之靈
易云積善之家必有余慶書曰非夭夭人人中絕命則冉牛斯疾顏回不幸何繆舛之若斯諒
聖賢之同病惟兄之生生而不辰孩失其怙幼喪所親旁無弟兄藐然一身自強自立以致成
人蓋以孤子靡托孝友彌敦自居易與兄及高九行簡雖從祖之昆弟甚同氣之天倫故雖百
里信宿之別曷常不惻然而悲辛矧終天之永訣知後期而無因徒撫膺而隕涕諒沈痛之難

伸追思乎早岁离阻各悲零俦中年集会共喜长成同参选於东都俱署吏於西京居则共被而卧出则连骑而行友于四人同年成名优游笑敖怡怡弟兄虽不侔八龙三虎亦自谓当家一时之荣及兄辞满淮南薄游江东居易亦以行迈忽逆旅而逢或酒或歌宴衍从容何朝不游何夕不同常以兄仁信根于心孝悌积于躬谓至行之有荅必景福以来从呜呼位始及一命禄未遇数锺年又不得四十而歿於道途之中郁壮志而不展结幽愤於无穷况旧业东洛先茔北邙三千里外身歿陵阳有妹出嫁无男主丧悠悠孤旆未办还乡宣城之西荒草道傍旅殡於此行路悲凉秋风萧萧白日无光聚今晨之弟侄对前日之盃觞稽首再拜魂兮来享进三奠而退一恸孰不神酸而骨伤哀哉伏惟尚飨

祭浮梁大兄文【时在九江】

维元和十三年岁在丁酉閏五月己亥居易等谨以清酌庶羞之奠再拜跪奠大哥于座前伏惟哥孝友慈惠和易谦恭发自修身施於为政行成内信及朋僚廉干露於官方温重形於酒德冀资福履保受康宁不谓才及中年始登下位辞家未踰数月寝疾未及两旬皇天无知降此凶酷交游行路尚为兴叹骨肉亲爱岂可胜哀举声一号心骨俱碎今属日时叶吉窀穸有期下邳南原永附松檟居易负忧系职身不自由伏枕之初既阙在左右执紼之际又不获躬亲痛恨所锺倍百常理呜呼追思曩昔同气四人泉壤九重刚奴早逝巴蜀万里行简未归茆然一身漂弃在此自哥至止形影相依死灰之心重有生意岂料避弓之日毛羽摧颓垂白之年手足断落谁无兄弟孰不死生酌痛量悲莫如今日宅相痴小居易无男抚视之间过於犹子其余情礼非此能伸伏冀慈灵俯鉴悲恳哀纏痛结言不成文呜呼哀哉伏惟尚飨

祭匡山文

维元和十二年岁次丁酉二月辛酉朔二十一日将仕郎守江州司马白居易谨以清酌之奠敢昭告于匡山神之灵恭惟神正直聪明扶持匡庐福利动植居易赋命蹇连与时参差愿於灵山栖此陋质遗爱寺侧既置草堂欲居其中参禅养素而开构池宇在神域中往来道途由神门外辄用酒脯告于神神其听之歆此薄奠非敢徼福所期荐诚尚飨

祭庐山文

维元和十二年岁次丁酉二月二十五日乙酉将仕郎守江州司马白居易以香火酒脯告于庐山遗爱寺四旁上下大小诸神居易夙闻匡庐天下神秀幸因佐宦得造兹山又闻永远宗雷同居于是道俗并处古之遗风而遗爱西偏郑氏旧隐三寺长老招予此居创新堂宇疏旧泉沼或来或往栖迟其间不唯耽翫水石以乐野性亦欲摆去烦恼渐归空门傥秩满以来得以自遂余生终老愿托於斯今葺构既成游息方始爰以洁敬荐兹馨香不敢媚神不敢禳福但使疫厉不作魑魅不逢猛兽毒虫各安其所苟人居之静谧则神道之光明斋心露诚庶几有荅尚飨

祭李侍郎文

维长庆元年岁在辛丑五月丙申朔十日乙巳中散大夫守中书舍人翰林学士上柱国赐紫金鱼袋元稹朝议郎守尚书主客郎中白居易谨以清酌庶羞之奠敬祭于故刑部侍郎赠工部尚书陇西李公构直之灵於戏代重名义公能佩服德润行羶温温郁郁凡向善者如螳慕肉时重爵位公负桢干春秋天官是摄是赞尚书六职公理其半朝重文翰公掌诏令西阁丝言内庭密命公实出入迭操二柄家重隆盛公既陈许两掖中台差肩接武青幢赤帟叔出季处门重婚嗣公娶令族锵锵振振和鸣似续男女七人五珠二玉年重壽考公亦云老心虽壮健发已华皓五十加八亦不为夭人重康宁公体丰盈迨乎奄忽不失和平启手足夜无呻吟声古称五福公有七福凡人得一死犹瞑目矧公兼之岂有不足所不足者不在其身怏怏惻惻其在他人为门户惜主为骨肉惜亲为吾侪惜良友为朝廷惜贤臣况稹也不才居易无似辱与公游十九年矣昔贞元岁俱初筮仕并命同官兰台令史以公明達以我顽鄙度长絜能信非伦拟一言脗合不知所以莫逆之交实从兹始清问登近递罹谗毁江沔通州左迁万里或合或散一伏一倚浩浩世途是非同轨齿牙相轧波澜四起公独何人心如止水风雨如晦鸡鸣不已不因纷阻孰辨君子以胶投漆如弧有矢所以绸缪见于生死前年去年次第徵还或先或後俱到长安水流火就松茂栢坚置酒欲饮握手何言初论瘴疠次叙艰难三心六眼同一漚然稹与居易旋登禁掖公领铨衡职勤务剧私室多故公门少隙欢会实稀光陰虚掷不相劝勉急务欢适且曰朱顏已去白日可惜花寺春朝松园月夕大开口笑满酌口吃言约则然心期未获呜呼杓直而忍遗我弃我何处舍我何之岂反真归冥漠然而无所为将精多魂强的然而有所知恍如闻兮倏如覩未甘心於永辞彼有灵兮此有梦胡不一来兮质我疑逝川渺其不回日月忽乎有时指岐下以归祔备大葬之威仪礼有进而无退祖於庭而送之畿旌竿举兮輶轮动遂不得少留乎京师呜呼杓直其鉴于兹爵盈不饮豆乾不食如之何勿思公儿号我公马嘶我如之何勿悲呜呼杓直已而已而哀哉尚飨

祷仇王神文

维长庆二年岁次癸卯八月癸未朔十七日己亥朝议大夫使持节杭州诸军事守杭州刺史上柱国白居易谨遣朝议郎行余杭县令常师儒以清酌之奠敬祭于仇王神尝闻神者所以司土地守山川禽兽福生人也余杭县自去年冬逮今秋虎暴者非一神其知之乎人死者非一神其知之乎居易与师儒猥居牧宰慙无政化不能使渡江出境是用告于神惟神庙居血食非人不立则人神之主也兽神之属也今纵其属残其主於神何利焉於人何辜焉若一告之後神其有知即能挥灵申威服猛禁暴是人之福幸亦神之昭昭若人告不闻兽害不去是无神也人何望哉呜呼正直聪明盍鉴於此尚飨

祝臯亭神文【今杭州臯亭山神在城东北】

维长庆二年岁次癸卯七月癸丑朔十六日戊辰朝议大夫使持节杭州诸军事守杭州刺史上柱国白居易以酒乳香果昭告于臯亭庙神去秋愆阳今夏少雨实忧灾沴重困杭人居易忝奉诏条愧无政术既逢愆序不敢宁居一昨祷伍相神祈城隍祠灵虽应期雨未沾足是用择日祇事改请于神恭闻明神稟灵於陰祇资善於释氏聪明正直洁靖慈仁无幽不通有感必应今请斋心告神其监之若四封之间五日之内雨泽霑足稼穡滋稔敢不增修像设重荐

馨香歌舞鼓钟备物以报如此则不独人之福亦惟神之光若寂寥自居肸飡无应长吏?诚而不荅下民顒望而不知坐观田农使至枯悴如此则不独人之困亦唯神之羞惟神裁之敬以俟命尚飡

祭龙文

维长庆二年岁次癸卯八月癸未朔二日甲申朝议大夫使持节杭州诸军事守杭州刺史上柱国白居易率寮吏荐香火拜告于北方黑龙惟龙其色玄其位坎其神壬癸与水通灵昨者历禱四方寂然无应今故?诚洁意改命於黑龙龙无水欲何依神无灵将恐竭泽能救物我实有望於龙物不自神龙岂无求於我若三日之内一雨霂 是龙之灵亦人之幸礼无不报神其听之急急如律令

祭浙江文

维长庆四年岁次甲辰五月己酉朔四日壬子朝议大夫使持节杭州诸军事守杭州刺史上柱国白居易谨以清酌少牢之奠敢昭告于浙江神?滔大江南国之纪安波则为利洚流则为害故我上帝命神司之今属潮涛失常奔激西北水无知也如有凭焉浸淫郊鄣坏败庐舍人坠垫溺顒天无辜居易祇奉玺书兴利除害守土守水职与神同是用备物致诚躬自?禱庶俾水反归壑谷迁为陵土不蹇崩人无荡析敢以醴币羊豕沉奠于江惟神裁之无忝祀典尚飡

白氏长庆集卷四十

卷四十一

钦定四库全书

白氏长庆集卷四十一

唐白居易撰

碑碣【凡六首】

有唐善人墓碑

唐有善人曰李公公名建字杓直陇西人魏将军申公发公十五代祖也周柱国杨平公远六代祖也绥州刺史明高祖也太子中允进德曾祖也絳州昌明令珍玉大父也雅州别驾赠礼部尚书震考也赠博陵郡太君崔氏妣也陈许节度礼部尚书逊兄也渭源县君房氏妻也容管招讨使济外舅也长庆元年二月二十三日夜无疾即世于长安修行里第是岁五月二十五日归祔于凤翔某县某乡某原之先茔春秋五十八有二女五男曰纳朴恪慤硕公官历校书郎左拾遗詹府司直殿中侍御史比部兵部吏部员外郎兵部吏部郎中京兆少尹洋州刺史太常少卿礼部刑部侍郎工部尚书职历容州招讨判官翰林学士鄜州防御副使转运判官知制诰吏部选事阶中大夫勲上柱国爵陇西县开国男有史官起居郎渤海高钱作行状翰林学士中书舍人河南元稹作墓志有尚书主客郎中知制诰太原白居易作墓碑大署其碑曰善人墓善人者何公幼孤孝养太君太君老疾常曰【乌禾切犬子】子劝吾食吾辄饱劝吾药吾意其疾瘳子公小字也及长居荆州石首县其居数百家凡争鬪稍稍就公决公随而评之寢及郷人不诣府县皆相率曰请问李君公养有余力读书属文业成与兄逊起应进士俱中第为校书时以文行闻故德宗皇帝擢居翰林翰林时以视草不诡随退官詹府詹府时以贞恬自处不出户辄逾月鄜帅路恕高之拜请为副在鄜时有非类者至以病去为御史时上任有遏其行事者作谬官诗以讽为吏部郎时调文学科暨吏课高者得无停年又省成劳急成状限繇是吏史革无缘为奸迄今选部用其法知制诰时笔削间有以自是不屈者因请告改少尹少尹时与大议岁减府税钱十三万在洋时不鞭人不名吏居岁余人人自化在礼部时由文取士不听誉不信毁公为人质良寛大体与用绰然有余裕为政廉平易简不求赫赫名与人交外淡中坚接士多可而有别称贤荐能未尝倦好议论而无口过远邪谀而不忤物其居家菲衣食厚宾客敬兄嫂礼妻子爱甥侄初先太君好善佛书不食肉公不忍违其志亦终身蔬食自八九岁时始讽毕尽得其义善理王氏易左氏春秋前後着文凡一百五十二首皆义理撮要词无枝叶其卓然者有詹事府司直比部员外郎厅记请双日坐疏与梁肃书上宰相论选事状秉笔者许之薨之日不识者惜识者叹交游出涕执友恸哭夫如是其善人乎传曰善人国之纪也语曰善人吾不得而见之矣噫善人之称难乎哉独加於公无愧焉

铭曰古者墓有表表有云显其行省其文故季札死仲尼表其墓曰君子今吾丧李君署其碑曰善人呜呼李君有知乎无知乎君之名与此石俱

唐故通议大夫和州刺史吴郡张公神道碑铭

张之为着姓尚矣自汉太傅良侍中肱晋司空华丞相嘉以降勲贤轩冕历代不乏肱避地渡江始居于吴故其子孙称吴郡人嘉以孝悌闻于郡故其所居号孝张里嘉之曾孙裕在宋为司徒即公五代祖也司徒之孙倂在隋为吴郡都督即公曾王父也台州临海令讳鵬即公王大父也袁州司马讳孝绩即公王考也或以人物着或以閼閼称迄今为江南右族公讳无择字无择未冠丁袁州府君忧庐于墓昼号而夜泣者三年矣有灵芝醴泉出焉既冠好学能属文从乡试登明经第应制举中精通经史科补弘文馆校书郎调左金吾录事换杭州录事参军在杭州前後诘伪制补吏者三十八人驳假年侍老者二十人举而正之人服其明会刘幽求来为刺史举课闻诏授绛州录事参军绛之郡有主胥者怙宠侮法豪夺人利公数其罪露章奏之章下丞相姚元崇奇之致书褒美寻改太原府功曹参军给事中张昶为江淮安抚使表公正直奏置部从事吏部尚书陆象先为河东按察使状公清白奏授怀州获嘉令在获嘉以不茹柔得人心以不吐刚得罪繇是左迁鄂州司马移深州司马转虢州长史时上方思理诏求二千石之良者时宰以公塞诏擢拜和州刺史公在郡奉诏条恤人隐而已不知其他无何水潦害农公请蠲谷籍之损者什七八时李知柔为本道采访使素不快公之刚直密疏诬奏以附下为名遂贬苏州别驾老幼攀泣而遮道者数百人信宿方得去移曹州别驾岁余谢病归老于家天宝十三载正月二十一日终于东都利仁里私第其年二月十二日葬于河南府伊阙县中李原享年八十三噫公生天地间八十有三年可谓壽矣其间当明皇帝驭天下四十有五年可谓时矣有其才得其壽逢其时然职不过陪臣秩仅至郡守凡所贮蓄郁而不舒呜呼其命也夫公之文学常为贺知章贾彦璿许之公之谅直常为李邕张庭珪称之公之政事又为刘姚张陆推之夫以八君子之力援之而不足以一知柔之力排之而有余厄穷不振以至没齿呜呼其命也夫古人云道不虚行又云其後必有達者故公之子大理评事诚以节行闻于时公之孙户部侍郎平叔以才位光于国报施之道信昭昭矣不在其身则在子孙相去几何哉长庆二年某月某日平叔奉祖德碣之居易据家状序而铭之其词曰

有木有木硕大而长破为桷杙【夷益切】不作栋梁有骥有骥规行矩步辱在短辕不驾大辂呜呼噫嘻公亦如之何时不遇我而我不遇时勿谓已矣天锡多祉既贤其子以济其美又才其孙以大其门苟无先德孰启後昆唐赠尚书工部侍郎吴郡张公神道碑铭并序

有唐岭南观察推官试大理评事吴郡张公大历三年十一月八日终于伊川别墅五年八月七日葬于伊阙县中李原春秋五十五元和十三年诏赠主客员外郎明年赠太常少卿又明年赠尚书工部侍郎夫人吴郡陆氏贞元二年某月某日终于某所春秋六十六追封嘉兴县太君又封吴郡太夫人嗣子通议大夫守尚书户部侍郎判度支上柱国赐紫金鱼袋平叔以长庆二年某月某日立神道碑太原白居易文其碑云

公讳诚字老莱吴郡人父讳无择和州刺史祖讳孝绩袁州司马由高曾而上世德世禄载在

和州府君碑内此不书公年十八以通经中第及调判入高等授苏州长洲尉秩满丁先府君忧既禫又丁先太夫人忧泣血六年哀毁过制以方寸再乱殆无宦情既除丧退居不调者累年而亲友以大义敦责不得已而复起选授左武卫骑曹参军分司东都属安禄山陷覆洛京以伪职淫刑胁刳士庶公与同官范阳卢巽潜遁于陆浑山食木实饮泉水者二年讫不为逆命所污及肃宗嗣位诏河南尹薛伯连搜访不仕贼庭隐藏山谷者伯连得六人以应诏而公与巽在焉繇是名节闻于朝野君子以为知道优诏褒美特授密县主簿未周岁迁宋州碭山县令时睢阳当大兵後野无草里无人公抚之一年襁负至二年污莱辟三年衣食足及解印去县民相率泣而饯之君子以为知政岭南节度观察使李勉伟人也既高公陆浑之节又美公碭山之政欲以名职礼命起而大之遂奏授试大理评事充观察推官及除书简牒到门即公捐館舍之明日也才如是命如是呜呼哀哉公常自负其才不後於人自疑其命不偶於世及将去碭山而反伊川也顿驾擗【女角切】管沈叹久之因赋咏怀诗云论成方辩命赋罢即归田竟如是言终于衡茅之下君子以为知命公有三子曰平仲平叔平季夫人陆氏即国子司业集贤殿学士善经之女贤明有法度初公既歿诸子尚幼夫人勤求衣食亲执诗书讽而导之咸为令子又常以公遗志择其子而付之故平叔卒能振才业致名位追爵命碣碑表继父志扬祖德此诚孝子顺孙之道也亦由夫人慈善教诱之德浸渍而成就之不其然乎居易常辱与户部游而知其家事故见托譔述庶传信焉铭曰

猗嗟碭山以文行保家声以义节振时名以惠政抚县民而职不登诸侯卿秩不及廷尉评悲哉猗嗟碭山前有和州名德如彼後有户部才位若此才子之父名父之子贤者兼之可谓具美休哉

传法堂碑

王城离域有佛寺号兴善寺之次也有僧舍名传法堂先是大彻禅师宴居于是寺说法于是堂因名焉有问师之名迹曰号惟寛姓祝氏衢州信安人祖曰安父曰皎生十三岁出家二十四具戒僧腊三十九报年六十三终兴善寺葬灞陵西原诏諡曰大彻禅师元和正直之塔云有问师之传授曰释迦如来欲涅槃时以正法密印付摩诃迦叶传至马鸣又十二叶传至师子比丘及二十四叶传至佛驮先那先那传圆觉達摩達摩传大弘可可传镜智璨璨传大医信信传圆满忍忍传大鉴能是为六祖能传南岳让让传洪州道一一諡曰大寂寂即师之师贯而次之其传授可知矣有问师之道属曰由四祖以降虽嗣正法有家嫡而支???者犹大宗小宗焉以世族譬之即师与西堂藏甘泉贤勒潭海百岩晖俱父事大寂若兄弟然章敬澄若从父兄弟径山钦若从祖兄弟鹤林素华严寂若伯叔然当山忠东京会若伯叔祖嵩山秀牛头融若曾祖伯叔推而序之其道属可知矣有问师之化缘曰师为童男时见杀生者尽然不忍食退而发出家心遂求落发於僧昙【徒含切】受尸罗於僧崇学毗尼於僧如证大乘法於天台止观成最上乘道於大寂道一贞元六年始行於闽越间岁余而回心改服者百数七年驯猛虎於会稽作滕家道場八日与山神受八戒於鄱阳作回向道場十三年感非人於少林寺二十一年作有为功德於卫国寺明年施无为功德於天宫寺元和四年宪宗章武皇帝召见於安国寺五年问法於麟德殿其年复灵泉於不空三藏也十二年二月晦大说法於是堂说讫说化其化缘云尔有问师之心要曰师行禅演法垂三十年度白黑衆殆百千万亿应

病授药安可以一说尽其心要乎然居易为赞善大夫时尝四诣师四问道第一问云既曰禅师何故说法师曰无上菩提者被於身为律说於口为法行於心为禅应用有三其实一也如江湖河汉在处立名名虽不一水性无二律即是法法不离禅云何於中妄起分别第二问云既无分别何以修心师曰心本无损伤云何要修理无论垢与净一切勿起念第三问云垢即不可念净无念可乎师曰如人眼睛上一物不可住金屑虽珍宝在眼亦为病第四问云无修无念亦何异於凡夫耶师曰凡夫无明二乘执着离此二病是名贞修贞修者不得勤不得妄勤即近执着妄即落无明其心要云尔师之徒殆千余达者三十九人其入室受道者有义崇有圆镜以先师常辱与予言知予尝醒【杜兮切】酬【洪孤切】嗅薈【覩敢切】卜【步黑切】者有日矣师既歿後予出守南宾郡远托譔述迨今而成呜呼斯文岂直起师教慰门弟子心哉抑且志吾受然灯记记灵山会於将来世故其文不避繁铭曰

佛以一印付迦叶至师五十有九叶故名师堂为传法唐抚州景云寺故律大德上弘和尚石塔碑铭【并序】

元和十一年春庐山东林寺僧道深怀纵如建冲契宗一至柔以言语智则智明云皋太易等凡二十辈与白黑衆千余人俱实持故景云大德弘公行状一通执钱十万来诣浔阳府请司马白居易作先师碑会有故不果十二年夏作石坟成复来请会有病不果十三年夏作石塔成又来请始从之既而僧反山衆反聚落钱反寺府翌日而文就明年而碑立其词云尔

我闻竺乾古先生出世法法要有三曰戒定惠戒生定定生惠惠生八万四千法门是三者迭为用若次第言则定为惠因戒为定根定根植则苗茂因树成则果满无因求满犹梦果也无根求茂犹握苗也虽佛以一切种智摄三界必先用戒菩萨以六波罗密化四生不能舍律律之用可思量不可思量如来十弟子中称优波离善持律波离灭有南山大师得之南山灭有景云大师得之师讳上弘姓饶氏曾祖君雅祖公悦父知恭临川南城人童而有知故生十五岁发出家心始从舅氏剃落壮而有立故生二十五岁立菩提愿从南岳大圆大师具戒乐所由生故大历中不去父母之邦请隶于本州景云寺修道应无所住故贞元初离我我所徙居洪州龙兴寺说法亲近善知识故与匡山法贞天台灵裕荆门法裔暨兴果神凑建昌惠进五长老交游佛法属王臣故与姜相国公辅太师顔真卿暨本道廉使杨君凭韦君丹四君子友善提振禁戒故讲四分律而从善远罪者无其数随顺化缘故坐甘露坛而誓衆主盟者二十年荷担大事故前後登方等施尸罗者十有八人会救拔羣生故孳婆男女由我得度者万五千七十二人示生无常故元和十年十月己亥迁化于东林精舍示灭有所故是月丙寅归于南冈石坟住世七十七岁安居六十五夏自生至灭随迹示教行止语嘿无非佛事夫施於人也博则反诸己也厚故门人乡人报如不及繇是艺松成林琢石为塔塔有碑碑有铭铭曰佛灭度後薈卜香衰醒酬味醢【邻溪切】谁反是香谁反是味景云大师景云之生一匡苾【覓笔切】葛中兴毗尼景云之灭衆将安仰法将畴依昔景云来行道者随践迹者归今景云去升堂者思入室者悲鑪峯之西虎谿之南石塔巍巍有记事者以实眞辞书于塔碑

唐江州兴果寺律大德湊公塔碣铭

如来灭後後五百岁有持戒见性者曰兴果律师师姓成号神凑京兆蓝田人既出家具戒於南岳希操大师参禅於鍾陵大寂大师志在首楞严经行在四分毗尼藏其他典论以有余力通大历八年制悬经论律三科策试天下僧师中等得度诏配江州兴果寺後从僧望移隶东林寺即鴈门远大师旧道場有甘露坛白莲池在焉师既居是寺兴佛事元和十二年九月七日遘疾二十六日及其十月十九日迁全身于寺道北附鴈门坟左春秋七十四夏腊五十一日至乎哉师本行也以精进心脂不退轮以勇健力挺无畏鼓故登坛进律郁为法将者垂三十年领羯磨会十三化大衆万数仪范所摄惠用所诱贵高憎慢罔不降伏其威重如自兴果起东林一盂斋一榻居衣麻寝菅如坐漆室繇是名闻檀施来无虚月尽归寺藏与大衆共之迨启手足目前无长物其简俭如是师心行禅身持律起居动息皆有常节虽沍【何故切】寒隆暑风雨黑夜捧一鑪秉一烛行道礼佛者四十五年凡十二时未尝阙一其精勤如是师既疾亟四大将坏无恋着念无厌离想郡太守门弟子进医馈药者数四师颌之云报身非病焉用是为言讫趺坐恬然就化其了悟如是门人道建利辯元审元总等封坟建塔思有以识之以先师尝辱与予游托为铭碣初予与师相遇如他生旧识一见欣合不知其然及迁化时予又题四句诗为别盖欲会前心集後缘也不能改作因取为铭曰

本结菩提香火社共嫌烦恼电泡身不须恋恋从师去先请西方作主人

白氏长庆集卷四十一

卷四十二

<集部,别集类,汉至五代,白氏长庆集>

钦定四库全书

白氏长庆集卷四十二

唐白居易撰

墓志铭【凡七首】

大唐故贤妃京兆韦氏墓志铭

德宗圣文神武皇帝元妃韦氏讳某字某京兆人也曾祖某某官祖某某官父某某官妃即某官府君第某女也母曰永穆公主元和四年四月某日妃薨于某所以其年四月某日诏葬于万年县上好里洪平原上悼焉哀荣之礼有以加焉呜呼惟韦氏代德官业族系婚戚有国史家谍存焉今奉诏但书地及时与妃之所以曰贤之义而已贞元中沙鹿上仙长秋虚位凡六十九御之政多听於妃妃先以采蘋之诚奉于上故能致霜露之感荐于九庙次以樛木之德逮于下故能分云雨之泽洽于六宫其余坐论妇道行赞内理服用必中度故组【惣五切】紃【详伦切】有常训言动必中节故环佩有常声七十二年礼无违者册命曰贤不亦宜哉贞元中号奉宫车誓留园寝麻衣告朔蓬首致哀执匪懈之心视奠於灵坐修无上之道荐福于崇陵殆兹殁身不衰其志故葬之日掌文之臣白居易得以无媿之词志于墓而铭曰

京兆阡兮洪平原兮岁已丑兮日丁酉兮惟土田兮与时日龟兮蓍兮偕言吉峨峨新坟兮葬者谁德宗皇帝韦贤妃

唐故会王墓志铭【并序】

唐元和五年冬十一月四日会王寢疾薨于内邸大小敛之日上皆不举乐不坐朝恩也越十二月十八日诏京兆尹潘监视葬事于万年县崇道乡西赵原礼也是日又诏翰林学士白居易为之铭志故事也王讳纁字某德宗之孙顺宗之子陛下之弟幼有令德早承宠章未冠而王受封曰会夫以祖功宗德之庆父天兄日之贵胄土列藩之宠好德乐善之贤宜乎壽考福延为王室辅呜呼降年不永二十一而终哀哉皇帝厚悼睦之恩深友悌之爱故王之薨也轸悼之念有加於常情王之葬也遣奠之仪有加於常数哀荣兼备斯其谓乎铭曰

岁在寅月穷纪万年县崇道里会王薨葬於此

故滁州刺史贈刑部尚書荊陽鄭公墓志銘

周宣王封母弟桓公于鄭厥後因封命氏為荊陽人鄭自桓公而下平簡公而上世家婚嗣咸詳于史牒故不書公諱某字某五代祖諱某北齊尚書令是為平簡公曾祖諱某下邳郡太守王父諱某衛州刺史王考諱某秘書郎贈鄭州刺史公即秘書第三子好學工詞賦進士中第判入高等始授鄆城尉無何本郡守移他鄉州民有暴悖者相率遮道麾呵不去公忿其犯上立斃六七人采訪使奇之奏署支使改浚儀主簿轉大理評事兼佐漕務彭果領五府奏公為節度判官會果坐贓連累僚佐貶光化尉移向城尉歷北海時安祿山始亂傳檄郡邑邑民孫俊鄧犀伽毆市人劫廩藏以應公時已去秩因奮呼率僚吏子弟急擊之殺俊犀伽盡殲其黨繇是一邑用寧朝廷美之擢授登州司馬尋轉長史累加朝散大夫入為太子左贊善大夫尚書屯田員外郎太子中允出攝淄州刺史俄換萊州連有善最詔授檢校司勳郎中兼侍御史充青萊登海密五州租庸使太尉李公光弼鎮徐州奏公為徐州刺史充海密沂三州招討使加正議大夫賜紫魚袋公威惠旧着比至部而蒼山賊帥李浩與其徒五千人來降繇是三郡底定復入為衛尉少卿相國王公縉統河南奏公為副元帥判官未几除秘書少監兼滁州刺史本州團練使居八載政績大成大曆十二年二月十五日薨于揚州權于某所享年七十有八公凡七佐軍四領郡祿俸不積滯衣食无常主常嘆曰以飽暖活孀幼以清白貽子孫是吾心也逮啓手足卒如其志先是太夫人常寢疾公衣不解發不栉者弥年侍疾執喪忧毀過禮公尤善五言詩與王昌齡王之煥崔國輔輩聯唱迭和名動一時逮今着樂詞播人口非一晚賦思旧游詩百篇亦傳於代前夫人清河崔氏贈清河郡太君後夫人博陵崔氏贈博陵郡君生子七人女七人長子云逵有才名官至刑部侍郎京兆尹公由京兆累贈至散騎常侍刑部尚書次子微終潤州司馬次子公逵有至行初公年高就養不仕及居忧廬墓泣血三年淮南節度使本道黜陟使泉朝賢袁高高參等累以孝悌稱荐向名教者慕之今為侍御史上柱國滄景節度參謀次子方逵衡州司士參軍次子震當陽丞次子文弼幽州參軍次子安逵率府倉曹參軍公自捐館舍殆逾三紀家國多故未克反葬至元和二年月日始遷兆於鄭州新鄭縣某原祔先秘書荳二夫人从焉時京兆已即世諸弟在下位獨侍御史恤襄事孝備始終見托述譔銘于墓石銘曰世祿德門斯之謂可久懿文茂績斯之謂不朽二千石之祿七十八之年斯之謂貴壽內史之显揚柱史之孝行斯之謂有後嗚呼鄭公榮如是哀如是又何不足之有

唐河南元府君夫人荊陽鄭氏墓志銘

有唐元和元年九月十六日故中散大夫尚書比部郎中舒王府長史河南元府君諱寬夫人荊陽縣太君鄭氏年六十寢疾歿于万年縣靖安里私第越明年二月十五日權祔于咸陽縣奉賢鄉洪渎原从先姑之茔也夫人曾祖諱遠思官至鄭州刺史贈太常卿王父諱【於盖切】朝散大夫易州司馬父諱濟睦州刺史夫人睦州次女也其出范陽盧氏外祖諱平子京兆府涇陽縣令夫人有四子二女長曰沂蔡州汝陽尉次曰桓京兆府万年縣尉次曰積同州韋城尉次曰稹河南縣尉長女适吳郡陸翰翰為監察御史次為比丘尼名真一二女不幸皆先夫人歿府君之為比部也夫人始封荊陽縣君从夫貴也稹之為拾遺也夫人進封荊陽縣太君从子貴也天下有五甲姓荊陽鄭氏居其一鄭之勲德官爵有國史在鄭之源流婚媾有

家牒在比部府君世祿官政文行有故京兆尹郑云逵之志在今所叙者但书夫人之事而已初夫人为女时事父母以孝闻友兄姊睦弟妹以悌闻发自生知不由师训其淑性有如此者夫人为妇时元氏世食贫然以丰洁家祀传为诒燕之训夫人每及时祭则终夜不寝煎和滌濯必躬亲之虽隆暑沍寒之时而服勤亲饌面无怠色其诚敬有如此者元郑皆大族好合而姻表滋多凡中外吉凶之礼有疑议者皆质於夫人夫人从而酌之靡不中礼其明達有如此者夫人为母时府君既没积与穉方韶亂家贫无师以授业夫人亲执书海而不倦四五年间二子皆以通经入仕穉既第判入等授秘书省校书郎属今天子始践祚策三科以拔天下贤俊中第者凡十八人穉冠其首焉由校书郎拜左拾遗不数月诨言直声动於朝廷以是出为河南尉长女既适陆氏陆氏有舅姑多姻族於是以顺奉上以惠逮下二纪而歿妇道不衰内外六姻仰为仪范非夫人恂恂孜孜善诱所至则曷能使子達於邦女宜其家哉其教诲有如此者既而诸子虽迭仕祿赐甚薄每至月给食时给衣皆始自孤弱者次及疎贱者由是衣无常主?无异膳亲者悦疎者来故佣保乳母之类有冻馁垂白不忍去元氏之门者而况臧获辈乎其仁爱有如此者自夫人母其家殆二十五年专用训誡除去鞭扑常以正顔色训诸女妇诸女妇其心战兢如履於冰常以正辞气誡诸子孙诸子孙其心愧耻若撻于市由是纳下於少过致家於大和婢仆终岁不闻忿争童孺成人不识櫜楚闺门之内熙熙然如太古时人也其慈训有如此者噫昔漆室缁紫之徒烈女也及为妇则无闻伯宗梁鸿之妻哲妇也及为母则无闻文伯孟氏之亲贤母也为女为妇时亦无闻今夫人女美如此妇德又如此母仪又如此三者具美可谓冠古今矣呜呼惟夫人道移於他则何用而不臧乎若引而伸之可以肥一国焉则关雎鹊巢之化斯不远矣若推而广之可以肥天下焉则姜嫄文母之风斯不远矣岂止於训四子以圣善化一家於仁厚者哉居易不佞辱与夫人幼子穉为执友故聆夫人美最熟穉泣血号慕哀动他人托为撰述书于墓石斯古孝子显父母之志也呜呼斯文之作岂直若是而已哉亦欲百代之下闻夫人之风过夫人之墓者使悍妻和鬻母慈不逊之女顺云尔铭曰

元和岁丁亥春咸阳道渭水滨云谁之墓郑夫人唐扬州仓曹参军王府君墓志铭【代裴頠舍人作】

公讳某字士寬其先出自周灵王太子晋凡二十一代而生翦翦为将军又三世而生珣珣居太原故今为太原人又十九代而生琮琮为後魏仆射諡孝简公又二代而生曾祖讳满官为河南府王屋县令王父讳大璿为嘉州司马父讳昇为京兆府咸阳令河南府伊阙令有文行学术应制举对沈谋秘略策登科诗入正声集公即伊阙第三子好学善属文天宝中应明经举及第选授婺州义乌尉以清干称刺史韦之晋知之署本州防御判官无何租庸转运使元载又知之假本州司仓专掌运务岁终课绩居多遂奏闻真授永泰中勅迁越府户曹属邑有不理者公假领之所至必理大历中本道观察使薛兼训以公清白尤异表奏之有诏权知余姚县令时海寇初殄邑焚田荒公乃营邑室创器用复流庸辟菑畬凡江南列邑之政公冠其首其制邑辟田增户之绩则会稽之谍地官之籍载焉建中初选授扬州仓曹参军至五年七月二十六日疾歿于江阳县之私第春秋六十二夫人清河崔氏凤合舍人融之侄孙郑州司户法昂之女妇顺母训中外师之贞元二十年十一月十三日疾终于三原县之官舍享年六十二有子曰播曰炎曰起咸以进士举及第播应制举对直言极谏策授集贤殿校书郎累迁

監察殿中侍御史三原令炎既第未仕起應博學宏詞科選授集賢殿校書郎昆弟三人不十年而五登甲第時論者榮之一女適范陽盧仲通播等號護靈輿以永貞元年十月二十五日遷祔于京兆府富平縣淳化鄉之某原從吉兆也嗚呼夫懋言行蓄事業俾道積於躬者在人也踐大官贊元化俾功加于民者由命也有其人無其命雖聖與賢無可奈何維公受天地之和積為行發為文宣為用故在家以孝友聞行已以清廉聞莅事以干盥聞如金玉在佩動而有聲其大者又常以經德秉哲致君濟人為己任有識者深知之宜乎作王者心膂耳目之官以經緯其邦家而才為時生道為命屈名雖聞於天子位不過於陪臣鬱鬱然歿而不展其用者命矣夫古人云有明德大智者若不當世其後必有余慶今其將在後嗣乎不然何乃德行政事文學之具美聚乎公之三子乎天其或者殆將肥王氏之家大王氏之門以甚明報施之道者也某不佞頃對策於王廷也與炎同升諸科焉祇命於憲府也與播聯執其簡焉及為考文之官也又起在選中焉辱與公之三子游而聆公之遺風甚熟故作斯文無隱情無愧辭焉銘曰

淮山道光淮水靈長??子孫代有賢良將軍輔秦武功抑揚孝簡翊魏天德闡彰降及於公實生于唐大智全才應用無方作掾於郡三語有章承乏於邑一同載康展矣之人何用不臧宜登大位俾紹前芳嗚呼百鍊之金不鑄千將十圍之材不作棟梁公亦如之與世不當道不虛行後嗣其昌

唐故坊州鄜城縣尉陳府君夫人白氏墓志銘

夫人太原白氏其出昌黎韓氏其適潁川陳氏享年七十唐和州都督諱士通之曾孫尚衣奉御諱志善之玄孫都官郎中諱溫之孫延安令諱鎰之第某女韓城令諱欽之外孫故鄜城尉諱潤之夫人故潁川縣君之母故大理少卿襄州別駕諱季庾之姑前京兆府戶曹參軍翰林學士白居易前秘書省校書郎行簡之外祖母也惟夫人在家以和順奉父母故延安府君視之如子既笄以柔正從人故鄜城府君敬之如賓自延安終夫人哀毀過禮為孝女洎鄜城歿夫人撫訓幼女為節婦及居易行簡生夫人鞠養成人為慈祖母迨乎潔蒸嘗敬賓客睦娣姒工刀尺善琴書皆出於余力焉貞元十六年夏四月一日疾歿于徐州古丰县官舍其年冬十一月權?于符離縣之南偏至元和八年春二月二十五日改卜宅兆于華州下邽縣義津鄉北原即潁川縣君新塋之西坎從存歿之志居易等號慕慈德敬譔銘志泣血秉筆言不成文銘曰

恭惟夫人女孝而純婦節而溫母慈而勤嗚呼謹揚三德銘于墓門恭惟夫人實生我親實抚我身欲養不待仰號蒼旻嗚呼豈寸魚之心能報東海之恩

唐太原白氏之殤墓志銘

白氏下殤曰幼美小字金剛奴其先太原人高祖諱志善尚衣奉御曾祖諱溫都官郎中王父諱鎰河南府巩縣令先府君諱季庾大理少卿山東別駕先太夫人潁川陳氏封潁川縣君幼美即第四子也既生而惠既孩而敏七歲能誦詩賦八歲能讀書鼓琴九歲不幸遇疾夭徐州

符离县私第贞元八年九月权?于县南原元和九年春二月二十五日改葬于华州下邽县义津乡北冈祔于先府君宅兆之东三十步其兄居易行简藐然已孤抚哀临穴断手足之痛其心如初且号且铭志于墓曰

呜呼刚奴痛矣哉念尔九岁逝不回埋魂閼骨长夜台二十年後复一开昔葬符离今下邽魂兮魂兮随骨来

白氏长庆集卷四十二

卷四十三

钦定四库全书

白氏长庆集卷四十三

唐白居易撰

记序【凡一十二首】

江州司马厅记

自武德以来庶官以便宜制事大摄小重侵轻郡守之职总於诸侯帅郡佐之职移於部从事故自五大都督府至于上中下郡司马之事尽去唯员与俸在凡内外文武官左迁右移者第居之凡执伎事上与给事於省寺军府者遥署之凡仕久资高耄昏软弱不任事而时不忍弃者实莅之莅之者进不课其能退不殿其不能才不才一也若有人畜器贮用急於兼济者居之虽一日不乐若有人养志忘名安於独善者处之虽终身无闷官不官系乎时也适不适在乎人也江州左匡庐右江湖土高气清富有佳境刺史守土臣不可远观游羣吏执事官不敢自暇佚惟司马绰绰可以从容於山水诗酒间由是郡南楼山北楼水湓亭百花亭风篁石岩瀑布庐宫源潭洞东西二林寺泉石松雪司马尽有之矣苟有志於吏隐者舍此官何求焉案唐典上州司马秩五品岁廩数百石月俸六七万官足以庇身食足以给家州民康非司马功郡政坏非司马罪无言责无事忧噫为国谋则尸素之尤蠹者为身谋则禄仕之优稳者予佐是郡行四年矣其心休休如一日二日何哉识时知命而已又安知後之司马不有与吾同志者乎因书所得以告来者时元和十三年七月八日记

草堂记

匡庐奇秀甲天下山山北峰曰香炉峰北寺曰遗爱寺介峰寺间其境胜絶又甲庐山元和十一年秋太原人白乐天见而爱之若远行客过故乡恋恋不能去因面峰腋寺作为草堂明年春草堂成三间两柱二室四牖广袤丰杀一称心力洞北户来陰风防徂暑也敞南甍纳阳日虞祁寒也木斲而已不加丹墙圻而已不加白城【七计切】阶用石甍牕用纸竹帘紵帟率称是焉堂中设木榻四素屏二漆琴一张儒道佛书各三两卷乐天既来为主仰观山俯听泉傍睨竹树云石自辰及酉应接不暇俄而物诱气随外适内和一宿体宁再宿心恬三宿後颓然嗒然不知其然而然自问其故荅曰是居也前有平地轮广十丈中有平台半平地台南有方池倍平台环池多山竹野卉池中生白莲白鱼又南?石涧夹涧有古松老杉大仅十人围高不知几百尺修柯戛云低枝拂潭如幢竖如盖张如龙蛇走松下多灌丛萝茑叶蔓骈织承翳日月光不到地盛夏风气如八九月时下铺白石为出入道堂北五步据层崖积石嵌空垤块

杂木异草盖覆其上绿陰蒙蒙朱实离离不识其名四时一色又有飞泉植茗就以烹燂【齿善切】好事者见可以永日堂东有?布水悬三尺泻阶隅落石渠昏晓如练色夜中如环佩琴筑声堂西倚北嵕右趾以剖竹架空引嵕上泉脉分綫悬自檐注砌累累如贯珠霏微如雨露滴沥飘洒随风远去其四傍耳目杖屨可及者春有锦绣谷花夏有石门涧云秋有虎谿月冬有鑪峰雪陰晴显晦昏旦含吐千变万状不可殫纪鬬缕而言故云甲庐山者噫凡人丰一屋华一簣而起居其间尚不免有骄矜之态今我为是物主物至致知各以类至又安得不外适内和体宁心恬哉昔永远宗雷辈十八人同入此山老死不反去我千载我知其心以是哉矧予自思从幼迨老若白屋若朱门凡所止虽一日二日辄覆簣土为台聚拳石为山环斗水为池其喜山水病癖如此一旦蹇剥来佐江郡郡守以优容而抚我庐山以灵胜待我是天与我时地与我所卒获所好又何以求焉尚以冗员所羁余累未尽或往或来未遑宁处待予异时弟妹婚嫁毕司马岁秩满出处行止得以自遂则必左手引妻子右手抱琴书终老於斯以成就我平生之志清泉白石实闻此言时三月二十七日始居新堂四月九日与河南元集虚范阳张允中南阳张深之东西二林寺长老湊朗满晦坚等凡二十有二人具斋施茶果以落之因为草堂记

许昌县令新厅壁记

民非政不义政非官不举官非署不立是三者相为用故古君子有虽一日必葺其墙屋者以是哉许昌县居梁郑陈蔡间要路由於斯当建中贞元之际大军聚於斯兵残其民火焚其邑大田生荆棘官舍为煨烬乘其弊而为政作事者其难乎去年春叔父自徐州士曹掾选署颍川令於是约己以清白纳人以简直立事以强毅以清白故官吏不敢侵于民以简直故狱讼不得留于庭以强毅故军镇不能干于县由是居二年民用康政用暇乃曰储蓄邦之本命先营困仓又曰公署吏所宁命次图厅事取材於土物取工於子来取时於农隙然後丰约量其力广狭称其位俭不至陋壮不至骄庇身无燥湿之忧视事有朝夕之利官由是而立政由是而举民由是而又建一物而三事成其孰不韪之哉呜呼吾家世以清简垂为貽燕之训叔父奉而行之不敢失坠小子举而书之亦无愧辞若其官邑之省置风物之有亡田赋之上下盖存乎图谍此略而不书今但记新厅之时制与叔父作为之所由也先是邑居不修屋壁无纪前贤姓字湮泯无闻而今而後请居厥位者编其年月名氏自叔父始时贞元十九年冬十月一日记

养竹记

竹似贤何哉竹本固固以树德君子见其本则思善建不拔者竹性直直以立身君子见其性则思中立不倚者竹心空空以体道君子见其心则思应用虚受者竹节贞贞以立志君子见其节则思砥礪名行夷险一致者夫如是故君子人多树之为庭实焉贞元十九年春居易以拔萃选及第授校书郎始於长安求假居处得常乐里故关相国私第之东亭而处之明日履及于亭之东南隅见丛竹於斯枝叶殄瘁无声无色询于关氏之老则曰此相国之手植者自相国捐馆他人假居繇是筐篚者斩焉簞箒者刈焉刑余之材长无寻焉数无百焉又有凡草木杂生其中攀【边九切】茸荟郁有无竹之心焉居易惜其尝经长者之手而见贱俗人之

目翦弃若是本性犹存乃芟翳荟除粪壤疏其间封其下不终日而毕於是日出有清陰风来有清声依依然欣欣然若有情於感遇也嗟乎竹植物也於人何有哉以其有似於贤而人爱惜之封植之况其真贤者乎然则竹之於草木犹贤之於衆庶呜呼竹不能自异惟人异之贤不能自异惟用贤者异之故作养竹记书于亭之壁以貽其後之居斯者亦欲以闻於今之用贤者云

记画

张氏子得天之和心之术积为行发为艺艺尤者其画欤画无常工以似为工学无常师以真为师故其措一意状一物往往运思中与神会髣髴焉若欧和役灵於其间者时予在长安中居甚闲闻甚熟乃请观於张张为予尽出之厥有山水松石云霓鸟兽暨四夷六畜妓乐华虫咸在焉凡十余轴无动植无小大皆曲尽其能莫不向背无遗势洪纖无遁形迫而视之有似乎水中了然分其影者然後知学在骨髓者自心术得工侔造化者由天和来张但得於心传於手亦不自知其然而然也至若笔精之英华指趣之律度予非画之流也不可得知之今所得者但觉其形真而圆神和而全炳然俨然如出於图之前而已耳张始年二十余致功甚近予意其生知之艺与年而长则画必为希代宝人必为後学师恐将来者失其传故以年月名氏记于图轴之末云时贞元十九年清河张敦简画六月十日太原白居易记

记异

华州下邽县东南三十余里曰延平里里西南有故兰若而无僧居元和八年秋七月予从祖兄曰皞自华州来访予途出於兰若前及门见妇女十许人服黄绿色衣少长杂坐会语於佛屋声闻于门兄热行方渴将就憩且求饮望其从者萧士清未至因下马自縈於门柱举首忽不见意其退藏於牕闥之间从之不见又意其退藏於屋壁之後从之又不見周视其四旁则堵墙环然无隙缺覆视其聚谈之所则尘壤翳【於检切】然无足迹繇是知其非人悸【具位切】然大异之不敢留上马疾驱来告予予亦异之因讯其所闻兄曰云云甚多不能殫记大抵多云王胤老於此观其辞意若相与数相过者厥所去予舍八九里因同往访焉果有王胤者年老即其里人也方徙居於兰若东百余步葺墙屋筑塲艺树仅毕明日而入既入不浹辰而胤死不越明而妻死不逾时而胤之二子与二妇一孙死余一子曰明进大恐惧不知所为意新居不祥乃撤屋拔树夜徙去遂获全焉嘻推而徵之则衆君子谋於社以亡曹妇人来焚廩竺之室信不虚矣明年秋予与兄出游因复至是视胤之居则井湮竈夷閭然唯环墙在里人无敢居者异乎哉若然者命数耶偶然耶将所徙之居非吉土耶抑王氏有隐慝鬼得谋而诛之耶茫乎不识其由且志於佛室之壁以俟辨惑者九月七日乐天云

东林寺经藏西廊记

元和初江西观察使韦君丹於庐山东林寺神运殿左甘露坛右建修多罗藏一所土木丹漆之外饰以多宝相好严丽邻诸鬼功虽两都四方或未前见一切经典尽在於内盖释宫之天祿石渠也初藏既成南东北廊亦具独西未作而韦君薨迨今十余年风日所飘燥雪雨所沾

湿西南一隅坏有日矣僧坊衆惜之予亦惜之非不是图才力不足暨十三年予作景云律师塔碑成景云弟子馈绢百匹予以法施净财义不已有即日移用作藏西廊因请寺长老演公满公琳公等经之寺纲维令杲灵逵等成之盖欲护前功偿始愿非任於布施相功德心也其集经名数与创藏由缘详于李肇碑文此但书新作西廊而已十四年月日忠州刺史白居易记

三游洞序

平淮西之明年冬予自江州司马授忠州刺史微之自通州司马授虢州长史又明年春各祇命之郡与知退偕行三月十日参会於夷陵翌日微之反棹送予至下牢戍又翌日将别未忍引舟上下者久之酒酣闻石间泉声因舍棹进策步入 ？初见石如叠如削其恠者如引臂如垂幢次见泉如泻如洒其奇者如悬练如不絶綫遂相与维舟岩下率仆夫芟荒刈翳梯危缒滑休而复上者凡四焉仰睇俯察絶无人迹但水石相薄磷磷凿凿跳珠溅玉惊动耳目自未訖戍爱不能去俄而峡山昏黑云破月出光气含吐互相明灭晶荧玲珑象生其中虽有敏口不能名状既而通夕不寐迨旦将去怜奇惜别且叹且言知退曰斯境胜絶天地间其有几乎如之何俯通津縣岁代寂寥委置罕有到者予曰借此喻彼可为长太息岂独是哉岂独是哉微之曰诚哉是言矧吾人难相逢斯境不易得今两偶於是得无述乎请各赋古调诗二十韵书于石壁仍命予序而纪之又以吾三人始游故因为三游洞洞在峡州上二十里北峰下两崕相廕间欲将来好事者知故备书其事

游大林寺

余与河南元集虚范阳张允中南阳张深之广平宋郁安定梁必复范阳张时东林寺沙门法演智满士坚利辨道建神照云臯息慈寂然凡十七人自遗爱草堂历东西二林抵化城憩峰顶登香炉峰宿大林寺大林穷远人迹罕到环寺多清流苍石短松瘦竹寺中唯板屋木器其僧皆海东人山高地深时节絶晚于时孟夏月如正二月天梨桃始华润草犹短人物风候与平地聚落不同初到恍然若别造一世界者因口号絶句云人间四月芳菲尽山寺桃花始盛开长恨春归无覓处不知转入此中来既而周览屋壁见萧郎中存魏郎中弘简李补阙渤三人姓名诗句因与集虚辈叹且曰此地实匡庐间第一境由驿路至山门曾无半日程自萧魏李游迨今垂二十年寂寥无继来者嗟乎名利之诱人也如此时元和十二年四月九日乐天序

代书

庐山自陶谢泊十八贤已还儒风縣縣相续不絶贞元初有符载杨衡辈隐焉亦出为文人今其读书属文结草庐於岩谷间者犹一二十人即其中秀出者有彭城人刘轲轲开卷慕孟轲为人秉笔慕扬雄司马迁为文故着翼孟三卷参龙子十卷杂文百余篇而圣人之旨作者之风虽未臻极往往而得予佐浔阳三年轲每着文辄来示予予知轲志不息异日必能跨符杨而攀陶谢轲一旦尽賫所着书及所为文访予告行欲举进士予方沦落江海不足以发轲事

业又羸病无心力不能徧致书於台省故人因援纸引笔写胷中事授辄且曰子到长安持此札为予谒集贤庾三十二补阙翰林杜十四拾遗金部元八员外监察牛二侍御秘省萧正字蓝田杨主簿兄弟彼七八君子皆予文友以予愚直尝信其言苟于今不我欺则子之道庶几光明矣又欲使平生故人知我形体已悴志气已惫独好善喜才之心未死去矣持此代书三月三日乐天白

送侯权秀才序

贞元十五年秋予始举进士与侯生俱为宣城守所贡明年春予中春官第既入仕凡历四朝才朽命剥蹇蹶不暇去年冬蒙不次恩迁尚书郎掌诰西掖然青衫未解白发已多矣时子尚为京师旅人见除书走来贺予因从容问其官名则曰无得矣问其生业则曰无加矣问其仆乘囊资则曰日消月朘【子全切】矣问别来几何时则曰二十有三年矣嗟乎侯生当宣城别时才文志气我尔不相下今予犹小得遇子卒无成由子而言予不为不遇矣嗟乎侯生命实为之谓何哉言未竟又有行色且曰欲谒东诸侯恐不知我者多请一言以宠别予方直阁慨然窃书命笔以序之尔

冷泉亭记

东南山水余杭郡为最就郡言灵隐寺为尤由寺观冷泉亭为甲亭在山下水中央寺西南隅高不倍寻广不累丈而撮奇得要地搜胜槩物无遁形春之日吾爱其草薰薰木欣欣可以导和纳粹畅人血气夏之夜吾爱其泉淙淙风泠泠可以蠲烦析醒起人心情山树为盖岩石为屏云从栋生水与阶平坐而翫之者可濯足於牀下卧而狎之者可垂钓於枕上矧又潺湲洁澈粹冷柔滑若俗士若道人眼耳之尘心舌之垢不待盥涤见辄除去潜利阴益可胜言哉斯所以最余杭而甲灵隐也杭自郡城抵四封丛山复湖易为形胜先是领郡者有相里君造虚白亭有韩仆射臯作候仙亭有裴庶子棠棣作观风亭有卢给事元辅作见山亭及右司郎中河南元稹最後作此亭於是五亭相望如指之列可谓佳境殫矣能事毕矣後來者虽有敏心巧目无所加焉故吾继之述而不作长庆三年八月十三日记

白氏长庆集卷四十三

卷四十四

钦定四库全书

白氏长庆集卷四十四

唐白居易撰

书【凡三首】

与杨虞卿书

师臯足下自仆再来京师足下守官鄆县吏职拘绊相见甚稀凡半年余与足下开口而笑者不过三四及仆左降诏下明日而东足下从城西来抵昭国坊已不及矣走马至涯水才及一执手悯然而诀言不及他迺来虽手札三往来亦不过问道途报健否而已郁结之志旷然未舒思欲一陈左右者久矣去年六月盗杀右丞相於通衢中迸血髓磔髮肉所不忍道合朝震栗不知所云仆以为书籍以来未有此事国辱臣死此其时耶苟有所见虽畎亩卑隶之臣不当默默况在班列而能胜其痛愤耶故武相之气平明絶仆之书奏日午入两日之内满城知之其不与者或诬以伪言或构以非语且浩浩者不酌时事大小与仆言当否皆曰丞郎给舍諫官御史尚未论请而赞善大夫何反忧国之甚也仆闻此语退而思之赞善大夫诚贱冗耳朝廷有非常事即日独进封章谓之忠谓之愤亦无媿矣谓之妄谓之狂又敢逃乎且以此获辜顾何如耳况又不以此为罪名乎此足下与崔李元庾辈十余人为我悒悒郁郁长太息者也然仆始得罪於人也窃自知矣当其在近职时自惟贱陋非次宠擢夙夜腆愧思有以称之性又愚昧不识时之忌讳凡直奏密啓外有合方便闻於上者稍以歌诗导之意者欲其易入而深誠也不我同者得以为计媒蘖之辞一发又安可君臣之道间自明白其心乎加以握兵於外者以仆洁慎不受赂而憎秉权於内者以仆介独不附已而忌其余附丽之者恶仆独异又信狺狺吠声唯恐中伤之不获以此得罪可不悲乎然而寮友益相重交游益相信信於近而不信於远亦何恨哉近者少远者多多者胜少者不胜又其宜矣师臯是之故言不发於他人独发於师臯师臯知我者岂有愧於其间哉苟有愧於师臯固是言不发矣且与师臯始於宣城相识迨于今十七八年可谓故矣又?之妻即足下从父妹可谓亲矣亲如是故如是人之情又何加焉然?与足下相知则不在此何者夫士大夫家闺门之内朋友不能知也闺门之外姻族不能知也必待友且姻者然後周知之足下视?莅官事择交友接宾客何如哉又视?抚骨肉待妻子驭僮仆又何如哉小者近者尚不敢不尽其心况大者远者乎所谓斯言无愧而後发矣亦犹仆之知师臯也师臯孝敬友爱之外可略而言足下未应举时尝充贤良直言之赋其所对问志磊磊而词谔谔虽不得第仆始爱之及与独孤补阙书让不论事与卢侍郎书请不就职与高相书讽成致仕之志志益大而言益远而仆爱重之心繇是加焉近者足下与李弘庆友善弘庆客长安中贫甚而病亟足下为逆致其母安慰其心自损衣食以续其医药

甘旨之费有年岁矣又足下与崔行俭游行俭非罪下狱足下意其不幸及於流窜勅下之日躬俟於御史府門而行李之具养活之物崔生顾其旁一无阙者其余奉寡姊亲护其夫丧抚孤甥誓毕其婚嫁取贵人子为妇而礼法行於家由甲乙科入官而吏声闻於邑凡此者皆可以激扬積俗表正士林斯所以向慕勤勤岂敢以骨肉之姻形骸之旧为意哉然足下之美如此而仆侧闻蚩蚩之徒不悦足下者已不少矣但恐道日长而毁日至位益显而谤益多此伯寮所以愬仲由季孙所以毁夫子者也昔卫玠有云人之不逮可以情恕非意相加可以理遣故至终身无喜愠色虽不敏常佩此言师臯人生未死见千变万化若不情恕於外理遣於中欲何为哉欲何为哉之是行也知之久矣自度命数亦其宜然凡人情通達则谓由人穷塞而後信命则不然十年前以固陋之姿琐屑之艺与敏手利足者齐驱岂合有所获哉然而求名而得名求禄而得禄人皆以为能独以为命命通则事偶事偶则幸来幸之来尚归之於命不幸之来也舍命复何归哉所以上不怨天下不尤人者寔如此也又常照镜或观写真自相形骨非富贵者必矣以此自决益不复疑故宠辱之来不至惊怪亦足下素所知也今且安时顺命用遣岁月或免罢之後得以自由浩然江湖从此长往死则葬鱼鼈之腹生则同鸟兽之羣必不能与搢声攫利者量其分寸矣足下辈无复见仆之光尘於人寰间也多谢故人勉树令德粗写鄙志兼以为别居易顿首

与陈给事书

正月日乡贡进士白居易谨遣家僮奉书献於给事阁下伏以给事门屏间请谒者如林献书者如云多则多矣然听其辞一辞也观其意一意也何者率不过有望於吹嘘翦拂耳居易则不然今所以不请谒而奉书者但欲贡所诚质所疑而已非如衆士有求於吹嘘翦拂也给事得不独为之少留意乎大凡自号为进士者无贤不肖皆欲求一第成名非居易之独慕耳既慕之所以切不自察尝勤苦学文迨今十年始获一贡每见进士之中有一举而中第者则欲勉狂简而进焉又见有十举而不第者则欲引弩钝而退焉进退之宜固昭昭矣而遇者自惑於趣舍何哉夫蕴奇挺之才亦不自保其必胜而一上得第者非他也是主司之明也抱琐细之才亦不自知共妄动而十上下第者亦非他也是主司之明也岂非知人易而自知难耶伏以给事天下文宗当代精鉴故不揆浅陋敢布腹心居易鄙人也上无朝廷附离之援次无乡曲吹煦之誉然则孰为而来哉盖所仗者文章耳所望者主司至公耳今礼部高侍郎为主司则至公矣而居易之文章可进也可退也切不自知之欲以进退之疑取决於给事给事其能舍之乎居易闻神蓍灵龟者无常心苟叩之者不以诚则已若以诚叩之必以信告之无贵贱无大小而不之应也今给事鉴如水镜言为蓍龟邦家大事咸取决於给事岂独遗其微小乎谨献杂文二十首诗一百首伏愿俯察悃诚不遗贱小退公之暇赐精鉴之一加焉可与进也乞诸一言小子则磨鉛策蹇骋力於进取矣不可进也亦乞诸一言小子则息机敛迹甘心於退藏矣进退之心交争於胸中者有日矣幸一言以蔽之旬日之间敢伫报命尘秽听览若夺气褫魄之为者不宣居易谨再拜

为人上宰相书

二月十九日某官某乙谨拜手奉书献於相公执事书曰古人云以水投石至难也某以为未

甚难也以卑干尊以贱合贵斯为难矣何者夫尊贵人之心坚也强也不转也甚於石焉卑贱人之心柔也弱也自下也甚於水焉则合之难也岂不甚於水投石哉然则自古及今往往有合者又何哉此盖以心遇心以道济道故也苟心相见道相通则水反为石石反为水则其合之易也又甚乎以石投水焉何者石之投水也犹触之有声受之有波心道之相得也则贵者不知其贵也贱者不知其贱也当其冥同欣合之际但臆【武粉切】然而已矣其合之易也岂不甚於石投水哉噫厥道废坠不行於代久矣故贵者自贵耳贱者自贱耳维同心同道不求相合也今某之心与相公之心愚智不侔也今某之道与相公之道小大不伦也矧又尊卑贵贱之势相悬如石焉如水焉而欲强至难为至易无乃不可乎然则知其不可而为之者抑有由伏以相公方今佐裁成之道当具瞻之初窃希变天下水石之心自相公始也通天下贵贱之道自某始也不然者夫岂不自知其狂进妄动哉伏少留听而毕辞焉幸甚幸甚某伏观先皇帝之知遇相公也虽古君臣道合者无以加也然竟不与大位不授大权不尽行相公之道者何哉识者以为先皇父子孝慈之闲亦古未有也盖先皇所以辍已知人之明用贤之功致理之德以留赐今上也亦犹太宗黜李积而使高宗宠用之也故今上在谅阴而特用也相公自郎官而特拜也推此二者有以见识者之言信矣斯则先皇知遇之恩贻燕之念今上速用之旨倚赖之诚相公宠擢之荣托寄之重自国朝以来三者兼之甚鲜矣故某窃惟相公自拜命以来八九日得食不暇饱寝不暇安行则然居则惕然思所以答先皇之知副今上之用先天下之望哉某窃以为必然矣况今主上肇抚苍生初嗣洪业虽物不改旧而令宣布新是以百辟倾心嚮嚮【卢侯切】然以待主上之政也万姓注目专专然以望主上之令也四夷侧耳颙颙然以听主上之风也岂直若此而已哉盖待其政者勤惰邪正系其中焉望其令者忧喜亲疎生其中焉听其风者畏侮动静出其中焉而将来理乱之根安危之源尽在於三者之中矣如此则相公得不匡辅其政缉熙其令宣和其风乎然则匡辅缉熙宣和之道某虽不敏尝闻於师焉曰天子之耳待宰相之耳而後聪也天子之目待宰相之目而後明也天子之心识待宰相之心识而後圣神也宰相之耳待天下之耳而後聪也宰相之目待天下之目而後明也宰相之心识待天下之心识而後能启发圣神也然则下取天下耳目心识上以为天子聪明神圣者此宰相之本职也而为匡辅缉熙宣和之道也若宰相唯以两耳听之两目视之一心思之则朝廷之得失岂尽知见乎必不尽也而况于天下之得失乎宰相之耳目得聪明乎必未也而况于上以为天子聪明圣神乎然则天下聪明心识取之岂无其道耶必有也在乎知与不知行与不行耳噫自开元已来斯道寢衰鲜能行者自贞元以来斯道寢微鲜能知者岂唯不知乎不行乎又将背古道而驰者也何者古者宰相以危言危行扶危持顛为心今则敏行逊言全身远害而已矣古者宰相以接士为务今则不接宾客而已矣古者宰相以开合为名今则鑰其第门而已矣致使天下之聪明尽委弃於草木中焉天下之心识尽沈没於泥土间焉则天下聪明心识万分之中宰相何尝取得其一分哉是故宠益崇而谤益厚岁弥久而愧弥深至乃上负主恩下敛人怨行止寝食自有慙色者夫岂非不得天下聪明心识之所致耶然则为宰相者得不思易其辙乎是以聪明损於上则正直销於下畏忌慎默之道长公议忠谏之路塞朝无敢言之士庭无执咎之臣自国及家寢以成弊故父训其子曰无介直以立仇敌兄教其弟曰无方正以贾悔尤先達者用以养身後进者资而取仕日引月长炽然成风识者腹非而不言愚者心兢而是效至使天下有目者如瞽也有耳者如聋也有口者如含锋刃也如此则上之得失下之利病虽欲匡救何由知之嗟乎自古以来斯道之弊恐未甚於今日也然则为宰相者得不思变其风乎是以慎忌积於中则政事废於表因循苟且

之心作强毅久大之性亏反谓率职而举者不達於时宜当官而行者不通於事变故殿最之书虽具而不实黜陟之法虽备而不行欲望恶者惩善者劝或恐难矣古之善为宰相者岂尽得贤而用之乎岂尽知不肖而去之乎盖在於秉钧轴之枢握刀尺之要剗邪为正削觚为圆能使善之必迁不谓善之尽有能使恶之必改不谓恶之尽无成此功者无他惩劝之所致耳然则为宰相者得不思提其纲使羣目皆自张乎是以惩劝息於此则贤能乏於彼故岳镇阙而不知所取台省空而不知所求今则尚书六司之官暨于百执事者大凡要剧者多虚其位闲散者咸备其官或曰所以难其人重其禄也嗟乎徒知难其人而阙之不知邦政日归於下吏也徒知重其禄而爱之不知稍食日费於冗员也损益利害岂不明哉古之善为宰相者虚其怀直其气苟有举一言者必从而索之苟有荐一善者必随而用之然後明察否臧精考真伪得人者行进贤之赏谬举者坐不当之辜自然审轮辕以相求谨关梁以相保故才无乏用国无废官岂可疑所举之未精而反失其善重所任而不苟而反废其官与其废官宁其虚授与其失善宁其谬升但在乎明核是非必行赏罚则谬升虚授当自辨焉然则为宰相者得不思振其领使衆毛皆举乎是以庶政阙於内则庶事斁於外至使天下之户口日耗天下之士马日滋游手於道途市井者不知归托足於军籍释流者不知反计数之吏日进聚敛之法日兴田畴不辟而麦禾之赋日增桑麻不加而布帛之价日贱吏部则士人多而官员少奸滥日生诸使则课利少而羨余多侵削日甚举一知十可胜言哉况今方域未甚安边陲未甚静水旱之灾不戒兵戎之动无期然则为宰相者得不图将来之安补既往之败乎若相公用天下之目观而救之夫岂无最远之见乎用天下之心图而济之夫岂无最长之策乎策之最长者见之最远者在相公鉴而取之诚而行之而已取之也行之也今其时乎为时之用大矣哉古者圣贤有其才无其位不能行其道也有其才有其位无其时亦不能行其道也必待有其才有其位有其时然後能行其道焉某窃见相公曩时制策对中论风化浇淳之源明天人交感之道陈兵灾救疗之术可谓有其才矣又伏见今月十一日制词云其代予言允属良弼必能形四方之风成天下之务可谓有其时矣今相公有其才有其位有其时则行道由已而由道乎哉某又闻一往而不可追者时也故圣贤甚惜焉方今拭天下之目以观主上之作为也侧天下之耳以听相公之举措也如此则相公出一言不终日而必闻於朝野主上发一令不浹辰而必達於华夷盖主上辑百辟和万姓服四夷之时在於此时矣相公充人望代天工报国之恩正在於今日矣或者曰君臣之道至大也可以渐合不可以速合也天下之化至大也可以渐行不可以速行也贤人之事业至大也行之可以枉尺而直寻也某以为殆不然矣夫时之变事之宜其间不容息也先之太过後之则不及故时未至圣贤不进而求时既来圣贤不退而让盖得之则不啻乎事半功倍也失之则不啻乎事倍而功半也嗟乎或者徒知渐合其道而不知啓沃之时失於渐中矣徒知渐行其化而不知變理之时失於渐中矣徒知枉尺而直寻而不知易失於时则难生於渐中虽枉尺不能直尺矣近者宰相道不行化不成事业不光明率由乎有志於渐矣请以前事明之某尝闻太宗顾谓羣臣曰善人为邦百年然後能胜残去杀当今大乱之後将求致理宁可造次而望乎魏文贞曰不然夫乱後易理犹饥人易食也若圣哲施化人应如响期月而可信不为难三年成功犹谓其晚太宗深纳其言时封德彝辈共非之曰不可三代以後人渐浇讹皆欲理而不能岂能理而不欲魏徵书生不识时务信其虚说必乱国家於是太宗卒从文贞之言力行不倦三数年间天下大安戎狄内附太宗曰惜哉不得使封德彝见之斯则得其时行其道不取於渐之明効也况今日之天下岂弊於武德之天下乎相公之事业岂後於文贞之事业乎在於疾行而已矣所以主上践祚未及十日

而宠命加於相公者惜国家之时也相公受命未及十日而某献於执事者惜相公之时也夫欲行大道树大功贵其速也盖明年不如今年明日不如今日矣故孔子曰日月逝矣岁不我与此言时之难得而易失也伏惟相公惜其时之易也而不失焉虑其渐之难也而不取焉抑又闻济时者道也行道者权也扶权者宠也故得其位不可一日无其权得其权不可一日无其宠然则取权有术也求宠有方也盖竭其力以举职而权必自归忘其身以徇公而宠必自至权归宠至然後能行其道焉伏惟相公详之而不忽也抑又闻不弃死马之骨者然後良骥可得也不弃狂夫之言者然後嘉谏可闻也苟某管见之中有可取者俯而取之苟葛言之中有可采者俛而采之则知之者必曰如某之见犹且不弃况愈於某之徒欤则天下通情達识之士得不比肩而至乎闻之者必曰如某之言犹且不弃况愈於某之徒欤则天下謇谔敢言之士得不继踵而来乎伏惟相公试垂意焉则天下之士幸甚某游长安仅十年矣足不践相公之门目不识相公之?名不闻相公之耳相公视某何为者哉岂非介者耶狷者耶今一旦卒然以数千言尘渎执事者又何为哉实不自揆欲以区区之闻见裨相公聪明万分之一分也又欲以济天下顛顛之人死命万分之一分也相公以为如何

白氏长庆集卷四十四

卷四十五

<集部,别集类,汉至五代,白氏长庆集>

钦定四库全书

白氏长庆集卷四十五

唐白居易撰

书序【凡五首】

与元九书

月日居易白微之足下自足下谪江陵至於今凡所赠答诗仅百篇每诗来或辱序或辱书冠於卷首皆所以陈古今歌诗之义且自叙为文因缘与年月之远近也仆既受足下诗又谕足下此意常欲承答来旨麤论歌诗大端并自述为文之意总为一书致足下前累岁已来牵故少暇间有容隙或欲为之又自思所陈亦无足下之见临纸复罢者数四率不能成就其志以至於今今俟罪浔阳除盥栉食寝外无余事因览足下去通州日所留新旧文二十六轴开卷得意忽如会面心所畜者便欲快言往往自疑不知相去万里也既而愤悱之气思有所泄遂追就前志勉为此书足下幸试为仆留意一省夫文尚矣三才各有文天之文三光首之地之文五材首之人之文六经首之就六经言诗又首之何者圣人感人心而天下和平感人心者莫先乎情莫始乎言莫切乎声莫深乎义诗者根情苗言华声实义上自贤圣下至愚騷微及豚鱼幽及鬼神羣分而气同形异而情一未有声入而不应情交而不感者圣人知其然因其言经之以六义缘其声纬之以五音音有韵义有类韵协则言顺言顺则声易入类举则情见情见则感易交於是乎孕大含深贯微洞密上下通而一气泰忧乐合而百志熙五帝三皇所以直道而行垂拱而理者揭此以为大柄决此以为大宝也故闻元首明股肱良之歌则知虞道昌矣闻五子洛汭之歌则知夏政荒矣言者无罪闻者作戒言者闻者莫不两尽其心焉洎周衰秦兴采诗官废上不以诗补察时政下不以歌泄导人情乃至於諂成之风动救失之道

【丘月切】于时六义始刳【五官切】矣国风变为骚辞五言始於苏李苏李骚人皆不遇者各系其志发而为文故河梁之句止於伤别泽畔之吟归於怨思彷徨抑郁不暇及他耳然去诗未远梗槩尚存故兴离别则引双凫一雁为喻讽君子小人则引香草恶鸟为比虽义类不具犹得风人之什二三焉于时六义始 矣晋宋已还得者盖寡以康乐之奥博多溺於山水以渊明之高古偏放於田园江鲍之流又狭於此如梁鸿五噫之例者百无一二焉于时六义寢微矣陵夷至於梁陈间率不过嘲风雪弄花草而已噫风雪花草之物三百篇中岂舍之乎顾所用何如耳设如北风其凉假风以刺威虐也雨雪霏霏以愍征役也常棣之华感华以讽兄弟也采芣苢美 以乐有子也皆兴发於此而义归於彼反是者可乎哉然则余霞

散成绮澄江净如练离花先委露别叶乍辞风之什丽则丽矣吾不知其所讽焉故仆所谓嘲风雪弄花^廿而已于时六义尽去矣唐兴二百年其间诗人不可胜数所可举者陈子昂有感遇诗二十首鲍鲂有感兴诗十五首又诗之豪者世称李杜之作才已奇矣人不逮矣索其风雅比兴十无一焉杜诗最多可传者千余篇至於贯穿今古覩【郎何切】缕【两举切】?律尽工尽善又过於李然撮其新安吏石壕吏潼关吏塞芦子留花门之章朱门酒肉臭路有冻死骨之句亦不过三四十首杜尚如此况不逮杜者乎仆尝痛诗道崩坏忽忽愤发或食辍哺夜辍寝不量才力欲扶起之嗟乎事有大谬者又不可一二而言然亦不能不羸陈於左右仆始生六七月时乳母抱弄於书屏下有指无字之字示仆者仆虽口未能言心已默识後有问此二字者虽百十其试而指之不差则仆宿习之缘已在文字中矣及五六岁便学为诗九岁谙识声韵十五六始知有进士苦节读书二十已来昼课赋夜课书闲又课诗不遑寢息矣以至於口舌成疮手肘成胝【旨而切】既壮而肤革不丰盈未老而齿发早衰白髻髻【匹蔑切】然如飞蝇垂珠在眸子中也动以万数盖以苦学力文所致又自悲矣家贫多故二十七方从乡赋既第之後虽专於科试亦不废诗及授校书郎时已盈三四百首或出示交友如足下辈见皆谓之工其实未窥作者之域耳自登朝来年齿渐长閱事渐多每与人言多询时务每读书史多求理道始知文章合为时而着歌诗合为事而作是时皇帝初即位宰府有正人屡降玺书访人急病仆当此日擢在翰林身是諫官手请諫纸啓奏之外有可以救济人病裨补时阙而难於指言者辄咏歌之欲稍稍递进闻於上上以广宸聪副忧勤次以酬恩獎塞言责下以复吾平生之志岂图志未就而悔已生言未闻而谤已成矣又请为左右终言之凡闻仆贺雨诗而衆口籍籍已谓非宜矣闻仆哭孔戡诗衆面脉脉尽不悦矣闻秦中吟则权豪贵近者相目而变色矣闻乐游园寄足下诗则执政柄者扼腕矣闻宿紫阁村诗则握军要者切齿矣大率如此不可徧举不相与者号为沽名号为诋訐号为讪谤苟相与者则如牛僧孺之戒焉乃至骨肉妻孥皆以我为非也其不我非者举不过三两人有邓鲂者见仆诗而喜无何而鲂死有唐衢者见仆诗而泣未几而衢死其余则足下又十年来困蹶若此呜呼岂六义四始之风天将破坏不可支持耶抑又不知天之意不欲使下人之病苦闻於上耶不然何有志於诗者不利若此之甚也然仆又自思关东一男子耳除读书属文外其他懵然无知乃至书画碁博可以接羣居之欢者一无通晓即其愚拙可知矣初应进士时中朝无缙麻之亲达官无半面之旧策蹇步於利足之途张空拳於战文之场十年之间三登科第名入衆耳迹升清贯出交贤俊入侍冕旒始得名於文章终得罪於文章亦其宜也日者又闻亲友闲说礼吏部举选人多以仆私试赋判传为淮的其余诗句亦往往在人口中仆慙【女六切】然自愧不之信也及再来长安又闻有军使高霞寓者欲聘娼妓妓大夸曰我诵得白学士长恨歌岂同他妓哉由是增价又足下书云到通州日见江馆柱间有题仆诗者复何人哉又昨过汉南日适遇主人集衆乐娱他宾诸妓见仆来指而相顾曰此是秦中吟长恨歌主耳自长安抵江西三四千里凡乡校佛寺逆旅行舟之中往往有题仆诗者士庶僧徒嫖妇处女之口每每有咏仆诗者此诚雕虫之戏不足为多然今时俗所重正在此耳虽前贤如渊云者前辈如李杜者亦未能忘情於其间哉古人云名者公器不可以多取仆是何者窃时之名已多既窃时名又欲窃时之富贵使已为造物者肯兼与之乎今之迍穷理固然也况诗人多蹇如陈子昂杜甫各授一拾遗而迍剥至死李白孟浩然辈不及一命穷悴终身近日孟郊六十终试协律张籍五十未离一太祝彼何人哉彼何人哉况仆之才又不逮彼今虽谪在远郡而官品至第五月俸四五万寒有衣饥有食给身之外施及家人亦可谓不负白氏之子矣微之微之勿念我哉

仆数月来检讨囊篋中得新旧诗各以类分分为卷首自拾遗来凡所适所感关於美刺兴比者又自武德迄元和因事立题题为新乐府者共一百五十首谓之讽谕诗又或退公独处或移病闲居知足保和吟翫情性者一百首谓之闲适诗又有事物牵於外情理动於内随感遇而形於吟咏者一百首谓之感伤诗又有五言七言长句絶句自一百韵至两韵者四百余首谓之杂律诗凡为十五卷约八百首异时相见当尽致於执事微之古人云穷则独善其身达则兼济天下仆虽不肖常师此语大夫所守者道所待者时时之来也为云龙为风鹏勃然突然陈力以出时之不来也为雾豹为冥鸿寂兮寥兮奉身而退进退出处何往而不自得哉故仆志在兼济行在独善奉而始终之则为道言而发明之则为诗谓之讽谕诗兼济之志也谓之闲适诗独善之义也故览仆诗知仆之道焉其余杂律诗或诱於一时一物发於一笑一吟率然成章非平生所尚者但以亲朋合散之际取其释恨佐懽今铨次之间未能删去他时有为我編集斯文者畧之可也微之夫贵耳贱目荣古陋今人之大情也仆不能远徵古旧如近岁韦苏州歌行清丽之外颇近兴讽其五言诗又高雅闲澹自成一家之体今之秉笔谁能及之然当苏州在时人亦未甚爱重必待身後然後人贵之今仆之诗人所爱者悉不过襍律诗与长恨歌已下耳时之所重仆之所轻至於讽谕者意激而言质闲适者思澹而词迂以质合迂宜人之不爱也今所爱者并世而生独足下耳然千百年後安知复无如足下者出而知爱我诗哉故自八九年来与足下小通则以诗相戒小穷则以诗相勉索居则以诗相慰同处则以诗相娱知吾最要率以诗也如今年春游城南时与足下马上相戏因各诵新艳小律不襍他篇自皇子陂归昭国里迭吟递唱不絶声者二十里余樊李在旁无所措口知我者以为诗仙不知我者以为诗魔何则劳心灵役声气连朝接夕不自知其苦非魔而何偶同人当美景或花时宴罢或月夜酒酣一咏一吟不知老之将至虽骖鸾鹤游蓬瀛者之适无以加于此焉又非仙而何微之微之此吾所以与足下外形骸脱踪蹟傲轩鼎轻人寰者又以此也当此之时足下兴有余力且与仆悉索还往中诗取其尤长者如张十八古乐府李二十新歌行卢杨二秘书律诗窦七元八絶句博搜精掇编而次之号元白往还诗集衆君子得拟议於此者莫不踊跃欣喜以为盛事嗟乎言未终而足下左转不数月而仆又继行心期索然何日成就又可为之叹息矣又仆尝语足下凡人为文私於自是不忍於割截或失於繁多其间妍?益又自惑必待交友有公鉴无姑息者讨论而削夺之然後繁简当无不得其中矣况仆与足下为文尤患其多已尚病之况他人乎今且各纂诗笔麤为卷第待与足下相见日各出所有终前志焉又不知相遇是何年相见在何地湑【苦盍切】然而至则如之何微之微之知我心哉浔阳腊月江风苦寒岁暮鲜欢夜长无睡引笔铺纸悄然灯前有念则书言无次第勿以繁杂为倦且以代一夕之话也微之知我心哉乐天再拜

答户部崔侍郎书

侍郎院长阁下户部牒中奉八月十七日书具承康寧喜与拚会并别观手翰访叙绸缪何眷好勤勤若此之不替也幸甚幸甚首垂问以鄙况不足云盖默默兀兀委顺任化而已次垂问以体气除旧目疾外虽不甚健亦幸无急病矣次垂问以月俸月俸虽不多然量入以为用亦不至冻馁矣又垂问以舍弟渠从事东川近得书且知无恙矣终垂问以心地此最要者辄梗槩言之顷与阁下在禁中日每视^二之暇匡牀接枕言不及他常以南宗心要互相夸导别来闲独随分增修比於曩时亦似有得得中无得无可寄言来书云麤示可乎斯不可也又知兵

部李尚书同在南宫钱萧二舍人移官闲秩退朝之暇数获晤言每话旧游辄蒙见念此盖君子久要之心不为荣顿合散增减耳而不佞者又何幸焉然自到浔阳忽已周岁外物尽遣中心甚虚虽赋命之间则有厚薄而忘怀之後亦无穷通用此道推颓然自足又或杜门隐几块然自居木形灰心动逾旬月当此之际又不知居在何地身是何人虽鵬鸟集於前枯柳生於肘不能动其心也而况进退荣辱之累耶又思顷者接确论时走尝有言荐於执事云心与迹多相戾道与名不两立苟有志於道者若不幸於外是幸於内猥蒙叹赏犹忆之乎今之身心或近是矣退思此语抚省初心求仁得仁又何不足之有也前月中长兄从宿州来又孤幼弟侄六七人皆自远至日有粝【郎达切】食岁有麤【食胡切】衣饥寒获同骨肉相保此亦默默委顺之外益自安也况庐山在前九江在左出门是沧浪水举头见香炉峰东西二林时时一往至如瀑水怪石桂风杉月平生所爱者尽在其中此又兀兀任化之外益自适也今日之心诚不待此而後安适况兼之者乎此鄙人所以安又安适又适而不知命之穷老之至也院长公望日重啓沃非遥仰惟勉树勲名勿以鄙劣为念

与济法师书

月日弟子太原白居易白济上人侍右昨者顶谒时不以愚蒙言及佛法或未了者许重讨论今经典间未谕者其义有二欲面问答恐彼此卒卒语言不尽故粗形於文字愿详览之敬伫报章以开未悟所望所望佛以无上大慧观一切衆生知其根性大小不等而以方便智说方便法故为阐提说十善法为小乘说四谛法为中乘说十二因缘法为大乘说六波罗密法皆对病根救以良药此尽方便教中不易之典也何以若为小乘人说大乘法心则狂乱狐疑不信所谓无以大海内於牛迹也若为大乘人说小乘法是以秽食置於宝器所谓彼自无创勿伤之也故维摩经总其义云为大医王应病与药又首楞严三昧经云不先思量而说何法随其所应而为说法正是此义耳犹恐说法者不随人之根性也故又法华经戒云若但讚佛乘衆生没在罪苦不能信是法破法不信故如此非独虑说者不能救病亦惧闻者不信没入罪苦也则佛之付嘱岂不丁寧也何则法王经云若定根基为小乘人说小乘法为大乘人说大乘法为阐提人说阐提法是断佛性是灭佛身是说法人当历百千万劫堕诸地狱纵佛出世犹未得出若生人中缺唇无舌获如是报何以故衆生之性即是法性从本已来无有增减云何於中分别病药又云於诸法中若说高下即名邪说其口当破其舌当裂何以故一切衆生心垢同一垢心净同一净衆生若病应同一病衆生须药应同一药若说多法即名颠倒何以故为妄分别拆善恶法破一切法故随机说法断佛道故此又了然不坏之义也又金刚经云是法平等无有高下是名阿耨多罗三藐三菩提又金刚三昧经云皆以一味道终不以小乘无有诸褻味犹如一雨润据此後三经则与前三经义甚相戾也其故何哉若云依维摩诘谓富楼那云先当入定观此人心然後说法又云不观人根不应说法夫以富楼那之通慧又亲奉如来为大弟子尚未能观知人心况复五百岁末法中弟子岂尽能观知人心而後说法乎设使观知人心若彼发小乘心而为说大乘法可乎若未能观彼心而率已意说又可乎既未能观与默然不说又可乎若云依义又依语则上六经之义互相违反其将孰依乎若云依了义经则三世诸佛一切善法皆从此六经出孰名为不了义经乎况诸经中与维摩法华首楞严之说同者非一也与法王金刚金刚三昧之说同者亦非一也不可遍举故於二义中各举三经此六经皆上人常所讲读者今故引以为问必有甚深之旨焉今且有人忽问法於上人

上人或能观知其心或未能观知其心将应病与药而为说耶将同一病一药而为说耶若应病与药是有高下是有裸味即反法王等三经之义岂徒反其义又获如上所说之罪报矣若同一病一药为说必当说大乘大乘即佛乘也若讚佛乘且不随应心且不救病即反维摩等三经之义岂徒反其义又使衆生没在罪苦矣六者皆如来说如来是真语实语不诳语不异语者今随此则反彼顺彼则逆此设有问者上人其将何法以对焉此其未谕者一也又五蘊者色受想行识是也十二因缘者无明缘行行缘识识缘名名缘色色缘六入六入缘触触缘受受缘爱爱缘取取缘有有缘生生缘老死病苦忧悲苦恼是也夫五蘊十二因缘盖一法也盖一义也畧言之则为五详言之则为十二虽名数多少或殊其於伦次转迁合同条贯今五蘊中则色受想行识相次而十二缘中则行识色入触受相缘一则色在行前一则色次行後正序之既不类逆伦之又不同若谓佛次第而言则不应有此杂乱若谓佛偶然而说则不当名为因缘前後不伦其义安在此其未谕者二也上人耆年大德後学宗师就出家中又以说法而作佛事必能研精二义合而通之仍望指陈着於翰墨盖欲藏於篋笥永永不忘也其余疑义亦续咨问居易稽首

与微之书

四月十日夜乐天白微之微之不见足下面已三年矣不得足下书欲二年矣人生几何离濶如此况以胶漆之心置於胡越之身进不得相合退不得相忘牵挛乖隔各欲白首微之微之如何如何天实为之谓之奈何仆初到浔阳时有熊孺登来得足下前年病甚时一札上报疾状次序病心终论平生交分且云危惓【朱劣切】之际不暇及他唯收数帙文章封题其上曰他日送达白二十二郎便请以代书悲哉微之於我也其若是乎又睹所寄闻仆左降诗云残灯无焰影憧憧此夕闻君谪九江垂死病中惊起坐闇风吹雨入寒窗此句他人尚不可闻况仆心哉至今每吟犹惻惻耳且置是事畧叙近怀仆自到九江已涉三载形骸且健方寸甚安下至家人幸皆无恙长兄去夏自徐州至又有诸院孤小弟妹六七人提挈同来顷所牵念者今悉置在目前得同寒煖饥饱此一泰也江州风候稍凉地少瘴疠乃至虵虺蚊蚋虽有甚稀湔鱼颇肥江酒极美其余食物多类北地仆门内之口虽不少司马之俸虽不多量入俭用亦可自给身衣口食且免求人此二泰也仆去年秋始游庐山到东西二林间香鑪峰下见云水泉石胜絶第一爱不能舍因置草堂前有乔松十数株修竹千余竿青萝为墙垣白石为桥道流水周於舍下飞泉落於檐间红榴白莲罗生池砌大抵若是不能殫记每一独往动弥旬日平生所好者尽在其中不唯忘归可以终老此三泰也计足下久不得仆书必加忧望今故録三泰以先奉报其余事况条写如後云云微之微之作此书夜正在“堂中山窗下信手把笔随意乱书封题之时不觉欲曙举头但见山僧一两人或坐或卧又闻山猿谷鸟哀鸣啾啾平生故人去我万里瞥然尘念此际暫生余习所牵便成三韵云忆昔封书与君夜金銮殿後欲明天今夜封书在何处庐山庵里晓灯前笼鸟檻猿俱未死人间相见是何年微之微之此夕我心君知之乎乐天顿首

荔枝图序

荔枝生巴峡间树形团团如帷盖叶如桂冬青华如橘春荣实如丹夏熟紫如蒲萄核如枇杷

殼如紅繒膜如紫綃瓢【女良切又如羊切】肉瑩白如冰雪漿液甘酸如醴酪大畧如彼其實過之若離本枝一日而色變二日而香變三日而味變四五日外色香味盡去矣元和十五年夏南賓守樂天命工史圖而書之蓋為不識者與識而不及一二三日者云

白氏長慶集卷四十五

卷四十六

钦定四库全书

白氏长庆集卷四十六

唐白居易撰

书颂议论状【凡七首】

补遗书

汤征诸侯葛伯不祀汤始征之作汤征

葛伯荒怠败礼废祀汤专征诸侯肇徂征之汤若曰格尔三事之人逮于有衆啓乃心正乃容明听余言咨先格王有彝训曰禄无常荷荷于仁福无常享享于敬惠乃道保厥邦覆乃德殄厥世惟葛伯反易天道怠弃邦本虐于民慢于神惟社稷宗庙罔克尊奉暨山川鬼神亦靡禋祀告曰罔牺牲以供俎羞予畀厥牛羊乃既於盗食曰罔黍稷以奉粢盛予佑厥稼穡乃困於仇饷今尔衆曰葛罪其如予闻曰为邦者祇奉明神抚绥烝民二者克备尚克保厥家邦吁废于祀神震怒肆于虐民离心顷绳契以降暨于百代神怒亟【一无亟字】民叛而不颠隣者匪我攸闻小子履以凉德钦奉天威肇征有葛咨尔有衆克济厥功其有傲师徒戒车乘敬君事者有明赏其有罔率职罔戮力不恭命者有常刑明赏不僭常刑无赦呜呼朕告汝衆君子监于兹钦哉懋哉罚及乃躬不可悔

箴言

贞元十有五年天子命中书舍人渤海公领礼部贡举事越明年春居易以进士举一上登第洎翌日至於旬时伏念固陋惧不克副公之选充王之宾乃自陈戒于德作箴言

曰我闻古君子人疾没世名不称耻邦有道贫且贱今我生休明代二十有六年乃策名名既闻於君乃干禄禄将及于亲升闻逮养繫公之德公之德之死矢报之报之之义靡他惟励乃志远乃猷俾德日修道日就是报于公匪报于公是光于躬匪光于躬是华于邦吁其念哉其勛哉庶俾行中规文中伦学惟时习罔怠弃位惟驯致罔躁求惟一德五常陶甄于内惟四科六艺斧藻于外若御輿既勒衔策乃克骏奔若冶金既砥淬厉乃克利用无曰擢甲科名既立而自广自满尚念山九仞亏于一簣无曰登一第位其达而自欺自卑尚念行千里始於足下呜呼我无监于止水当监于斯文庶克钦厥止慎厥终自顾于箴言无作身之羞公之羞

中和节颂【并序 此已下文并是未及第前作】

乾清而四时行坤宁而万物生圣人则之无为而无不为神唐御宇之九叶皇帝握符之十载夷夏咸寧君臣交欣有诏始以二月上巳日为中和节自上而下雷解风动翌日而颁乎四岳浹辰而达乎八荒於戏中和之时义远矣哉惟唐之兴我神尧子兆民而基皇德太宗家六合而开帝功玄宗执象而薰仁寿之风代宗垂拱而阜富庶之俗焉奕乎赫赫煌煌八圣重光以至於我皇我皇运玄枢陶淳精治定而化成嗣皇极於穆清纳黔首於升平于时数惟上元岁惟仲春皇帝穆然居青阳太庙命有司考时令以为安萌芽养幼小缓刑狱布庆赐盖百王常行之道未足以啓迪天地之化发挥祖宗之德乃命初吉肇为中和中者揆三阳之中和者酌仁气之和其为称也大矣非至圣畴能建之於是谋始要终循义讨源于以九八节七六气排重阳而拉上已煦元气于厚壤则幽蛰苏而勾萌达噫和风于穷荒则桀骜化而犷【古猛切】俗淳垂万祀以摅无穷被四表以示大同于时两仪三辰贞明絪縕千品万彙熙熙忻忻繇是文武百辟金拜手稽首而扬言曰大哉睿德合于玄造又曰昔在唐尧敬授人时垂于典谟降及周文在镐饮酒列于雅颂斯盖钦若四序凯乐一方而已未若肇建令节混同天下泽铺动植庆浹华夷若斯之盛欤盖圣人之作事必导达交泰幽赞亨毒与元化合其运与真宰同其功丕休哉其至矣夫贱臣居易忝濡文明之化就宾贡之列辄敢美盛德颂成功献中和颂一章附于唐雅之末颂曰

权舆胚浑玄黄既分煦妪絪縕肇生蒸民天命圣神是为大人大人淳淳为天下君巍巍我唐穆穆我皇纂承九叶照临八方四维载张两曜重光曜曜唐虞越【卢谷切】越【千木切小步也】羲皇乘时有作焕乎文章乃建贞元以正乾坤乃纪吉辰以殷仲春吉辰伊何号为中和和维大和中维大中以畅中气以播和风萌芽昆虫昭苏有融如斡玄化如运神功於戏德洽道丰万邦来同微臣作颂垂裕无穷

晋諡恭世子议

晋侯以骊姬之惑杀太子申生或谓申生得杀身成仁之道是以晋人諡为恭世子载在方册古今以为然居易独以为不然也大凡恭之义有三以孝保身子之恭以正承命臣之恭以道守嗣君之恭若弃嗣以非礼不可谓道受命於非义不可谓正杀身以非罪不可谓孝三者率非恭也申生有焉而諡曰恭不知其可若垂末代以为训戒居易惧後之臣子有失大义守小节者将奔走之将欲商?敢徵义类在昔虞舜父顽母嚚舜既克谐瞽亦允若申生父之昏姬之恶诚宜率子道以几谏感君心以至诚虽申生之孝不侔於舜而献公之顽亦不逮於瞽盍以蒸蒸之父俾不格於奸乎故咎之始形则斋栗祗载为虞舜可也若不能及祸之将兆则让位去国为吴太伯可也若又不能及难之既作则全身远害为公子重耳可也三失无一得於是乎致身於不义不祗陷父於不德不慈负罪被名以至於死臣子之道不其惑欤夫以尧之圣书美曰允恭舜之孝书美曰温恭今以申生之失道亦谓曰恭庸可称乎周之衰也楚子以霸王之器奄有荆蛮光啓土宇赫赫楚国由之而兴諡之为恭犹曰薄德今申生徇其死不顾其义轻其身不图其义俾死之後弑三君【奚齐卓子怀公】杀十有五臣【荀息里克丕郑祁举共华贾华叔坚锥黻累虎特官山祀庆郑狐突瑕生郤芮】实啓祸先大乱晋国则楚恭之

得也如彼申生之失也若此异德同謚无乃不可乎左氏修鲁史受经於仲尼盖仲尼之志丘明从而明之无善恶无大小莫不微婉而发挥焉至於申生之死也之謚也畧而无讥何其谬哉何以核诸且仲尼修春秋明则有凡例幽则有微旨其有君不君臣不臣父不父子不子者率书名以贬之故书曰晋侯杀其太子申生不言晋人而书晋侯且名太子者盖明晋侯不道且罪申生陷君父於不义也以微旨考之则仲尼明贬可知矣以凡例推之则左氏之阙文可知矣呜呼先王之制謚岂容易哉盖善恶始终必褒贬於一字所以彰明往者劝沮来者故君子於其謚无所苟而已矣繇是而言则恭世子之謚不亦诬乎不亦诬乎

汉将李陵论

论曰忠孝智勇四者为臣为子之大宝也故古之君子奉以周旋苟一失之是非人臣人子矣汉李陵策名上将出讨匈奴窃谓不死於王事非忠生降於戎虏非勇弃前功非智召後祸非孝四者无一可而遂亡其宗哀哉予览史记汉书皆无明讥窃甚惑之司马迁虽以陵获罪而无讥可乎班孟坚亦从而无讥又可乎按礼云谋人之军师败则死之故败而死者是其所也春秋所以美狼臯者为能获其死所而陵获所不死得无讥焉观其始以步卒深入虏庭而能以寡击衆以劳破逸再接再捷功孰大焉及乎兵尽力殫摧锋败绩不能死战卒就生降噫坠君命挫国威不可以言忠屈身於夷狄束手为俘虏不可以言勇丧战勲於前坠家声於後不可以言智罪追於躬祸移於母不可以言孝而引范蠡曹沫为比又何谬欤且会稽之耻蠡非其罪鲁国之羞沫必能报所以二子不死也而陵苟免其微躯受制於强虏虽有区区之意亦奚为哉夫吴齐者越鲁之敌国匈奴者汉之外臣俾大汉之将为单于之擒是长寇讎辱国家甚矣况二子虽不死无陵生降之名二子苟生降无陵及亲之祸酌其本末事不相侔而陵窃慕之是大失臣子之义也观陵答子卿之书意但患汉之不知已而不自内省其始终焉何者与其欲刺心自明刎颈见志曷若効节致命取信於君与其痛母悼妻尤君怨国曷若忘身守死而纾祸於亲焉或曰武帝不能明察苟听流言遽加厚诛岂非负德答曰设使陵苟其生能继以死则必赏延於世刑不加亲战功足以冠当时壮节足以垂後代忠孝智勇四者立而死且不朽矣何流言之能及哉呜呼予闻之古人云人各有一死死或重於泰山生或轻於鸿毛若死重於义则视之如泰山也若义重於死则视之如鸿毛也故非其义君子不轻其生得其所君子不爱其死惜哉陵之不死也失君子之道焉故陇西士大夫以李氏为愧不其然乎不其然乎

太原白氏家状二道【元和六年兵部郎中知制诰李建按此二?撰铭志】故巩县令白府君事状

白氏芈姓楚公族也楚熊居太子建奔郑建之子胜居於吴楚间号白公因氏焉楚杀白公其子奔秦代为名将乙丙已降是也裔孙白起有大功於秦封武安君後非其罪赐死杜邮秦人怜之立祠庙于咸阳至今存焉及始皇思武安之功封其子仲於太原子孙因家焉故令为太原人自武安以下凡二十七代至府君高祖讳建北齐五兵尚书赠司空曾祖讳士通皇朝利州都督祖讳志善朝散大夫尚衣奉御父讳温朝请大夫检校都官郎中公讳鏐字确鍾都官郎中第六子幼好学善属文尤工五言诗有集十卷年十七明经及第解褐授鹿邑县尉洛阳

县主簿酸枣县令理酸枣有善政本道节度使令狐章知而重之秩满奏授殿中侍御史内供奉赐绯鱼袋充滑台节度参谋军府之要多咨度焉居岁余公尝规章之失章不听公因留一书遗章不辞而去明年选授河南府巩县令在任三考自鹿邑至巩县皆以清直静理闻於一时公为人沈厚和易寡言多可至於涉是非关邪正者辨而守之则确乎其不可拔也大历八年五月三日遇疾歿於长安春秋六十八以其年权厝於下邳县邑里夫人河东薛氏夫人之父讳俶河南县尉大历十二年六月十九日歿於新郑县私第享年七十以其年权窆厝於新郑县临洧里公有子五人长子讳季庚襄州别驾事具後状次讳季般徐州沛县令次讳季轸许州许昌县令次讳季宁河南府参军次讳季平乡贡进士元和六年十月八日孙居易等始发护灵柩迁葬於下邳县北义津乡北原而合祔焉谨状

襄州别驾府君事状

公讳季庚字某巩县府君之长子天宝末明经出身解褐授萧山县尉历左武卫兵曹参军宋州司户参军建中元年授彭城县令时徐州为东平所管属本道节度使反反之状先以胜兵屯埇口【委勇切】口絶汴河运路然後谋东闚江淮朝廷忧虞计未有出公与本州刺史李洧潜谋以徐州及埇口城归国反拒东平遣骁将信都崇敬石隐金等率劲卒二万攻徐州徐州无兵公收合吏民得千余人与李洧坚守城池亲当矢石昼夜攻拒凡四十二日而诸道救兵方至既而贼徒溃运路通首挫逆谋不敢东顾繇是徐州一郡七邑及埇口等三城到於今讫不隸东平者实李洧与公之力也德宗嘉之命公自朝散郎超授朝散大夫自彭城令擢拜本州别驾赐绯鱼袋仍充徐泗观察判官故其制云令州将忠谋翻然効顺叶其诚美共贊良图我悬爵赏俟兹而授宜加左郡之命仍宠殊阶之序贞元初朝廷念公前功加检校大理少卿依前徐州别驾当道团练判官仍知州事故其制云尝宰彭城挈而归国旧勲若此新宠蔑如或不延厚於忠臣将何劝於义士宜从亚列再貳徐方秩满又除检校大理少卿兼衢州别驾秩满本道观察使皇甫政以公政绩闻荐又除检校大理少卿兼襄州别驾贞元十年五月二十八日终於襄阳官舍享年六十六其年权窆於襄阳县东津乡南原至元和六年十月八日嗣子居易等迁护於下邳县义津乡北原从巩县府君宅兆而合祔焉夫人颍川陈氏陈朝宜都之後祖讳璋利州刺史考讳润坊州郿城县令妣太原白氏夫人无兄姊弟妹八岁丁郿城府君之忧居丧致哀主祭尽敬其情礼有过成人者中外姻族咸称异之十五岁事舅姑服勤妇道夙夜九年迨於奉蒸尝睦娣姒待宾客抚家人又三十三年礼无违者故中外凡为冢妇者皆景慕而仪刑焉又别驾府君即世诸子尚幼未就师学夫人亲执诗书昼夜教导恂恂善诱未尝以一棒一杖加之十余年间诸子皆以文学仕进官至清近实夫人慈训所致也夫人为女孝如是为妇顺如是为母慈如是举三者而百行可知矣建中初以府君彭城之功封颍川县君元和六年四月三日歿於长安宣平里第享年五十七其年十月八日从先府君祔於皇姑焉有子四人长曰幼文前饶州浮梁县主簿次曰居易前京兆府户曹参军翰林学士次曰行简前秘书省校书郎幼子金刚奴无禄早世初高祖赠司空有功於北齐诏赐庄宅各一区在同州同城县至今存焉故自司空而下都官郎中而上皆葬於韩城县今以卜归不便遂改卜靳县府君及襄州别驾府君两莹於下邳县义津乡北原其两莹同兆域而异封树盖从时宜且叶吉也谨状

白氏长庆集卷四十六

卷四十七

钦定四库全书

白氏长庆集卷四十七

唐白居易撰

试策问制诰【凡十六首】

才识兼茂明於体用科策一道【元和元年四月登第】

问皇帝若曰朕观古之王者受命君人兢兢业业承天顺地靡不思贤能以济其理求谏直以闻其过故禹拜昌言而嘉猷罔伏汉徵极谏而文学稍进匡时济俗罔不率由厥後相循有名无实而又设以科条增求茂异舍斥已之至言进无用之虚文指切着明罕称於代兹朕所以叹息郁悼思索其真是用发恳恻之诚咨体用之要庶乎言之可行行之不倦上获其益下输其情君臣之间确然相与子大夫得不勉思朕言而茂明之我国家光宅四海年将二百十圣弘化万邦怀仁三王之礼靡不讲六代之乐罔不举浸泽於下昇中於天周汉以还莫斯为盛自祸阶漏壤兵宿中原生人困竭耗其大半农战非古衣食罕储念兹疲眊远乖富庶督耕植之业而人无恋本之心峻榷酤之科而下有重斂之困举何方而可以复其盛用何道而可以济其艰既往之失何者宜惩将来之虞何者当戒昔主父惩患於晁错而用推恩夷吾致霸於齐桓而行寓令清求古人之意啓迪来哲之怀眷兹洽闻固所详究又执契之道垂衣不言委之於下则人用其私专之於上则下无其効汉元优游於儒学盛业竟衰光武责课於公卿峻政非美二途取舍未获所从余心浩然益所疑惑子大夫熟究其旨属之於篇兴自朕躬无悼後害

对臣闻汉文帝时贾谊上疏云可为痛哭者一可为流涕者二可为长太息者三是时汉兴四十载万方大理四海大和而贾谊非不见之所以过言者以为词不切志不激则不能回君听感君心而发愤於至理也是以虽盛时也贾谊过言而无愧虽过言也文帝容之而不非故臣不失忠君不失圣书之史策以为美谈然臣观自兹以来天下之理未曾有髣髴於汉文帝时者激切之言又未有髣髴於贾谊疏者岂非君之明圣不侔於文帝乎臣之忠说不逮於贾谊乎不然何衰乱之时愈多而切直之言愈少也今陛下思禹之昌言而拜之念汉之极谏而徵之废【芳未切】虚文之无用者獎至言之斥已者询臣以可行之策谕臣以不倦之意恳恻郁悼发於至诚此真圣王思至理求过言之明旨也斯则陛下之道已弘於前代臣之才识劣於古人辄欲过言以裨陛下明德万分之一也裨之者非敢谓言之必可行也体用之必可明也且欲使後代知陛下践祚之後有朴直敢言之臣出焉无俾文帝贾谊专美於汉代然後退而俯伏以待罪戾焉臣诚所甘心也谨以过言昧死上对伏蒙陛下赐臣之策有思兴礼乐之

道念救疲毗之方辨惩往戒来之宜审推恩寓令之要至矣哉陛下之念及此实万叶之福也岂惟一代之人受其赐而已哉臣闻疲病之作有因缘焉救疗之方有次第焉臣请为陛下究因缘陈次第而言之臣闻太宗以神武之姿拨天下之乱玄宗以圣文之德致天下之肥当二宗之时利无不兴弊无不革远无不服近无不和贞观之功既成而大乐作焉虽六代之尽美无不举也开元之理既定而盛礼兴焉虽三王之明备无不讲也理行故上下辑睦乐达故内外和平所以兵偃而万邦怀仁刑清而兆民自化动植之类咸煦熙而自遂焉虽成康文景之理无以出於此矣洎天宝以降政教寢微寇既荐兴兵亦继起兵以遏寇寇生於兵兵寇相仍迨五十载财征由是而重人力由是而罢下无安心虽曰督农桑之课而生业不固上无定费虽曰峻管榷之法而岁计不充日削月朘以至於耗竭其半矣此臣所谓疲病之因缘者也岂不然乎由是观之盖人疲由乎税重税重由乎军兴军兴由乎寇生寇生由乎政缺然则未修政教而望寇戎之销未销寇戎而望兵革之息虽太宗不能也未销兵革而求征徭之省未省征徭而求黎庶之安虽玄宗不能也何则事有以必然虽常人足以致势有所不可虽圣哲不能为伏惟陛下将欲安黎庶先念省征徭将欲省征徭先念息兵革将欲息兵革先念销寇戎将欲销寇戎先念修政教何者若政教修则下无诈伪暴悖之心而寇戎所由销矣寇戎销则民无兴发攻守之役而兵革所由息矣兵革息则国无馈饷飞挽之费而征徭所由省矣征徭省则人无流亡转徙之忧而黎庶所由安矣臣窃观今天下之寇虽已尽销伏愿陛下不以易销而自怠今天下之兵虽未尽散伏愿陛下不以难散而自疑无自怠之心则政教日肃无自疑之意则诚信日明故政教肃则暴乱革心诚信明则犷鸷归命革心则天下将萌之寇不遏而自销归命则天下已聚之兵不散而自息然後重斂可日减疲毗可日安富庶可日滋困竭可日补日安则和悦之气积日富则廉让之风形因其廉让而示之以理则礼易行矣乘其和悦而鼓之以乐则乐易达矣举斯方而可以复其盛用斯道而可以济其艰惩既往之失莫先於诚不明而政不修戒将来之虞莫先於寇不销而兵不息此臣所谓救疗之次第者也岂不然乎若齐行寓令之法以霸诸侯汉用推恩之谋以惩亡国施之今日臣恐非宜何者目今万方一统四海一家无隣国可倾非夷吾用权之秋也虽欲寓令令将何所寓耶今除国建郡置守罢侯无爵土可疏非主父矫弊之日也虽欲推恩恩将何所推耶但陛下嗣贞观之功弘开元之理必将光二宗而福万叶矣何区区齐汉之法而足为陛下所慕哉精究之端实在於此矣又蒙陛下赐臣之问有执契垂衣之道委下专上之宜敦儒学而业衰责课实而政失者此皆政化之所急古今之所宜陛下幸念之臣有以见天下之理兴矣夫执契之道垂衣不言者盖言已成之化非谋始之课也委之於下者言王者之理庀其司分其务而已非谓政无小大悉委之於下也专之於上者言王者之道秉其枢执其要而已非谓事无巨细悉专之於上也汉元优游於儒学而盛业竟衰者非儒学之过也学之不得其道也光武责课於公卿而峻政非美者非考课之累也责之不得其要也臣请重为陛下别白而明之夫垂衣不言者岂不谓无为之道乎臣闻无为而理者其舜也欤舜之理道臣粗知之矣始则懋於修己劳於求贤明察其刑明慎其赏外序百揆内勤万机晨食宵衣念其不息之道夫如是岂非大有为者终则安於恭已逸於得贤明刑至於无刑明赏至於无赏百职不戒而举万事不劳而成端拱凝旒立於无过之地夫如是岂非真有为者乎故臣以为无为者非无所为也必先有为而後至於无为也老子曰无为而无不为盖是谓矣夫委下而用私专上而无効者此由非所宜委而委之也非所宜专而专之也臣请以君臣之道明之臣闻上下异位君臣殊道盖大者简者君道也小者繁者臣道也臣道者百职小而衆万事细而繁诚非人君一聪所能徧察一明所能周

览也故人君之道但择其人而任之举其要而执之而已矣昔九臣各掌其事而唐尧乘其功以帝天下十乱各効其能而周武总其理以王天下三杰各宣其力而汉兼其用以取天下此三君者不能为一焉但执要任人而已亦犹心之於四肢九窍百骸也不能为一焉然而寢食起居言语视听皆以心为主也故臣以为君得君之道虽专之於上而下自有以展其効矣臣得臣之道虽委之於下而人亦无以用其私矣由此而言光武督责而政未甚美者非他昧君臣之道於小大繁简之际也汉元优游而业以寢衰者非他昧无为之道於始终劳逸之间也二途得失较然可知陛下但举中而行之则无所惑矣臣伏以圣策首言曰思贤能以济其理求谏直以闻其过又曰上获其益下输其情其末章则又曰兴自朕躬无悼後害此诚陛下思酌下言欲闻上失勤勤恳恳虑臣辈有所隐情者也臣敢不再竭狂直以副天心之万一焉臣闻古先圣王之理也制欲於未萌除害於未兆故静无败事动有成功自非圣王则异於是莫不欲逞於始悔追於终政失於前功补於後利害之効可畧而言且如军暴而後戢之兵乱而後遏之善则善矣不若防其微杜其渐使不至於暴乱也官邪而後责之吏奸而後诛之惩则惩矣不若审其才得其人使不至於奸邪也人馁而後食之人冻而後衣之惠则惠矣不若轻其徭薄其税使不至於冻馁也举一知十不其然乎今陛下初嗣祖宗新临蒸庶承多虞之运当鼎盛之年此诚制欲於未萌除害於未兆之时也伏惟陛下敬惜其时重慎於事既往者且追救於弊後将来者宜早防於事先夫然则保邦恒在於未危恭已常居於无过三五之道夫岂远哉臣生也得为唐人当陛下临御之时观陛下昇平之始斯则臣朝闻而夕死足矣而况充才识之贡承体用之问者乎今所以极千虑昧万死当盛时献过言者此诚微臣喜朝闻甘夕死之志也不然何轻肆狂瞽不避斧鑕若此之容易焉伏惟少垂意而览之则臣生死幸甚生死幸甚谨对

礼部试策五道【贞元十六年二月高侍郎试及第】

第一道

问周礼庶人不畜者祭无牲不耕者祭无盛不蚕者不帛不绩者不纁皆所以耻不勉抑游惰欲人务衣食之源也然为政之道当因人所利而利之故修其教不易其俗齐其政不易其宜由是农工商贾咸遂生业若驱彼齐人强以周索牲盛布帛必由已出无乃物力有限地宜不然而匱神废礼谁曰非阙且使日中为市懋迁有无者更何事焉

对利用厚生教之本也从宜随俗政之要也周礼云不畜无牲不田无盛不蚕不帛不绩不纁盖劝厚生之道也论语云因人所利而利之盖明从宜之义也夫田畜蚕绩四者土之所宜者多人之所务者衆故周礼举而为条目且使居之者无游惰无墮业焉其余非四者虽不具举则随土物生业而劝导之可知矣非谓使物易业土易宜也夫先王酌教本提政要莫先乎任土辨物简能易从然後立为大中垂之不朽也若谓其驱天下之人责其所无强其所不能则何异夫求萍於中逵植橘於江北反地利违物性孰甚焉岂直易俗失宜匱神废礼而已且圣人辨九土之宜别四人之业使各利其利焉各适其适焉犹惧生生之物不均也故日中为市交易而退所以通货食迁有无而後各得其所矣由是言之则大易致人之制周官劝人之典论语利人之利三科具举有条而不紊矣谨对

第二道

问书曰眚灾肆赦又曰宥过无大而礼云执禁以齐衆不赦过若然岂为政以德不足耻格峻文必罚斯为礼乎诗称既明且哲以保其身易称利用安身以崇德也而语云无求生以害仁有杀身以成仁若然则明哲者不成仁欵杀身者非崇德欵

对圣王以刑礼为大忧理乱系焉君子以仁德为大宝死生一焉故邦有用礼而大理者有用刑而小康者古人有崇德而远害者有蹈仁而守死者其指归之义可得而知焉在乎圣王乘时君子行道也何者当其王道融人心质善者衆而不善者鲜一人不善衆人恶之故赦之可也所以表好生恶杀且臻乎仁寿之域矣而肆赦宥过之典由兹作焉及夫大道隐至德衰善者鲜而不善者衆一人不善衆人効之故赦之不可也所以明惩恶劝善且革浇漓之俗矣而执禁不赦之文由兹兴焉此圣王所以随时以立制顺变而致理非谓德政之不若刑罚也然则君子之为君子者为能先其道後其身守其常则以道善乎身罹其变则不以身害乎道故明哲保身亦道也巢许得之求仁杀身亦道也夷齐得之虽殊时异政同归於一揆矣何以核诸观乎古圣贤之用心也苟守道而死死且不朽是非死也苟失道而生生而不仁是非生也向使夷齐生於唐虞之代安知不明哲保身欵巢许生於殷周之际安知不求仁杀身欵盖否与泰各系於时也生与死同归於道也由斯而观则非谓崇德者不为成仁杀身者不为明哲矣呜呼圣王立教同出而异名君子行道百虑而一致亦犹水火之相戾同根於冥数共济於人用也亦犹寒暑之相反同本於元气共济於岁功也则用刑措刑之道保身杀身之义昭昭然可知矣谨对

第三道

问圣哲垂训言微旨远至於礼乐之同天地易简之在乾坤考以何文徵於何象絕学无忧原伯鲁岂其将落仁者不富公子荆曷云苟美朝阳之桐聿来凤羽泮林之榘克变鵑音胜乃俟乎木鸡巧必资於瓦注咸所未悟庶闻其说

对古先哲王之立彝训也虽言微旨远而学者苟能研精钩深优柔而求之则壺奥指趣将焉度哉然则礼乐之同天地者其文可得而考也岂不以乐作於郊而天神和焉礼定於社而地祇同焉上下之大同大和由礼乐之驯致也易简之在乾坤者其象可得而徵也岂不以乾以柔克而运四时不言而善应坤以陰鸷而生万物不争而善胜柔克不言之谓易阴鸷不争之谓简简易之道不其然乎老氏絕学无忧傲其溺於时俗之习也原伯鲁不学将落戒其废圣哲之道也孟子不富之说虑蘊利而生孽也公子荆苟美之言嘉安人而丰财也凤鸣朝阳非梧桐而不栖择木而集也鵑止泮林食桑榘而好音感物而变也事有躁而失静而得者故木鸡胜焉有贵而失贱而得者故瓦注巧焉虽去圣逾远而大义斯存是故远旨微言可明徵矣谨对

第四道

问天地有常道日月有常度水火草木有常性皆不易之理也乃至邹衍吹律而寒谷暖鲁阳挥戈而暮景回吕梁有出入之游周原变堇荼之味不测此何故也将以传信乎抑亦传疑乎

对原夫元气运而至精分三才立而万物作惟天地日月暨水火草木度数情性各有其常其随事应物而迁变者斯人之所感也何哉惟天地万物父母惟人万物之灵盖天地无常心以人心为心苟能以最灵之心感善应之天地至诚之诚感无私之日月则必如影随形响随声矣而况於水火草木乎故有吹律於寒谷和气生焉挥戈於曜灵暮暑回焉神合於水游吕梁而出入不溺化被於草木周原而堇荼变味盖品彙之生则守其常性也精诚之至则感而常通也静守常性动随常通是道可於物而非常一於道也故如是则两仪之道七曜之度万物之性可察矣可信矣夫何疑焉谨对

第五道

问纺绩之弊出於女工桑麻不甚加而布帛日已贱蚕织者劳焉公议者知之欲乎价平其术安在又仓廩之实生於农田人有余则轻之不足则重之故岁一不登则种食多竭往年时雨愆候宸慈轸怀遣使振廩分官贱粃故得馁殍载活麦禾载登思我王度金玉至矣窃闻寿昌常平今古称便国朝典制亦有斯仓开元之二十四年又於京城大置贱则加价收粃贵则终年出粃所以时无艰食亦无伤农今者若官司上闻追葺旧制以时歛散以均贵贱其於美利不亦多乎

对人者邦之本也衣食者人之所由生也古者圣人在上而下不冻馁者非家衣而户食之盖能为之开衣食之源均财用之节也方今食廩虚而农夫困布帛贱而女工劳以愚所闕粗知其本何者夫天地之数无常故岁一丰必一俭也衣食之生有限故物有盈则有缩也古人知其必然也故敦俭嗇以足衣务储蓄以足食是以禹有九年之水汤有七年之旱野无青草人无菜色者无他焉盖勤俭储蓄之所致耳故曰前事之不忘後事之元龟也当今将欲开美利利天下以厚生生蒸人返贞观之升平复开元之富寿莫善乎实仓廩均丰凶则耿寿昌之常平得其要矣今若升闻率修旧制上自京邑下及郡县谨豆区以出纳督官吏以监临岁丰则贵粃以利农岁歉则贱粃以恤下若水旱作沴则资为九年之蓄若兵革或动则馈为三军之粮可以均天时之丰俭权生物之盈缩修而行之实百代不易之道也虞灾救弊利物寧邦莫斯甚焉然则布帛之贱者由锥刀之壅也苟粟麦足用泉货通流则布帛之价轻重平矣抑居易闻短绊不可以汲深曲士不可以语道小子狂简不知所以裁之莫究微言空慙下问谨对

进士策问五道【元和三年为府试官】

第一道

问礼记曰事君有犯无隐又曰为人臣者不显谏然则不显谏者有隐也无乃失事君之道乎无隐者显谏也无乃失为臣之节乎语曰不知命无以为君子易曰乐天知命故不忧又语曰君子忧道不忧贫斯又忧道者非知命乎乐天不忧者非君子乎夫圣人立言皆有伦理虽前

後上下若贯珠然今离之则可以旁行合之则不能同贯岂精义有二耶抑学者未达其微旨耶

第二道

问大时不齐大信不约大白若辱大直若屈此四者先圣之格言後学之彝训有国者酌之以行化也立身者践之以修己也然则雷一发而蛰虫苏勾萌达霜一降而天地肃草木衰其为时也大矣斯岂不齐者乎日月代明而昼夜分刻漏者准之无杪忽之失焉春秋代谢而寒暑节律吕者候之无黍累之差焉其为信也大矣斯岂不约者乎尧让天下而许由遁周有天下而伯夷饿其为白也大矣斯亦不辱者乎桀不道龙逢谏而死紂不道比干谏而死其为直也大矣斯岂不屈已者乎由是而观有国者立身者惑之久矣衆君子试为辨之

第三道

问大凡人之感於事则必动於情发於叹兴於咏而後形於歌诗焉故闻蓼萧之咏则知德泽被物也闻北风之刺则知威虐及人也闻广袖高髻之谣则知风俗之奢荡也古之君人者采之以补察其政经纬其人焉夫然则人情通而王泽流矣今有司欲请於上遣观风之使复采诗之官俾无远迹无美刺日采於下岁闻於上以副我一人忧万人之旨识者以为何如

第四道

问百官职田盖古之稍食也国朝之制悬在有司兵兴已还吏鲜克举今稽其地籍则田亦具存计以户租则数多散失至使内外官中有品秩等局署同而厚薄相悬不啻乎十倍斯者积弊之甚也得思革之乎请陈所宜以救其失

第五道

问谷帛者生於下也泉货者操於上也必由均节以致厚生今田畴不加辟而菽粟之价日贱桑麻不加植而布帛之估日轻懋力者轻用而愈贫射利者贱收而愈富至使农人益困游手益繁矣然岂谷帛歛散之节失其宜乎将泉货轻重之权不得其要乎今天子方策天下贤良政术之士亲访利病以活元元吾子若待问於王庭其将何辞以对

奉敕试制书诏批答诗等五首【元和二年十一月四日自集贤院召赴银台候进旨五日召入翰林奉敕试制诏等五首翰林院使梁守谦奉宣宜授翰林学士数月除左拾遗】

将仕郎守京兆府盩厔县尉集贤殿校理臣白居易进

奉敕试边镇节度使加仆射制

门下镇寧三边左右百揆兼兹重任必授全材某镇节度使某乙天与忠贞日彰名节德温以肃气直而和明畧足以佐时英姿足以遏寇累经事任历着勲庸中权之令风行外镇之威山立戎夷慑服汉兵无西击之劳疆场底寧胡马絕南牧之患禁暴而三军辑睦除害而百姓阜安千里长城一方内地实嘉乃绩爰简朕心夫竭力输诚为臣之大节念功懋赏有国之恒规顾兹忠勤宜进爵秩尔有统戎之畧已授旌旄尔有宣赞之猷特加端揆往践厥职其惟有终可尚书左仆射余如故主者施行

与金陵立功将士等敕书

敕浙西立功将士等朕自临寰宇已再逾年以忠恕牧万人以恩信驭百辟动必思於恤隱静无忘於泣辜庶乎驯致小康寢兴大道也李錡因缘属籍践历官常苞藏祸心素怀梟獍之性彰露凶德忽发豺狼之声朕念以宗枝务於容贷谕以迷复卒无悛心而乃保界重江窃弄凶器抗拒朝命驱胁师人背德欺天乱常干纪蜂虿之毒流於郡县犬彘之行肆于闺门恶稔祸盈亲离衆叛人神共弃天地不容卿等忠愤闡彰义勇潜发变疾风雨谋先鬼神中推赤心前蹈白刃率其膂力死命於军前擒其凶魁生致於阙下廓千里之沴气济一方之生人诚感君亲义激臣子临危见不夺之节因事立非常之功予嘉乃诚一念三叹至於图劳懋赏询事策勲各有等差续当处分故先宣慰宜并悉之冬寒卿等各得平安好遣书指不多及

与崇文诏【时崇文为西川节度使】

敕崇文卿忠廉立身简直成性董戎长武边候义安授律西川凶徒荡灭是以宠崇外阃秩进上公而能省事安人多方抚俗谕朕念功之旨勉其师徒宣朕恤隱之心慰彼黎庶威立无暴功成不居累陈表章恳请朝覲虽殿邦之寄重诚欲藉才而望阙之恋深固难夺志且嘉且叹弥感於怀属时候严凝山川修阻永言跋涉当甚勤劳伫卿来思副朕诚望想宜知悉冬寒卿比平安好遣书指不多及

批河中进嘉禾图表

上天降休下土効祉将表丰年之兆故生同颖之祥顾慚寡德受此嘉瑞披图省表閱视久之卿发诚自中归美於上亦宜勉勤匡赞驯致雍熙庶洽升平之风以叶和同之庆所贺知

太社观献捷诗【以功字为韵四韵成】

淮海妖氛灭乾坤嘉气通班师郊社内操袂凯歌中庙筭无遗策天兵不战功小臣同鸟兽率舞向皇风

白氏长庆集卷四十七

卷四十八

<集部,别集类,汉至五代,白氏长庆集>

钦定四库全书

白氏长庆集卷四十八

唐白居易撰

中书制诰一【旧体凡二十七道】

张彻宋申锡可并监察御史制

勅旧制副丞相缺中执宪得出入御史缺则於内外史中考核其实封奏其名以补之今御史中丞僧孺奏某官张彻某官宋申锡皆方直强毅可监察御史章下丞相府丞相亦曰可朕其从之并可监察御史

杨子留後殷彪授金州刺史兼侍御史河陰令韦同宪授南郑令韦弁授绛州长史三人同制

勅某官殷彪等今之郡守古侯伯也今之邑令古子男也於吏有君臣之道焉於人有父母之道焉郡邑之间承上率下者州长史也凡此之官与吾共理使吾人安而无怨者其在吏良而政平乎金秦之郡也奏告专达得行异政以彪清平信惠临事能守大小之职率着名绩故仍宪简俾往牧之南郑梁之邑也上有贤师无忧掣肘以同宪河阴有政可以移用故换铜印俾往宰之而绛为名藩弁实良士命之赞贰亦叶其宜宜各悉心修举三职可依前件

冯宿除兵部郎中知制诰制

勅吾闻武德暨开元中有顔师古陈叔达苏頲称大手笔掌书王命故一朝言语换成文章朕承祖宗思济其美凡选一才补一职皆不敢轻易其庶几前事乎刑部郎中冯宿为文甚正立意甚明笔力雄健不浮不鄙况立身守事端方精敏而我诰命忽思润色之听诸人言曰宿也可宿立朝历御史博士郡守尚书郎在仕进途不为不遇然不登兹选未足其心故吾於今归汝职业仍迁秩为五兵郎中勉继顔陈无辱吾举可尚书兵部郎中知制诰

郑覃可给事中制

勅给事中之职凡制勅有不便於时者得封奏之刑狱有未合於理者得驳正之天下冤滞无

告者得与御史纠理之有司选补不当者得与侍中裁退之率是而行号为称职固不专於掌侍奉讚诏令而已中大夫行谏议大夫云骑尉荥阳县开国男食邑三百户郑覃清节直行正色寡言先臣之风藹然犹在自居首谏益励謇谔擢领是职必有可观亦欲天下闻之知吾獎骨鯁之臣来谏诤之道也可给事中散官勲如故

韦审规可西川节度副使御史中丞李虞仲崔戎姚向温会等并西川判官皆赐绯各检校省官兼御史制

勅西川曰益部地有险府有兵碍戎屏华号为难理故吾命文昌为帅长俾镇抚焉次命审规为上介俾左右焉又命虞仲戎向会等为庶僚俾咨度焉进言者谓文昌贤而审规辈才以才佐贤蜀必理矣辍三署吏赞丞相府假宪官职加台郎暨一命再命之服以遣之其於张大光荣与四方征镇之宾寮不侔矣尔等苟佐吾丞相以善政闻使吾无一方之忧吾寧久遗汝於诸侯乎尔其勉之可依前件

魏博军将吕晃等从弘正到镇州各加御史大夫宾客制

勅去年冬命侍中弘正建大将军旗鼓移镇於成德军而晃以下四十有一人实从魏来或驱或殿被坚执銳可谓有劳宜以官坊之寮宪府之职随其名秩序而宠之可依前件

张平叔可户部侍郎判度支制【时长庆二年三月制】

勅故事君使臣其道不一或先劳而後受赏或先加宠而後责功盖宜便有後先时事有缓急故耳朝议大夫守鸿臚卿兼御史大夫判度支上柱国赐紫金鱼袋张平叔国之才臣也计能析秋毫吏畏如夏日司会逾月纲条甚张况师旅未息调食方急倚成取济非尔而谁故自大鸿臚换居人部造膝而授不时而迁其要无他是欲急吾事而望倚尔功也公卿以降羣有司盈庭然问曰与吾坐而决事丞相以下不过四五而主计之臣在焉非智能则事不可成非谅直则吾难近噫职局之外得不思称官望而厌我心乎可守尚书户部侍郎判度支散官勲赐如故

李虞仲可兵部员外郎崔戎可户部员外郎制

勅剑南西川节度判官朝散大夫检校尚书户部郎中兼侍御史上柱国赐紫金鱼袋李虞仲西川观察判官朝议郎检校刑部员外郎兼侍御史云骑尉赐绯鱼袋崔戎等去年春朕忧西南事授丞相文昌钺镇抚之次选郎吏有才实如虞仲辈者往赞理之故其制云苟佐吾丞相以善政闻寧久遗汝於诸侯乎今蜀政成矣蜀人安矣是汝辈职修事举而奉吾诏书甚谨也前言在耳安可弭忘并命为郎主吾信赏虞仲可行尚书兵部员外郎戎可尚书户部员外郎散官勲如故

牛僧孺可户部侍郎制

勅户部侍郎周之地官小司徒也掌天下田户之图生齿之籍赋役货弊之政令以待国用而质岁成元和以还日益宠重善其职者多登大任中兹选者莫匪正人谁其称之我有邦彦朝议郎守御史中丞上柱国赐紫金鱼袋牛僧孺自举贤良践台阁秉润色笔提纠缪纲而书命无繁词决事无留狱受宠有忧色纳忠多苦言朕心知之何用不可夫以人会之重如彼僧孺之贤若此俾居是职不亦宜乎可守尚书户部侍郎散官勲如故

庾承宣可尚书右丞制

勅朝议大夫守尚书刑部侍郎骁骑尉庾承宣昔我太宗文皇帝尝谓尚书丞百职纲维事一失中则天下有受其弊者因命戴胄魏徵及杜正伦刘洎辈继领是职分居左右官修事理人到於今称之故吾前命崔戎持左纲今命承宣操右辖衆口籍籍颇为得人况承宣端谅勤敏周知典故必能为我纽有条之纲柅妄动之轮坐曹得出入郎官立朝得奏弹御史会政决要扶树理本无俾戴魏刘杜专美於贞观中可守尚书右丞散官勲如故

张聿可衢州刺史制

勅中散大夫行尚书工部员外郎上柱国吴县开国男食邑三百户张聿内外庶官同归共理牧守之任最亲吾人盖施张举措由其心赏罚威福悬其手若一日失其职一郡非其人而名未达於朝听之间为害已甚矣选授之际得不慎夫以尔聿前领建溪有理行次临沔郡着能名用尔所长副吾所急宜辍郎署往颁诏条来暮之声伫入吾耳可使持节衢州刺史散官勲如故辛丘度可工部员外郎李石可左补阙李仍叔可右补阙三人同制

勅朝散大夫右补阙内供奉飞骑尉辛丘度等朕诏丞相求方畧忠谏之士置於左右而播等以石暨仍叔应诏言其为人厚实謇直尝以文行谋画容於幕府之间临事敢言当官能守可使束带同升诸朝又言丘度介洁静专不交势利宜加推獎以劝其徒况久次者转迁後來者登进皆适所用平章可之可依前件

魏博军将薛之纵等十四人各授官爵制

勅薛之纵等去年冬授愬钺俾自徐镇潞而愬与其麾下同德食不求饱席不暇煖节镇殿定一如所委此诚愬之忠畧然所赖之纵等焦心戮力同济厥功而颁赏已逾时秩宜加等我有爵禄分而命之知吾不遗细大之功可依前件

裴度李夷简王播郑絪杨於陵等各赐爵并回授爵制

勅礼云臣下竭力尽忠以立功於国者必报之以爵禄此言上之不虚取於下也而司空度等咸以忠力作股肱心膂之臣大节大劳书在甲令然则功如是忠如是高爵重秩予何爱焉故能统御之初先行信赏诏主爵者合为奏书或加宠进封或延恩任子次勒第品咸按旧章行乎敬之无忝予一人之嘉命可依前件

郑余庆杨同悬等十人亡母追赠郡国夫人制

勅余庆亡母某氏等夫德不旌则劝善之典缺矣亲不显则扬名之道废矣凡今公卿大夫至於元士济济然抱忠履信立我朝者皆圣善之教燕翼之方所致也自家刑国有所从来不大封崇是忘报施朕去年仲月统御之初发号推恩先降是命岂直光前慰後而已哉亦欲使天下为母者闻庶几乎善统其家慈训其子厚人伦而美教化也可不务乎

李真授咸阳令制

勅某官李真近者西夷犯塞诏诸将出师司计臣俊言真有应辨才可司馈饷故自京府掾假台郎宪职以命之属寇遁师旋未展其用况在公族推有器干今授铜印俾宰咸阳夫庶官之任为急西郊咫尺伫尔能声可京兆府咸阳县令

刘纵授秘书郎制

勅某官刘纵徒步诣阙上献封章又自叙其先臣陈许间事皆历历可听公侯子弟多溺於骄邪尔能读书学文自可嘉獎图籍之府命尔为郎岂唯振滞求能且不欲使勲劳之後栖栖於尘土中可秘书省秘书郎

程羣授坊州司马制

勅程羣尝从事於镇冀之间病免所职垂老之岁弃为穷人依依无归有足伤者夫一夫不获若纳诸隍此圣王用心推已及物今宜与羣禄食使饱暖其身亦犹晋君不能忘情於绛老也往佐中部尔其念哉可坊州司马

海州刺史王元辅加中丞制

勅海州刺史王元辅汉制二千石有政绩者就中加命秩不即改移盖欲使吏久於官而人安於化也今元辅为郡颇有理名廉使上闻奏课居最宜加中宪旌而宠焉庶使与君共理者闻而知劝可兼御史中丞

杨潜可洋州刺史李繁可遂州刺史史备可濠州刺史制

勅朝散大夫守尚书金部郎中上柱国杨潜温厚静专有端士之操朝议大夫前使持节吉州诸军事吉州刺史上柱国李繁精强博敏有才子之称将仕郎前使持节光州诸军事守光州刺史云骑尉史备变通健决有良吏之用而能本於文学辅以政事为郎见其行为郡闻其声夫洋更梁之险遂居蜀之腴濠控淮之要三者皆名郡而委之三吏得不思勤俭教导劳来安辑膏雨吾土襦袴吾人者乎潜可使持节洋州诸军事守洋州刺史散官勲如故繁可使持节都督遂州诸军事守遂州刺史备可使持节濠州诸军事守濠州刺史充团练涡口西城等使

官勲如故

张洪相里友畧并山南东道判官同制

勅朝议郎守太常博士上柱国张洪前瀛汉等州都团练判官朝议郎侍御史内供奉上柱国赐绯鱼袋相里友畧等元翼以大节大忠绰闻朝野授钺开府殿我汉南而又求贤乞能以自参贰则其宾寮宜有以称之故求吾俊造之英勲烈之胄达朝仪而练戎事者与焉今以洪之知国礼奉家声以友畧之富艺文饱军旅两中是选合而命之优秩宠章无所爱惜时无古代有忠贤苟致吾元翼於羊杜间别有陟明之典在洪可检校尚书职方员外郎兼侍御史充山南东道节度判官仍赐绯鱼袋散官勲如故友畧可检校尚书屯田员外郎兼侍御史充山南东道观察判官散官勲如故

姚成节右神策将军知军事制

勅朝议郎前使持节成州诸军事守成州刺史充本州守捉使赐紫鱼袋姚成节尝为天平军裨将当刘悟之立忠勲也谋成事集尔有助焉虽授一城未足酬獎况闻信厚勤恪宜於爪牙肘腋间居之昔汉文帝以宋昌忠劳擢拜将军掌宿卫今吾用汝犹前志也环拱之职得不勉欬可毅果校尉守右神策将军知军事赐如故

高钺等一十人亡母郑氏等太君制

勅起居郎高钺亡母荥阳郡太君郑氏等予有侍臣咸士之秀者或左右以书吾言动前後以补吾阙遗森然在庭各举其职爰思乃教知所从来岂非善稟於亲行成於内徙邻断织训使然耶不追封邑之荣曷显统家之庆可依前件

柳公绰可吏部侍郎制

勅京兆尹兼御史大夫柳公绰长吏数易为害甚多迺来都畿未免斯弊或苛急而人重困或软弱而奸不息得其中者其公绰乎细大必躬亲刚柔不吐茹甚称厥职惜而不迁然智者常忧忠者常劳亦非吾以平施御天下之道也尚书六职天官首之辩论官材澄汰流品比诸内史选妙秩清询衆用能无易公绰尔宜飭躬承命以裴王崔毛为心苟副吾言用称乃职而今而後亦何往而不适哉可尚书吏部侍郎

孔戣可散骑常侍制

勅昔齐桓公心体懈怠则隰朋侍汉成帝亲重儒术则刘向从今之常侍是其选矣称其任者唯正人乎吏部侍郎孔戣言行谨直风操端庄肃然礼容清庙之器始自筮仕迄於天官虚舟为心利刃在手全才具美时论多之可使珥貂立吾左右从容侍从以备顾问隰朋刘向岂远乎哉可右散骑常侍

王公亮可商州刺史制

勅尚书司门郎中王公亮茂於学精於文文学之外有析【思积切】毫剌【符佛切】钟之用自佐戎律领郡符持宪为郎皆称厥职吾前命刘遵古张平叔为商州刺史继有善政人用乂安今尔代之守而勿失况商土瘠商人贫可以静理而阜安不宜改张而易辙以尔精敏当自得中可商州刺史

韦觐可给事中庾敬休可兵部郎中知制诰同制

勅职之要莫先乎駁正文之选莫难於司言将使朝纲有条朕命惟允在二者得人而已中大夫使持节苏州诸军事守苏州刺史上都骑尉韦觐精微专直通乎事典可使平奏议而坐左曹朝散大夫尚书礼部郎中上柱国庾敬休温裕端明饰以辞藻可使书诰命而专右席而轮辕凿柄各适所宜夫惟刺史守列城郎官应列宿选任倚注非不荣重然吾左右前後方求正人如觐敬休不宜疎远亦犹有声之玉无类之珠不置於佩服掌握之间皆非其所也宜自敬谨无忝吾言觐可行给事中散官勲如故敬休可尚书兵部郎中知制诰散官勲如故

白氏长庆集卷四十八

卷四十九

钦定四库全书

白氏长庆集卷四十九

唐白居易撰

中书制诰二【旧体凡三十道】

李愬赠太尉制

勅故特进行太子太保上柱国凉国公食邑三千户食实封五百户李愬在建中岁泚贼叛逆惟太师晟实仗大顺翦而诛之在元和朝蔡寇充斥惟尔愬实奋奇策虜而戮之父子之功书于甲令俱为第一焯【职畧切】煇【呼回切】当时矧尔一登将坛六换鉄钺坐论岩廊之道卧理保傅之事方深倚望奄忽沦谢是用当食累叹视朝三辍岂不以爪牙之威【立月切】於外股肱之痛軫於中者乎而吊奠之命賻【六凤切】賻【符过切】之数虽加常等未表殊恩宜以太尉之秩赠上公之袞斂俾尔被哀荣服忠孝从先太师於九原也不其盛欤呜呼美终必复礼无不答昔尔之勤劳如彼今吾之宠饰如此君臣报施可谓两臻其极焉尔灵有知钦我追命可赠太尉仍令所司备礼册命赐绢二千匹布七百端米粟一千石委度支送

田布赠右仆射制

勅朕闻古之臣子有忍死効节为忠者有不伤发肤全归为孝者有不顾性命引决为忠者但问所操所蹈何如耳岂系去就生死之间耶噫今有重义如泰山轻生如鸿毛死而不朽者安得不褒扬宠饰使天下闻之所以劝孝心激忠肠然後薄者敦懦者立幸生者耻格也故魏博等州节度观察处置等使起复寧远将军守右金吾大将军员外置同正员检校工部尚书兼魏州大都督府长史御史大夫赐紫金鱼袋田布其父太尉甚贤此子镇阳之乱弘正歿焉而布枕戈尝胆誓报冤耻故吾以大将军之旗鼓鉄钺先臣之土壤士卒尽用委付亲加勉谕人鬼之愤期一泄而甘心焉既而激发魏师出疆临故事有不得已者布亦未如之何卒至於刳心自明遗疏自列谢君於天上报父於地下可谓田氏有孝子国家有烈臣则吾之知臣弘正之知子明矣聳动人听【迄力切】伤我怀故废临朝所以示哀也加礼命所以示荣也哀荣恩礼至则至矣呜呼曾未足以显尔之节不厌吾之心乎可赠尚书右仆射赐布帛三百段米粟二千石委度支逐便支遣

韦贯之可工部尚书制

勅河南尹韦贯之善驭者齐六轡善理者正六官六官成则百事举故吾选贤任旧以次第补之而六卿材吾已得五阙一不可待汝而成贯之以正行明诚为先朝辅始以直进终以直退道有消长德无缙磷及帅湘潭尹河洛而廉平清一之政继闻於京师名简吾心善入我耳宜置朝右以之厚时风况今之尚书汉公卿也言动可否属人耳目焉固不专率四属程百工备位於冬官而已可工部尚书

太子詹事刘元鼎可大理卿兼御史大夫充西番盟会使右司郎中刘师老可守本官充盟会副使通事舍人太仆丞李武可守本官兼监察御史充盟会判官三人同制

勅太子詹事刘元鼎等夫选可任而任之则用无不适择可劳而劳之则事无不成盖君使臣臣事君之大端也属西夷乞盟求可以莅之者历选多士吾得三人今以元鼎之博通师老之诚谅武之恭敏合而为用不亦可乎尔宜临之以庄示之以信仪形辞气皆有可观必能率服彼戎不独益敬吾使法卿宪秩宠之以遣可依前件

许季同可秘书监制

勅大理卿许季同国朝以来有刘得威张文瓘唐临为大理卿有魏徵虞世南颜师古为秘书监设官之重得贤之盛人到於今称之今季同以明慎钦恤理刑狱以文学博雅长图籍由廷尉而长秘府论者荣之宜自重其官自远其道又思与刘张唐魏虞颜为比不亦自多乎可秘书监

张元夫可礼部员外郎制

勅殿中侍御史张元夫官有秩清而选妙者其仪曹员外郎之谓乎凡殿内御史虽文才秀出功课高等者满岁而授犹曰美迁有如元夫连膺二选历彼践此金以为宜况怒飞青冥翔集禁陛由兹去者十八九焉汝知之乎思有以称可尚书礼部员外郎

杨嗣复可库部郎中知制诰制

勅权知兵部郎中杨嗣复朕闻前代制诰中书令侍郎舍人通掌之国朝以来或以他官兼领惟其人是用不限於资秩职署焉予以为然多繇是选前所命者时称得人研实核名次第及汝汝嗣复根於义训播为令器文焕发而才秀出不当汨没於郎吏间况贞元中汝父为中书舍人甚称厥职今使汝继书吾命成一家言堂烜【况远切】国华在於此举尔宜兢兢祗励无隕其名可库部郎中知制诰

张平叔可京兆少尹知府事制

勅商州刺史张平叔为人廉直为政简惠前後历掾邑宰郡守而去思来暮之谣继闻於人听焉及副盐铁官刺商雒郡会课报政亦甲於他官自贞元以来用三科取士奉详明政术可以

理人之诏而得其名有其实者几何人哉平叔居其一也能効若是何用不臧故事内史 未补闲亚尹得行大京兆事试可而即真者往往有之故其选任日益难重尔宜称所举慎厥职无堕大以勤小无急弱以缓强夕念朝行遵吾约束可京兆少尹知府事

康日华赠坊州刺史

勅汉令军中士有不幸死者得以棺敛传送若是而已犹四方归心焉矧吾褒赠以荣之惻隐以将之显其忠抚其後亦所以激生者节岂独慰逝者魂乎左神策军赴行营正将试太常卿康日华领王师死王事军书置奏朕甚悼焉可赠坊州刺史

张籍可水部员外郎制

勅登仕郎守国子博士张籍文教兴则儒行显王泽流则歌诗作若上以张教流泽为意则服儒业诗者宜稍进之顷籍自校秘文而训国胄今又覆名揣称以水曹郎处焉前年以来凡历文雅之选三矣然人皆以尔为宜岂非笃於学敏於行而贞退之道胜邪不与之宠名何以獎夫不汲汲於时者可守尚书水部员外郎散官勲如故

何士义可河南县令制

勅汉朝郎官出宰百里故今京邑令 多命尚书郎补焉朝议郎尚书水部员外郎何士义慎检和易介然有常守而勿失可使从政然能佩弦以自导带星以自勤则缓急劳逸之间必使适宜而会理矣以尔舒退故吾进之可守河南县令散官如故

崔植一子官回授侄某制

勅丞相植典职枢务亦既逾岁而能明我目达我聪左右我躬以底于道况属郊祀摄赞大仪宠锡之间植宜加等而念其犹子乞用推恩既叶旧章允膺新命其侄某可某官

王起等赐勲制

勅中书舍人王起等朕临御之始庆赏遂行卿士大夫递加勲秩自武骑尉以上十有二转自起以下十有四人咸赐以勲举书於籍可依前件

萧俛除吏部尚书制

勅古者君使臣以礼臣事君以忠季代已还鲜由兹道先皇帝创於是故在位十五载凡解相印者殆二十人多宠为大僚或付以兵柄矧予小子宜有加焉而辅弼之臣尝经一日造吾膝沃吾心则思与之始终厚申恩礼不唯感劝来者且不敢失坠先志也尚书右仆射萧俛忠肃孝敬佐吾为理以勤事国以疾退身本末初终不失其道既免枢务倚为右揆加恩超等复吾

前言而俛继上让章至於三四敦谕烦切陈乞弥坚是用正命为选部尚书而冠六卿统百职尚可以表吾宠重亦所以成尔谦光尔宜钦厥止慎厥终无忝我褒扬之命可吏部尚书

温尧卿等授官赐绯充沧景江陵判官制

勅温尧卿等今之俊乂先辟于征镇次升於朝廷故幕府之选下台阁一等异日入为大夫公卿者十八九焉荆门景域南北大府而尧卿等或已参军要或方受兵书各命以官分试其事名秩章绶分而宠之夫千里之行始於足下苟自强不息亦何远而不届哉可依前件神策军及诸道将士某等一千九百人各赐上柱国勳制

勅古之善为国者劳不忘而赏不滥有赏一人而为僭者有千百人而不为费者其要在当否而已不系於衆寡也朕自统御已来忽忽有念念天下材力之将勇敢之士进有征讨之苦退有守扞之勤藏之中心何尝暂忘而亟因大庆思洽普恩某等若干人咸进勳级并可上柱国

李彤授检校工部郎中充郑滑节度副使王源中授检校刑部员外郎充观察判官各兼侍御史赐绯紫制

勅万年令李彤【徒红切】侍御史王源中等舜以五长绥四国若今之节制也周以十聯率诸侯若今之廉察也国家合为一柄付有功诸侯故其陪臣选任益重或辍朝籍授简书者往往而有况承元有大忠于国受重任于外使其承上莅下敬始善终实在庶寮叶力以济今以彤宰京邑有理剧之用如水在器挠之不浊以源中立宪府有纠正之能如刃发硎割之无滞一可以倅【匕醉切】戎事一可以佐輶【余招切】车二职交修在此一举台郎宪吏金印银章加乎尔身无忝我命可依前件

柳公绰父子温赠尚书右仆射竇侔父叔向赠工部尚书薛伯高父恽赠尚书司封郎中元宗简父锯赠尚书刑部侍郎皇甫镛父愉赠尚书右仆射韦文恪父渐赠太子少保王正雅父翊赠太子太师范季睦父彦赠礼部郎中八人亡父同制

勅古人有云树欲静而风不止子欲养而亲不待向无显扬褒赠之事则何以旌先臣德慰後嗣心乎故朕每施大恩行大庆而哀荣之命未尝阙焉银青光禄大夫行尚书吏部侍郎上护军河东县开国子柳公绰父温等咸有令子集於中朝资父事君移忠自孝本於严训酬以宠名赐命追荣各高其等呜呼存者不匮往者有知斯可以载扬兰陔【居亥切】之光辍风树之叹耳可依前件

李宗河可渭南令李玘可京兆府户曹制

勅李宗河等夫纲一提则羣目举源一澄则衆流清故朝廷命官师选寮属亦得其人矣按内史公绰奏宗河学古修已练达道理乃乞为旬县令玘励节徇公通详典故乞为天府掾况渭南封圻之首邑户曹赋籍之要司位虽未高职亦不细宜乎以三语自试以一同自効无俾尔

长貽失举之责焉可依前件

兵部郎中知制誥冯宿侍御史裴注义武军行军司马御史中丞萧籍饶州刺史齐照邓州刺史浑鋮【呼对切】并可朝散大夫同制

勅某官冯宿等凡品秩之制有九自五而上谓之贵阶而宿司吾言注持吾宪籍照以降皆着勤由朝议郎一进而及此此之所以为贵者?及子命及妻岂唯腰白金服赤芾【敷勿切】从大夫之後而已宠数既重思有以称之并可朝散大夫

太常博士王申伯可侍御史盐铁推官监察御史里行高谐河东节度参谋兼监察御史崔植并可监察御史三人同制

勅某官王申伯学优行茂饰以词藻执礼定议多得其中某官高谐温庄洁白不交势力某官崔植外和内直通知政典在伦辈内而人皆谓之滞淹唯是三子之才吾得於御史中丞僧孺御史吾耳目官也非清明劲正不泥不挠者安可使辨淑慝振纪律广吾之聪明焉并命同升无忝是举可依前件

温造可起居舍人充镇州四面宣慰使制

勅殿中侍御史温造尝纠天府不旷官驰轺车不辱命况为人外和内决以兼济为心拔居殿中以备时使会吾忧两河间事求可谕朝旨慰人心者使焉揆効酌能汝中吾选故不待满岁擢为右史出则衔吾命入则记吾言獎任不轻思有所立可依前件

高芳颖等四人各赠刺史制

勅故某官高芳颖等昔文王葬枯骨之无知也但惻隐之心不忍弃也故天下皆归仁焉况捐躯之魂死节之骨见危授命朕甚悯之深州故小将高某等四人皆从战阵连歿王事褒赠之数宜其有加并命追荣以光地下可依前件

崔咸可洛阳县令制

勅度支员外郎崔咸汉以四科辟士求多畧不惑强明决断者任三辅令故今两京令亦择尚书郎有才理者补之而咸在郎署中推为利用加以词学缘饰吏能操割洛阳必有余力然宰大邑如烹小鲜人扰则疲鱼扰则馁寛猛吐茹其鉴于兹可洛阳令

周愿可衡州刺史尉迟銳可汉州刺史薛鯤可河中少尹三人同制

勅前复州刺史周愿等夫劳者之思休息病者之思救疗人之本情也今兵戈甫定物力未丰如闻湘衡巴汉之间人犹疲困宜择良二千石俾休息而救疗之而愿銳鯤等前以符竹分镇

三郡皆有善政达乎朝廷举课考能无愧是选息劳救病其有望於汝乎河中吾之股肱郡也貳尹职而佐府事者亦在得人命鯤处之无荒厥职可依前件

杨景复可检校膳部员外郎郢州观察判官李绶可监察御史天平军判官卢载可协律郎天平军巡官独孤涇可监察御史寿州团练副使马植可试校书郎涇源掌书记程昔范可试正字涇源判官六人同制

勅某官杨景复等士子不患无位患已不立苟有所立人必知之惟尔等六人蘊才业文咸士之秀者果为贤侯交辟俾朕得闻其姓名是用各进其秩分授其职若修饰不已筹谋有闻则鸿渐之资当从此始而景复稟训祗命颇着令称故因满岁特假台郎古者公臣之良入补王职朝獎非远尔其勉之可依前件

前庐州刺史殷佑可郑州刺史制

勅某官殷佑夫吏寬信则人人不偷吏廉明则人人尽力吾观佑之为政其近之乎前守庐江能率是道岁会课第甲於他州俾精前功且伫来効宜换符竹移牧郑人在春秋时郑为侯国武公善於其职子产遗爱於人人无古今更有能否听吾用汝汝其嗣之可郑州刺史

李德循除膳部员外郎制

勅尚书郎自奏议弥纶外凡邦之牲豆之品醴膳之数实纠理之命文昌长佐春官卿以朝散大夫守秘书丞上柱国李德循籍训于台庭业官于书府揆才考第得补为郎司膳 员尔宜专掌可尚书膳部员外郎余如故

张正甫可同州刺史制

勅冯翊吾左辅也分理浩穰【汝两切】率先风化故其选次任内史一等而冠四方岳牧之首焉宜求吏课高位望重者分部共理以夹辅京师尚书右丞赐紫金鱼袋张正甫自登台阁为人说直物论时望敬而重之及领藩部为政寬简将吏黎庶信而爱之所谓朝廷正臣郡国良吏常有惠政加於是邦迨兹五年去思犹在故辍台辖再委郡符宜敬服新命增修旧政俾吏畏如夏日人归如流水慎於终始典於厥官可持节同州诸军事守同州刺史充本州防御使散官勳如故

崔瑄可职方郎中侍御史知杂制

勅近岁以来副相多 朝纲国纪专委中宪而侍御史一人得总台事以左右之今御史中丞德裕以中散大夫行尚书吏部员外郎上柱国崔瑄守文无害莅事惟精在郎署中推其才理奏补是职请观其能因而可之仍加宠秩操执举措尔无自轻可行尚书职方郎中兼侍御史知杂散官勳如故

白氏长庆集卷四十九

卷五十

钦定四库全书

白氏长庆集卷五十

唐白居易撰

中书制诰三【旧体凡二十八道】

册新回鹘可汗文

维长庆元年岁次辛丑四月庚寅朔二十一日庚戌皇帝若曰唐有天下垂二百载列圣垂拱八荒即叙舟车之所及日月之所照威绥仁董罔不向化惟北之气积厚而灵灵发象生生为豪杰义信武烈代为名王南西东方亦有君长较雄鬪智莫之与京国朝已来寢渍风泽或効功伐或申婚媾同和协比以托於今今朕不德祇嗣大统推义布信以初为常矧乎柔远申恩睦隣展礼兹惟旧典垂自祖宗?奉恭行安敢失坠咨尔九姓回鹘君登里罗羽録没密施句主録毗伽可汗地生奇特天赐勇智英姿所莅雄略所加诸戎杂虏爱畏柔服风靡山立清寧一方宜人有土受天百禄时推代嗣实来告予曰予一人实隣册命是用遣使朝议大夫检校左散骑常侍兼少府监御史大夫云骑尉赐紫金鱼袋裴通副使朝议大夫守少府少监兼御史中丞袭魏国公食邑三千户赐紫金鱼袋贾隣【离珍切】等持节备物册为登里罗羽録没密施句主録毗伽可汗於戏善必有邻德无不答此崇恩礼则彼竭信诚克保大义永藩中夏昭昭天地实闻斯言

册回鹘可汗加号文

维长庆元年岁次辛丑某月朔某日皇帝若曰北方之强代有君长作殿玄朔宾於皇唐粤我祖宗锡乃婚媾五圣六纪二邦一家此无北伐之师彼无南牧之马兵匣锋刃使长子孙叶德保和以至今日咨尔回鹘君登里罗羽録没密施句主録毗伽可汗义智忠肃武决勇健天之所授时而後生故东渐海夷西亘山狄惠寧威制鳞帖草偃声有闻於天下气无敌於荒外而能事大图远纳忠贡诚请仍旧姻誓嗣前好朕惟睦邻是务柔远为心既降和亲之命遂申饰配之礼礼物大备宠章有加喜动陰山光增昴宿夫以回鹘雄杰如彼庆荣若此虽自贵曰天骄子未称其盛虽自尊曰天可汗未称其美宜赐嘉号以大夸将来今遣使某官某副使某官某等持节加册为信义勇智雄重贵寿天亲可汗於戏厘降展亲大德也进册加号大名也宜乎思大德称大名懋哉始终钦若唐之休命

韦绶从右丞授礼部尚书薛放从工部侍郎授刑部侍郎丁公着从给事中授工部侍郎三人

同制

勅尚书右丞韦绶等朕在东宫时先皇帝垂慈圣之德念予冲蒙选端士通儒使讲贯今古自礼乐刑政暨君臣父子之道博我约我日就月将俾予今不至墙面克何丕训大扬耿光实绶放公着之力也故朕嗣位未逾时月或自郡邸或自省署徵擢宠用为丞郎给事官虽超拜职亦俱举师道光而心愈让人爵贵而心益恭宜更褒升重酬辅导以绶精粹辩博有先儒之风可作秩宗以放端明慎重行君子之道可居宪部以公着检敬规度得有司之体可贰冬官於戏贞百工平五刑典三礼皆重任清秩予无爱焉盖欲表三子道不虚行而明予一人德无不报也绶可礼部尚书放可刑部侍郎公着可工部侍郎余并如故

李谅除泗州刺史兼团练使当道兵马留後兼侍御史赐紫金鱼袋张愉可岳州刺史同制

勅扼淮压湘之列城曰泗与岳舟车会焉军戎屯焉是二郡守则易为政先是分领者多会有政岁时罢去长吏数易人必重困宜择良二千石救而养之以谅自澄城长讫尚书郎中间又再为州牧三宰剧县皆苦心恤隐煦妪及物操刃决滞蠹騷【霍号切】有声而愉亦学古入仕甚自修饰河西有政次於谅焉故命愉守岳命谅守泗仍以戎职留事宪简章绶一加於谅谅其听之哉异日吾将以重官剧职处尔尔安得不副吾所急用尔所长更宜以难理之郡自试尔各依前件

裴廙授殿中侍御史制

勅某官裴廙【夷益切】贞观初张行成为殿中侍御史纠劾巡察时以为能朕思弘贞观之风故选御史府官亦先其精敏刚正者以尔廙动循道理语必信直励其志节有类行成因授厥官无忝吾举可殿中侍御史

裴通除检校左散骑常侍兼御史大夫充回鹘吊祭册立使制

勅语曰使於四方不辱君命可谓士矣况驰轡轩奉玺书称天子之使以燿焜絕域者岂容易其选哉少府监裴通温敬忠实加之谨敏有言语可任以专对有辩识可委以便宜属北方君长来告代嗣求可以将命展礼申吾哀荣之恩者其任不细颇难其人择臣者君而通可使命为副丞相而加金貂之贵授册与节临轩遣之庶乎远而有光华且欲使絕俗殊邻益敬吾使也可依前件

元稹除中书舍人翰林学士赐紫金鱼袋制

勅仲尼曰志有之言以足志文以足言言之无文行而不远故吾精求雄文达识之士掌密命立内廷甚难其人尔中吾选尚书祠部郎中知制诰赐绯鱼袋元稹去年夏拔自祠曹员外试知制诰而能芟【师衔切】繁词剗【楚简切】弊句使吾文章言语与三代同风引之而成纶綍【敷勿切】垂之而为典训凡秉笔者莫敢与汝争能是用命尔为中书舍人以司诏令

尝因暇日前席与语语及时政甚开朕心是用命尔为翰林学士以备访问仍以章绶宠荣其身一日之中三加新命尔宜率素履思永图敬终如初足以报我可中书舍人翰林学士赐紫金鱼袋

孔戣【渠为切】授尚书左丞制

勅汉诏丞相岁举质直忠厚逊让者盖所以急贤俊扶政教厚风俗也然则退藏疎贱之士苟有一善尚搜而扬之况任久位崇才全望重而不致於急官要职者安可以纪纲庶政而羽仪朝廷焉正议大夫守右散骑常侍上柱国赐紫金鱼袋孔戣自十年来历中台左曹国庠卿寺洎藩守近侍之职各以其任皆有可称矧又贞白端庄淡然自立进无矜满之色居无堕替之容求之周行不可多得若戣者宜尚扶政教厚风俗之选也尚书丞掌决百事枢辖六曹晋魏已还右卑於左惟有立者可以纠吏惟无瑕者可以律人无以易戣往恭乃位可尚书左丞散官勲赐如故

授柳杰等四人官充郑滑节度推巡制

勅试太子司议郎柳杰等古者公府得自选吏属今仍古制亦命领征镇者必先礼聘而後升闻矧郑滑帅承元输忠仗顺炳焉有大节於国奉上莅下实藉寮案以左右之而杰等或缘饰词华或贮蓄才行揣摩思诚以待已知宜展筹谋用光慰荐杰可某官充郑滑节度推官

韩愈等二十九人亡母追赠国郡太夫人制

勅王者有褒赠之典所以旌往而劝来也其有淑顺之德标表母仪者圣善之训照烛子道者又有名高秩尊禄养之不逮者霜降露濡孝思之罔极者非是典也则何以显其教而慰其心焉国子祭酒韩愈母某氏等蕴德累行积中发外归於华族生此哲人为我苾臣率由兹训教有所自恩不可忘是用啓郡国之封极哀荣之饰呜呼歿而无知则已苟有知者则显扬之孝追宠之荣可以达昊天而贯幽窆矣往者来者监予心焉可依前件

授骆峻太子司议郎梧州刺史赐绯鱼袋兼改名玄休制

勅某官骆峻桂林守土臣式方言梧为要郡兵後人困乞廉贞吏以抚之又言峻守道抱器可以起用朕方思良吏以活元元适副所求即可其奏官寮郡印命服嘉名四者与之足为优异峻宜副所举慎所为无以滋章为聪明无以鹵莽为高简勉率中道往安梧人可梧州刺史

刘总弟约等五人并除刺史赐紫男及侄六人除赞善洗马卫佐赐绯同制

勅某官刘约等惟尔先人太师济经武秉哲为国元臣镇阳之役实歿王事茂勲大节书於旗常惟尔兄司空总象贤纂戎以续名业纳忠於王室振耀其家声而尔约等亦能稟守其风忠恭孝友念义方之训而不堕居贵介之地而不骄况兼器能皆可任用授郡符而加命服者五

升朝序而佐环卫者六朱轡【孚艰切】紫绶焕赫相望勲德之家於斯为盛呜呼昔武子有遗爱晋人怜其子赵季有笃行汉朝宠其弟今以济之仗顺积善宜鍾庆於子孙以总之输忠立爱可延赏於弟侄多与爵禄予无惜焉欲使天下知尔父兄忠顺之若彼而国家报施之如此可依前件

王元辅可左羽林卫将军知军事制

勅国家设十二卫犹汉之有南北军而左右羽林尤称亲重自诸卫而移镇者谓之美迁左神武将军王元辅生勲伐之家通吏理之事佐戎临郡率着能名以掌勾陈而护建章备巡警而严羽卫大将军事假而行之宜励初终副兹宠任可依前件

尚书工部侍郎集贤殿学士丁公着可检校左散骑常侍越州刺史浙东观察使制

勅古者通守守土刺史按部从宜务简今则合之故任日崇而选日重非廉平简直兼恺悌之德者曾不足中吾选焉某官丁公着尝以学行礼法诲予一人报德图劳连加宠擢起曹书殿兼而委之二职增修三命益敬朕以浙河之左抵於海隅全越奥区延袤千里宜得良帅俾之澄清往分吾忧无出尔右假左貂而帖中宪操郡印而握兵符勉哉是行伫闻报政可依前件

郑綱【伊真切】可吏部尚书制

勅天官太宰秩序常尊自昔迄今冠诸卿首非位望崇盛者不可以处之而朕即位以来凡命故相领者三矣迨此而四可不重乎东都留守防御使检校刑部尚书兼御史大夫荥阳县开国公郑綱有丙吉之寬裕子产之恭惠合而为用藩辅四朝故事遗爱留於官次国之都府半在东周委以保厘人安吏肃重烦耆德入领冢卿昔魏用崔琰毛玠典吏曹一时之士以廉节自励国朝以宋璟李义掌选部亦能遏絕讹伪振张纪纲官无古今得人则理吾言及此欲尔继之可吏部尚书

重授李晟【时征切】通事舍人制

勅李晟昔管仲云升降揖让进退闲习臣不如隰朋今之通事舍人近此选也而晟常中此选善於其职故相导通奏之节宣扬拜起之仪引而赞之不闻失礼既终丧纪宜服官常可使束带曳裾为吾谒者可通事舍人

徐登授醴泉令制

勅徐登京兆尹言登前为泾阳令清廉简直奉法爱人请补醴泉再考其绩昔子路理蒲仲尼诲曰爱而恕可以容困温而断可以抑奸今醴泉人与蒲相类宜用此道往训养之岁时之间期於报政可醴泉县令

王汶加朝散大夫授左赞善大夫致仕制

勅王汶善修其身爲時良士善訓其子爲國憲臣況以時制之年知終請老不加優秩何厚吾風禮大夫七十而致仕故我以朝散贊善二大夫之爵加乎爾身惟秩與年兩皆得禮以茲退去亦足爲榮可依前件

元公度授華陰令制

勅元公度吾欲理化萬方故自近始前授大宗正【咨登切】印綬使牧華人能副吾此心選吏責課言公度廉明有守乞宰華陰當道東西往來先爲邑者多飾傳舍奉賓客以沽名譽而不親吾人爾能革之足爲良宰敬長畏法無慢乃官可華陰縣令

唐州刺史韋彪授王府長史楊歸厚授唐州刺史劉旻授雅州刺史制

勅韋彪等善官人者先考其能然後授以事使輪轅齒柄各適其用則羣職庶政得以交修今以彪宦久年高勤於爲政俾從優逸入補王官以歸厚文行器能尋在巴峽勵精爲理績茂課高區區萬州豈盡所用且移大郡稍展奇才以旻早著戎功通詳吏事西南物土罔不周知习俗從宜宜守嚴道分命以職各用所長庶乎咸修乃官同底於理可依前件

鄭綱烏重胤馬總劉悟李佑田布薛平等亡母追封國郡太夫人制

勅經曰立身揚名以顯父母孝之終也而綱等學文武之道以飭厥躬可謂善立身矣居將相之位以光大其門可謂能揚名矣夫自家所以刑國本立而後道生必待我哀榮之恩方成爾始終之孝是用啓封追號各顯乃親慰後光前孝道備矣可依前件

奉議郎殿中侍御史內供奉飛騎尉賜緋魚袋盧商可劍南西川雲南安撫判官朝散大夫行開州開江縣令楊汝士可殿中侍御史內供奉充劍南西川節度參謀二人同制

勅劍南西川雲南安撫判官奉議郎殿中侍御史內供奉飛騎尉賜緋魚袋盧商等士之束發立身爲知己用也無遠近無勞逸但問所務者何從者誰耳今蜀之帥潞之長皆勤於述職妙於賢多得其儁材樂告以善道故以參其選焉或從事有勞或即戎奔命輟玄黃之著述振銅墨之滯淹以良士而贊賢侯宜乎多成功而鮮敗事矣勉思所立各服乃官

李演贈太子少保制

勅夫生立勲勤下以忠事上也歿加褒飾上以義答下也忠義臻其分哀榮極其恩而君臣之道全矣故奉天定難功臣開府儀同三司檢校兵部尚書兼左衛上將軍御史大夫李演忠信以爲干義勇以爲器器與干合郁成將材故出長諸侯入統七萃拊循警衛朕甚賴之方深倚仗遽此淪謝茲予所以當寧興念廢朝軫懷聞鼙鼓而長太息者也追崇之命宜有加焉可贈

太子少保

李谅授寿州刺史薛公干授泗州刺史制

勅泗州刺史李谅等诗云恺悌君子人之父母朕三复斯言往往兴叹安得循吏俾父母吾人乎吾前命谅为泗守未即路会寿守植卒因改谅守寿命公干守泗谅之理课前诏详矣公干自尚书郎连领二郡政平法一甚便於人加以有理戎之材可付留事故辍军保仍宪秩而兼宠之夫寿与泗皆郡之大者也谅与公干皆二千石之良者也以大郡委良吏不亦宜乎噫谅无忘澄城之理公干无替亳城之政则恺悌之化吾有望於二郡焉谅可寿州刺史公干可泗州刺史

柳公绰罢盐铁守本官兵部侍郎制

勅某官柳某昔先皇帝知尔有材元和已来应用不暇及领榷管漕运之务属陵寝郊丘之礼财给事集时乃之功宜有转移以均劳逸况闻牢笼无遗利课督有常规今诏刑部尚书播代之亦令守而勿失朕将兴理化先务根本凡百职事悉归有司惟兹夏官实掌戎政简稽调补今方其时司马贰卿佐平邦国是尔本职无忘增修可守兵部侍郎

崔元备张惟素郑覃陆灏韦弘景赐爵制

勅崔元备等礼莫重於复土事莫大於慎终使朕以孝敬之诚获贡于先帝实赖左右侍从之臣服勤祗事展四体而竭一心诚俾予无悔赏不敢忘爵不敢爱尔宜疏封服命而扬之可依前件

刘约授棣州刺史制

勅前齐州刺史兼御史中丞刘约故太保济之子太尉总之弟也吾常思济之功总之忠而嘉约之谨厚累迁至齐州刺史在官无败事罢秩有去思念旧録能宜当宠用况公侯之後约有通才封域之间棣为要郡委之共理谁曰不然可使持节棣州诸军事棣州刺史依前御史中丞散官勲如故

李肇可中散大夫郢州刺史王鎰可郎州刺史温造可朝散大夫三人同制

勅朝请大夫使持节澧州诸军事澧州刺史上柱国赐紫金鱼袋李肇等乃者李景俭使酒获戾而肇等与之会饮失於检慎宜有所惩由是左迁分为郡守今首坐者既复班列缘累者亦当徵还但以长吏数易其弊颇甚况闻三郡皆有政能人方便安不宜迁换故吾以采章阶级并命而就加之盖汉制进爵秩降玺书慰劳良二千石之旨也尔当是命得不勉哉

白氏长庆集卷五十

卷五十一

<集部,别集类,汉至五代,白氏长庆集>

钦定四库全书

白氏长庆集卷五十一

唐白居易撰

中书制诰四【新体祭文册文附凡五十道】

赠刘总太尉册文

维长庆元年四月某日皇帝若曰朕闻古有履忠仗顺生而大有为者又有功成身退歿而永
不朽者非正气令德间生挺出则高名大节孰能兼之哉故天平军节度使检校司徒兼侍中
楚国公刘总降自天和生为人杰得君於先帝叶运於昌时纂戎弓裘守土燕蓟迨此一纪北
方晏然有开必先纳欵於我沈断大事奋扬奇谋捧幽都四封之图挈卢龙三军之籍尽献阙
下高谢人间感动君臣惊激忠义顾妻子若脱屣视富贵如浮云惟道是从奉身以退伸连事
成而蹈沧海子房名遂而追赤松贤明所归今古一致朕方改授兵柄移镇郛郊命作司徒倚
为左相期奋乃志将沃朕心而天不憖遗邦失柱石夫臣戴君如元首则君视臣如股肱股肱
或亏何痛如是兹朕所以废朝轸念备礼加恩庸建尔於上公盖褒赠之崇重者也呜呼尔总
尚知之乎今遣使某官某副使某官某持节册赠尔为太尉

傅良弼可郑州刺史制

勅金紫光禄大夫使持节沂州诸军事行沂州刺史兼御史中丞骑都尉傅良弼燕冀之间纷
扰之际多垒失守孤城保全介于险中率乃麾下转战郊野来覲阙廷徇义灭亲亡家丧子忠
勤勇烈人所难能若不褒陞何劝来者海沂剖竹未足报功溱洧颁条可兼观政敬承後命无
替前劳可使持节郑州诸军事行郑州刺史兼御史大夫散官勲如故

河北榷盐使检校刑部郎中裴弘泰可权知贝州刺史依前榷盐使制

勅某官裴弘泰以干蛊之才领盐卤之务管榷条制动皆得宜观其所能若有余地可假兼职
俾之牧人而河北列城久乏良吏俗多思理政不难施亦犹冻馁之人易为衣食今予命尔煦
而饫之襦袴之谣伫入吾耳可兼知贝州刺史

崔陵可河南尹制

勅河洛千里都畿在焉俾之乂安属在尹正凤翔陇州节度观察处置等使正议大夫检校礼部尚书兼凤翔尹御史大夫上柱国开国男食邑三百户赐紫金鱼袋崔陵有精敏之用洁直之操施于有政由是知名始资州县之劳卒致公卿之位况刺部有理行主计无???【苦坚切】违尹右辅而镇西郊盖獎能报勤之旨也昔吴公为河南守谨身廉平人服教化袁安为河南尹政令清肃号为严明谁其嗣之无易陵者往为表则勿替能名可检校礼部尚书兼河南尹散官勲封赐如故

侯丕可霍丘县尉制

勅赐太常寺奉礼郎翰林待诏上护军侯丕夫执艺以事上奉诏而处中其於出入谨身夙夜祇命比他局署实倍恭勤既宠之以职名又优之以禄俸盖先劳後食之义也汝其承之可守寿州霍丘县尉依前翰林待诏勲如故

崔楚臣可兼殿中侍御史制

勅成德军节度押衙银青光禄大夫检校太子宾客兼监察御史崔楚臣材膺爪士职在牙旗每祇命以奉辞必竭诚而得礼既嘉详敏亦念恭勤式示宠名宜迁宪秩可殿中侍御史余如故

王庭湊曾祖五哥之可赠越州都督祖未怛活可赠左散骑常侍父昇朝可赠礼部尚书制

勅成德节度镇冀深赵等州观察处置等使金紫光禄大夫检校工部尚书兼镇州大督府长史大夫上柱国太原县开国男食邑三百户王庭湊曾祖故忠武将守左武卫大将军员外置同正员兼试太常卿五哥之等鬼神有知履孝敬者福祿至王侯无种仗忠信者富贵来我有列臣本於良胤奋发而励节许国感激而扬名显亲夫教必有初德无不报安有收其材而遗其本爱其後而忘其先乎是用褒崇以弘宠泽庶使闻者起孝作忠可依前件

崔羣可秘书监分司东都制

勅前武寧军节度徐泗濠等观察处置等使正议大夫检校兵部尚书使持节徐州诸军事兼徐州刺史御史大夫上柱国赐紫金鱼袋崔羣天受至宝为国重器始自修己移於事君辅弼藩宣不失其道及离征镇召赴阙廷方登道途遂遘疾恙正在颐养之际岂任朝谒之劳诚宜许以便安不可阙其禄食而移秩外史分曹东周加宠优贤无易於此且有後命俟其有瘳可秘书监分司东都散官勲赐如故

董昌齡可许州长史制

勅将仕郎权知泗州长史兼殿中侍御史赐绯鱼袋董昌龄顷为邑宰今赞郡符皆闻约已之名每展在公之节稽其器局允谓廉能议以稍迁用彰勤効可许州长史兼侍御史散官勲如故

柳经李褒并泗州判官制

勅徵事郎前河南县尉柳经儒林郎试太子通事舍人李褒等濒淮列城泗州为要控转输之路屯式遏之师故府有寮军有倖选择补署得闻於朝廷而经等皆有所长宜当是选守臣置奏因而可之仍加秩命用示优宠经可监察御史充泗州团练副使散官如故褒可试太常寺协律郎充武寧军节度泗州兵马留後判官仍改名衔散官勲如故

张讽等四人可兼御史中丞侍御史监察御史同制

勅义成军节度马步都知兵马使光禄大夫检校太子詹事兼侍御史上柱国张讽等御史府自中执宪暨察视之官皆显秩也唯怀材而展効者可以授焉尔等昨领偏师出疆赴难指踪而去摩垒而还忠勇勤劳宜有加獎故以宪职第而宠之可依前件

啖异可滁州长史许志雍可永州司户崔行俭可隋州司户并准赦量移制

勅守袁州司马员外置同正员啖异等有司奉新制明旧章凡负疵瑕必沾庆泽况尔等各有才用多淹岁时谴累重轻递从恩贷班资远迩率以例迁如闻进修岂忘牵复可依前件

程执抚亡父怀信赠太保李佑亡父景畧赠太子少傅柏耆亡父良器赠太子少保白余盛亡父孝德赠太保同制

勅中散大夫检校右散骑常侍兼右神武军大将军知军事御史大夫上柱国河东县开国男食邑三百户赐紫金鱼袋程执抚父赠太子太保怀信等咸有忠勲播为先德悉承义训垂在後昆故吾令臣皆乃爱子袭弓裘而稟诗礼犹水木之有本源将使天下之为人子者感恩天下之为人父者知劝宜加宠赠以表显扬可依前件

严谟可桂管观察使制

勅汉置部刺史掌奉诏条纠吏理盖今观察使职耳桂林秦郡也东控海岭右扼蛮荒自隋迄今不改戎府地远则权重俗殊则理难驭而化之非才不可朝议大夫前守秘书监骁骑尉赐紫金鱼袋严谟尝守商洛刺黔巫州部县道謐然安理是能用寬猛相济之政抚夷夏杂居之人故也迹其往効式是南邦况尔操行端和文学精茂宾寺书府善於其官勉副前言俟申後命可使持节都督桂林诸军事守桂州刺史兼御史中丞桂州本管都防御观察处置等使散官勲如故

杜式方可赠礼部尚书制

勅生有宠禄殁有褒崇此王者所以明终始之恩厚君臣之道也故桂州本管都防御观察等使正议大夫使持节都督桂州诸军事守桂州刺史兼御史中丞上柱国南阳县开国男赐紫金鱼袋杜式方庆袭台庭任当垣翰服名教乃保家之子树风声为守土之臣尽礼事君劳心奉职奄忽沦逝念之惻然况近属连姻远藩捐馆闻讣之命实悼中心赠饰之恩宜加常等俾趋荣於八座用贲宠於九原可赠礼部尚书仍赙【符过切】布帛二百段米粟二百石委度支逐便支遣

武昭除石州刺史制

勅某官武昭王师伐蔡尔在行间致命奋身挑战当寇忠愤所感卒获生全求之军中不可多得司马以尔信直谨厚可领边城尔宜酬乃已知副我朝獎抚獯戎杂居之俗安离石重困之人勉而莅之其任不细可石州刺史

梁希逸除蔚州刺史制

勅某官梁希逸顷为蔡将陷在贼庭知有君臣不顾妻子率其所属当战阵前反旆倒戈翻然归我忘家之士希逸有之从司空再平淮右指踪衔命皆称所使可以移用俾之守疆北边列城蔚为冲要雄右军号务兼钱刀醺【时流切】勤迭能俾乃兼领宜思来効以续前劳可蔚州刺史兼横野军使并知本州铸钱事

卢元勲除隰州刺史制

勅卢元勲乃者镇帅身丧正承元纳款之际柏耆将命之初军情汹然未知向化而元勲挺身奋臂出於衆中指明安危分别逆顺顔色不挠声气甚励言行事立朕甚多之虽有优升未酬义烈宜以一郡宠而旌之用劝四方闻其风者可隰州刺史

扬孝直除滑州长史制

勅扬孝直早以材力从戎冀方专习武经通知吏事承元移镇孝直实来询谋驱驰有所裨助军郡之佐宠秩非轻用答忠劳以明劝獎可滑州长史

张嘉泰可延州长史制

勅前丹州司马张嘉泰一从戎旅多历岁时奉职有劳率身无过军部长佐资秩不卑自丹转延颇为优豫题輿便道往守乃官可延州长史

魏玄通除深王府司马制

勅魏玄通有御侮之才扞城之畧服勤戎职善守边州训旅牧人有可称者夫文武迭用出入序迁所以关才能而均劳逸也尔宜解绶郡邸曳裾王门飭躬慎仪以奉朝谒可依前件

杨造等亡母追赠太君制

勅通事舍人杨造翰林待诏某亡母等生播徽华歿留仪范训保家之子为有国之臣或相礼彤庭或待诏金马咸居禁近率有忠勤风树之心必忧深而思远蓼萧之泽宜自叶而流根并啓邑封各从子贵扬名之孝与汝成之可依前件

张值李翱等二十人亡母追赠郡县夫人制

勅寿州刺史张植亡母某氏等夫忠於上者教有所自仁於下者恩有所延孝理之风实繇此作当今良二千石皆与朕共理虽禄不逮养而名可显亲将慰匪莪之心宜流自叶之泽俾从子贵咸赠邑封

陈中师除太常少卿制

勅尚书吏部郎中兼侍御史陈中师早以体物之文待问之学中乡里选第甲乙科及筮仕立身皆有本末不背俗以矫迹不趋时以沽名从容中道自致闻望累践郎署再参宪司官无卑崇事无简剧如玉在佩动必有声为时所称何用不可朕以立国之本礼乐为先今之太常兼掌其事貳兹职者不亦重乎历代迄今谓之清选往服是命伫观有成予方急才尔寧久次可太常少卿

衢州刺史郑羣可库部郎中齐州刺史张士阶可祠部郎中同制

勅某官郑羣等今之正郎班望颇重中外要职多繇是选故其所选不得不慎必循名实而後命之羣与士阶久典名郡谨身化下有循吏之风会课陟明宜当是选国之大事在祀与戎一掌祠曹一司武库各领其要尔宜敬之羣可库部郎中士阶可祠部郎中

元稹可太子左谕德依前入蕃使制

勅通事舍人元稹东宫之有谕德犹上台之有骑省也清班优秩所选非轻朕前遣使臣往修戎好以稹言信行敬命为介焉扬旌出疆反驾奔命有所啓奏多叶便宜乃知得人可以卒事故加是命以宠劝之可太子左谕德依前入蕃使

卢昂量移虢州司户长孙铉量移遂州司户同制

勅万州司户参军卢昂等顷负疵瑕各从谴谪或远窜荒裔或未复班资既逢荡涤之恩俾及转迁之命况闻修省以克已固将校试而用能吾无弃人汝宜自効可依前件

李石杨穀张殷衡等并授官充泾原判官同制

勅李石等用武之地曰泾与原合为一镇控扼夷虏朕授布钺责其成功布乃祇惕受命思有以自辅者因上言石穀殷衡等学业才画堪置幄中分务列官咸可其请而布忧边甚切选士必精尔宜各竭所能为知己用可依前件

李演除左卫上将军制

勅王者法勾陈设环列非勲勤之将信近之臣则何以久张爪牙转置肘腋者也某官李演尝从德宗皇帝南蒐于梁籍名功臣谓之定难泊出分戎律入拱宸居内外周旋不懈於位交戟之下周庠肃然今之转迁示益亲信移领左广仍参夏卿夫八屯之警巡七萃之勤惰尔为其正尽得察之宜惜前劳无隳乃力可依前件康昇让可试太子司议郎知钦州事兼充本州镇遏使陈倓【徒监切】可试太子舍人知峦州事兼充本州镇遏使李顥可试太子通事舍人知宾州事兼宾澄峦横贵等五州都游奕使冯绪可试太子通事舍人知田州事充左江都知兵马使滕殷晋可试右卫率府长史知灋州事兼充左江都知兵马使五人同制

勅容州本贯经畧招讨左押衙兼右厢兵马使康昇让等有奉职徇公之勤有理戎殄寇之効其帅公素上章以闻吾方念劳尔宜受赏况容之诸郡有大小郡之兼职有重轻量能第功分命而往噫方藩虽远朝听甚卑有善必闻无功不録吾言及此欲尔知之可依前件西川大将贺若岑等一十二人授御史中丞殿中监察及诸州司马同制

勅丞相镇蜀志在忧边俾静蕃蛮实资将校故加宠任以责成功某官某等若干人类例勲劳进登班秩宪官名重郡佐禄优参以命之足为荣獎尔宜恭承主帅慎守封疆戮力一心无落戎事可依前件

前右羽林将军李彦佐服阕重除本官兼御史中丞知军事制

勅军有羽林用法星象统之爪士以拱宸居某官某前以忠劳选登戎卫而能训勇力之士以备时使申谁何之令以奉徼巡夙夜祇严不懈於位既终丧纪宜复官常假中执宪之名行上将军之事勉修旧职用副新恩可依前件

奉天县令崔鄯可仓部员外郎判度支案制

勅奉天县令崔鄯大凡南宫郎无非慎选者也况地官之属有堆案盈几之文有月计岁会之课故员外郎不可逾时缺不待满岁迁事剧才难断可知矣而鄯自操白简宰赤县绳举违谬惠养鰥寡皆有善声着於官次岂能於彼而不能於此乎尔宜率廩人佐计务决繁析滯期有可观可依前件

翰林待诏李景亮授左司御率府长史依前待诏制

勅某官李景亮夫执艺事上者必揆日時計劳绩而後进爵秩以旌服勤况待诏宫闈饬躬晨夜比於他职宜有加恩官坊卫官以示优獎可依前件

故盐州防狄兵马使康太崇赠邓州刺史制

勅故某官康太崇尝习韬铃夙称拳勇使之训旅能叶武经使之守疆能着戎绩永言殂谢宜及褒荣俾追宠於朱轡庶知恩於黄壤可赠邓州刺史

刘总外祖故瀛州刺史卢龙军兵马使张懿赠工部尚书制

勅故某官张懿德善者将啓後人忠孝者克扬前烈有美必复宜其然乎而懿仗忠履义体仁养勇学究韬畧艺穷骑射负幽燕之劲气虽振其名有将相之长才不得其位命屈当代庆流後昆有外孝孙为吾贤帅以忠许国以顺克家扬名显亲自义率祖推恩外族归美前修俾追八座之荣以辍九原之叹可依前件

刘总外祖母李氏赠赵国夫人制

勅李氏族茂本枝行光内则柔明缮性和淑保身辅佐良人克谐家道训成贤女作相令门善积於中福延於後段公威德当流庆於外孙令伯孝心愿推恩於祖母式遵赠典用赞德芬宜从大国之封追正小君之命可赠赵国夫人

萧俛一子回授三从弟制

勅吏部尚书萧俛顷在台庭时逢郊礼大行庆泽先及辅臣当延赏於胤嗣愿推恩於友爱厥有典例因而从之咨尔弟仲可恭成命可河中府参军

贾麟【离吟切】入回鹘副使授兼御史中丞赐紫金鱼袋制

勅少府少监贾麟行人之官官必有介所以敬王事而重国命也以尔麟稟训台鼎饬躬搢绅自登班行多历年祀恪勤官次保守令名斯可以卒贰使臣谕申朝旨宜假宪秩仍加命服以示兼宠俾之出疆况继好二邦奉辞万里副车之任选亦不轻兹吾使能期尔复命可依前件

张杞授庐州刺史兼御史中丞制

勅卢龙军节度判官检校刑部郎中张杞司徒总言尔从事於幽蓟之间有年岁矣尝委事任备观器用务丛而益办职久而弥勤颇出辈流宜加獎擢况公侯之嗣幕府之英余庆所鍾有才如是今以名郡宠而任之旌善劝能仍兼中宪可庐州刺史

韩公武授左骁卫上将军制

勅朝散大夫检校左散骑常侍兼右金吾卫将军御史大夫上柱国赐紫金鱼袋韩公武我元老之令子也孝於家忠於国故出则秉旄钺入为执金吾宠任益崇谦敬弥着而勤於夙夜疾病所侵上陈表章乞就颐养夫环卫之列心膺之臣虽亲信之寄则同而劳逸之间或异宜辍繁重俾从便安可检校左散骑常侍兼左骁卫上将军御史大夫散官勲如故

姚元康等授官充推官掌书记制

勅朝散郎行秘书省秘书郎姚元康儒林郎试太常寺协律郎郑懿等益部浮阳皆大征镇也文昌全畧皆贤将相也而能以礼聘士以职任才多闻得人咸乐为用况尔等筹谋文藻各负所长苟能赞察兼掌奏记孜孜不怠翩翩有声慰荐褒升其则不远元康可试左武卫仓曹参军充劔南西川观察推官散官如故懿可试左金吾卫兵曹参军充横海军节度掌书记散官如故

杨玄谅等三十人加官制

勅右神策军忻州行营兵马使试太常卿杨玄谅等夫才不録则劝善之道废勤不赏则念功之典缺而玄谅辈凡三十人咸列禁戎远从征讨临难有身先之勇奔命无道弊之劳宜以禄秩酬其忠効所谓材不失选赏不逾时亦欲使为善者不疑有功者速劝也可依前件

李益王起杜元颖等赐爵制

勅李益等去年春朕以陵寢事大哀惶疚心而益等斋栗奔走各率其职俾予孝道刑于四海何尝一日而忘之即命有司举常典凡爵之高下视执事之重轻有司亦能遵我成命第而次之进给益封无有不当由益而下尔宜钦承可依前件

王计除莱州刺史吴晞【于鬼切】除蓬州刺史制

勅王计等咸以材畧载笔从军艺学智谋霈然足用多历年祀备尝艰危进退周旋不闻失道司徒弘正详奏以闻因以竹符分命试吏而莱蓬二郡各介一方牧人者但不扰其心不夺其力则虽华夷南北土物不同皆可以自足自遂矣宜用此道往安养之可依前件又武军奏事官虞候卫绍则可检校秘书监职如故制

勅某官卫绍则服勤藩镇敷奏阙廷奉主帅之表章达军府之情状嘉其忠効宜可褒升俾洽新恩用充旧职可依前件

深州奏事官卫推试原王友韩季重可兼监察御史充职制

勅某官韩季重上将临戎陪臣将命详其奏报颇尽事情特加宠章用獎劳効王官宪职以示兼荣可依前件

袁干可封州刺史兼侍御史制

勅安南兵马使封州刺史兼监察御史袁干委质藩方稳知戎旅尝驱寇盗累着功劳故命迁
领郡符超升宪简足以安荒俗耀远人敬而承之无替前効可封州刺史

华州及陕府将士吉少华二千三百三十五人各赐勲五转制

勅某官吉少华等距河重镇分陕近藩俾遏寇虞实资士旅劳既同力赏宜徧行次第其名书
於勲籍可各赐勲五转

祭回鹘可汗文

维长庆元年岁次辛丑月日皇帝遣使朝议大夫检校右散骑常侍兼少府监御史大夫云骑
尉赐紫金鱼袋裴通致祭於故爱登罗汨没密施毗伽保义可汗之灵粤以英武之姿雄奇之
策抚有九姓制临一方气吞诸戎名播上国况能向风纳款继好息人代为亲隣岁入职贡方
赖威略共清寰瀛倚为长城永固中夏而天殲骄子国丧名王夺气色於陰山賁精光於昴宿
凶讟云至悲怀用深故遣使臣往将国命展吊奠之礼申哀荣之恩犹有明灵当鉴诚意尚飨

白氏长庆集卷五十一

卷五十二

钦定四库全书

白氏长庆集卷五十二

唐白居易撰

中书制诰五【新体凡五十道】

京兆尹卢士玫除检校左散骑常侍兼中丞瀛汉二州观察等使制

勅夫疆理天下壤制四方乘时省置何常之有故方隅未寧务先经畧则专委方伯以总统之及兵革甫定思弘风化则并命连帅以分理之朕常以幽蓟一方环封千里延袤广莫专制实难属元戎改辕新帅进律因而置制以叶便宜盖王者施张变通之要也京兆尹卢士玫为人端和为政宽简自尹京辇人甚便安今司徒总籍甚尔名叶从人望河间列郡乞委士玫因而可之必易为理况新造之府经始之政劳来安辑是尔所能俾珥左貂兼执中宪宠任不细勉哉是行可依前件武寧军军将郭晕等五十八人加大夫宾客詹事太常卿殿中监制

勅某官某顷以齐寇发狂王师致讨武寧裨将五十八人虽有元戎指踪制胜实由衆校同心许国合力成功宜以宪秩储寮寺卿府监举申赏典用益勲庸可依前件

赠仆射苏兆男三人妻兄一人并被蔡州诛戮各赠太子赞善大夫等制

勅故某官男等淮寇之起尔陷其中能守父训不失臣节竟遇蠹蚤并为鲸鲵葵将死而心倾剑虽埋而气在毒延御侮祸及维私将贲幽魂宜追宠命俾赠青宫之秩用伸赤族之冤可依前件

王士则除右羽林大将军制

勅羽林所设上法星文军卫之中号为雄重称兹选任不易其人左骁卫将军王士则勲戚之家义方之子发身学剑余力知书早践班荣累参环列职近而身弥检慎任久而心益恭勤卑以自居劳而不伐况一备禁卫四为偏将滞於久次宜有超升俾领上军仍迁右广统良家之骑士训期门之材官宠任不轻无堕於事可右羽林军大将军

前谷熟县令李季立授奉天丞兼监察御史充回鹘使判官制

勅某官李季立蕃国通聘使臣告行上请属寮同役王命以尔常为令长颇有干能加之恪恭可备选择假威宪职兼命邑丞足示优荣勉勤任使可依前件

李怀金等各授官制

勅博野镇都虞候殿中监李怀金等戮力戎行叶谋王事既展扞城之効弥章奉国之心不加宠荣何劝忠勇敢授爵命勉思令图可依前件

王日简可朝散大夫德州刺史制

勅前代州刺史代北军使王日简吾闻任有才则事集獎有劳则功劝以日简尝为代守军睦人安旌効所能可居要地是用超登阶级迁领郡符励精壹意其听吾言夫主忧则臣劳时危则节见今寇戎暴起封域未寧是忠臣奋奇谋烈士展殊効之日也朝立功而夕受赏汝其念之哉可德州刺史

薛元赏可华原县令制

勅前大理丞薛元赏甸服之制也树以尹正承以令长上下有统而理化行焉以元赏前为廷尉丞察狱评刑颇闻敬慎寺卿奏课邑宰缺员故移钦恤之心使布惠和之化上承尔长下字吾人无或越思而乖统理可华原县令

王承林可安州刺史制

勅安陆古郢国也介荆汉之间承军旅之後宜得谨良长吏以养理之也前相州刺史王承林比刺安阳勤修其职録劳獎善故申命焉况尔生勲伐之家早阶宠禄宜自修立以光大其门尔当思勤俭以检身务廉平以临下率吏用礼劝人归农勿侦【丑正切】勿佻一遵吾之约束可安州刺史

严绶可太子少傅制

勅东朝保傅历代尊崇汉择名儒任先疎广晋求耆德选在山涛实资六傅之贤用弘三善之道检校司徒兼太子少保严绶文雅成器恭谦致用出领重镇以帅诸侯入为具寮以长卿士历践中外备尝艰虞殆三十年勤亦至矣况理心以体道知命而安时是谓教诲之人可领调护之任由保迁傅尔其敬之可太子少傅

源寂可安王府长史

勅义成军节度判官检校兵部员外源寂早膺慰荐累展才能谋画有终恭勤无怠守臣推善列状升闻可使束带立朝廷曳裾游藩邸俾从宾佐入补王官

郑枋可河中府河西主簿制

勅郑滑观察推官试太子通事舍人郑枋名列士林职参军府修身无阙从事有劳既展効於
即戎宜试能而补吏俾之纠邑庶有可观可依前件

乔弁可巴州刺史制

勅权知巴州刺史乔弁前假竹符俾临巴郡一意为理三年有成州人借留廉使置奏既因会
课宜及陟明九仞之功无亏一篲无忤真授而怠初心可巴州刺史

薛戎赠左散骑常侍制

勅夫有名於时有功於国尽忠以事上遗爱而及下则必生享宠禄歿加褒崇所以旌善人而
劝来者故浙东观察使越州都督兼御史中丞薛戎挺英於冠族擢秀於士林凡践官荣皆着
政绩及授符节委之察廉自江而东政成人父老而将智病且知终方覲阙廷忽捐馆舍是用
废朝軫念加赙申恩俾增九原之光追备八貂之列可依前件

辛弁文可淄州长山县令制

勅赵州临城县令辛弁文既有英材又知臣节遁逃寇难奔走道途言念忠劳宜加恩獎俾换
铜墨移宰长山可依前件

知汴州院官侍御史卢蒙可检校仓部员外郎陕府院官卢台可兼侍御史郑滑院官李克恭
可试大理评事独孤操可卫佐并依前知院事同制

勅盐铁官漕运职小大远迩罗布於四方自丞相播兼领以来而撮大纲覆羣吏职以能进秩
由课迁法无僭差人有惩劝今台蒙克恭操等咸当自举分命以官勉副已知无忝成命可依
前件

王智兴可检校右散骑常侍兼御史大夫充武寧军节度副使领本道兵马赴行营制

勅沂州刺史御史大夫王智兴李愿李愬之镇武寧也汝为裨将励节忘身济成大功汝实有
力獎其诚効擢授郡符海沂之间又着声绩宜加新命以宠旧劳仍提銳师往副戎律夫将之
抚衆如子弟则衆之视将如父兄苟推赤心而无疑必蹈白刃而不悔勉亲士卒伫翦寇戎可
依前件

田羣可起复守左金吾卫将军员外置兼澶州刺史制

勅前左武卫将军田羣忠谨立身韬铃嗣业自参戎卫尤见恭勤而燕蓟之间澶为要郡公侯

之後羣有令名俾分符竹之榮仁濟弓裘之美宜奪情禮起而用之楊於陵母亡祖母崔氏等贈郡夫人制

勅大孝存乎始終殊恩被於幽顯追榮之命安可廢耶戶部尚書楊於陵亡祖母崔氏等風范有初光塵未昧發揮婦道標表母儀施及孝孫陟于高位夫蘊德者垂裕於後揚名者光昭其先俾彰積慶於中故許推恩而上各從寵贈用顯貽謀可依前件

邵同貶連州司馬制

勅朝議大夫守衛州刺史兼御史中丞邵同寵在專城職當守土不承制命擅赴闕廷違越詔條叛離官次將懲慢易宜舉憲章可連州司馬仍馳驛發遣

鄭公達可陝州司馬制

勅朝議郎守原王府長史上柱國賜緋魚袋鄭公達衆推士行時許吏才自列班榮尤彰恭恪夙夜匪懈春秋已高宜罷曳裾之勤往贊坐棠之理是爲優秩用答令名可守陝州大都督府右司馬散官勲賜如故

劉泰倫可起復謁者監制

勅朝議郎前行內侍省內謁者監上柱國賜紫金魚袋劉泰倫古者有中涓謁者皆侍奉親近之臣也今之寵秩亦由舊焉況泰倫有行藝可以飾身才干可以掌務監臨內署朝請中閨謹密端和甚宜厥職久於其事兼之實難宜加進秩之恩仍舉奪情之典勉承獎任勿替初終可起復朝議大夫行內侍省內謁者監

王師閔可檢校水部員外郎徐泗濠等州觀察判官制

勅前徐泗濠等州觀察支候朝議郎殿中侍御史內供奉上騎都尉賜緋魚袋王師閔朕以師律授智興智興以軍書辟師閔才既爲知己用官不俟滿歲遷所以使能而責理也然則贊廉察安戎旅既命之後吾有望於爾焉勉副所從仁展來効可檢校尚書水部員外郎兼殿中侍御史充徐泗濠等州觀察判官勲賜如故

薛從可右清道率府倉曹制

勅三品子薛從惟汝父平守吾藩鎮能以忠力殄寇安人疇庸既以啓封延賞亦宜及嗣勉承義訓無忝寵章可朝散郎行右清道率府倉曹參軍

義武軍行營兵馬使高從政等五人河東節度行營兵馬使傅義等二十四人并破賊可御史大夫中丞侍御史制

勅古者赏不逾时所以劝勲庸也爵有加等所以激忠勇也而某官高从政等以义武之师统晋阳之甲前蹈白刃中推赤心大摧贼徒连告戎捷超荣速赏尔实当之故视军功递迁宪秩破竹之势其思有终可依前件故奉天定难功臣试殿中监陈日荣等一十二人可赠商邓唐隋等州刺史制

勅春秋崇褒善之义国家厚追荣之宠其身歿而名不殒时去而恩未及者大司马得稽勲籍举而行之故某官某等凡十二人按状徵书宜加宠命饰终之典其可废乎可依前件

段斌宗惟明等除检校大理太仆卿制

勅义武军节度都押衙兼侍御史段斌衙前虞候检校太子宾客宗惟明等寇虞未平将校方用宜以爵赏劝其忠劳而斌奔命献俘惟明奉章告捷各勤乃事咸造於庭并加宠荣以示优獎斌可试太仆卿依前兼侍御史惟明可检校大理卿余各如故

户部尚书杨於陵祖故奉先县主簿杨冠俗可赠吏部郎中於陵奏请回赠制

勅故某官杨冠俗貽厥孙谋垂裕後世扬其祖美不忘先也以冠俗之栖迟下位道屈於时以於陵之光大其门庆鍾於後生不逮事歿有追荣宜加义率之心用举饰终之典可赠吏部郎中

故光禄卿致仕李恕赠右散骑常侍制

勅故某官某国老之子藩臣之兄尝列棘以承家竟悬车而捐馆生加爵宠没及褒荣兹惟旧章用慰幽窆

刘悟妻冯氏可封长乐郡夫人制

勅古者有策名命妇赐号夫人盖积善於闺门而受封於国邑也泽潞节度使刘悟妻冯氏传芳茂族作合良臣成此忠贞之功因於辅佐之力礼从夫贵庆叶家肥俾开大郡之封以正小君之命可封长乐郡夫人

夏州军将二人授侍御史制

勅某官某等早称武艺久隸军麾稟命元戎服勤王事或千里移镇从为纪纲或十乘啓行倚为肘腋繇历年月积成勤劳不加宠荣何劝忠効并命宪职宜敬承之并可兼侍御史余如故

日试诗百首田夷吾曹璠等授魏州兗州县尉制

勅乃者魏兗二帅以田夷吾曹璠善属文贡置阙下有司奏报明试以诗五言百篇终日而毕

藻思甚敏文理多通贤侯荐延宜有升獎因其所贡郡县各命以官而倚马爰来衣锦归去以文得禄亦足为荣可依前件卫佐崔蕃授楼烦监牧使判官校书郎李景让授东畿防御巡官制

勅某官崔蕃等咸因文行自致班序或佐卫兰錡或典校蓬山各从所之将展其用夫司牧垆野备御都畿所以班马政而遏寇虞也兹皆重务尔勉赞之可依前件李愬李愿薛平王潜马总孔戢崔能李翱李文悦咸赐爵一级并回授男同制

勅封爵之设在乎赏劝有以褒德有以序勤聳善兴功实由兹道而某官李愬等或望崇台鼎或委重旌旄爰及藩条共分忧寄有劳於事无怠於心宜疏爵以啓封许推恩而及嗣祇受厥命永孚于休可依前件

故工部尚书致仕杜羔赠右仆射制

勅故某官杜羔生於仁族发为公器敦厚孝友本乎天性文学政事出於余力自立朝右蔼然素风司谏平刑駁议廉问凡所践历不懈於位以年致政以疾就第出处进退皆叶时中遽此沦谢惻惻兴念夫生有荣禄歿有宠赠所以极君道厚时风亦圣人有始卒之义也宜追端揆以申褒饰犹有精爽知吾不忘可赠尚书右仆射

幽州兵马使刘悚除左骁卫将军制【以兄刘悟奏请】

勅某官刘悚夙负气槩早习骑射才推燕赵之士学究孙吴之书加以忠厚可当任用况有令弟为吾信臣节着艰贞情鍾友爱夫宠寄於外莫重於藩垣委任於中莫亲於禁卫加此一职宠示二人岂不为荣季出叔处可左骁卫将军

前幽州押衙瀛州刺史刘令璆除工部尚书致仕制

勅某官刘令璆【渠尤切】勲伐之家弓裘之嗣尝修戎职亦领郡符迨此迟暮知有止足夫壮而奋发以忠事国老而知退以道安身人所难能理宜嘉尚俾超崇秩以宠高年可工部尚书致仕

卢衆等除御史评事制

勅幽州节度判官卢衆等幽蓟重镇卢龙旧军是吾北门委在上将实资寮佐以济谋猷尔等或参务戎旃或专司奏记俱因事任各展才能而御史府官廷尉寺吏用申褒獎以劝忠勤勉奉元戎伋成嘉绩

张伟等一百九十人除常侍中丞宾客詹事等制

勅卢龙军押衙兵马使什将随军某等夫爵赏行於上则忠劳劝於下有国之典其可废乎吾思蓟北首将及吏合衆聚力镇寧一方縣以岁年积成勤效今以朝右贵秩言坊清班举为宠章用申酬獎

梁璲【徐醉切】等六人除范阳管内州判司县尉制

勅卢龙军节度要籍梁璲等咸以干能早膺任使各参军要同济戎功言念恭勤宜加优獎郡掾邑佐分而命之仍兼旧职勉申来効可依前件

渤海王子加官制

勅渤海王子举国内属遣子来朝祇命奉章礼无违者夫人修职贡出锡爵秩兹惟旧典举而行之

石士俭授龙州刺史制

勅石士俭东川帅涯上言士俭久习武艺兼通吏事可使为郡责成其功吾闻江油巴夷杂处勿以遐陋而忘缉綏奉法爱人无负知己可龙州刺史

韩苕授尚辇奉御制

勅韩苕局分六尚职奉七辇兹惟优秩列在通班以尔立身颇恭守事甚谨宜有所獎可升於朝可尚辇奉御

孟存授成都府少尹制

勅孟存尝参剧务亦牧疲人咸有能名得於主帅三蜀征镇屯於成都虽有忠贤委为尹正至於赞修庶务通统诸曹承而貳之实资亚理勉勤厥职无累所知可成都府少尹

杜元颖等赐勲制

勅中书舍人杜元颖等有位於朝有劳於事不加庆赐何劝恪勤宜各策名列於勲籍可依前件

商州寿州将士等赐勲制

勅某官某等夫勲者所以馭贵叙劳亢身庇族非因大庆不降殊恩尔皆委质从军服勤事国宜按勲籍分而赐之可依前件

内侍杨志和等授朝散大夫制

勅杨志和等咸分要职列在内司慎静检身恭勤守事宜以章绶命为大夫佩服宠光尔无失坠可依前件

内常侍赵弘亮加勲制

勅内常侍赵弘亮等列名禁籍祇命宫闱多历岁时积成劳効宜加勲赏以洽恩荣可依前件

乌行初授卫佐制

勅乌行初重胤之子早稟义方诗礼弓裘式闻不坠赏延之典本劝忠勲环卫之官兼资慎择非唯父任亦以才升可佐卫曹参军

乌重胤妻张氏封邓国夫人制

勅古者夫为大夫则妻为命妇况在小君之位未加大国之封岂唯有废徽章抑亦无劝忠力也乌重胤妻张氏以鸣鳩之德作合邦君辅成勲猷驯致爵位虽从夫贵未授国封今以南阳本邦善地锡为汤沐加号夫人兹乃殊荣足光闺闼可封邓国夫人

白氏长庆集卷五十二

卷五十三

<集部,别集类,汉至五代,白氏长庆集>

钦定四库全书

白氏长庆集卷五十三

唐白居易撰

中书制诰六【新体凡四十八道】

镇州军将王怡判官李序先被贼中诛囚并死各赠官及优恤子孙制

敕朕常思镇冀之间吊伐之际有仗顺死义不吾闻者因命弘正列状以闻而某官王怡等顷陷艰虞思伸忠効或名节将立并命于幽忧或义烈临奋失身于戮辱履危如虎尾视死如鸿毛若无褒扬何劝天下既降饰终之命仍加身後之礼追崇延宠有越常伦冀使死节之魂忠愤之骨知我怜悯歿无恨焉怡可赠左仆射序可赠给事中

武寧军阵亡大将军李自明赠濠州刺史制

敕王师之讨蔡平郢也自明为武寧裨将隶于元戎凡所指踪必先致命三军之士于今称之有劳未图无禄早代生不及赏歿而加恩庶使猛将义夫闻而相劝曰死而不忘况生者乎可赠濠州刺史

裴弘泰可太府少卿知左藏库出纳制

敕前度支河北榷盐使朝议郎捡校尚书刑部郎中使持节贝州诸军事兼权知贝州刺史侍御史充本州防御使上柱国赐紫金鱼袋裴弘泰九土之贡百品之货辨其名物谨其出纳常在外府统以上卿宜求干敏之才以为之贰而弘泰顷分榷务兼抚郡民当军兴之时法行政立则受藏之府事繁物殷量其器能可以专委勉膺是任无替前劳可守太府少卿知左藏库出纳散官勲赐如故

李昌元可兼御史大夫制

敕通议大夫使持节仪州诸军事仪州刺史兼御史中丞上柱国李昌元弓裘令子疆場劳臣能读父书甚识戎事每在战阵未尝无功及委藩条亦闻有政而知臣者君也赏劳者爵也亚

相之秩威重宠崇加乎尔身以功能者可兼御史大夫

田颢可亳州刺史制

敕正议大夫前捡校右散骑常侍使持节洺州诸军事兼洺州刺史御史大夫充本州团练使上柱国赐紫金鱼袋田颢自别屯将垒专领郡城而能勤恤师人与之劳逸故临戎则士乐为用抚下而衆知向方忠勲既彰能政亦着牧守之选吾所重之譙鄴之间人亦劳止授尔印绶往来之宜推前心伫立後効可捡校右散骑常侍使持节亳州诸军事兼亳州刺史御史大夫本州团练使镇遏使散官勲赐如故

薛伯高等亡母追赠郡夫人制

敕某夫人某氏等始播妇仪终垂母道教其令子为我良臣而皆茂着才名荣居爵位永言圣善宜及显扬俾追啓邑之封式表统家之训可依前件

李佑授晋州刺史制

敕郡守之官与吾共理下之安否系乎其人必稽前功方降是命某官李佑夙负材器累经任用常领军郡颇着政声而平阳旧都近罢征镇上疆事物既广且殷藉尔良能为予抚字夫均其征役简其科繇谨身省事以临其人而人不安未之有也往弘是道以康晋人可依前件

武寧军将王昌涉等授官制

敕王昌涉等早以材力召募从军元和以来南征北伐咸有劳绩着于一时主帅上闻乞加褒赏故以寺卿宪职序而宠之无弃前功在申後効可依前件

马摠亡祖母韦氏赠夫人制

敕某官马摠亡祖母韦氏播兹懿范貽厥嘉谋施及孝孙实居贵仕将明余庆其在追荣不唯垂裕後昆抑亦光昭幽壤宜降封丘之命以慰令伯之心可赠某夫人

路贯等授桂州判官制

敕藩隅之重委以侯伯军府之要掌在宾寮贯等以文行修身以智谋从事佐廉问澄清之务抚华夷错杂之人俾其乂安实在参赞宜及宠命以光所从可依前件

驸马都尉郑何除右卫将军制

敕周设七萃汉列八屯皆以拱将王宫肃严徽道统兹骑吏其属亲贤某官郑何擢秀士林挺

质公器以贞和陶其性以礼乐文其身善积德门庆连戚里况久践名职累着声猷念旧獎能宜加荣宠环列之尹不易其人俾宣力于爪牙不失亲于肺腑可右卫将军余如故

封太和长公主制

敕公主之封号也或以善地或以嘉名立爱展亲兹惟旧典第四女端明成性和顺禀教静无违礼故组紉【详伦切】有常训动必中节故环佩有常声岁茂穠华日新淑问乃眷肃雍之德俾开汤沐之封可封某公主

宋朝荣加常侍制

敕河东节度都押衙试太子宾客兼御史中丞宋朝荣尝因战功擢领边郡揆能适用故有转迁龙楼上寮衙门右职虽有兼命未表殊恩宜加骑省之荣不改宪台之重以兹宠任足报忠勲尔其敬承无隳乃力可捡校左散骑常侍余如故

赠阵亡军将等刺史制

敕故某官某等王师问罪至于淄青尔等同执干戈亲当矢石忠而尽瘁勇而亡身或退卒于师或进歿于战俱死王事深恻朕心念捐躯于军前宜追念于泉下郡守之贵以示褒荣可依前件

诸道军将等授官制

敕平齐之役也诸军指期衆校合战某官等各输戮勇同树勲勤永思积日之劳颇愧踰时之赏故於獎授有所超迁朝右贵班宫坊清秩或参宪职分以命之庶知我心不忘忠力可依前件

裴度韩弘等各赐一子官并授侄女婿等制

敕某官某等谒庙郊天改元肆眚是为大庆与衆共之矧股肱心膂之臣与吾同体延赏任子其可废乎尔等或以文华或以吏职有所修立稟于义方自当褒升况沾庆泽俾举展亲之典用叶推恩之道犹子爱婿各命以官尔其敬承无忝朝獎可依前件

入回纥使下军将官吏夏侯仕戡等四十人授卿监宾客谏议卫佐同制

敕某官夏侯仕戡等前命郑權之入回纥也尔等参护使车用祇王命悉心尽力有恪恭跋涉之勤焉宜以省寺军卫之班宫坊府邸之列举为宾典分以宠之辨等旌劳于是乎在可依前件

卢昂可监察御史里行知转运永丰院制【时王播奏请】

敕虢州司户参军卢昂前负瑕疵事多暧昧今闻修省善亦昭彰况有大僚同知情状且明非罪仍举有才吾信人言遂可其奏尔思自効无辱所知可依前件

张惟素亡祖紘赠户部郎中制

敕右散骑常侍张惟素亡祖某县令某德合上玄才终下位命屈于当代庆流于後昆故其孝孙实登贵仕经曰无念尔祖诗曰貽厥孙谋此言孙之谋能显扬其先祖之德能垂裕于後也不追荣于列宿曷旌德于太丘可赠户部郎中

兴州刺史郑公逵授王府长史李循授兴州刺史同制

敕郑公逵等或以行称或以才举进修所致班秩不卑改命序迁各适其用且乘朱轮于郡邸曳长裾于王门士子名宦至斯亦不为不遇也立朝案部各敬尔官可依前件

权知陵州刺史李正卿正除刺史制

敕审材之要考察为先吾之于人试可乃用李正卿颇闚吏道因假郡符畏法爱人善于其职夫速旌其能则吏劝久于其政则化成未可转迁就加真秩副吾知獎无怠始终可陵州刺史

知渭桥院官苏洵授员外郎依前职前进士王绩授校书郎江西巡官制

敕某官苏洵【良以切】尝以干良分领剧务受任称职主者上闻绩既有成赏安可阙前进士王绩亦以艺学籍名太常着其令闻及此慰荐一以课进一以才升咸加班荣同以褒獎台官校职尔各钦承可依前件

湖南都押衙监察御史王瓘可柳州司马依旧职制

敕某官王瓘【取猥切】郡司马之官秩禄颇厚凡在戎行有军课者多兼命以优宠焉而瓘以鞭弭橐【姑劳切】鞬【经天切】从事征镇前後主帅咸称有功宜加新命仍率旧职盖欲旌往劳而责来効也尔其勉之可兼柳州司马安南告捷军将黄士僉授银青光禄大夫试殿中监制

敕某官黄士僉【仓含切】戎首来降陪臣告捷服勤靡盬将命无违宜以恩荣獎其劳効贵阶崇秩兼而宠之可依前件

王鎰可刑部员外郎制

敕刑曹郎阙朕诏执事择可以善于其职者而殿中侍御史王鎰自居殿中能察非法连鞠庶狱多协平允加以温敏静专可当是选一岁之狱决在秋冬今方其时宜敬乃职

京兆府司录参军孙简可检校礼部员外郎荆南节度判官浙东判官试大理评事韩伋【七四切】可殿中侍御史巡官试正字晁朴可试协律郎充推官同制

敕某官孙简等凡使府之制量职之轻重以命官揆时之远近以进秩俾等杀有常序迁次有常程劳均而名分定矣简自登宪司佐相幕府暨纠天府皆有可称而伋等亦以文学发身谋画効用荆扬浙右实籍宾僚况今之公卿大夫皆由此涂出慎尔职事尔无自轻可依前件

冀州奏事官田练可冀州司马兼殿中侍御史制

敕某官田练干敏立身公勤济事奉州将之手疏达军人之血诚念其忠劳宜有宠擢假宪名于殿内迁郡秩於治中兹谓兼荣尔其敬受可依前件

薛常翺可邢州刺史本州团练使制

敕新授深州刺史薛常翺【呼对切】平蔡之役常领偏师实立勲劳遂膺宠任今属方隅多故将守用能且以翺之长材居邢之要地故命鱼符换郡熊轼移辕夫事至而功成时来而节见此忠良之事业也尔其念之哉可依前件

牛元翼可检校左散骑常侍深州刺史御史大夫制

敕某官兼御史中丞权知深州事牛元翼命官之要凡试吏者必俟成効然後即真而元翼有理戎之才扞城之畧权领军郡能修武经士乐人安厥有成绩是用假威台宪真拜郡符仍以金貂示其兼宠吾闻忠臣立节烈士垂名其要无他得时而已勉竭才力副予斯言可依前件

王衆仲可衡州刺史制

敕前?州刺史王衆仲聚学修身由文饰吏累经任使颇着良能前牧南康亦闻有政宜新印绶载领藩条而衡湘之间蛮越杂处无以俗陋不慎乃事无以地远而怠厥心副吾陟明俟汝奏课可依前件

田盛可金吾将军勾当左卫事制

敕右金吾卫将军田盛夫仕官至执金吾古今所荣重也而盛生勲德门有文武略居贵介而无佚领谁何而有劳言念徼巡之功宜及转迁之命处左摄事以表使能可依前件

陈楚男王府谏议参军君赏可定州长史兼御史军中驱使制

敕某官陈君赏夙承义训幼有令闻专继弓裘之名通知军旅之事因仍宪职兼佐郡符敬服宠章勉从任使

崔承宠可集州刺史制

敕太子左谕德崔承宠早登班级亟换星霜自陈力於贵朝屡奉辞於外国职因事博绩以劳成就列宫坊既申赞谕之美分符郡底伫闻刺举之能宜励公心祇承宠命

前贝州刺史崔鸿可重授贝州刺史制

敕前贝州刺史崔鸿尝牧贝丘能修其职及辞印绶颇有去思相时之宜从人之望俾换新命再临旧邦况闻贮蓄时材谙详物务而方州思理侯伯荐能勉勤为政之心勿忝知人之举

前吉州刺史李繁可依前吉州刺史制

敕前吉州刺史李繁累奉藩条皆奏课第故移缙云之政俾牧庐陵之人虽降玺书未临郡邸属鱼章改造熊轼追还事既谋新职宜仍旧勉率分忧之任庶成来暮之謠

瀛汉州都虞候万重皓可坊州司马制

敕某官万重皓尝资武力早备戎行颇历艰虞亦闻勤効而洛隅未靖迁转从宜言念前劳宜加优秩可坊州司马

崔墉可河南府法曹参军制

敕郛曹观察判官监察御史里行崔墉文行饰躬公清奉职士林推美藩府荐能军旅之间久资其用忠勤之後不殒其名宜拔才于功臣俾试吏于府掾可依前件前河阳节度使魏义通授右龙武军统军前泗州刺史李进贤授右骁卫将军并检校常侍兼御史大夫制

敕文武之才内外迭用军国之任出入递迁斯所以优勲贤而均劳逸也某官魏义通以戎功积久荣委旌旄某官李进贤以军课居多宠分符竹各勤其职咸用所长是以河阳三城镇静而不扰泗滨一郡缉理而有劳我有禁军尔宜分领亲信则倚为心膂动用则张为爪牙苟非其人不付此任咸假貂蝉之贵仍兼宪职之荣勉哉二臣无替一志可依前件

李玄成等授官制

敕黔州观察使兼度支使李玄成等或蕴蓄能才咨谋是藉或分领剧务课绩有成并可奏书各迁宪职勉勤乃事无忝所知可依前件

马摠準制追赠亡父请回赠亡祖制

敕夫积善者庆鍾于後显扬者光昭于先而摠贵为邦君贤为国土荷貽谋之训用率义之文上献表章有所陈乞朕念其祖德褒以台郎所以复陈实必兴之言慰范乔泣涕之思庶使幽显两无恨焉可赠某官

权知朔州刺史乐璘正授兼御史中丞制

敕乐璘专习武经旁通吏道试补郡守以观其能连帅上闻果副所举夫审官之要在因其所长而任之则政速成而化易就也才既试可官宜即真何以宠之就加宪职可朔州刺史兼御史中丞

神策军推官田畴加官制

敕田畴官列环卫职参禁军慎捡有闻恭勤无怠顾是劳効例当转迁郡佐官寮以示兼宠

裴敞授昭义军判官裴侔授义成军判官各转官制

敕裴敞等昭义义成今之重镇实藉宾介以参谋猷而二帅皆勤于奉公精于辟土度才而授职循序而请官颇合所宜咸可其奏可依前件

云州刺史高荣朝除太子宾客河东都押衙制

敕高荣朝常领锐师入攻坚寇因累獎赏位至专城才有所长宜迁戎职功不可忘兼进荣班勉事元戎无替劳効

韦绶等赐爵制

敕韦绶等去年春夏同奉寝园事集礼成副吾哀敬宜加封爵以报恪勤可依前件

乌重明等赠官制

敕故某官乌重明等夫生树功勤歿加褒饰有国之常典也重明等在兴元初常执勤于奉天策勲为定难无禄即代有劳未图星岁屡迁光尘不昧闻鞞【蒲麋切】之念予心曷忘俾慰幽泉各追显秩可依前件

羽林龙武等军将士各加改转制

敕夫军卫警则内外严爵赏明则忠勤劝尔等咸以材力列于禁营属去年以来屡陈仪仗虽

加赐与未荅勤劳因诏有司举行赏典吾匪虚授尔宜敬承文武班资各从序进可依前件

新罗贺正使金良忠授官归国制

敕新罗使仓部郎中金良忠等朕以文明御时以仁信柔远声教所及骏奔而来况溟涨一隅舟航万里尔慕我化我图尔劳随其等伦命以宠秩无替前効永为外臣可依前件

白氏长庆集卷五十三

卷五十四

钦定四库全书

白氏长庆集卷五十四

唐白居易撰

翰林制诰一【拟制附凡三十四道】

除裴垍中书侍郎同平章事制

门下朕闻后德惟哲臣德惟良在太宗时实有房杜赞贞观之业在玄宗时实有姚宋辅开元之化咸克佑我烈祖格于皇天朕祇奉丕图懋继前烈思欲贞百度和万邦建中于人垂拱而理永惟房宋之化寤寐求思至诚感通上帝眷佑果赖良弼辅予一人正议大夫行尚书户部侍郎上柱国赐紫金鱼袋裴垍器得天爵文为国华行有根源词无枝叶忠敬恭顺贯之以诚心方洁贞廉辅之以通识玉立不倚金扣有声洎内掌纶言密参枢务严重有大臣之体温雅秉君子之文每献纳之时动有直气当顾问之际言无隐情远图是经大事能断匡予不逮时乃之功及领地官且司邦赋会计务剔出纳事殷投利刃而皆虚委桻丝而必理历试已久全才益彰宜登中枢以副企望夫宰辅者下执邦柄上代天工为国蓍龟注人耳目尔尚降乃德以亲百姓广乃志以序九流匡朕心以清化源从人欲以致和气予欲宣力汝为股肱予欲询谋汝为心膂予违望于汝弼勿谓不从汝言逆于朕心必求诸道独立勿惧直躬而行明听斯言敬践乃位呜呼罔俾房宋专美于前可中书侍郎同中书门下平章事散官勲赐如故主者施行除段佑捡校兵部尚书右神策军大将军制

门下为君之心惟功劳是念有国之典以赏劝为先其有辑睦师徒保绥黎庶尽勤王之节建护塞之勲则宜进以官常委之军要兼文武之秩参内外之荣斯所以彰念功而明懋赏也四镇北庭行军兼泾原等州节度支度营田观察处置等使光禄大夫捡校工部尚书使持节泾州诸军事泾州刺史兼御史大夫上柱国鴈门郡开国公段佑早膺事任累着公忠名因义闻位以勤致自分戎阃实控塞门明举武经大修边务士卒有勇保障无虞虏不近边农皆狎野展执珪之勤礼沥恋阙之深诚方图尔劳且遂其志夫六官庀【普弭切】职大司马列于前二翼分师上将军处其右长夏官以率属领环卫而拱宸苟非信臣安可兼委嘉乃实效副予虚求将慎重其腹心宜进登于喉舌敬服休命勉扬令图可捡校兵部尚书右神策军大将军知军事散官勲封如故主者施行

除赵昌捡校吏部尚书兼太子宾客制

門下王者以尚齒尊賢為禮以念功任舊為心況文武之才各有兼備則中外之職所宜迭居所以寵舊勲而優耆德者也前荆南節度管內支度營田觀察處置等使金紫光祿大夫檢校兵部尚書兼江陵尹上柱國天水郡開國公趙昌聚學飾身修誠致用久膺事任累著勲猷統護交州威惠之聲克振鎮臨南海撫循之政有經自移部荆門馳心魏闕增修職貢益勵忠勤爰舉寵章用旌茂績夫望優四皓然後能調護春閨才冠六卿然後能紀綱會府惟爾年德足尚可以周旋其間宜增喉舌之榮以崇羽翼之任服我休命其惟懋哉可檢校吏部尚書兼太子賓客散官勲封如故主者施行

除鄭綱太子賓客制

門下王者重輔弼之任明進退之宜見可即升知否則舍茲朕所以推誠不惑與物無私者也銀青光祿大夫守門下侍郎同中書門下平章事兼弘文館大學士上柱國陽武縣開國侯鄭綱早以令聞入參禁署永惟勤績出授台司期爾有終匡予不逮歲月滋久謀猷寢微罔清淨以慎身每因循而保位既乖素履且郁皇猷宜副羣情罷茲樞務朕以其久居內職累事先朝思厚大臣貴全終始俾就優閑之秩用申寬大之恩可太子賓客散官勲封如故主者施行

加程執恭檢校尚書右仆射制

門下職參揆務權揔戎麾必惟其人乃授斯柄自非望崇垣翰功著旗常則何以副儀形之求稱節制之任我有休命爾其敬承銀青光祿大夫檢校兵部尚書使持節滄州諸軍事兼滄州刺史御史大夫橫海軍節度支度營田滄景等州管內觀察處置等使上柱國邢國公食邑三千戶程執恭義勇立身忠懇成性聚為事業發為勲猷歷事先朝久專外閫殿邦而山岳比鎮奉國而金石為心動修武經居有循化泊執珪入覲班瑞言旋忠懇內激于心誠恭順外形于詞氣爰舉疇庸之典稍增命秩之榮方圖前勞且有後命朕思安封域望在勲賢任既切于腹心位猶輕於喉舌以守土勤王之効雖進官封念來朝述職之忠未加寵數特升右揆俾在中樞勉終永圖無替成績可檢校右仆射余并如故除王泌【薄密切】檢校戶部尚書充靈鹽節度使制【四年六月十三日進】

門下靜邊之要選將為先夫有統馭之才然後授以節制之任有撫備之略然後鎮以夷夏之冲期乎攘遏寇虞慎固封域今予命爾時謂得人開府儀同三司檢校刑部尚書兼右衛上將軍寧塞郡王食實封二百五十戶王泌忠厚立誠果斷効用慎始終而行有根本踐夷險而道無磷緇早練武經果從軍職頃逢多垒實佐元戎節著臨危功參定難位由勞致名以忠聞自列六卿且司七萃星霜屢變金石弥堅宜申命于北轅俾遏戎于南牧進地官以崇新命極勲秩以褒旧功中簡朕心外諧金議况五原重鎮諸夏長城修戎政莫先于威聲牧邊民莫尚于惠實師雜昆夷之悍訓必在和地為獯虜之隣撫宜以信勉率是道往分朕忧歲時之間期於報政委望斯在爾其聽之可檢校戶部尚書兼靈州大都督府長史御史大夫充朔方靈鹽定遠城節度使知節度事管內支度營田觀察處置押蕃落等使仍賜上柱國散官實封并如故主者施行

除阎巨源充邠寧节度使制【四年十月十一日进】

门下华夷要地实为蕃汉鉄钺重柄必授忠贤况乎犄角诸军金汤中夏有坐甲护边之旅任切于拊循有引弓犯塞之虞寄深于备御内作心腹外张爪牙苟非信臣不在兹选奉天定难功臣开府仪同三司检校尚书右仆射兼羽林军统军御史大夫上柱国定襄郡王食邑一千三百户阎巨源备知虏态明练兵符永惟颇牧之能宜授邠【须伦切】邠之寄长南宮而迁左揆壮西郊而委中权既图前劳且伫来効於戏千练之师可以观政万夫之长可以树勲勉弘令猷副我休命可检校尚书左仆射使持节邠州诸军事兼邠州刺史御史大夫充邠寧庆等州节度管内支度营田观察处置等使功臣散官勲封并如故主者施行

授吴少阳淮西节度留後制【三月十九日】

门下议事以制择善而行是适变通庶臻康济此王者所以弘德而息人也况阃外重寄淮右成师建有德以统藩方擢有才以领留府仰惟令典今举行之彰义军马军先锋兵马使正议大夫检校右散骑常侍使持节申州诸军事申州刺史兼御史大夫会稽郡王吴少阳忠劳许国贵介成家蓄武畧于韬铃宣吏能于符竹属元戎既歿谋帅其难朕将选衆以升试可而用推掌戎务已逾岁时而能和辑师人勤修土贡布寬简有恒之政动悦人情守恭顺不踰之心静俟君命有嘉大节可假中权宜进列于貂蝉俾增威于貔武仍加勲秩式茂宠章呜呼重观其能我故委之留事载伫其効尔宜勉于後图敬思是言往率乃职可银青光禄大夫检校左散骑常侍依前兼御史大夫使持节蔡州诸军事权知蔡州刺史充彰义军节度管内支度营田申光蔡等州观察处置等使留後仍赐上柱国封如故主者施行

除程执恭检校右仆射制【七月十二日夜进】

门下臣之节极乎忠功君之柄先乎爵赏欲忠者之克懋也故爵有加等欲功者之速劝也故赏不逾时古先哲王实用兹道今我命尔因其旧章横海军节度支度营田沧景等州观察处置等使起复冠军大将军左金吾卫大将军员外置同正员检校兵部尚书使持节沧州诸军事兼沧州刺史御史大夫上柱国邢国公程执恭业传将畧名在勲籍蘊天爵以修已忠孝两全竭臣节而事君夷险一致纪纲我列郡节制我成师动扬休声静着茂实自合符徵旅奔命出强暴露历于三时供亿出于二郡整衆而身作师律伐谋而心为战锋服金革而无辞当矢石而有勇雨晦识鸡鸣之信风高见隼击之威远略既申茂勲方集朕以恒阳之衆蠢尔无知毆彼生人致之死地每一念至惻然久之与其伤和而济功曷若含垢而修德既罢师旅爰图勤劳効且居多赏宜从重俾自夏官之长特升右揆之崇獎忠劝功於是乎在承我休命尔其钦哉可检校尚书右仆射余并如故主者施行

除郎官分散诸州制

汉宣帝云与我共理者其惟良二千石乎诚哉是言朕每三复安得循吏副吾此心今之台郎一时妙选尝经任历率有才用虽典曹庀【普弭切】事其务非轻而恤隐分忧所寄尤重是

用并命分牧吾人岁时之间期于报政户部郎中某可某州刺史兵部员外郎某可某州刺史
【云云】朕高悬爵赏伫期酬効咨尔夙夜其念之哉无俾龚黄专美前代

除张弘靖门下侍郎平章事制

夫佐佑天子燮理阴阳平章法度登进贤哲外抚夷狄内安元元使百官修其职一物不失其所此宰相之任也朕思得良弼驯致此道咨予命汝其殆庶乎某官张弘靖惟乃祖乃父代居相位咸有成绩书于旗常尔有忠正恭肃文以礼乐日济其美振扬家声一时之人谓之才子亟登清贯益着令闻洎出刺陝部移镇蒲坂政不苟细甚得人心寮吏将卒皆乐为用清简之化闻于京师由是郑风缁衣之好汉庭玄成之美朝望时议翕然与之人谋既同朕志亦定乃用登尔于佐辅授尔以大政尚克钦乃嘉命业乃代官竭其股肱服我前训呜呼三代为相邦家之光尔其念哉无替乃前人之徽烈

授范希朝京西都统制

阊阖风至太白星高谋帅护边国之大计某官范希朝忠贞勤俭以为质惠和智勇以为用一代名将三朝信臣朕以西边列镇三四若有摠统则易成功思得良帅有威名者并护诸将岁一巡边乘秋顺令扬其威武则南牧之马引弓之人知我有备不战而去谁可任者无如希朝以尔有朔方之劳有振武之効功在疆场【刑狄切】名闻羌戎惟实与声皆副是选今拜尔为大将尊尔为司徒节制进退一令谕禀倚望如右可不慎与可充京西都统

赠吉甫先父官并与一子官制

敕某官李吉甫出入将相迨今七载而能修庶职叙彝伦毗予一人以底于道夙夜不怠厥功茂焉夫忠于君者教本于亲宠其身者赏延于嗣于是乎有饰终之命有任子之恩所以感人心而劝臣节也惟兹旧典可举而行

除李绹平章事制

昔在尧舜聪明文思尚赖良臣实相以济况朕薄德不逮先王是用急疾于求贤置之於左右俾承弼纳海以匡不逮言虽逆耳必求诸道事苟利人咸可其奏兹足以宣股肱之力成天下之务历选多士爰得良辅乃降厥命其听之哉某官李绹斋庄严重内明外直进退举措有大臣体自参内职每备顾问忠谏之操终然不渝及贰地官专领财赋未逾周月亦有成绩历试多可人望攸归俾登中枢无易绹者於戏尔以文学入仕以正直奉上才膺大用职亦屡迁十年之间位至丞相可以报国在乎匪躬钦哉懋哉无忝朕命

授韩弘许国公实封制

梁宋之交水陆合会人杂难理军暴难戢因变肆乱往往有焉唯此一方朕常忧虑今有良帅

镇而抚之政立功成宜举赏典某官韩弘以长材大略作我藩臣本於忠力辅以政理自分阃寄在浚之郊严贞师律恭守朝宪训兵积粟明罚信赏军和食足礼节并行河南晏如于兹一纪是则有大勲于国有大惠於人会课议功无出其右夫有过人之効则有加等之命古之王者所以赏一人而天下劝者用此道也可不务乎是用建于上公授之眞食以示殊宠以旌殊绩钦我休命子孙其保之

除裴度中书舍人制

司勲郎中知制诰裴度以茂学懿文润色训诰体要典丽甚得其宜施之四方朕命惟允况中立不倚道直气平介然风规有光近侍台郎满岁班列当迁纶阁之职所宜眞授

除萧俛起居舍人制

左补阙翰林学士萧俛顷居谏列职同其忧夙夜孜孜拾遗左右朕嘉乃志选在内庭自参密近益见忠说始终不替尤足多之记事之官一时清选俾膺是命以弘劝奨

除崔羣中书舍人制

库部郎中知制诰翰林学士崔羣端厚和敏饰以文学温温忠敬得侍臣之风自列内朝兼司诰命事烦而益密职久而弥精六年于兹勤亦至矣况小大之事常所访问尽规极虑弘益居多所宜宠以正名式光禁职敬乃嘉命其惟有终

独孤郁守本官知制诰制

考功员外郎史馆修撰独孤郁为人沈实敏行寡言粲然文藻秀出于衆累升谏列再秉史笔洎掌功论率以直闻求之周行不可多得而掖垣近职纶阁重选俯询时议尔宜居之

授沈傅师左拾遗史馆修撰制

京兆府鄠县尉沈傅师庶职之重者其史氏欵历代以来甚难其选非雄文博学辅之以通识者则无以称命今兹命尔其有旨哉昔谈之书迁能修之彪之史固能终之惟尔先父尝撰建中实录文质详略颇得其中尔宜继前志率前修无忝尔父之官之职可左拾遗史馆修撰

除许孟容河南尹兼常侍制

昔吴公袁安为河南尹守皆能以廉平清肃驭吏教人孰能继之我有良吏某官许孟容才志甚大言论甚高在台阁间蔼然公望尝尹京邑观其器用临事能守当官敢言不吐刚以茹柔不附上以急下政无烦碎甚合衆心及是转迁颇有遗爱河洛千里都畿在焉凡所选任必归望实考言询事非尔而谁不忘旧政可立新绩仍以骑省申而宠之

除李程郎中制

隋州刺史李程顷以词学入参训命旋以才用出领诏条汉东大郡委之共理励精为政三年有成中外序迁朝之彝典尚书郎缺尔宜补之

裴克谅权知华陰县令制

华陰令卒非选补时调租勉农政不可 前镇国军判官试大理评事裴克谅久佐本府颇有勤绩属邑利病尔必周知宜假铜墨试其才理待有所立方议正名

赠高郢官制

故尚书右仆射高郢立身从事皆有本末在乱不污可以言忠守官不挠可以言直以道佐主可以言正以年致仕可以言礼有一於此人鲜克举况备四者不亦君子乎天不慙遗深用轸悼宜加褒赠以旌其风仍俾善人闻而知劝可赠某官

贬于尹躬洋州刺史制

中书舍人于尹躬其弟臯谲赃污狼藉虽无从坐之法合当失教之责然以典职诏命恭勤五年我即念劳尔宜思过俾居近郡兹谓得中

赠裴埴官制

故太子宾客裴埴忠正恭慎佐予为理事君尽礼徇国忘身积忧与劳构成疾恙以至沦逝念之惻然顷属多故未申礼典永惟褒饰寧忘于心今则命数之间宜从加等庶使忠於君者有以劝焉可赠某官

除军使邠寧节度使制

金方之气凝为将星王者法天选命豪杰授之以钺拜为将军以威西戎以护中夏而倚望若是安可非其人哉某官某出忠入孝仗信抱义行有余力学剑读书郁然将材用兼文武自领军卫为我爪牙夙夜警巡不懈于位材官知训环列增勲服勤五年兹为成绩可以移用使之守疆郇【须伦切】邠大藩控扼胡虏若得良将则无外虞知臣者君非尔不可仍加副相以重是行勉树勤劳式光宠擢

除韦贯之平章事制

周宣汉宣继体之主一得申甫一得魏丙咸克致理号为中兴朕嗣位以来永监前烈惟是贤俊寤寐求思历选周行乃获时彦宜以政柄举而授之某官韦贯之温重明正国之公器当官

必守临事能断简在朕志迨今累年乃者擢居谏司以观其直出领符竹以观其理烦之剧务以观其用访之大政以观其体历试必中衆望允属倚之为相金曰宜哉可中书侍郎同中书门下平章事夫臣事君以忠后从谏则圣靡不有始鲜克有终理化不成恒由於此今我与尔永终是图虽休勿休以臻其极呜呼二宣之业吾有望焉

除拾遗监察等制

渭南尉庾敬休等咸文行清茂士之秀者官从吏列擢在朝行各随才用分命以职司谏执宪伫有可称

除范传正宣歙观察使制

古之诸侯三载考绩选其贤者命为长率所以劝功行而兴理化也苏州刺史范传正文学政事二美具焉选自郎署出分符竹江南列郡连领者三所至之部悉心为理明谕朝旨恭守诏条谨身省事以临其下政简而速意诚而明吏不能欺人是以息而去思之叹来暮之谣往复有政闻於人听虽古循吏蔑以加之朕以陵阳奥壤土广人庶其地有险所寄非轻迹其前効可当此选况黜【於宜切】歙之遗爱尚在吴兴之新政方播升车便道足慰人心固当望风自安计日而理倚注于尔往宜钦哉

边镇节度使起复制

执亲之丧三年礼也圣人不得已而夺之金革之事无避权也忠臣不得已而从之某官某握我兵要守在塞门忠勇威惠合以为用师人悦附戎虏畏服迨彼诸部闻其姓名况岁广屯田日讨军实载陈远略方集大勲自罹家艰遽致公政茹荼衔恤已过旬时而军旅不可以无帅疆場不可以无主且虑人慢或生戎心盖臣节大於孝思王事急于情礼舍轻从重徇公灭私变而通之正在於此俾加戎秩用护边封往服旧职无违朕命

除任迪简捡校右仆射制

书曰德懋懋官功懋懋赏此先王所以匡饰天下也其有忠劳输于国惠泽及于人高位厚赏朕无所爱某官任迪简顷以本镇元戎来朝俾佐师律实掌留务属偏裨不轨诱动军部乱行忤命至于再三而迪简冒白刃於戎首置赤心于人腹挺身誓衆罔不率迎羣情既归因命为帅况闻阖荡析【思积切】仓廩匱竭野有饿殍军无见粮又能推恩信以结衆心率勤俭以劝生业士旅悦附流庸思归周月之间秦然安堵开置幕府叶和亲邻俾予无忧时乃之力夫为将守立功如斯不加爵赏何劝来者建官惟百端揆长之自非勲贤不在此选以是加等之命宠乃殊常之绩俾增威于阃外仍就拜于军中尔其钦哉无替厥命

除常侍制

某官某往以强毅刚正见称於时擢在左曹俾之駁议旋以言动小有过差左迁远藩亦闻有政虽经三黜仅历二纪而坚直之气终然不渝人之所难亦足嘉尚宜可束带立之于朝正色诤言时有所取俾登西掖仍珥右貂从容前後以备顾问

除裴武太府卿制

聚九州之赋辩百货之名按其度程谨其出纳孰为主者外府上卿务殷秩崇不易其选某官裴武有通敏之识有倚辩之才以兹器用早膺任使小大之务罔不励精累有勤绩存乎官次而受藏之府国用所资若非使能何以集事俾陞显列仍委剧务尔宜率其官属钦乃职司会帑藏出入之要修权量平校之法以遵成式无使改易谨而守之斯为称职

白氏长庆集卷五十四

卷五十五

钦定四库全书

白氏长庆集卷五十五

唐白居易撰

翰林制诰【凡四十三道】

杜佑致仕制

敕尽悴事君明哲保身进退终始不失其道自非贤达孰能兼之司徒同平章事杜佑以长才名略为国元臣历事四朝殆逾三纪出专征镇为诸侯帅入赞台褒为王室辅嘉猷茂绩中外洽闻宠任既崇勤劳亦至顷以年登致仕退请悬车方深倚注久未得谢勉就牵率迨兹累年今抗疏披诚至于数四敦谕颇切陈乞弥坚期于必遂理不可夺守冲知止佑实有焉贤哉大夫今古同道宜从优异之命式表褒崇之礼尚资耆望俾傅东朝可太子太师致仕如天气晴和亦任朝谒昔祁奚申叔皆就请老国有大事入议否臧忠臣爱君岂必在位永观前事期副兹怀

郑涵等太常博士制

某官郑涵等并早以文行久从吏职辈流之间颇为淹滞况雅有学识进修不已礼官方缺宜当此选凡朝廷礼制或损益有宜中外谥议或褒贬不决尔为博士皆得正之所任非轻各敬乃事并可太常博士

除韩臯东都留守制

国之都府半在东州未遑时巡方委留镇非位望崇盛加之勤旧者则不足以允金属而副重寄也刑部尚书韩臯名德之後郁然公才正行通规贯于终始累迁台府连鎮藩维入修职业出树风声故多遗爱着闻中外况一登朝序殆三十年旧德耆望无居其右俾父东夏金以为然乃加冢卿以示崇宠敬服嘉命永孚于休可捡校吏部尚书东都留守

中书舍人韦贯之授礼部侍郎制

典郊祀之礼献贤能之书今小宗伯实兼二事非直清明正者不足以处之中书舍人韦贯之沈实贤峻文以礼乐行成於内移用於官公直之声满於台阁顷以词藻选登禁掖秉笔书命

时称得人久积勤劳宜有迁转可使典礼以和神人可使考文以第俊秀仪曹之选金议所归往修乃官无替厥问可礼部侍郎余如故

薛存诚除御史中丞制

庶官之政得人则举况中执宪准?之司所以提振纪纲端肃内外盖一职修者其斯任之谓欤给事中薛存诚选自郎署列于左曹居必静专言皆说正章疏駁议多所忠益可以执宪立于朝端况副相方缺台纲是领纠正百官尔得专之夫直而不绞威而不猛不附上以急下不犯弱以违强率是而行号为称职敬服斯命往其懋哉可御史中丞余如故

前长安县令许季同除刑部郎中前万年县令杜羔除户部郎中制

前长安县令许季同前万年县令杜羔等顷自郎署分宰京邑而长吏待之小乖常礼虽同辞托故动未得中然远耻以退道不失正各从免职亦既踰时况文行政能皆推於衆询诸时议宜有迁授尚书郎缺方选才良宪部人曹俾膺并命季同可刑部郎中羔可户部郎中

京兆少尹辛秘可汝州刺史制

京兆少尹辛秘顷守吴兴时逢扰乱安人殄寇节効可称出倅戎车入贰京尹亦有政绩着于官常今以汝郛军郡之大方求良吏委之分忧询事考能尔当其选往即乃土以舒吾人可汝州刺史

除李逊京兆尹制

近岁京兆长吏数迁诚不便时抑有其故或钤【其廉切】键【巨展切】不谨吏缘为奸或钩距大烦人受其弊既非中道皆不得已而罢之宜求恬智寛猛相济者亲谕斯旨使久於其职以息吾人浙江东道观察使御史中丞李逊十年以来连守四郡或纷扰之际或荒馑之余威惠所加罔不和辑赏其殊绩擢在大藩自临会稽一如旧政况省科禁以便俗通津梁以息征动遵诏条深副朝旨江南列镇良帅则多集课程功尔为称首而内史之选久难其人今予所求唯尔可使虽表率州部其委非轻然尹正京师所资尤急宜辍材於浩壤伫观政於輶轂望尔有成无替厥命可权知京兆尹

除孔戣等官制【戣渠为切】

浑金璞玉方圭圆珠虽性异质殊皆国宝也是故能官人者亦辩而用之谏议大夫孔戣静专贞白不涉声利执言守事无所依违驾部郎中薛存诚廉洁直方饰以词藻中立不倚介然风?吏部员外郎王涯端明精实加之以敏懿文茂学尤推於时并历践朝行恪勤官次谏垣郎署藹其休声宜加公獎擢在近侍左右禁闥可以同升必能评奏台议发扬纶诰临事有立属词可观各随所长分命以职祇奉乃事无替厥猷戣存诚并可给事中涯可兵部员外郎知制诰

除李建吏部员外郎制

六官之属选部郎首之历代以来诸曹郎之中择其践历久考第高加以有器局律度者迁焉今之选任亦由是矣兵部员外郎李建文行才理公勤课绩可谓具美宜居厥官岁调方殷勉勤尔事可吏部员外郎

除刘伯刍虢州刺史制

给事中刘伯刍以文雅才名给事左闕实掌駁议再逾岁时亦谓恪勤宜从迁转而虢略近郡黎人未康藉尔良能为予抚字悬赏伫効勉哉是行可授虢州刺史

除周怀义丰州刺史天德军使制

西受降城尤居边要西戎北虏介乎其间委之郡符建以戎号将守之选宜乎得人前汝州刺史周怀义久列禁卫尝从征伐又领军郡率着勤功宜加奨用可属忧寄况兹要镇实扼戎吭犄角诸军局鑄右地牧人训旅兼领非轻无替前劳在申後効可丰州刺史天德军使

除某官王某魏博节度使制

师长之选重难其人况河上列城邺中雄镇初丧良帅思安衆心若亲与仁方膺是命某官王某出忠入孝根乎至性好学乐善出於余力发自修已施于为政可以守土可以长人今两河之间三军乏帅是用命尔领兹大藩澄清魏风辑理相土为我垣翰永孚于休往其钦哉无替厥职可魏博等州节度观察使

除某节度留後起复制

懋勲德者庆鍾于嗣袭忠顺者教本於亲于是乎有代及之恩有赏延之命所以光子道而激臣节也兹惟旧典可举而行某官某惟乃祖父勤劳王家咸有忠功书于申令降及于尔亦克负荷早承义训久倅戎麾自罹悯凶能着成敬恭俟朝命靖安人心虽在幼冲足可嘉奨今属元戎初丧衆望顒然宜选亲贤以为统帅留府之事俾尔专之加戎秩以夺哀迁冬卿以示宠奉扬新命无忘前修尔宜懋哉悬赏伫効可节度留後檢校工部尚书

除薛平郑滑节度制

武牢以东至于白马形势之地水陆之会宜择文武兼备者以为守臣右卫将军薛平自司禁旅为我爪牙训整警巡能宣其力尝使于絶国可谓有劳尝牧于大郡亦闻有政况忠厚为质通明为用秉吏道之刀尺袭将门之弓裘可以为三军之帅可以理千乘之赋俾辍才於北落往节制於东方尔宜式遏四封辑寧百衆明簡稽以实军旅信赏罚以劝吏人勉率乃职无忝厥命仍以冬卿副相兼而宠之可檢校工部尚书兼御史大夫

除卢士玫刘从周等官制

君有举左史得书之政有阙谏官得补之二职者历朝之清选也前侍御卢士玫尝在西川时为从事乱危潜伏能洁其身前监察御史刘从周顷佐宣城奉公守政端士之操终然不渝时所称论并宜甄奖况学术词藻见推於衆并命清贯金以为宜记事尽规各伫能効士玫可起居郎从周可右补阙

张正一致仕制

前谏议大夫张正一学行器用为时所称擢居谏官冀効忠说虽年齿未暮而衰疾有加所宜颐养不可牵率俾移优秩以从致政可国子司业致仕

张正甫苏州刺史制

浙右列城吴郡为大地广人庶旧称难理多选他郡二千石之良者转而迁焉邓州刺史张正甫自领南阳仅经三载廉平清简以临其人人安政和理行第一宜以大郡推而广之用旌勤劳且伫来効可苏州刺史

崔清晋州刺史制

左司郎中崔清以才良行敏补尚书郎颇积公勤宜加奨任顷尝为郡亦闻有政平阳旧壤时谓名藩得才与能方可共理安人训俗伫有成绩可晋州刺史

除柳公绰御史中丞制

中宪之设纠谬惩违一引其纲百职具举非清与直不称厥官谏议大夫柳公绰忠实有常文以词学介然端直有古之遗风顷居台宪累次郎位持平守正人颇称之擢首谏司器望益重今副相缺位中司专席惟有守者可以执宪惟无私者可以闲邪询事审官尔当是选光昭新命振起旧章宜一乃心以扬其职可御史中丞

除田兴工部尚书魏博节度使制

驭下安人其道不一或序能以次用或因效以拔才所命虽殊同归共理某职某官田兴时属本军初丧戎帅乱政咸啓羣心不寧而兴列在偏裨奋其义勇谋成必中事至能断智略所及指麾所加一军获安百衆附悦连献章疏恭俟制命有节有礼朕用嘉之夫以将材如彼军情若此允膺不次之举可贵非常之功是用宠之冬卿擢为大将仍以印绶就拜军中其敬之哉无墮乃力可捡校工部尚书兼御史大夫魏博等州节度观察等使

除郑余庆太子少傅制

东朝三少历代重选不必备位在乎得人吏部尚书郑余庆贞明俭素有古人风发自修身施于为政出入中外多历要重咸有勤绩存于官次况动中礼法学综儒玄是谓羽仪之臣可居师傅之任辅我元子尔其勉欤可太子少傅

除裴堪江西观察使制

江西七郡列邑数十土沃人庶今之奥区财赋孔殷国用所繫兹为重寄宜付长才同州刺史裴堪素蓄器干久经任遇日者资其忠谅入为谏议大夫藉其良能出为左冯翊曾未周岁政立绩成区区一郡未尽其用锺陵要镇可以委之夫简其条章平其赋役徇公率正以临其人而人不安未之有也祇服厥命往修乃官仍兼中宪以示优宠可江西观察使兼御史中丞

赠杜佑太尉制

生有爵禄歿有褒赠此王者所以崇哀荣之礼厚君臣之恩况有辅臣所宜加等某官致仕佑以通济之才公忠之节逢时入用为国大臣外领藩镇内参台铉积勤尽悴迨过三纪左右于位亦既八年天不憖遗夺我元老惘然兴叹实轸于怀永言褒荣俾峻礼命上公之秩用贲幽灵呜呼録旧旌劳知予不忘可赠太尉

除孔戢万年县令制

京邑令 多择尚书郎有才理者补之兵部员外郎孔戢自御史府迁夏官之属凡所涖职一心奉公在郎署间称有名实加以文学缘饰吏能俾宰京剧仁有成效

除裴向同州刺史制

冯翊之地密迩郊畿分内史之政参京师之化俾善所职其在得人京兆少尹裴向器蕴利用学通政事久试吏治颇着良能累守大郡入亚天府奉上抚下皆有可称左辅之重尔膺其选况征赋犹重人庶未康实望良才与之共治勉副所举往修厥官可同州刺史

除武元衡门下侍郎平章事制

朕嗣守丕业迨将十年实赖一二辅臣与之共治故外镇方域则仗以为将有绛侯厚重之质有邴吉寛大之风自登台司克厌人望顷属巴蜀军後人残权委节旄俾往镇抚信及夷貊恩加疲瘵每因利以施惠不易俗而修教政无苟得人用便安惠兹一方时乃之绩报政既久属望益深宜归左辅以参大政夫坦然公道可以叙衆才旷然虚怀可以应羣务弼违救失不以尤悔为虑进善惩恶不以亲讎自嫌用此辅君足为名相钦率是道往复乃官可门下侍郎同中书门下平章事

除李夷简西川节度使制

征镇之大实惟蜀川西距於戎南渐於海有重江复山之险有长穀坚甲之旅水陆交会华夷杂居畴能治之我有良帅山南东道节度使某官李夷简以正事上以简临下仗兹器用累当任遇执宪之难也尔为台丞其职甚举司计之重也尔调邦赋其効可称爰资长才出领重镇自摠符钺于汉之南专奉诏条削去敝政均谷籍不一之赋罢舟车无名之征近悦远来归如流水俗用丕变人迄小康三载考功尔为称首进其右秩迁于大藩以均惠乎四方以旌劝乎羣吏昔文翁明于教化种【持中切】 曷优於政能巴蜀之间遗美犹在不替前効可以副之伫闻有成用光厥命可捡按吏部尚书劔南西川节度等使

除袁滋襄阳节度使制

汉以二千石之良者入为公卿周以六官之贤者出兼侯伯内外之任所命则殊至於治军国宠忠贤其致一也户部尚书袁滋奉上甚勤临下甚简安人附衆尤是所长须资其能移镇东郡略其科禁缓其征徭政不滋彰人用休息在部七载绩成课高玺书徵还益闻遗爱老幼遮道事隣古人朕方勤恤疲民褒獎循吏累月再命其有旨哉举郑滑之政也故旌武公之美宠以司徒忧襄汉之人也故仗叔子之才委兹征镇类能而使其在此乎勉扬厥声无替前効可某官山南东道节度等使

归登右常侍制

近侍之列骑省为贵历代迄今选任颇重必询望实而後命之工部侍郎归登朴忠沈厚心无诡诈介圭不饰止水无波澹然自居以致名称抱此素行历践清贯掌议左掖贰职冬官岁时滋深体望益茂可以备顾问应对之选列言语侍从之臣冠附貂蝉立之于右访诸时论金以为然可右散骑常侍

李程行军司马制

隋州刺史李程顷自周行出分忧寄汉南大郡守之五年颇着良能宜当选獎况专习文学通知兵事西南重镇初委元戎慎选副车尔当此举三军之重俾往贰之仍加宪职以示优宠可御史中丞劔南西川行军司马

李甌虞部郎中制

金州刺史李甌雅有文艺饰以政事早从吏职久领郡符谨慎廉平颇副所任虞曹郎缺命以序迁敬兹宠名勉守厥位可尚书虞部郎中

牛僧孺监察御史制

河南县尉牛僧孺志行修饰词学优长顷对策于庭其言甚直累从吏职颇谓滞淹访诸时论宜当朝选俾升宪府以观其才可监察御史

裴克谅量留制

华州刺史奏华阴令裴克谅在官清白奉法考秩向满其政如初借留三年用观成绩朕方旌求良吏俾养黎元适副所怀宜可其奏

张聿都水使者制

前湖州长史张聿顷以艺文擢升朝列尝求禄养出署外官名不为身志亦可尚丧期既毕班序当迁俾领水衡以从优秩可都水使者

薛伾【铺杯切】 鄜【芳无切】 坊观察使制

鄜峙延安抵于中部羌夷种落散在其间戎夏杂居易扰难理宜选寛明之使通知边事者委以符节而纠绥之右金吾将军薛伾服勤戎职练达吏道出入中外縣历岁年能一乃心以宣其力自加宠遇再执金吾徼巡有严夙夜匪懈在公若是何用不臧况为人沉静内肃外和按俗守封是其所善宜辍务於谁何俾宣风於廉察庶乎劳徕诸部纲纪列城奉诏条以安人参戎索以训旅钦承厥命往复乃官仍践冬卿式光重寄可檢校工部尚书充鄜坊等州观察使

韩愈比部郎中史馆修撰制

太学博士韩愈学术精博文力雄健立词措意有班马之风求之一时甚不易得加以性方道直介然有守不交势利自致名望可使执简列为史官记事书法必无所苟仍迁郎位用示褒升可依前件

李晕安州刺史制

宿州刺史李晕勲阀之门嗣生才略久参戎卫颇着勤劳试守列城观其为政属汴泗之右创画州居府署城池委之经始一日必葺三年有成且闻公勤宜有迁转重分忧寄再伾良能往安吾人无忝厥命可安州刺史

窦易直给事中制

前御史中丞窦易直器质识智厚重闲敏文合法要学通政经累践台郎擢司邦宪寛猛举措甚得其中官不易方府无留事前因病免今以才迁俾升琐闥以备顾问夫制令奏议官狱典章苟有依违皆得駁正所任不细宜敬乃官可给事中

孟简赐紫金鱼袋制

汉制二千石有政绩者就加宠命不即改移盖欲使吏久於官人安其化也常州刺史孟简简

易勤俭以养其人政不至严心未尝怠曾未再稔绩立风行岁课郡政毗陵为最方求共理实获我心宜加命服以示旌宠庶俾羣吏闻而劝焉宜赐紫金鱼袋

卢元辅杭州刺史制

河南县令卢元辅早以学艺列在周行尝守商都颇闻有政再领京县益见其才江南列郡余杭为大征赋犹重疲人未康藉尔登车往分忧矚劳徕安辑称朕意焉悬赏旌能以仁报政可杭州刺史

白氏长庆集卷五十五

卷五十六

<集部,别集类,汉至五代,白氏长庆集>

钦定四库全书

白氏长庆集卷五十六

唐白居易撰

翰林制诰【敕书批答祭文赞文附凡五十五首】

与王承宗诏

敕王承宗朕临驭天下及此五年三叛诛夷四方清泰不以功武自负常推恩信为先尔父云亡即欲命卿受诏而远近方镇内外人情纷然奏陈皆云不可朕以卿累代积勲贤之业一门有忠义之风功着艰危恩连姻戚虽中心是念而衆请难违可否之间久不能决然亦欲观卿进退之礼察卿忠孝之心卿自罹悯凶属经时月待使臣而动皆得礼奉章疏而言必由衷请献官员愿输贡赋而又上陈密款远达深诚洁身而谋出三军损已而让推二郡斯有以得臣子之大节知君亲之大恩卿心既然朕意已定特加新命仍抚旧封今授卿起复左金吾卫大将军检校工部尚书充成德军节度使恒州刺史恒冀深赵等州观察等使兼御史大夫仍赐上柱国并赐告身旌节等往想卿忠孝哀感兼深其德棣两州以卿进让尤欲於卿亲属之内选授一人在法虽有推恩相时亦恐非便今所以除薛昌朝德棣两州观察使昌朝昔尝事卿先父今又与卿亲邻卿宜具以诚怀令报昌朝知委卿今授命之後足得节制三军使其不失事宜方见卿之忠荃昨者衆情易惑非卿不能効此诚羣议难排非朕不能断此意所宜保持大义勉励远图深念斯言永副予望其当军大将已下各宜特与改转卿即条録闻奏其官健等亦宜量加优赏想宜知悉

答李迺等谢恩令附入属籍表

卿先父顷逢多难尝立大功每想忠劳岂忘存歿念先臣之绩虽书名于太常推同姓之恩更附籍于宗正俾增荣於一族兼延宠于九原卿等或诗礼承家或弓裘奉业咸鍾新命庆属本枝省所谢陈深嘉诚恳

祭卢?文

维元和四年岁次己丑七月日皇帝遣某官某以清酌庶羞之奠致祭于故秘书监赠兵部尚

书卢?之灵惟尔质性端和风猷茂远名因文着位以才升秉大节而事君始终一致陈义方而训子忠孝两全甲族推华士林增美久在貂蝉之列近迁图籍之司方延宠光遽閼幽窆【祥亦切】褒獎之命虽已表于哀荣遣奠之恩宜再申於軫悼魂兮不昧鉴此诚怀尚飨

批李夷简贺御撰君臣事迹屏风表

朕思求理化亲閱典坟至於去邪纳諫之规勤政慎兵之诫取而作鉴书以为屏与其散在图书心存而景慕不若列之绘素目覩而躬行庶将为後事之师不独观古人之象卿词彰恭顺义见忠规省览再三深叶朕意所贺知

批百寮严绶等贺御撰屏风表

朕烈祖太宗以古为镜用辅明圣实臻理平垂作孙谋每惧乎失坠取为殷鉴遂饰丹青至若明君直臣前言往事森然在目如见其人论列是非既庶几为座隅之诫发挥献纳亦足以开臣下之心况卿等职在仪刑政当补察各勤所任共副兹怀所贺知

答杜兼谢授河南尹表

卿文通吏道学达政源凡历官常辄闻绩効观能以授俾亚理于三川见可而迁宜专临其一府尽委封畿之政仍兼运漕之权岁时之间伫有勤効勉恭尔职重副予怀所谢知

与茂昭诏

敕茂昭卢校等至省所奏恒州事宜并别论情陈献者具悉卿望重勲贤寄崇藩镇谋参庙筭宠接国姻累上表章继陈诚款永言智略已见匡济之才载念公忠益表感知之志若非劳瘁忧国义勇忘家则丹赤之心不能至此想风兴叹至于再三所缘恒州事宜朕亦思之甚熟但以武俊率身仗顺於国有功忠勲所延宜及俊嗣承宗又密陈深款远献忠诚既念旧劳已降成命计其奉诏必合感恩如或乖违续有商议卿宜以睦隣为事体国为心想卿诚怀当悉朕意

与师道诏

敕师道省表具悉卿业重相门位崇戎阃忠输于国行着于家久而益彰嘉叹无已所奏亡兄师古请列于私庙昭穆者此乃心推孝友诚切恭敬览表见情深足嘉尚但以祠庙所见贵於礼成师古虽则始营至卿方行祔礼即卿为庙主固合其宜况师古爵位尊崇宏选自合祔庙别立祠宇使其主之奉以蒸尝亦非乏祀也已令有司重议如此颇谓得中且叶礼经卿宜知悉

与於陵诏

敕於陵省所贺安南破坏王国贼帅李乐山等三万人者具悉卿蛮夷犯疆方镇致讨凶徒丧败荒徼清平卿素蕴忠诚又连封壤疾既同于山藪势益壮于辅车想闻捷书当倍慰惬载省所贺深见乃怀

答段佑等贺册皇太子礼毕表

朕祗膺统序恭守典常爰推至公乃命长子使主国鬯用贞邦家册毕礼成良增感庆卿等各司军卫同奉表章备见忠诚益深嘉叹所贺知

答李词贺处分王士则等德音表

朕临驭天下以惩劝为先有恶必诛无功不念顾承宗之罪诚合讨除思武俊之勲宜令嗣袭况坟墓禁其剪伐将校许以归降庶明用师盖非获已卿职修卿寺诚奉本枝省兹贺章备见忠荃

与吐蕃宰相鉢闍布敕书

敕吐蕃宰相沙门鉢闍布论与勃藏至省表及进奉具悉卿器识通明藻行精洁以为真实合性忠信立诚故能辅赞大蕃叶和上国弘清净之教思安边陲广慈悲之心令息兵甲既表卿之远略亦得国之良图况朕与彼蕃代为甥舅两推诚信共保始终览卿奏章远叶朕意披閱嘉叹至于再三所议割还安乐秦原等三州事宜已具前书非不周细及省来表似未指明将期事无後艰必在言有先定今信使往来无壅疆场【音亦】彼此不侵虽未申以会盟亦足称为和好必欲复修信誓即须重画封疆虽两国盟约之言积年未定但三州交割之後尅日可期朕之衷情卿之志愿俱在於此岂不勉欤又缘自议三州已来此亦未发专使今者赞普来意欲以再审此言故遣信臣往谕诚意即不假别使更到东军此使以後应缘盟约之事如其间节目未尽更要商量卿但与凤翔节度使计会此已处分令其奏闻则道路非遥往来甚易颇为便近亦冀速成更待要约之言皆已指定封疆之事保无改移即蕃汉俱遣重臣然後各将成命事关久远理贵分明想卿通才当称朕意曩者郑叔矩路泌因平凉盟会没蕃落中比知叔矩已亡路泌见在念兹存没每用惻然今既约以通和路泌合令归国叔矩体骨亦合送还表明信诚兼亦在此其论与勃藏等寻到凤翔旧例未进表函节度不敢闻奏自取停滞非此稽留昨者方进表函旋令召对今便发遣更不迟回仍令与祠部郎中兼御史中丞徐复及中使刘文璨等同往其余事宜已具与赞普书内卿宜审於谋议速副诚怀兼有少信物赐卿具如别録至宜领也冬寒卿比平安好遣书指不多及

与希朝诏

敕希朝省所奏请自部领当道兵马一万五千人取蔚州路赴行营并奏土门及承天军各添兵士备御者具悉卿武毅雄才忠贞大节出为良将倚作信臣约已徇公忘身许国忿违命不恭之寇激勤王自効之心亲统锐师率先羣帅况又周知要害备设防虞计其威声已振凶丑

有臣如此朕复何忧伫建殊功以副深重所有动静宜数奏闻想当知悉

与师道诏

敕师道朱何至省所奏当道赴行营兵马取正月过渡河逐便攻讨并奏兵马出界後请自供一月粮料又奏待收下城邑若有军粮一月已後续更支计并陈谢慰问者具悉卿文武间生忠贞特立动有所効知无不为昨献帛助军极盈数于万正今又齎粮出境减经费于三旬此乃力之所任无不罄竭虑之所及不无经营因时见忧国之心临事识忠臣之节诏书慰谕未尽朕怀章疏谢陈益嘉乃志再三兴叹寤寐难忘其所奏闻并依来表想宜知悉

与刘济诏

敕刘济李臯至省表及露布十二月十七日刘缙部领当道行营兵马收下饶阳县城破贼衆三千人并擒斩将校收获马畜器械等兼送贼将朝履清等四人又进所收饶阳县等者具悉卿尽忠伐叛发渔阳精銳之师缙仗顺临戎讨冀方昏狂之寇诏下而父子戮力鼓行而将卒齐心先羣帅以启行首诸军而告捷连擒逆将并下贼城归献罪之俘囚进已收之县邑可谓忘身徇国尽礼事君疾风知偃草之心大雪见贞松之节况表章之内益叹恭勤而眷想之间如覩风采计兹凶丑当已震惊破竹之势可乘覆巢之期匪远伫清大憝重副深怀其饶阳县卿宜且令镇守稍加存抚用劝将来宋常春卿所密奏具委事情且宜叶和以体朕意故令宣慰想当知悉

祭吴少诚文

维元和五年岁次庚寅二月辛未朔二日壬申皇帝遣内侍省内府局丞赐绯鱼袋孙士政以清酌庶羞之奠致祭於故彰义军节度使赠司徒吴少诚之灵曰惟尔武毅挺质韬铃拔身负勇果之雄才蓄变通之明识自察廉列郡节制成师贞且有为勤而不扰军戎辑睦封域底寧从义而致诚仗顺而保福既延宠渥方茂辉荣遽此幽沦深用伤悼逝波不舍去日苦多想松檟以軫怀闻鼓鼙而兴叹恩加遣奠礼举褒崇念尔有灵知予此意尚飨

与季安诏

敕季安省所奏当道行营兵马今月十七日已收枣强县其贼弃城夜走者具悉卿输忠报国嫉恶忘家遣无敌之师伐不袭之寇军声远届先路以风行逆党潜知弃城而宵遁已收县邑益振兵威此皆卿训练所加指麾有素永言明効实属深怀固可乘势应机逐便进讨以卿忠荃当副朕心

与希朝诏

敕希朝张嘉和至省初奏前月二十六日破逆贼河湟镇六千余人具悉卿亲领统师誓诛逆

党张军心以吞敌奋士力而指踪潜戒偏裨先攻险阻伐谋而事有成筭克日而动不愆期果败凶徒遂据要地况杀伤既重收获颇多益壮军威可夺虏气伫闻扫荡以慰衷怀

与从史诏

敕从史曹公义至省所奏今月三日柏乡县南破贼众约三万人并擒斩首级收获器械及马等又奏当军所伤士马数并量事优恤事宜具悉卿外扬武略内竭忠谋率有名之师深入其阻遇无状之寇大挫其锋兵刃屡加捷书频至杀伤数广绩效居多非卿悉力摧凶誓心报国则何能指麾之下动必成功表奏之间事皆审实既光重委益副深怀嘉叹再三不忘寤寐所奏承璀出军合阵并续发露布事宜具委所陈想当知悉

与季安诏

敕季安许峯至省所奏具悉卿勲亲重德台辅元臣竭诚信以戴君弘识度而体国谋能极虑言必尽忠周览表章益增寤叹吴少阳自参军务颇効恭勤岂待奏陈已有处分想宜知悉

与昭义军将士诏

敕昭义军节度下将士等卿等当军将士与诸道不同自经艰难多易将帅而忠顺之节未尝有亏朕每思之无时暂忘卢从史为卿主将作朕藩臣权位尊崇恩宠优厚而乃外示恭顺内怀奸邪刻削军中暴殄境内朕以君臣之道未忍发明为之含容颇有年月近又苟求起复请讨恒州与贼通谋为国生患自领士马久屯行营收当军赏设之资加本道刍粟之估不为公用尽入私家此则主将之恩於卿何有臣子之分负朕日深卿等辨邪正之两端识逆顺之大义抱忠勇者耻居其下守名节者愤发於中失三军之心已闻大去犯众人之怒果见不容远察事宜备知诚欵兴言嘉叹至于再三其当军将士等赏设已有处分上自将校下及士卒各励尔志再思朕言卿等承前以来常保忠贞之节自今以後永为心腹之军宜念始终副兹瞩望故令宣慰宜并悉之夏热卿等各得平安

与承璀诏

敕承璀【取猥切】卿摠领禁军控临戎境见敌每彰其勇敢因事益表其忠勤言念在怀发於寤叹昭义军将士等去邪远恶仗义保忠统其成师宜得良帅孟元阳夙怀武毅累着功庸威名甚彰人望所属以之为帅必惬军情以之讨贼必有勲绩今授元阳捡校尚书右仆射充昭义军节度等使未到行营间其昭义军卿宜切加宣抚务使安寧乌重胤职在偏裨保於忠正宜从奨擢以表殊恩今授乌重胤河阳节度使兼御史大夫卿亦宜谕此恩意令知朕心兼恐河阳无人速宜进发想当知悉

与元阳诏

敕元阳泽潞全军方讨恒冀卢从史亏失大节包藏二心奸迹邪谋日已自露军情物议俱所不容寻追赴朝今已在道朕以昭义将士忠顺成风况在行营久勤戎事今欲使其战者奋发居者悦安共成大功必在良帅以卿有浞水之勲効有河阳之政令思之甚熟无以易卿宜领重藩仍迁宗秩今授卿检校尚书右仆射充泽潞节度等使并赐旌节告身等往卿宜速发先到潞府上讫便赴行营慰安军心宣谕朕意乌重胤徇忠守节宜加奨用今便授重胤河阳节度使兼御史大夫想宜知悉

与昭义军将士诏

敕昭义军节度下将士等卿等久在行营乍无主将而士旅辑睦军垒安寧足彰守正之心尤见尽忠之节以此叹矚劳於寢兴孟元阳是朕信臣为国良将威略可以摄凶孽慈和可以牧师人累着忠勤克谐朕命为其主帅必副羣情况卿等同嫉奸邪久困贪暴宜以仁贤之帅抚卿忠义之军靖思元阳无出其右今授元阳检校尚书右仆射充卿等当道节度使勉同王事以慰朕怀乌重胤特効忠诚深宜奨擢今便授河阳节度使兼御史大夫故令宣慰并宜知悉

与师道诏

敕师道林英至省所陈奏并进王承宗与卿书者具悉王承宗童騃无知凶器有素虽籍祖父之宠曾微分寸之劳但以武俊勲在册书姻连戚属朕独排羣议特降殊私未卒父丧使承祖业即加新命仍抚旧封则朕於承宗恩亦至矣而伪陈诚欸欺诳使臣假托军情拒违诏命则承宗於朕罪莫大焉悖礼乱心暴於天下此乃承宗干国家之纪非朕忘武俊之功遂至用师盖非获已仍开生路许以自新而梟音不悛鵠张益炽人情共弃国典不容在于朕心安敢轻舍卿既膺注意义感酬恩所献表章具已详览虑深远计词切说言在忠谋而则然於事体而未可诚嘉勤至难允恳怀今诸道将帅亲领士马深入寇境频奏捷书四面合围一心旅进穷迫已甚覆灭非遥况卿同遣师徒已收县邑冀清氛孽伫见功名勉於令图副此矚望

与师道诏

敕师道任文质至省表具悉卢从史顷者请率全师誓清妖孽推诚待物许之不疑而背恩於上结怨於下邪谋贰志日以彰闻亏大节而自絶於君积羣怒而不容於衆因以邀命幸而脱身屈法申恩已有处分昨者诏旨已明示卿卿体国为心事君尽力固宜有闻必荐有见必陈竭其忠谅之诚济其献替之美省閱章奏嘉叹良多

与茂昭书

敕茂昭王日兴至省所奏今月十八日大破贼衆一万七千人并擒斩收获讫者具悉卿亲率劲兵誓平妖寇竭股肱之力中有奇谋励父子之军前无强敌故能深入贼境大破凶徒杀伤既多俘获亦广具详奏报备见忠劳眷属之怀发於寤叹将士等各怀勇烈同忿寇讎激於衆心致此殊効况荷戈於炎暑之际奋身於锋刃之间永念於兹未尝暂忘故令宣慰宜并悉之

与昭义节度亲事将士等书

敕昭义军节度下亲事将士等卢从史受恩至重负国至多衆所不容追令赴阙朕以误曾任使贵全始终今则止於贬官此盖曲从寬典卿等抱忠怀义朕所素知顷以诣营同事从史三军一体俱是王臣既不相干又能自効朕方优赏以酬功勲何至不安有此疑惧必?从史已追之後元阳未到之间卿等当营乍无主将或被外人扇诱令衆意忧疑势使之然事非获已朕虽在此远有军情料卿本心必无此意况元阳勤俭恤下寬厚爱人久在河阳甚近泽潞元阳臧否卿等合谏以卿忠义之军故择仁贤为帅已有诏示宣谕元阳若到行营一无所问乃至将士家口亦令优恤安存卿复何忧必得其所况昭义将士艰难以来保守忠贞未尝亏失天下称叹卿亦自知又卿父母妻儿家田坟墓一物以上并在潞州顷刻之间岂忍便弃朕之此语卿宜细思各相勉谕同保忠顺计元阳已合到彼卿等便取元阳指麾想卿等心必副朕意故令宣慰并宜知悉

与执恭诏

敕执恭王克谨至省所奏今月八日进收平昌县已令镇守并奏刘济欲与卿约义事者具悉卿奉辞伐罪仗节啓行指顾偏裨收复城邑已令镇备兼务缉绥威惠之方既明吊伐之义斯在永言倚任弥注衷情刘济将相大臣与卿先父同列欲求契约固合允从岂惟继好私情亦足叶心王事载省来奏深鉴乃诚至於寝兴不忘嘉矚

与恒州节度下将士书

敕成德军节度下将士等朕以王者之道与物无私若违命执迷则罔有容舍若知非改悔则无不含宏不穷无告之人不塞自新之路顷属奸臣从史谋构异端致使恒阳隔于恩外六郡之地皆废农桑三军之人并惧锋镝每一念至中心悯然今卿等继献表章远输诚款省承宗之勤恳难阻其情思武俊之功劳不能无念况事因诒误而理可哀矜今已降制书各从洗雪承宗仍复旧官爵充恒冀深赵德棣六州观察使成德军节度使将士等官爵实封并宜仍旧待之如初卿等各宜协力同心知恩感德共保终始称朕意焉故令宣慰宜并知悉

与承宗诏

敕承宗顷者卢从史包藏奸诈矫示公忠下诬物情上惑朝听使卿陷於违命使朕至於用兵交乱君臣罪有所在今从史已正刑典远弃驩州已构乱者既就屏除诱陷者自宜明白况卿代连?戚朕岂不思祖有功劳朕岂不念事不得已势至如斯弃絶以来常怀悯恻卿今既陈章疏恳献衷诚请进官员愿修贡赋誓心以纳款归罪而责躬情可哀怜法存开释朕托于人上及兹六载体天地含弘之德厚君臣终始之恩常以人安为心岂欲物失其所今所以开独见之路降非常之恩卿及将士等已具制书并从洗滌卿仍复旧官爵便充恒冀深赵德棣等州节度观察等使并赐旌节告身等往爵土仍旧君臣如初想卿中怀当自知感所宜追补前悔勉勤後图夙夜思之永副朕意想当知悉

批宰相贺赦王承宗表

先臣武俊功不可忘後嗣承宗过而能改朕所以舍其罪悔议以勲亲垂宥过之恩尚宜及尔十代引泣辜之责诚合在予一人与其黷武而取威不若匿瑕而务德卿等重居台辅密赞谋猷发於衷诚有此称贺省閱章奏嘉叹久之

与刘济诏

敕刘济省所谢男绍及孙景震等授官并谢赐器仗弓甲刀斧等者具悉卿文武全才将相重任本於忠谅成此勲劳尚德尊贤位已极於台辅念功懋赏宠宜及於子孙时论允归朝章斯举至於出兹戎器赐我元臣但可以申朕恩私未足以表卿功绩载览来表备见乃诚并此谢陈益嘉勤荅

代王伶荅吐蕃北道节度论赞勃藏书【奉勅撰】

大唐朔方灵盐丰等州节度使捡校户部尚书寧塞郡王王伶【薄密切】致书大蕃河西北道节度使论公麾下远辱来书兼蒙厚赐慰悚之至难述所怀国家与彼蕃代为舅甥日洽恩信虽云两国实若一家遂令疆場之臣得以书信相问况麾下以公忠之节雄勇之才翊佐大邦经畧北道伶近蒙制命守在边陲慰望之情一二难尽皇帝以赞普频遣和使恳求通好凡此边镇皆奉朝章但令慎守封陲不许辄令侵軼至於事理彼此宜然且如党【都项切】项久居汉界曾无征税既感恩德未尝动摇然虽怀此抚循亦闻闕【缺规切】彼财货忘命而去获利而归但?彼蕃不知大为党项所卖其中亦闻诱致事甚分明不能缕【卢举切】陈计已深悉今请去而勿诱来而勿容不失两境之欢不伤二国之好在此诚为小事於彼即是远谋幸履坦途勿遵邪径今圣上德柔四海威及万方虽外国蛮夷尚皆率伏况中华臣妾敢有不恭岂假彼蕃欲相借助诚愧厚意终讶过言承去年出师讨逐回纥其间胜负此亦备知不劳来书远相示及所蒙寄赠并已捡到伶为边须守常规马及胡瓶依命已受其回纥生口缘比无此例未奉进止不敢便留今却分付来人至彼望垂捡领有少荅信具如别数幸恕寡薄也初秋尚热帷所履珍和谨因译语官马屈林恭回不具伶白

与吉甫诏

敕吉甫韩用政至省所奏陈谢具悉卿忠贞立身文武为德志惟经国谋不忘君才可以雄镇方隅故委之外阃智可以密参帷幄故任以中枢而能一其衷心再有冲让虽劳谦弥切每陈丹府之诚而忧寄方深难辍紫垣之务勉谕已伸于前诏忠劝载露於来章今征讨已停方隅稍泰克清之日虽则不遥难夺之心亦宜且抑重此宣慰当体朕怀是推至公烦有陈谢

与吐蕃宰相尚绮心儿等书

敕吐蕃宰相尚绮心儿等论思诺悉至省表并进奉具悉卿等才器特茂识略甚明仗义立身

资忠事主上佐赞普下康黎元以寻盟纳款为谋继好息人为请是卿上策叶朕中心每览表章辄用嘉叹朕与彼蕃国代为舅甥日结恩信自论盟会颇历岁时常欲速成以为永好虽诚明之内彼此无疑而言约之间往复未尽今故略收来意重示所怀想卿通明当所鉴悉河陇之地国家旧封论州郡则其数颇多计年岁则沿来甚近既通和好悉合归还今者舍而不言岂是无心爱惜但务早成盟约所以唯言三州则没于彼者甚多归於此者至少犹合推於礼让岂假形于言词来表云此三州非创侵袭不可割属大唐来且此本不属蕃岂非侵袭所得今是却归旧管何引割属为词去年论与勃藏来即云覆取进旨赞普便请为定今两般使至又云比之小务未合首而论之前後既有异同信使徒烦来去虽欲速为盟会其如无所适从静言二三固不在此若论和好即今各无侵軼已同一家若议修盟即须重定封疆先归三郡若三郡未复两界未分即是未定封疆凭何以为要约彼若吝惜小事轻易远图未能修盟且务通好至於信使一往一来但令踈数得中足表情意不絕彼有要事即令使来此有要事亦令使往若封境之上小小事意但令边头节度两处计会商量则劳费之间彼此省便前般蕃使论悉吉赞至缘盟约事大须审商量未及发遣後使虽是两般所论只缘一事故令相待今遣同归在於日时亦未淹久所送郑叔矩及路泌神枢及男女等并已到此良用惻然厚赠远归深嘉来意其刘成师原非刘辟子侄本是成都郡人已令送还本贯其余事目并在赞普书中卿等宜审参量以副朕意使回之日可备奏闻今遣兼御史中丞李鈹及中使与回使同往各有少信物具如别数至宜领之秋凉卿等各得平安好遣书指不多及

荅王承宗谢洗雪及复官爵表

帝者之道荡然无私唯推赤心以牧黔首故一夫不获若纳之於隍一物归诚则容之如地况卿家联懿戚宠自先朝祖立茂功赏延後嗣因人诋误不染疵瑕滌以恩波煦之宠泽抚旧封而廉察六郡进新律而统制三军荡秽加恩何以过此及覩来表乃见深诚言必由衷事皆知感承家袭庆誓继力於前修补过酬恩愿指期於後効永言尔志甚叶朕怀勉思始终用副眷矚所谢知

与郑綯诏

敕郑綯省所奏邕管黄少卿及子弟等事宜具悉卿望重中朝寄深南服誓敷惠政伫化远人言念忠勤不忘监寤山洞夷落易扰难安此来抚之未及其道览卿所奏颇合其宜岁时之间当革前弊勉于招谕以副朕心

荅高郢请致仕第二表

卿有忠贞之节立於险中有清重之名镇於朝右而能始终有道进退有常援礼引年遗荣致政人鲜知止卿独能行不唯振起古风亦足激扬时俗於卿则确然难夺在朕则情岂易忘诚鉴乃怀未允来表

与刘总诏

敕刘总卿业继将门才兼武略累临军郡悉着良能袭以弓裘宜加旌钺仍举夺情之典以昭延赏之恩今授卿起复云麾将军检校工部尚书充范阳节度等使并赐旌节官告往想宜知悉

荅裴垪让中书侍郎平章事表

卿自登台辅每竭忠贞一身秉彝百度惟序致君尽力久积股肱之勤忧国劳心微生腠理之疾暂从休告遽献表章所陈虽是卿心所请殊非朕意宜加调摄速就平和以副虚怀无为固让

荅刘总谢检校工部尚书范阳节度使表

卿幼承义训长有令闻能遵忠孝之风不坠弓裘之业朕所以命加异等宠冠常伦特授双旌超登八座岂唯延赏亦在任能将懋前修勉申後効载省章疏深鉴诚怀所谢知

与茂昭诏

敕茂昭王日兴至省表陈让检校太尉者具悉卿文武大僚勲戚重望累展朝宗之礼足表恭敬之心况多战伐立功弥彰勤荅言念及此每用嘉焉宜加宠荣已降新命何至谦让仍辞旧官眷倚之怀并具前诏想宜知悉

荅任廸简让易定节度使表

卿修文立身经武致用每誓心於忠勇常济事以智谋自副戎车已属时望及分旌钺果愜军情况武义之师输忠仗顺所期慰抚以就辑宁何至撝谦有兹陈让所进官告今却赐卿宜体朕怀即断来表

荅裴垪让宰相第三表

卿疾病已来表疏相继虽辞乞之诚颇切而注望之意方深所以来章久而未报然念卿勤恳之请至於再三若心不甚安即疾难速愈是用辍枢剧之务加崇重之官稍遂优闲伫期痊复勉从尔志深抑予怀

荅裴垪谢银青光禄大夫兵部尚书表

卿自居钧轴日献谋猷戴君常竭其股肱忧国每形於顔色及婴疾病益不遑安未踰四旬以至三让撝谦秉易退之道坚恳陈难夺之词遂抑朕心俯从卿请而七命印绶五兵尚书官秩甚崇事务稍简就以优养冀乎和平载省表章深见诚意

与刘总诏

敕刘总康志安至省所谢陈具悉卿之先父为朕元臣大节殊功歿而不朽宜加恩礼俾洽哀荣故命宰臣为之撰录卿义深报国孝重承家既感显亲之恩愿竭戴君之节远有奏谢益用嘉之想宜知悉

与房式诏

敕房式卿以良才尹兹东洛公忠无怠声绩有闻嘉叹之深寧忘寤寐宣城重寄深在得人藉卿政能往就绥抚今授卿宣州刺史兼御史中丞充宣歙等州都团练观察处置等使并赐告身往卿宜便起赴本道勉修所任以称朕怀想当知悉

与卢恒卿诏

敕卢恒卿累登朝序皆着公方自领藩条益彰理行恪恭而奉上勤俭以牧人不加宠荣何劝来者朕以擢管漕运军国所资其务甚殷所寄尤重以卿有忠劳之前効干济之长才常简朕心宜授此职今除卿尚书刑部侍郎充诸道盐铁转运使并赐告身往宜即赴阙庭想当知悉

与新罗王金重熙等书

敕新罗王金重熙金献章及僧冲虚等至省表兼进献及进功德并陈谢者具悉卿一方贵族累叶雄材仗忠孝以立身资信义而为国代承爵命日慕华风师旅叶和边疆寧泰况又时修职贡岁奉表章进献精珍忠勤并至功德成就恭敬弥彰载览谢陈益用嘉叹沧波万里虽隔於海东丹慊一心每驰于阙下以兹嘉尚常属寝兴勉宏始终用副朕意今遣金献章等归国并有少信物见如别録卿母及妃笄副王宰相已下各有赐物至宜领之冬寒卿比平安好卿母比得和宜官吏僧道将士百姓等各加存问遣书指不多及

荅文武百寮严绶等贺御制新译大乘本生心地观经序表

朕勤求道本广挹教源以真如不二之宗助清淨得一之化况斯经典时为大乘名理精微翻译成就虽契心则离於文字而得意亦假於筌蹄庶使发挥因为述序卿等精通外学恳竭忠诚引经赞扬奉表称贺再三省览嘉叹久之

荅孟简萧俛等贺御制新译大乘本生心地观经序状

大仙经典最上法乘来自西方閤于中禁将期利益必在阐扬遂命僧徒译其句偈兼诏卿等润以文言昨因披寻深得眞諦悟本生不灭之义证心地无相之宗方勤护持聊着序引永言述作犹愧圣明卿等贺陈良深嘉尚

荅元应授岳鄂观察使谢上表

夏口重镇属在时贤非明肃不能理其军非简俭不能阜其俗以卿有仁厚之质謇直之风累践班行皆着名节遂辍中宪往临外藩知己下车深慰人望伫兹报政用副朕怀所谢知

荅李鄴授淮南节度使谢上表

卿抱兼人之才秉徇公之节每登要职悉着能名若刃发硎投而不滞如玉在佩动必有声朕以距淮而南人物繁会非廉明何以贞师察俗非简惠何以通商绥农前劳既彰後効何远载省来表知己下车勉副虚怀伫观新政所谢知

画大罗天尊赞

岁正月十九日顺宗仙驾上昇之日月也皇帝嗣位六载每及兹晨斋居孝思明发不寐以为玄祖之教本乎道先帝之神在乎天故画大罗天尊像者欲以最上胜因而成本功德也然则知之者不如念之者念之者不如仰之者是用谛念真力仰尊仪命设色之工图其仪形命掌文之臣赞其功德达孝诚于天上致孝理於域中斯盖宏愿发於我皇景福荐於先后稽首奉诏跪称赞云

维大罗兮天上天维天尊兮仙上仙高真之鉴照下界孝敬之心达上玄每一念兮以一仰感罔极兮福无壅

白氏长庆集卷五十六

卷五十七

钦定四库全书

白氏长庆集卷五十七

唐白居易撰

翰林制诰四【凡六十八首】

荅元义请上尊号表

朕自君临运逢休泰时岁丰稔凶丑殄夷此皆宗社降灵忠贤宣力顾惟寡德敢受鸿名卿中发恳诚上尊美号虽属人望难贪天功宜悉所怀勿固为请

荅薛萃贺生擒李錡表

朕自嗣耿光每多惕厉念必先于除害志无忘於安人李錡大负国恩自贻天罚师徒未动于疆场【音亦】父子俱肆於市朝信上天之祸淫与率土而同庆省视来表深鉴乃诚所贺知

与薛萃诏

勅薛萃杨君靖至省所陈谢具悉卿勤王之节徇公灭私事主之诚移忠资孝苟非褒赠何以显扬且清白之风既自家而刑国则宠旌之泽宜因叶以流根式遵追远之经用表教忠之训是为礼典烦致谢章

与严砺诏

勅严砺薛光朝至所陈谢具悉卿徇公竭诚臣节克着扬名济美子道有光教忠既本于义方追远宜崇於礼命俾优褒赠爰慰孝思秩贵冬官以表过庭之训封荣石窀【居效切】用旌徙宅之贤虽示新恩允符旧典远烦陈谢深见恳诚

与余庆诏

勅余庆省所谢陈具悉卿累居袞职时谓尽忠自尹洛师日闻报政臣节既彰於宣力子道莫大於扬名俾光孝思爰举礼命荣褒冢宰宠贲幽灵式是彝章岂为私渥有烦陈谢深见诚怀

荅黄裳请上尊号表

朕以薄德嗣守丕图不敢荒寧以宏理道幸属岁时丰稔凶寇梟夷风两不愆礼圆丘而报本雷霆未震豐【许刃切与衅同】太社而服刑斯皆十圣降灵幽赞寡昧百辟叶德驯致和平永惟宏名实惧虚美卿上稽祖训下酌羣情陈献表章请加徽号暨于王公卿士降及耆艾缙黄咸一乃心各三其请朕尝以宰元化者曲成於物法天道者从欲於人虽恤隐泣辜未臻三五之化而乐推欣戴难违亿兆之心德非称焉让不获已勉从所请深愧于怀

与从史诏

勅从史杨干至省所奏今月七日到潞城县降雪尺余兼奏耆老等诣阙请欲立碑并手疏通和刘济本末事宜者具悉卿分朕之忧求人之瘼时降大雪丰年表祥岂惟泽及土田将使物无疵厉休庆斯在慰望良深耆老等远诣阙庭请立碑记寻已允许当体诚怀以旌政能无至陈让知卿协比其邻翼戴为意陈此手疏发於血诚忠恳弥彰嘉叹不已永言臣节何日忘之想当知悉

与韩臯诏

勅韩臯省所陈贺具悉卿朕自守睿图每思寬政虑先禁暴念在措刑李錡负国反常阻兵干纪未劳师旅已就诛夷卿宣力纳忠秉心嫉恶远陈庆贺深见恳诚想宜知悉

与元衡诏

勅元衡卿立身许国竭力匡君人之具瞻予所嘉赖凋残是恤远藉宣风之能利泽所资暂辍为霖之用慈和既敷于兵後惠信当洽于言前永念忠勤岂忘寤想计卿行迈已到西川涉远冒寒固甚劳顿勉加绥抚以副朕怀想宜知悉

荅李扞等谢许上尊号表

朕自临万邦仅经三载位虽托於人上化未洽於域中永念眇身敢当大号卿等义深宗室忠尽君亲一其情诚三有陈献迫以人望厌于天心遂抑所怀勉从其请固辞而事非获已抚德而何以堪之再省谢章弥增惕厉

荅冯伉请上尊号表

朕统承大宝时属小康代谋而吴蜀克清示信而华夷有截斯皆宗社垂佑天地降和非予冲人所能驯致卿上稽十圣之训下酌万人之心以为不让强名未伤於体道屈已循物何爽于至公遂抑素怀俯从衆望虽鸿名未称每劳躋地之心而人欲下从即爽法天之德勉依勤请良用愧怀

荅长安万年两县百姓耆壽等谢许上尊号表

朕每念雍熙慙未及於亿兆永言徽号让已至于二三而文武具寮缙黄庶老恳陈诚欸明引训谟开予以天地无私之心起予以圣宗不易之训以大道者无求於物物尊而不辞至公者非欲其名名立而不让迫於固然之礼不得已而许之卿等诚至感通义深欣戴再烦陈谢益用愧怀

荅元素谢上表

卿用兼文武识合变通辍纲领于中朝授麾幢於外阃吏能足以惠物将略足以董戎人望所归予心是赖知卿已到本镇当慰疲人深藉抚绥之方以安凋弊之俗日期报政岁望成功勉勤所图用副朕意

荅韩臯请上尊号表

销沴致和幸逢昌运加名建号岂称眇身而文武具寮?献庶老引古今之明训陈亿兆之恳诚谓德有所归讴譔不可以苟让谓功有所献徽号不可以固辞遂抑中怀俯从衆望庶增修乎茂实冀克副於鸿名卿发诚自中归美于上勉依所请弥愧于心

荅冯伉谢许上尊号表

朕以眇身嗣于丕业心虽劳於惕厉化未及於雍熙永惟强名实惧虚美上自一二元老下及亿兆?人大洽询谋明徵典训增予以巍巍之号感予以颋颋之诚既迫所怀俯从其请卿义深奉上志切戴君再省谢陈弥增愧惕

与顔证诏

勅顔证戴岌至省所贺及谢王国清充五岭监军具悉卿职在抚绥任兼备御公勤夙着闻望日彰言念于怀岂忘寤寐乾象昭感壽星垂文与时相膺有道则见顾慙菲德何以当之卿戎旅事殷宜有监领盖为常例烦至谢陈想宜知悉

与从史诏

勅从史省所陈谢追赠亡母并举荐韦悦具悉卿推诚奉国积庆成家既彰尽节之忠宜洽流根之泽虽禄难逮养已闋灵于九原而孝在显亲宜旌贤於三徙俾崇封赠以极哀荣韦悦既有才能又所谙委卿即发遣令赴阙庭卿之忠诚朕所识察岂待陈露然後知之载览来章益嘉恳切想宜知悉

与季安诏

勅季安省所陈请具悉卿朕纂承鸿业司牧苍生仅致小康未臻大化实慙薄德未称崇名而华夷兆人内外羣后屡有勤请难於固违卿远献表章明徵典训纳忠於上归美於君勉从恳诚良用愧怅储贰者上继宗祖下贞邦家心岂暂忘事或未暇尚阻来请当体所怀

与高固诏

勅高固卿奉国戴君必竭忠节统戎护塞克着勲劳自领藩垣委之心膂忠慤之志久而益彰钦叹在怀何尝暂忘以卿一从军旅多在边陲岁月积深勤劳滋久所宜出入中外周旋宠光今授卿检校尚书右仆射御史大夫兼右羽林军统军以端揆之崇兼环卫之帅遂卿望阙之恋表朕念功之心仍赐卿官告卿宜即赴阙庭想宜知悉

祭故赠婕妤孟氏文

维元和二年岁次丁亥十二月甲寅朔十九日壬申皇帝遣某官某以庶羞之奠致祭于故婕妤之灵曰惟尔和顺积中柔明奉上动静合肃離之体进退得婉娈之仪选自良家备兹内职修令顏以顾德兰幽有香守明节而保身玉洁无玷方资懿范以茂嘉猷彼美有闻于何不淑遽兹沦逝深用恻伤既卜日晨爰申奠醑以尔有班氏之明智故赠以婕妤以尔有宓妃之容姿故葬于洛浦魂兮不昧歆此诚怀尚飨【洛浦原在长安界】

季冬荐献太清宫词文

维元和二年岁次丁亥十二月甲寅朔二十六日巳卯嗣皇帝臣稽首大圣祖高上大道金阙玄天元皇大帝伏以今年司天台奏正月三日祀上帝于南郊佳气充塞四方温润祥风微起庐州申连理树一株彰义军节度使进白乌一郑滑观察使奏瑞麦五科司天台奏六月五日夜镇星见河阳节度使进白雀一荆南节度使申连理树一本山南西道观察使申嘉瓜一枚司天台奏六月十三日夜老人星见河南府申芝草两茎司天台奏冬至日佳气充塞瑞雪祁寒者臣嗣承丕图肃恭寅畏祖宗垂庆佳瑞荐臻?奉祯祥伏深祇惕今时惟玄律节及季冬仰荐明诚敬率恒典谨遣摄太尉司徒平章事杜佑荐献以闻谨词

与茂昭诏

勅茂昭卢校至省所奏请上尊号及建储闱贺诛李錡并进马者具悉卿朕以寡德祇嗣丕图虽致小康岂称大号迫於人望遂抑予怀永惟强名实愧虚受储贰者上继宗祖下贞邦家心非慙忘事或未暇尚阻来请宜体所怀李錡包藏乱心奋发凶德不劳征讨自就诛夷想卿忠诚倍以为慰所进马驯良可尚服御且闲取其恋主之心足表为臣之节再三省览嘉叹久之想宜知悉

荅百寮谢许追游集宴表

在昔哲王居于人上推其忧乐与衆共之顷属三凶荐兴二载连获凡百有位咸一其心诚念嘉谋共致昭泰今四表无事三农有年思与羣情同其具庆是宜削苛察之前弊煦寬裕之新恩仁及下而啓迪欢心泽先奏而导迎和气昨逢多故主忧且使臣劳今致小康上安则宜下乐庶欲解人之愠粗伸推己之恩岂曰殊私烦於陈谢

荅李扞谢许游宴表

朕自御万方仅经三载运逢休泰俗渐和平当朝野无虞之时见君臣相遇之乐是故去滋彰之化宏优贷之恩近自宗亲下及士庶赐其宴衍遂以优游盖以己之所安思与人之共乐虽夕惕而若厉每戒志於无荒赐春游以发生宜助时而有庆卿等荣崇宗寺恩重本枝省所谢陈弥嘉诚恳

荅刘济诏

勅刘济省所奏茂昭送卿管内百姓殷进能等七人奏前後事由具悉卿为国大臣与君同体寡而得衆忠以忘身每循公而灭私能虚怀以容物与茂昭疆场【音亦】之事小有违言曲直是非朕已明辨卿外崇藩翰内赞谟猷念屈已以为心或难容忍思戴君而是力宜务叶和勉卿寬裕之怀助朕含弘之化想宜知悉

与柳晟诏

勅柳晟卜英琦至省所奏庆云并进图者具悉昌运将开祥符先见发自和气聚为卿云捧日而五色相宣垂天而万物咸覩斯为嘉瑞宜契昇平朕方致小康未臻大化受兹方觐祗惕良深卿以诚事君推美奉上献轮囷於图画陈恳欵於表章披阅再三弥增嘉叹

荅薛萃谢授浙东观察使表

卿久践吏途累闻能政及居藩镇尤见忠勤训导而羣黎向方廉察而列郡承式实嘉乃绩每简予心宜迁雄剧之藩以广循良之化勉於为理副朕所怀所谢知

上元日叹道文

道本无象功成强名生一气之先为万物之母吹煦寒暑陰阳节而岁功成辅相乾坤上下交而生物遂故能阜蕃动植啓迪雍熙邦家保安夷夏咸若今以时殷献岁节及上元女道士某等奉为皇帝焚香行道敬修功德伏愿声闻紫极丕降玄休大庇羣生永康四海流光垂庆亿万斯年

画大罗天尊讚文

道用无穷统之者大圣神化不测感之者至诚非图像无以示仪刑非供养无以展严敬故一念一礼而福随之画大罗天尊者奉为顺宗至德大圣大安孝皇帝忌辰之所造也皇帝祖玄元之风嗣清静之理志在善继心维孝思申命工人彰施绘事粹容俨若真相炳焉凭志诚而上通垂景福而下济词臣奉诏恭为讚云真通之象孝感之心率土瞻仰在天照临蓄为精诚发为图画如从大罗应念而下

荅朱仕明贺册尊号及恩赦表

朕以寡德嗣承睿图俯从衆诚勉受鸿称庆之大者岂在予一人推而广之宜及尔万姓爰因受册之礼遂施作解之恩俾与羣生同斯大庆卿尽忠训旅推美奉君省兹贺陈深见诚至

祭咸安公主文

维元和三年岁次戊子三月癸未某日皇帝遣某官某以庶羞之奠致祭于故咸安大长公主
靚濬毗伽可敦之灵曰惟姑柔明立性温惠保身静修德容动中?度组【摠五切】紉【详伦切】之训既习於公宫汤沐之封遂开於国邑及礼从出降义重和亲承渥泽於三朝播芳猷於九姓远修好信既申协比之姻殊俗保和实赖肃雍之德方凭福履以茂辉荣宜降永年遽归长夜悲深讎告宠极哀荣爰命使臣往申奠礼故乡不返乌孙之曲空传归路虽遥青塚之魂可复远陈薄酌庶鉴悲怀呜呼尚飨

与仕明诏

卿久镇边防初膺阃寄式旌勤劾俾洽恩荣褒德念功故进封以示宠忠诚亮节宜因实而锡名既表新恩亦惟旧典今改封卿丹阳郡王仍改名忠亮勉勤乃事以副所怀想宜知悉

与崇文诏

勅崇文段良玘至省所谢亡妻邑号具悉卿有济时之勲宠居袞职士政承积善之庆列在王官俾洽恩光故加褒赠念梧桐之早落不及夫荣追茱苳之遗芳宜从子贵式崇宠命以贲幽灵省兹谢章良用嘉叹

祭张敬则文

维元和三年岁次戊子七月辛巳朔二十七日丁未皇帝遣某官某以清酌之奠致祭于故凤翔节度使赠某官张敬则之灵惟尔挺武毅之质负将帅之才名以忠闻位由勤致自膺阃职益茂勲猷惠葺疲氓威吞黠虏一方膏雨千里长城继博望之功劳能恢代业传子房之筹略不坠家声方誓山河遽捐館舍逝川无舍远日有时徽绩空存书旗常而播美音容不见听輶?而增思永念忠勤弥深轸悼往陈遣奠庶鉴悲怀呜呼尚飨

与希朝诏

勅希朝刘忠谨至省所奏沙陀突厥共一千八百七十人并驼马器械归投事宜具悉卿以将帅之才镇华夷之要忧劳为国忠勇忘家声动寇戎尘清封略突厥等向风输款率属来宾虽慕我怀柔远无不至亦因卿威惠导之使来念其归投宜有优赐今赐衣服及匹段等自首领已下卿宜等第给付其部落家口等远经跋涉宜稍安存以劝归心用副注意

与元衡诏

勅元衡省所奏当管南界外生蛮东凌六部落大鬼主苴春等以所管子弟百姓等二千余户请内属黎州并奏南路蕃界消息者具悉卿以文武之才兼将相之任仁和下布黎庶获安威惠旁流蛮夷率附勲勤斯着倚赖弥深钦瞩之怀岂忘寤寐生蛮部落苴春等久阻声教遂此归投愿属黎州请通县道勉於抚慰以劝将来所奏蕃界事宜具已知悉戎虏虽闻丧败封疆不可无虞亦宜堤防用副忧矚

与陆庶诏

勅陆庶省所奏当管新开福建陆路四百余里者具悉卿望重周行寄分越徼嘉闻素着茂政累彰况勤可使人智能创物废惊波之路开砥石之途舍旧谋新以夷易险财力不费商旅斯通惠既及人动非扰下绩用可尚钦叹良深

荅卢?谢赐男从史德政碑文并移贯属京兆表

卿男从史为国重臣自领大藩厥有成绩公忠茂着政理殊尤勒石所以表勲赐文所以褒德惟功是念有善必旌是国旧章非予私渥昨又请移乡贯愿隶京邑家声益振臣节逾章虽清望标门崇冠山东之族而丹心恋阙耻为关外之人载省恳诚弥深嘉叹所谢知

与宗儒诏

敕宗儒卿邦家桢干班列羽仪尝作股肱弼谐无怠及司管龠镇静有方钦重之怀寝兴不舍春宫之长非贤不居既简朕心亦符人望今授卿礼部尚书并赐官诰往除余庆东都留守卿宜便与交割即赴上都想宜知悉

与希朝诏

勅希朝省所奏党项归投事具悉卿边隅寄重阃外事繁威行而军声外扬信及而戎心内附动皆展效进必尽忠劳绩弥彰倚望尤切党项拓跋忠敬等顷虽为盗今已经恩惧而归投情可容恕许其後効以补前非卿宜安存无使疑惧其磨梅部落等尚能继至亦许自新宜加招谕令知朕意

与韩弘诏

勅韩弘任光辅至省所陈请具悉卿文武全畧邦家重臣自居大藩厥有成绩辑宁百姓严整三军使予无忧惟尔之力省兹章奏恳愿朝宗诚嘉深衷难遂勤请朕以梁宋之地水陆要冲运路咽喉王室藩屏人疲易散非卿之惠不能安师衆难和非卿之威不能戢今衆方悦附人又知归镇抚之间事难暂辍虽恋深双阙积十年而颇劳然倚为长城舍一日而不可勉卿忠力布朕腹心宜体所怀即断来表

荅杜佑谢男师损除工部郎中表

卿道赞谟猷功成辅弼师损克承训义雅有令名岂惟赏延兼以能选班行久次颇积功勤郎署稍迁未为渥泽省兹章奏深见恳诚所谢知

与严砺诏

勅严砺省所奏进苍角鹰六联具悉卿任重列藩寄兼外阃事皆奉上动必竭诚时属劲秋致兹鸷鸟调习成性进献及时取其効用之能足表尽忠之节

与韩弘诏

勅韩弘卿苦心奉国极虑抚人惠彼一方于兹十载历展勤王之効累陈恋阙之诚才以任彰节因事着不加殊宠何表成功夫外拥旌旄爪牙之任重内参台袞股肱之寄深以尔一心授兹二柄永言倚赖当副诚怀今除卿同中书门下平章事依前宣武军节度等使余并如故并赐官告往想宜知悉

荅王锬陈让淮南节度使表

卿自领大藩累彰殊効惠安百姓表正一方虽恋阙诚深然殿邦寄切既执圭而肆覲宜返旆而劳旋况淮海要冲旌旄重任永言共理已有成功方注意于抚绥何沥诚而陈让难允来请宜体所怀

荅韩弘让同平章事表

致理之道审官为先以卿有文武之才故授卿以将相之任所冀外为藩翰张爪牙之威内赞谟猷宣股肱之力金谐允属衆望攸归方注意於安危何执谦而陈让所进官告今却赐卿无或再辞即断来表

画大罗天尊讚文

唐元和己丑岁四月十四日画大罗天尊一躯成奉为睿圣文武皇帝降诞之辰所造惟岁之春惟月之望诞千年一圣之始降百祥万寿之初电绕枢而夜明雷出震而时泰皇帝孝敬寅畏忧勤劳谦以谓无疆之休虽肇自于元圣莫大之庆思广被于羣生爰命国工俾陈绘事真相俨若玄风穆如疑从大罗感圣而降至诚上通於一德景福旁济於万灵休命耿光自兹无极词臣承诏恭为赞曰

大罗天兮高不测浩无倪兮杳无极中有圣兮无上尊惟玄德兮可升闻图相好兮仰高真诚上感兮福下臻俾百祥兮与万寿配圣日兮而长新

荅韩弘再让平章事表

将相兼委实难其人非其德不可谬承当其才不在悬让朕非虚授卿勿固辞宜断来章即奉成命已具前诏当体朕怀

画元始天尊讚【并序】

元者诸天之先始者万灵之母混而成一强以为名至哉无上尊得以是为号正月二十有三日德宗神武孝文皇帝在九仙之月遏八音之日也皇帝教弘玄训业奉真宗承文祖之贻谋申孝孙之诚敬以谓元始天尊者真仪不远随相而生神用无方应念而至故命设绘素展仪刑五彩彰施七宝严饰所以表当宁之瞻仰感在天之圣神通玄应於希夷集灵佑于肸鬻【许两切】词臣承命跪唱讚云

玄圣何在天上天欲往从之宵无缘命工设色五彩宣忽如真相见于前圣应圣兮玄又玄荐百福兮垂万年

北齐骠骑大将军高敖曹讚【并序奉勅撰】

高昂字敖曹渤海蓆【他历切】人也姿体甚异胆力过人累经战伐皆着功绩官至骠骑大将军仪同三司冀州刺史其勇敢忠壮冠于一时时称为名将後竟以攻战死于王事年四十八赠太尉谥曰忠武赞曰

敖曹之容好配子羽生扬勲烈死谥忠武武不顾身忠不忘主诚哉选士无以貌取

与骠国王雍羌书

勅骠国王雍羌卿性弘毅勇代济贞良训抚师徒镇寧邦部钦承王化思奉朝章得睦隣之善谋秉事大之明义又令爱子远赴阙庭万里纳忠一心禀命诚信弥着嘉想益深今授卿捡校太常卿并卿男舒难陀那及元佐摩诃思那等二人亦各授官告往至宜领之此所以表卿勲勤申朕恩礼敬受新命永为外臣勉弘令图以副遐瞩今有少信物具如别录想宜知悉也冬

寒卿比平安官吏百姓等并存问之遣书指不多及

与季安诏

勅季安刘清潭至省所奏贝州宗城县百姓刘宏为母病割股充祭事宜具悉卿任重弼谐寄深鎮守勤抚绥之政赞燮理之功至使部人忘身展孝虽因心有感诚化我之时风而率下可知足表卿之理行省兹陈奏钦叹良深

荅杜兼谢上河南少尹知府事表

三川封畿实重其任贰职纲纪亦难其人卿素怀器能累着声绩亚理以明慎选专领以展长才知己下车当亲抚绥伫闻报政用副忧勤所谢知

代忠亮荅吐蕃东道节度使论结都离等书【奉勅撰】

大唐四镇北庭行军泾原等州节度使捡校工部尚书兼御史大夫丹阳郡王朱忠亮致书大藩东道节度使论公都监军使论公麾下专使辱问悚慰良深国家与吐蕃代为舅甥日修邻好虽曰两国有一至于封疆尤贵和叶忽枉来问稍乖素诚虽有过言敢以衷告来书云频见烧草何使如然者至如时警边防岁焚宿草盖是每年常事何忽今日形言况牛马因风犹出疆以相及草木延火纵近境而何伤遽怀异端未敢闻命又云去年忽生异见近界筑城者且国虽通好军不彻警近边修缉彼此寻常况城是汉城地非蕃地岂乖通理何致深疑静言思之谁生异见顷当报牒彼已息讼今又再言寧无慙德又云皇天无亲有德即辅者皇帝君临万方迨及四载道光日月德动乾坤南北东西化无不及若非皇天辅德明神福仁西域何为归诚南蛮何为慕化风雨何因大顺岁时何因屡丰则神助天亲可明验矣彼若无故生疑无端结怨但思小利不务远图则咎孽之生?不在此永言取笑却请三思又云汉之臣下频有叛逆者近以吴蜀小寇暂肆猖狂未及讨除寻以殄灭皇威不露妖沴自清岂假彼蕃远思傍助忠亮谬蒙恩渥叨在藩垣恭守边隅幸邻封壤纵未能为汉名将亦不可谓秦无人辄献直言以祛深惑愿推诚信同保始终各勉令图以求多福岁暮严冬惟所履安胜远垂惠颺愧佩殊深今因押衙回亦有少荅信具如别纸恕轻渺也不具忠亮敬白

与南诏清平官书

勅南诏清平官段诺突李附览?何栋尹辅首段谷普李异傍郑蛮利等段史倚至知异牟寻丧逝朕以义重君臣情深轸悼卿等哀慕所切当何可任又知合劝继业抚人输诚奉教蒸黎咸父封部获安皆是卿等同竭忠谋佐成休绩永言及此嘉慰良深勉终令图以嗣遐矚今遣諫议大夫兼御史中丞段平仲持节册命合劝想当悉之卿等各有少信物具如别錄至宜领也春寒卿等各得平安好遣书指不多及

荅王锬贺赉恤江淮德音表

水旱流行江淮艰食朕明申诏旨亲遣使臣蠲其逋租赈以公廩爰与利物之利用表忧人之忧庶俾疲民均沾惠泽卿克勤乃职共理为心省兹贺陈深见诚意

与茂昭诏

勅茂昭卢校至省所陈奏具悉卿翼戴君亲出入将相久专戎阃累覲王庭忠劳必竭其智谋诚恳每形於章表近者志在忧国虑及安边请率精兵亲防黠虏朕以卿当管军镇寄重事殷实藉抚绥用安封部虽未允所请而深嘉乃诚今又密奏恒州具申事体曲尽忠勤之节备知丹赤之心言念再三发于嗟叹眷重之至并在予怀想宜知悉

与潘孟阳诏

勅孟阳卿夙怀才畧早振声猷历践班行累彰绩效自守关辅克举藩条惠及蒸黎威行军镇永言所任未展其能朕以东川蜀门重镇弊承军後雄压险中思得忠勤之臣抚此凋残之俗量才注意无以易卿今授卿劔南东川节度观察使并赐官告往想宜知悉

荅宰相杜佑等贺德音表

古先圣王托于人上与百姓同其欲与天下共其忧唯推是心可底于道朕临御万国迨兹五年惕厉之怀虽勤于夙夜愆伏之候犹害於岁时思革弊以救灾在济人而损己是用钦刑缓死责已恤贫罢郡国之贡珍省宫廩之烦费延春令而布仁行惠先南风而解愠阜财庶凭欢心以召和气卿等或匪躬献替或悉力弼谐啓沃之间已申霖雨之用燮理之际伫见阴阳之和各宜勉之以辅予理所贺知

荅宗正卿李词等贺德音表

朕统承鸿绪子育苍生累岁有秋今春不雨在阴阳之数虽有盈虚为父子之心敢忘惻隐俾除人弊以荡岁灾卿等任重宗卿恩连属籍省兹陈贺深见忠诚

荅将军方元荡等贺德音表

朕以时阳舛候春泽愆期思备旱之方无如贬省务动天之德莫若精诚是以修已恤人去烦节用冀荅天戒以致时和卿志竭邦家职修军卫省兹表章深用嘉之所贺知

与回鹘可汗书

皇帝敬问回鹘可汗夏热想比佳适可汗有雄武之姿英果之畧统制诸部君长一方纂承前修继守旧好故得邑落蕃盛士马精强连挫西戎永藩中夏况向风之义每勤于朝聘事大之敬常见於表章动皆由衷言必合礼朕所以深嘉忠款遐想风?至於寝兴不忘叹矚勉宏令德

用副诚怀达覽将军等至省表其马数共六千五百匹据所到印纳马都二万匹都计马价絹五十万匹缘近岁以来或有水旱军国之用不免阙供今数内且方圆支二十五万匹分付达覽将军便令归国仍遣中使送至界首虽都数未得尽足然来使且免稽留贵副所须当悉此意顷者所约马数盖欲事可久长何者付絹少则彼意不充纳马多则此力致歉马数渐广则欠价渐多以斯商量宜有定约彼此为便理甚昭然况与可汗礼在往来义存终始亲邻既通于累代恩好益于往时所以万里推诚期于一言见信远思明智固体朕心其东都太原置寺此令人勾当事缘功德理合精严又有彼国师僧不必更劳人捡校其见捻拓勿施邬达于等今并放归所令帝德将军安庆云供养师僧请住外宅又令骨都禄将军充捡校功德使其安立请随般次放归本国者并依来奏想宜知悉今赐少物具如别録内外宰相及判官摩尼师等并各有赐物至宜准数分付内外宰相官吏师僧等并存问之遣书指不多及

与韦丹诏

勅韦丹竇从直至省所陈贺并奏江饶等四州旱损其所欠供军留州钱米等并已放免又奏权减俸及修造陂堰并劝课种蒔粟麦等事宜具悉朕顷缘时旱虑害农功虽推咎已之心敢望动天之德而未逾浹日膏泽沛然仰荷玄休俯增祗惕卿喜深称庆忠切分忧既览贺陈兼详奏请至如蠲逋以恤人隐减俸以济军须抑末业而移风务兹菽麦防旱年而歉雨修利陂塘皆合其宜并依所奏非卿公勤奉上仁惻发中则共理之心不能至此再三兴叹一二难申勉于始终以副朕意想宜知悉

与从史诏

敕从史史澣至省所陈谢具悉卿亡父早践班荣久着伟绩永言褒赠自叶典常况卿孝友承家勤劳事国念兹忠节皆禀义方将慰匪莪之心宜流自叶之泽岂为殊渥频至谢章

荅宰相杜佑等贺德音表

朕以春候发生岁功资始顺阳和而布政赈贫乏而劝农载念罪人因除弊事随其所利施以为恩富庶之端实渐于此卿等义敦宗戚诚竭君亲省兹贺陈用增嘉叹

与孙璿诏

敕孙璿刘德惠至省所进陇右地图兼进战车阵图车樣及奏陈收复河湟事宜者具悉卿尹兹右辅固乃西疆创制戎车缮修军实思收故地誓立殊勲载览阵图兼详所奏诚得开边之畧益加报国之心斯谓尽忠弥增注意眷言所至无忘于怀

与李良仅诏

敕李良仅卿久在军门习知边事居常恭恪动必忠勤眷乃才良可分忧寄今授卿延州刺史

兼安塞军使并赐官告往延州既兼军镇且杂蕃戎防遏抚绥两须得所宜勉所任用副朕怀

答京兆府二十四县耆壽谢赈贷表

朕勤求人隐慎恤农功念播植之时必资首种虑悬罄之日多乏见粮将便公私宜从歛散卿等名登庶老业守先畴各勉农人以副朕意所谢知

白氏长庆集卷五十七

卷五十八

钦定四库全书

白氏长庆集卷五十八

唐白居易撰

奏状【凡十首】

初授拾遗献书【元和三年进】

五月八日翰林学士将仕郎守左拾遗臣白居易顿首顿首谨昧死奉书于施展【音倚】之下臣伏奉前月二十八日恩制除授臣左拾遗前充翰林学士者臣与崔羣同状陈谢但言忝冒未吐衷诚今者再黜宸严伏惟重赐详览臣按六典左右拾遗掌供奉讽谏凡发令举事有不便于时不合于道者小则上封大则庭诤其选甚重其秩甚卑所以然者抑有由也大凡人之情位高则惜其位身贵则爱其身惜位则偷合而不言爱身则苟容而不谏此必然之理也故拾遗之置所以卑其秩者使位未足惜身未足爱也所以重其选者使上不忍负恩下不忍负心也夫位未足惜恩不忍负然後能有阙必规有违必谏朝廷得失无不察天下利病无不言此国朝置拾遗之本意也由是而言岂小臣愚劣闇懦所宜居之哉况臣本乡里?儒府县走吏委心泥滓絶望烟霄岂意圣慈擢居近职每宴饫无不先及每庆赐无不先沾中廕之马代其劳内厨之膳给其食朝慙夕惕已逾半年尘旷渐深忧愧弥剧未伸微効又擢清班臣所以授官已来仅将十日食不知味寝不遑安唯思粉身以荅殊宠但未获粉身之所耳今陛下肇建皇极初受鸿名夙夜忧勤以求致理每施一政举一事无不合于道便于时故天下之心颺颺然日有望于太平也然今後万一事有不便于时者陛下岂不欲闻之乎万一政有不合于道者陛下岂不欲革之乎候陛下言动之际诏令之间小有遗阙稍关损益臣必密陈所见潜献所闻但在圣心裁断而已臣又职在中禁不同外司欲竭愚衷合先陈露伏希天鉴深察赤诚无任感恩欲报恳欸屏营之至谨言

论制科人状

近日内外官除改及制科人等事宜

右臣伏见内外官近日除改人心甚警远近之情不无忧惧喧喧道路异口同音皆云制举人牛僧孺等三人以直言时事恩獎登科被落第人怨谤加诬惑乱中外谓为狂妄斥而逐之故并出为关外官扬於陵以考策敢收直言者故出为广府节度韦贯之同所坐故出为果州刺史裴垍以覆策又不退直言者故免内职除户部侍郎王涯同所坐出为虢州司马卢坦以数

事举为人所恶因其弹奏小误得以为名故黜为左庶子王播同之亦停知杂臣伏以裴垪王涯卢坦韦贯之等皆公忠正直内外咸知所宜授以要权致之近地故比来衆情私相谓曰此数人者皆人之望也若数人进则必君子之道长若数人退则必小人之道行欲卜时事之否臧在数人之进退也则数人者自陛下嗣位已来并蒙奨用或任之耳目或委以腹心天下人情日望致理今忽一旦悉疎弃之或降于散班或斥于远郡设令有过犹可优容况且无瑕岂宜黜退所以前月以来上自朝廷下至衢路衆心汹汹惊惧不安直道者疚心直言者杜口不审陛下得知之否凡此除改传者纷然皆云裴垪等不能委曲顺时或以正直忤物为人之所媒孽本非圣意罪之不审陛下得闻之否臣未知此说虚实但献所闻所闻皆虚陛下得不明辨之乎所闻皆实陛下得不深虑之乎虚之与实皆恐陛下要知臣若不言谁当言者臣今言出身戮亦所甘心何者臣之命至轻朝廷之事至大故也臣又闻君圣则臣忠上明则下直故尧之圣也天下已太平矣尚求诽谤以广聪明汉文之明也海内已理矣贾谊犹比之倒悬可谓痛哭二君皆容纳之所以得称圣明也今陛下明下诏令徵求直言反以为罪此臣所以未谕也陛下视今日之理何如尧与汉文之时乎若以为及之则诽谤痛哭尚含容而纳之况徵之直言索之极諫乎若以为未及则僧孺等之言固宜然也陛下纵未能推而行之又何忍罪而斥之乎此臣所以为陛下流涕而痛惜也德宗皇帝初即位年亦徵天下直言极諫之士亲自临试问以天旱穆质对云两汉故事三公当免卜式着议宏羊可烹此皆指言当时在权位而有恩宠者德宗深嘉之自第四等拔为第三等自畿尉擢为左补阙书之国史以示子孙今僧孺等对策之中切直指陈之言亦未过于穆质而遽斥之臣恐非嗣祖宗承耿光之道也书诸史策後嗣何观焉陛下得不再三省之乎臣昨在院与裴垪王涯等覆策之时日奉宣令臣等精意考覆臣上不敢负恩下不忍负心唯秉至公以为取舍虽有讐怨不敢弃之虽有亲故不敢避之唯求直言以副圣意故皇甫湜虽是王涯外甥以其言直合收涯亦不敢以私嫌自避当时有状具以陈奏不意羣心嗾嗾构成祸端圣心以此察之则或可悟矣傥陛下察臣肝胆知臣精诚以臣此言可以听采则乞俯回圣览特示寛恩僧孺等准任例与官裴垪等依旧职奨用使内外人意欢然再安若以臣此言理非允当以臣覆策事涉乖宜则臣等见在四人亦宜各加黜责岂可六人同事唯罪两人虽圣造优容且过朝夕在臣惧惕岂可苟安敢不自陈以待罪戾臣今职为学士官是拾遗日草诏书月请諫纸臣若默默惜身不言岂唯上孤圣恩实亦下负神道所以密缄手疏潜吐血诚苟合天心虽死无恨无任忧惧激切之至

论于頔裴均状

于頔裴均欲入朝事宜

右臣闻诸道路皆云于頔裴均累有进奉并请入朝伏闻圣恩已似允许臣侧听时议内酌事情为陛下谋恐非稳便昼夜思虑不敢不言伏见贞元以来天下节将握兵守土少肯入朝自陛下刑服三凶威加四海是得诸道节度使三二年来朝廷追则追替则替奔走道路惧承命之不暇斯则圣德皇威大被于四方矣夫谋宜可久事贵得中当难制之时则贵欲令其朝覲及可制之日则不必使之尽来何则安衆心收衆望在调驭之得其宜也臣伏见近日节度使或替或追稍似烦数今又许于頔等入奏或虑便留在朝臣细思之有三不可何者窃见外使入奏不问贤愚皆欲仰希圣恩傍结权贵上须进奉下须人事莫不減削军府割剥疲人每一

入朝甚于两税又闻于頔裴均等数有进奉若又许来荆襄之人必重困於剥削矣夺军府疲人之不足奉君上权贵之有余伏料圣心知之深所不忍此不可一也臣又窃闻时议云近日诸道节度使或以进奉希旨或以货贿藩身谓恩泽可图谓权位可取以入覲为请以恋阙为名须来即来须住即住要重位即得重位要大权即得大权进退周旋无求不得天下节度使尽萌此心不审圣聪闻此议否今于頔等以入覲为请若又许之岂非须来即来乎既来必以恋阙为名若又许之岂非须住即住乎则重位自然合加况必求之乎大权不得不与况必图之乎重位大权人谁不爱于頔既得则茂昭求之臣闻茂昭又欲入朝已谋行计茂昭亦宰相也亦国亲也若引于頔为例独不可乎若尽与之则陛下重位大权是以人情假人也授之可乎若独与彼不与此则忿争怨望之端自此而作今幸门已开矣速杜之又令于頔等开之臣必恐圣心有时而悔矣其不可二也臣又窃见自古及今君臣之际权太重则下不得所势太逼则上不甚安今于頔任兼将相来则总朝廷之权家通国亲入则连戚里之势势亲则疎者不敢谏权重则羣下不敢言臣虑于頔未来之间内外迎附之者其势已赫赫炎炎矣况其已来乎臣于頔未到之间内外合言者已不敢言矣况其已到乎脱或至此陛下有术以制驭之耶若用术制之不如不制之安也若又无术将如之何且于頔身是大臣子为驸马性灵事迹陛下素谙一朝到来权兼内外若以規制则必失君臣之心若纵其作为则必败朝廷之度进退思虑殆圣忧其不可三也凡此三不可事实不细伏乞圣览再三思之今臣所言皆君臣之密机安危之大计伏望秘藏此状不令左右得知况臣以疎议亲以贱论贵语多不便动有悔尤言出身危非不知耳但以职居近密身被恩荣苟有闻知即合陈露倘言而得罪亦臣所甘心若默而负恩则臣所不忍伏希圣鉴俯察愚诚谨具奏闻谨奏

论和籴状

今年和籴折籴利害事宜

右臣伏见有司以今年丰熟请令畿内及诸处和籴令收贱谷以利农人以臣所观有害无利何者凡曰和籴则官出钱人出谷两和商量然後交易也比来和籴事或不然但令府县散配户人促立程限严加徵催苟有稽遲则被追捉迫蹙鞭撻甚于税赋号为和籴其实害人倘依前而行臣故曰有害无利也今若有司出钱开塲自籴比于时价稍有优饶利之诱人人心情愿且本请和籴以图利人人若有利自然愿来利害之间可以此辩今若除前之弊行此之便是真得和籴利人之道也二端取舍伏惟圣旨裁之必不得已则不如折籴折籴者折青苗税钱使纳斛斗免令贱糶别纳见钱在於农人亦甚为利况度支比来所支和籴价钱多是杂色匹段百姓又须转卖然後将纳税钱至于给付不免侵偷货易不免折损所失过本其弊可知今若量折税钱使纳斛斗既无贱糶麦粟之费又无转卖匹段之劳利归於人美归于上则折籴之便岂不昭然由是而论则配户不如开塲和籴不如折籴亦甚明矣臣久处村间曾为和籴之户亲被迫切蹙实不堪命臣近为畿尉曾领和籴之司亲自鞭撻所不忍覩臣顷者常欲疏此人病闻于天聪疎远贱微无由上达今幸擢居禁职列在谏官苟有他闻犹合陈献况备谄此事深知此弊臣若緘默隐而不言不惟上孤圣恩实亦内负夙愿犹虑愚诚不至圣鉴未回即望试令左右可亲信者一人潜问乡村百姓和籴之与折籴孰利而孰害乎则知臣言不敢苟耳或虑陛下以敕命已下难于移改以臣所见事有不然夫圣人之举事也唯务便人唯求

利物若损益将半则不必迁移若利害相悬则事须追改不独于此其他亦然伏望宸衷审赐
详察谨具奏闻谨奏

论太原事状【三件】

严绶辅光

右严绶辅光太原事迹其间不可远近具知臣前日对时已仔细面奏今奉宣辅光已替严绶
续追此皆圣鉴至明左右不能惑听合於公议断自宸衷内外人心甚为愜当其严绶早须与
替不可更迟缘与辅光久相交结军中补署职掌比来尽由辅光今见别除监军小人乍失依
托或恐严绶相党曲为妄陈军情事宜之间须过防虑伏望圣恩速令贞亮赴本道便许严绶
入朝

贞亮

右贞亮原是旧人曾任重职陛下以太原事弊使替辅光然臣伏闻贞亮先充汴州监军日自
置亲兵数千又任三川都监日专杀李康两节度使事迹深为不可为性自用所在专权若贞
亮处事依前即太原却受其弊虽将追改难以成功其贞亮发赴本道之时?须以承前事切加
约束令其戒惧此事至要伏惟圣心不忘

范希朝

右希朝前在振武威令大行至今蕃戎望风畏伏况又勤俭信实所在士卒归心今若太原要
人无出希朝之右伏恐圣意虑其有年臣又访闻希朝筋力犹堪駈使但且令镇抚必愜军情
待其一二年间威制成立然後择能者则必易守成规则虽老年事须且用其灵武比太原虽
小亦是要镇如纳臣愚见伏?便须择人与希朝相代谨具奏闻

奏请加德音中节目【二件】

缘今时旱请更减放江淮旱损州县百姓今年租税

右伏以圣心忧軫重降德音欲令实惠及人无如减放租税昨正月中所降德音量放去年钱
米伏闻所放数内已有纳者纵未纳者多是逃亡假令不放亦徵不得况旱损州县至多所放
钱米至少百姓未经丰熟又纳今年税租疲乏之中重此徵迫人力困苦莫甚于斯却是今年
伏望圣恩更与宰臣及有司商量江淮先旱损用作分数更量放今年租税当疲困之际降惻
隐之恩感动人情无出于此敢竭愚见以副圣心

请?放後宫内人

右伏见大历已来四十余岁宫中人数稍久渐多伏虑駟使之余其数犹广上则虚给衣食有供亿糜费之烦下则离隔亲族有幽闭怨旷之苦事宜省费物贵遂情顷者已蒙圣恩量有拣放闻诸道路所出不多臣伏见自太宗玄宗已来每遇灾旱多有?放书在国史天下称之伏望圣慈再加处分则盛明之德可动天心感悦之情必致和气光垂史册美继祖宗贞观开元之风复见于今日矣非小臣愚恳不能发此言非陛下英明不能行此事如蒙允许便请于德音中次第处分谨具奏闻伏待圣旨谨奏

论于頔所进歌舞人事宜状

右臣三五日来闻于时议云前件所进者并是于頔爱妾被普寧公主闇欲选进今于頔所进事非获已者臣未知此说虚之与实再三思之皆为不可何则于頔自入朝来陛下待之深得其所存其大体故?加宠位知其性恶故不与威权中外人情以为至当在於于頔亦自甘心今因普寧夺其爱妾衆人既有流议于頔得以为词臣?此事不益圣德在臣愚见岂敢不言伏见陛下数月以来分别邪正所有制断所有处置无不合於公论无不惬于人情唯此一事实乖时体关於损益臣实惜之今道路云云皆有此说是于頔自进亦恐外人不知去就之间恐须却赐于頔内足以辨明圣意外足以止息浮词又令于頔有所感戴臣所闻所见如此伏恐陛下要知辄敢密陈庶裨万一谨具奏闻谨奏

论魏徵旧宅状

李师道奏请出私财收赎魏徵旧宅事宜

右今日守谦宣令撰与师道诏所请收赎魏徵宅还与其子甚合朕心允依来奏者臣伏以魏徵是太宗朝宰相尽忠辅佐以致太平在于子孙合加优恤今缘子孙穷贱旧宅典卖与人师道请出私财收赎却还其後嗣事关激劝合出朝廷师道何人辄掠此美依宣便许臣分非宜况魏徵宅内旧堂本是宫中小殿太宗特赐以表殊恩既又与诸家不同尤不宜使师道与赎计其典卖其价非多伏望明勅有司特以官钱收赎使还後嗣以劝忠臣则事出皇恩美归圣德臣苟有所见不敢不陈其与师道诏未敢依宣便撰伏待圣旨谨具奏闻谨奏

论王锬欲除官事宜状

右臣窃有所闻云王锬见欲除平章事未知何故有此商量臣伏以宰相者人臣极位天下具瞻非有清望大功不合轻授王锬既非清望又无大功若加此官深为不可昨日裴均除平章事内外之议早已纷然今王锬若除则如王锬之辈皆生冀望之心矣若尽与则典章大坏又未感恩若不与则?薄有殊或生怨望幸门一啓无可奈何臣又闻王锬在镇日不恤凋残唯务差税淮南百姓日夜无繆五年诛求百计侵削钱物既足部领入朝号为羨余亲自进奉凡有耳者无不知之今若授同平章事臣恐四方闻之皆谓陛下得王锬进奉而与宰相也臣又恐诸道节度使今日已後皆割剥生人营求宰相私相谓曰谁不如王锬邪故臣以为深不可也其王锬归镇与在朝伏望并不除宰相臣尚未知所闻信否贵欲先事而言或恐万一已行即

言之无及伏惟圣鉴俯察愚衷谨具奏闻谨奏

论裴均进奉银器状

右臣伏闻向外传说云裴均前月二十六日于银台进奉前件银器虽未审知虚实然而物议喧然既有所闻不敢不奏伏以陛下昨因时旱念及疲人特降德音停罢进奉天意如感雨泽应期巷舞途歌咸呼万岁伏自德音降後天下颺望遵行未经旬月之间裴均便先进奉若诚有此事深损圣德臣或虑有人云裴均所进银器发在德音之前遂劝圣恩不妨收纳以臣所见事固不然臣闻衆议皆云裴均性本贪残动多邪巧每假进奉广有诛求料其深心不愿停罢必恐即日修表倍程进来欲试朝廷尝其可否何者前月三日降德音准诸道进奏院报事例不过四五日即裴均合知至二十六日进物方到以此详察足见奸情今若便容果落邪计况一处如此则远近皆知臣恐诸道依前从此不守法度则是陛下明降制旨又自弃之何以制驭四方何以取信天下臣反覆思虑深为陛下惜之伏唯德音节文除四节及旨条外有违越进奉者其物送纳左藏库仍委御史台具名闻奏若此事果实则御史台必准制弹奏谏官必谏宰相必论天下知之何俾圣政以臣所见伏望明宣云裴均所进银器虽在德音之前恐四方不知宜送左藏库收纳如此则海内悦服天下欢心事出宸衷美归圣德又免至御史谏官奏论之然後有处置在于事体深以为宜伏愿圣心速赐裁断谨具奏闻谨奏

白氏长庆集卷五十八

卷五十九

<集部,别集类,汉至五代,白氏长庆集>

钦定四库全书

白氏长庆集卷五十九

唐白居易撰

奏状二【凡二十四首】

论孙璿【神六切】张奉国状

孙璿

右伏以凤翔右辅之地控压陇蜀又近国门最为重镇承前以来多择有功勲德望者为之节度使昨者孙璿忽除此官臣缘素未谙知不敢轻议可否及制下之後甚不愜人心孙璿虽久从军不闻有大功効自居禁卫亦无可称至於姓名衆未知有纵有才畧堪任将帅犹宜且试於小镇不合便授此重藩岂唯公议之间以为过当亦恐同类之内皆生幸心况今圣政日明朝纲日举每命一官一职人皆侧耳听之则除授之间深宜重慎今孙璿已受成命未可遽又改移待到凤翔观其可否以後不可不审伏恐圣聪要知

张奉国

右奉国当徐州用兵之时已有殊効及李錡作乱之日又立大功忠节赤诚海内推服近来将校少有比伦已蒙圣恩授金吾大将军以示奨劝以臣所见更宜与一方镇以感动天下忠臣之志以摧摄天下奸臣之心何者奉国之事无人不知方镇之荣无人不爱若奉国更得节度使天下闻知人皆为贪宠荣谁不争効忠顺万一若一方有事一帅负恩则麾下偏裨竞为奉国乱臣贼子不敢不息一则明劝忠贞二则闇销祸乱圣人机柄正在於斯今奉国闻已有年亦宜速用事不可失臣深惜之然以奉国未曾为理人官恐未可便授大镇若近边次节度有要替处与奉国最为得宜谨具奏闻谨奏

奏所闻状

向外所闻事宜

右伏见六七日来向外传说皆云有进旨令宣与诸道进奏院自今已後应有进奉并不用申报御史台如有人勘问便仰录名奏来者内外相传不无惊怪臣伏料此事多是虚传且有此闻不敢不奏伏惟德音除四节外非时进奉一切并停如有违越仰御史台察访闻奏今若不许报台不许勘问即是许进奉而废德音也伏以陛下忧人思理发自深诚德音中停罢进奉最是大节昨者裴均所进银器发在德音之前犹虑四方不知将谓容有违越特令送出外库宣报所司远近传呼闻於道路此则不独人心欣跃感动四方实亦国史光明垂示百代今未踰数月忽有此消息贺德音之使未絶於道途许进奉之声已闻於内外此衆情所以惊愕而不测也臣访昨闻又无明勅伏料圣意必无此处分但恐传宣之际或致疑误遂令内外有此流传实恐旬月之间散报诸道亏损圣政无甚於斯若此果虚即望宣示内外令知圣旨使息虚声伏愿宸衷速有处分谨具奏闻谨奏

奏阍【无分切】乡禁囚状

虢州阍乡湖城等县禁囚事宜

右伏闻前件县狱中有囚数十人并积年禁系其妻儿皆乞於道路以供狱粮其中有身禁多年妻已改嫁者身死狱中取其男收禁者云是度支转运下囚禁在县狱欠负官物无可填陪一禁其身虽死不放前後两遇恩赦今春又降德音皆云赦文不该至今依旧囚禁臣伏以罪坐之刑无重於死故杀人者罪止於死坐赃者身死不徵今前件囚等欠负官钱诚合填纳然以贫穷孤独唯各一身债无纳期禁无休日至使夫见在而妻嫁父已亡而子囚自古罪人未闻此苦行路见者皆为痛伤况今陛下爱人之心过於父母岂容在下有此穷人古者一妇怀冤三年大旱一夫结愤五月降霜以类言之臣恐此囚等忧怨之气必能伤陛下阴阳之和也其囚等人数及所欠官物并赦文不该事由臣即未知委细伏望与宰相商量兼令本司具事由分析闻奏如或是实禁系不虚伏乞特降圣慈发使一时放免一则使縲囚获宥生死皆知感恩二则明天听及卑远近自无冤滞事关圣政不敢不言臣兼恐度支盐铁使下诸州县禁囚更有如此者伏望便令续条疏其事奏上

论承璀【取猥切】职名状

承璀充诸军行营招讨处置使

右缘承璀职名自昨日来臣与李绹等已频论奏又奉宣令依前定者臣实深知不可岂敢顺旨便休伏望圣慈更赐详察臣伏以国家故事每有征伐专委将帅以责成功近年以来渐失旧制始加中使命为都监顷者韩全义讨淮西之时以贾良国为都监近日高崇文讨刘辟之时以刘贞亮为都监此皆权宜且为近例然则兴王者之师徵天下之兵自古及今未有令中使专统领者今神策军既不置行营节度使即承璀便是制将又充诸军招讨处置使即承璀便是都统岂有制将都统而使中使兼之臣恐四方闻之必轻朝廷四夷闻之必笑中国王承宗闻之必增其气国史记之後嗣观之陛下忍令後代相传云以中官为制将都统自陛下始伏乞圣虑以此思之臣又兼恐刘济茂昭及希朝从史乃至诸道将校皆耻受承璀指麾心既

不齊功何由立此是資承宗之計而挫諸將之勢也伏乞聖慮又以此思之臣伏以陛下自春宮以來則曾驅使承瓘歲月既久恩澤遂深望陛下念其勤勞貴之可也陛下憐其忠赤富之可也至於軍國權柄動關於治亂朝廷制度出自於祖宗陛下寧忍徇下之情而自隳法制從人之欲而自損聖明何不思於一時之間而取笑於萬代之後今臣忘身命瀝肝膽為陛下痛言者非不知逆耳非不知危身但以螻蛄之命至輕社稷之計至重伏乞聖慮又以此思之陛下必不得已事須用之即望改為都監且徇舊例雖威權尚重而制度稍存天下聞之不甚驚聽如蒙允許伏望速宣與中書改為諸軍都監臣不勝憂迫懇切彷徨之至

論元稹第三狀

監察御史元稹貶江陵府士曹參軍

右伏緣元稹左降事宜昨李絳崔羣等再已奏聞至今未蒙宣報伏恐愚誠未懇聖慮未回臣更細思事有不可所以塵黷至於再三臣內察事情外聽衆議元稹左降不可者三何者元稹守官正直人所共知自授御史已來舉奏不避權勢只如奏李公佐等之事多是朝廷親情人誰無私因以挾恨或假公議將報私嫌遂使誣謗之聲上聞天聽臣恐元稹左降已後凡在位者每欲舉事先以元稹為戒無人肯為陛下當官執法無人肯為陛下嫉惡繩愆內外權貴親黨縱橫有大過大罪者必相容隱而已陛下從此無由得知其不可者一也昨者元稹所追勘房式之事心雖奉公事稍過當既從重罰足以懲違況經謝恩旋又左降雖引前事以為責詞然外議諠諠皆以為元稹與中使劉士元爭廳自此得罪至於爭廳事理已具前狀奏陳況聞劉士元踢破驛門奪將鞍馬仍索弓箭吓辱朝官承前已來未有此事今中官有罪未見處置御史無過却先貶官遠近聞知實損聖德臣恐從今已後中官出使縱暴益甚朝官受辱必不敢言縱有被凌辱毆打者亦以元稹為戒但吞聲而已陛下從此無由得聞其不可者二也臣又訪聞元稹自去年以來舉奏嚴厲在東川日枉法收沒平人資產八十余家又奏王紹違法給券令監軍神樞及家口入驛又奏裴玢【卑民切】違勅旨徵百姓草又奏韓皋使軍將封杖打殺縣令如此之前後甚多屬朝廷法行悉有懲罰計天下方鎮皆怒元稹守官今貶為江陵判司即是送與方鎮從此方鎮報怨朝廷何由得知臣聞德宗時有崔善貞密告李錡必反德宗不信送與李錡李錡大怒遂掘坑縱火燒殺崔善貞未數年李錡果反至今天下為之痛心臣恐元稹左降後方鎮有過無人敢言皆欲惜身永以元稹為戒如此則天下有不軌不法之事陛下無由得知此其不可者三也若无此三不可假如朝廷誤左降一御史蓋是小事臣何敢煩黷聖聽至於再三乎誠以所損者微所關者大以此思慮敢不極言陛下若以臣此言為忠又未能別有處置必不得已則伏望且令追制改與一京師閑官免令元稹却事方鎮此乃上裨聖政下愜人情伏望細察事情斷在聖意謹具奏聞謹奏

請罷兵第二狀【五月十日進】

請罷恒州兵事宜

右緣討伐恒州事宜前者已具奏聞此事至大至切臣不合一奏便休伏愿聖聰再賜詳省臣

伏以河北事体本不合用兵既已用兵亦希万一所以人意或望成功今看事势保必无望何者陛下本用兵之初第一倚望承瓘第二准拟希朝茂昭今承瓘自去以来未敢苦战已丧大将先挫军威至今与从史两军入贼界下营未得从史虽经接战与贼胜负畧均况奏报之间又事恐非实迁延进退贵引日时不唯意在逗遛兼是力难支敌希朝茂昭数月以来方入贼界据所奏到贼新市城一镇便过不得又奏深泽县今却被贼打破则其进讨之势想亦可知刘济亲领全军分围乐寿又奏贼城坚守卒不易攻师道季安元不可保今看情状似相计会各收一县便不进军如此事由陛下具见据其去就岂有成功未审圣心何如更有所望以臣愚见速须罢兵若又迟疑其害有四可为陛下痛惜者二可为陛下深忧者二何则若果有成功即不论用度多少既的知不可即不合虚费赀粮悟而後行事亦非晚今迟校一日有一日之费更延旬月所费滋多终须罢兵何如早罢臣伏见陛下比来爱人省用发自深心至於圣躬每事节俭今以府库钱帛百姓脂膏资助河北诸侯转令富贵强大臣每念此不胜愤叹此其为陛下痛惜者一也臣伏恐河北诸将见吴少阳已受制命必引事例轻重同词请雪承宗若章表继来即议无不许请而後舍模样可知转令承宗胶固同类如此则与夺皆由邻道恩信不出朝廷实恐威权尽归河北臣每念此实所疚心此其为陛下痛惜者二也今天时已热兵气相蒸至於饥渴疲劳疫疾暴露衣甲暑湿弓箭疮痍上有赤日前有白刃驱以就战人何以堪纵不惜身亦难忍苦况神策官健又最乌杂以城市之人例皆不惯如此忽思生路或有奔逃一人若逃百人相扇一军若散诸军必摇事忽至此悔将何及此其为陛下深忧者一也臣伏闻回鹘吐蕃皆有细作中国之事小大尽知今聚天下之兵唯讨承宗一贼自冬及夏都未立功则兵力之强弱资费之多少岂宜使西戎北虏一一知之忽见利生心承虚入寇以今日之势力可能救其首尾哉兵连祸生何事不有万一及此实关安危臣每思之忧入骨髓此其为陛下深忧者二也伏惟详臣此状察臣此心审赐裁量速有处分如此则是陛下社稷宗庙之福不独天下幸甚谨具奏闻

请罢兵第三状【六月十五日进】

请罢恒州兵马事宜

右臣所请罢兵前後已频陈奏今日事势又更不同比来日月渐深忧惶转甚若不极虑若不切言是臣惧罪惜身上负陛下伏希圣鉴怜察血诚知臣心如此更详此状臣伏以行营近日事体陛下一一具知师道令收棣州至今竟未奉诏至於表章词意近者亦甚乖宜季安等心元不可测与贼计会各收一空县而已相顾拱手便休闻昨者泽潞溃散健儿其间有入魏博却投邢州者季安追捉并按军令昨所与诏都不禀承据此情状畧无形迹但恐今日以後此辈无不办为又比来所望有功只在南北两道今师道希朝等屯军向欲半年过新市一镇未得茂昭又称兵少特地方请加兵则南道势力今亦可见北道承瓘竟未立功元阳新到邢州又奏兵数至少请诸军兵马议不可抽假使承瓘等竭力尽忠终恐不副圣意据此事势万无成功陛下犹未罢兵不知更有何所待臣伏恐刘济近日情似尽忠今忽罢兵虑伤其意以臣所见理固不然刘济大奸过於羣辈外虽似顺中不可知有功无功进退获利初闻罢讨或可有词见雪恒州必私怀喜何则於承宗本末之势同也假令刘济实忠实意陛下难阻其心犹须计量重轻舍小图大岂缘刘济一人惆怅而不顾天下远图况今事情又不至此伏望圣意

断之不疑臣昨日以军久无功时又渐热人不堪命虑有奔逃前状之中已具陈奏今果闻神策所管徐泗郑滑两道兵马各有言语似少不安臣自闻之不胜忧切一军若不宁贴必扇诸军之心自此动摇何虑不有事忽至於此者则陛下求不罢讨得乎一种罢兵何如早罢必待事不得已然後罢之只使陛下威权转销天下模樣更恶如此事势皆在目前只合逆防不合追悔今卢从史已归罪左降王承宗又乞雪表来元阳方再整本军刘济且引兵欲进因此事势正可罢兵赦既有名罢犹有势若又此时不罢臣实不测圣心臣伏料陛下去年初锐意用兵之时必谓讨承宗如讨刘辟李錡兵合之後坐见诛擒岂料迁延经年如此然则始谋必尅犹不可知後事转难更何所望至於竭府库以富河北诸将虚中国以使戎狄生心可为深忧可为痛惜已具前奏不敢再陈况今日已前所惜者威权财用今日已後所忧者治乱安危国家有天下二百年陛下承宗社十一叶岂得以小忿而忘国家大计岂得以小耻而忘宗社远图伏愿圣心以此为虑臣前後已献三状不啻千言词既繁多语亦恳切陛下若以臣所见非是所言非忠况又尘黷不休臣即合便得罪若以臣所见为是所言为忠则陛下何忍知是不从知忠不纳不然则臣合得罪不然则陛下罢兵伏望读臣此状一二十遍断其可否速赐处分臣不胜负忧待罪恳迫兢惶之至谨奏

论严绶状

奉宣令依中书状撰制除严绶江陵节度使

右臣伏以赵宗儒衆称清介有恒严绶衆称怯懦无耻二人臧否优劣相悬宗儒自到江陵虽无殊政亦闻清净境内颇安纵要改移即合便择胜宗儒者且严绶在太原之事圣聪备闻天下之人以为谈柄陛下罢其节制追赴朝廷至今人情以为至当今忽再用又替宗儒臣恐制书下後无不惊叹兼邪人得计正人忧疑大乖羣情深损朝政臣前後所奏宣撰制若非甚不可者亦不敢切论今此除授实甚不可伏望圣意更赐裁量其制未敢便撰伏待圣旨谨奏

论孟元阳状

奉宣令依中书状撰制除孟元阳右羽林军统军仍封赵国公食邑三千户

右臣伏以孟元阳激水有功河阳有政自到泽潞戎事颇修但以老年事须与替比诸流辈事迹不同今所除官合加优獎昨者范希朝在太原日昏耄不理人情共知及除统军衆犹谓屈今元阳事即不同希朝又除统军恐似更屈虽加封爵悉是虚名况元阳功効忠勤天下有数今以无能者一例除改无所旌别臣恐今日已後无以劝人以臣所见若改除金吾大将军轻重之间实为得所只如柳惟晨李简之辈有何功业合比元阳犹居此官动逾年岁伏望圣慈以此裁量其制未敢依中书状便撰谨具奏闻伏待圣旨谨奏

谢官状

新授将仕郎守左拾遗翰林学士臣白居易新授朝议郎守尚书库部员外郎翰林学士云骑

尉臣崔羣

右臣等伏奉恩制除前件官今日守谦奉宣进旨特加慰谕并赐告身者圣慈曲被宠命猥加俯以拜恩跪而受赐蹈舞离次惊惶失图伏以郎吏谏官古今所重位当星象职在箴规皆须闻望清方行实端慤然可以佐弥纶於草昧能正其词尽献纳於藹言必直其节苟轻所选实忝厥官臣等学识庸虚才质愚懦自居近职忝冒已深况超擢荣班慙惶交至初授殊常之宠闻实若惊再思难报之恩感而欲泣唯当奋励弩钝补拾阙遗中誓赤诚上酬玄造俯伏忧愧若无所容无任感恩兢惕之至谨奉状陈谢以闻谨奏

奏陈情状【元和五年四月二十六日进】

翰林学士将仕郎守左拾遗臣白居易

右今日守谦奉宣圣旨以臣本官合满欲议改转知臣欲有陈露令臣将状来者臣有情事不敢不言伏希圣慈俯察愚恳臣母多病臣家素贫甘旨或亏无以为养药餌或阙空致其忧情迫於中言形於口伏以自拾遗授京兆府判司往年院中曾有此例资序相类俸禄稍多僥授此官臣实幸甚则及亲之禄稍得优丰荷恩之心不胜感激辄敢尘黷无任兢惶谨具奏陈伏待圣旨

谢官状【元和五年五月六日进】

新授京兆府户曹参军翰林学士白居易

右伏奉恩制除臣前件官今日守谦奉宣圣旨特加慰谕兼赐告身者俯俛拜恩?惕受命战越局迹惊惶失容蹈舞屏营不知所据臣叨居近职已涉四年自顾庸昧无裨明圣尘忝岁久忧慚日深况於官禄之间岂敢有所选择但以位卑俸薄家贫亲老养阙甘馨之费病乏药石之资人子之心有所不足昨蒙圣念虽许陈情敢望天恩遽从所欲况前件官位望虽小俸料稍优臣今得之胜登贵位此皆皇明俯察玄造曲成念臣为子之诚赐臣及亲之禄臣所以抚心知愧因事吐诚乌鸟私情得尽欢於展养犬马微力誓効死以酬恩荣幸不止於一身感戴实深於万品无任荷恩拚跃之至

谢蒙恩赐设状

右今日守谦奉宣圣旨以臣初入院特赐设者臣生长穷贱才质孱微草野鄙夫风尘走吏岂期圣造选在禁闈煦以天慈赐以御食臣所以凌兢受命俯伏荷恩心魂不宁手足无措况樽开九醞饌列八珍惠过加笾荣优置醴金罍引满将王泽而共深玉饌属厌与圣德而俱饱终食且叹扞心自惊战汗慙惶陨越于下谨奉状陈谢以闻谨奏

谢恩赐衣服状

右今日守谦奉宣圣旨以臣初入院特赐衣服者臣自入禁司才经旬月未陈薄効累受殊私况前件衣服等献自远方降从御府既鲜华而骇目亦轻暖而便身臣实何人堪此荣赐臣必拟秘藏箠笥传示子孙何则顾陋质而怀慙貌非称服抚微躯而荷宠力不胜衣因物感恩无任愧惧谨奉状

三月三日谢恩赐曲江宴会状

右今日伏奉圣恩赐臣等於曲江宴乐并赐茶果者伏以暮春良月上巳嘉辰获侍宴於内庭又赐欢於曲水蹈舞局地欢呼动天况妓乐选於内坊茶果出於中库荣降天上宠惊人间臣等谬列近司猥承殊泽捧觴知感终宴怀慙肉食无谋未展涓埃之効素餐有愧难胜醉饱之恩以此兢惶未知所报谨奉状陈谢以闻谨奏

九月九日谢恩赐宴曲江会状

右臣今日伏奉进旨赐臣等於曲江宴会特加宣慰并赐酒脯等者伏以重阳令节大有丰年赐宴於无事之朝追欢於最胜之地况天厨酒脯御府管弦宠赐忽降於寰中庆幸实生於望外仍加慰谕曲被辉华臣等各以凡才同参密职幸遇休明之日多承饫赐之恩乐感形骸欢容动而成舞泽均草木秋色变以为春徒激丹心岂报玄泽谨奉状

腊日谢恩赐口蜡状

右今日蒙恩赐臣等前件口蜡及红雪澡豆等仍以时寒特加慰问伏以时逢腊节候属祁寒岂意圣慈不忘微贱念严凝而加之煦妪虑皴【规伦切】？【之文切】而润以脂膏喜气动中欢容发外挟纆之恩所勉和则体舒不龟之泽既沾感而手舞臣等省躬怀愧因物谕情岂止饮德萦心唯惊宠赐必拟澡身励节以答鸿私感跃之诚倍万恒品谨具奏闻谨奏

中和日谢恩赐尺状

右今日奉宣赐臣等红牙银寸尺各一者伏以中和届节庆赐申恩当昼夜平分之时颁度量合同之令况以红牙为尺白银为寸美而有度焕以相宣逮下明忖度之心为上表裁成之德庆泽所及欢心毕同臣等尘忝日深宠赐岁至虽恩光下济咫尺之顔不违而尸素内慙分寸之功未効捧受愧畏倍万恒情谨具奏闻谨奏

谢清明日赐新火状

右今日高品官唐国玠就宅宣旨赐臣新火者伏以节过藏烟时当改火助和气以发滞表皇明以烛幽臣顾以贱微荷兹荣耀就赐而照临第宅聚观而光动里闾降实自天非因榆柳之燧仰之如日空倾葵藿之心徒奉恩辉岂胜欣戴

谢恩赐冰状

右今日奉宣旨赐臣等冰者伏以颁冰之仪朝廷盛典以其非常之物用表特异之恩况春羔之荐时始因风出当夏虫之疑日忽自天来烦暑迎消凉飈随至受此殊赐臣何以堪欣骇慙惶若无所措但饮之栗栗常倾受命之心捧之兢兢永怀履薄之戒以斯惕厉用答皇慈谨奉状陈谢以闻

谢赐新历日状

右今日蒙恩赐臣等前件新历日者臣等拜手蹈舞鞠躬捧持开卷受时见履端之有始披文阅处知御历之无穷庆贺既深感戴无极谨奉状陈谢

谢恩赐茶果等状

右今日高品杜文清宣进旨以臣等在院修撰制问赐茶果梨脯等曲蒙圣念特降殊私慰谕未终赐赆旋及臣等慙深旷职宠倍惊心述清问以修词言非尽意仰皇慈而受赐力岂胜恩徒激丹诚讵酬玄造

谢赐设及匹帛状

右今日高品刘全节奉宣进旨以臣等在院覆策毕特加慰问并赐设及匹帛者臣等职在掌文诏令考策虽竭鄙昧犹惧阙遗岂意皇鉴下临圣慈曲至惠加赐食荣及承筐宠厚缣緡仰难胜於玄貺恩深醉饱退有愧於素餐徒积慙惶何酬庆赐

社日谢赐酒饼状

右今日蒙恩赐臣等酒及蒸饼?饼等伏以时唯秋社庆属年丰颁上尊之酒浆赐太官之饼餌既非旧例特表新恩空荷皇慈岂伸丹慙谨奉状陈谢

白氏长庆集卷五十九

卷六十

钦定四库全书

白氏长庆集卷六十

唐白居易撰

奏状三【凡七首】

论重考科目人状

今年吏部应送科目及平判人所试文书等

右臣等奉中书门下牒称奉进旨令臣等重考定闻奏者臣等窃有所见不敢不奏伏以今年吏部科第不置考官唯遣尚书侍郎二人考试吏部事至繁剧考送固难精详所送文书未免瑕病臣等若苦考覆退者必多韩臯累朝旧臣伏料陛下不能以小事致责臣等又以朝廷所设科目虽限文字其间收采兼取人材今吏部只送十人数且非广其中更重黜落亦恐事体不弘以臣所见兼请不考已得者不妨侥幸不得者所胜无多贵收人材务存大体伏乞以臣等此状宣付宰臣重赐裁量伏听进旨【元和十五年十二月十三日重考定科目官将仕郎守尚书祠部员外郎臣白居易等状奏重考定科目官将仕郎守尚书祠部员外郎上护军臣李虞仲】

举人自代状

中书省朝议郎权知尚书兵部郎中骑都尉杨嗣复

右臣伏准建中元年正月五日勅文武常参官上後三日举一人自代者伏以前件官有辩政之学有体要之文文可以掌王言学可以待顾问名实相副辈流所推选备侍臣参知制命酌其宜称诚合在先臣既谙详辄举自代谨具闻荐伏听勅旨【长庆元年正月四日新授朝议郎守尚书主客郎中知制诰臣白居易状奏】

论重考试进士事宜状

右臣等伏料自欲重试进士已来论奏者甚衆伏计烦黷圣听之外必以为或亲或故同为党庇臣今非不知但以避嫌事小隐情责深所以冒犯天威不敢不奏伏希圣鉴试详臣言伏以陛下虑今年及第进士之中子弟得者侥幸平人落者受屈故令重试重考乃至公至平凡是

平人孰不庆幸况臣等才识浅劣谬蒙选充考官自受命以来夙夜惶惧实忧愚昧不副天心敢不尽力竭诚苦考得失其间瑕病纖毫不容犹期再三知臣愚尽然臣等别有愚见上裨圣聪反覆思量辄敢密奏伏准礼部试进士例许用书策兼得通宵得通宵则思虑必周用书策则文字不错昨重试之日书策不容一字木烛只许两条迫促惊忙幸皆成就若比礼部所试事校不同虽诗赋之间皆有瑕病在与夺之际或可矜量倘陛下垂仁察之心降特達之命明示瑕病以表无私特全声名以存大体如此则进士等知非而愧耻其父兄等感激而戴恩至於有司敢不惩革臣等皆蒙宠擢又忝职司实愿裨补圣明敢不罄竭肝胆谨具奏闻伏待圣裁谨奏【长庆元年四月十日重考试进士官朝议郎守尚书主客郎中知制诰臣白居易等奏重考试进士官朝散大夫守中书舍人上轻车都尉臣王起】

让绢状【长庆元年八月十三日进】

恩赐田布与臣人事绢五百匹

右田布以臣宣慰进旨敬命荷恩遂与臣前件绢臣不敢受寻以奏陈昨日中使第五文岑就宅奉宣令臣受取者臣以当时进状陈谢讫感戴圣恩昨日不敢不谢酌量事理今日不敢不言臣家素贫非不要物但以昨者陛下遣臣宣谕田布不同常例田布今日之事不同诸家何者未报父讐未雪国耻凡人有物犹合助之况取其财有所不忍又昨除田布魏博节度制中诫云一饭之饱必均於士卒一毫之费必用於戈矛今以五百匹绢与臣臣若便受则是有违制命不副天心臣又以凡节将之臣发军讨叛大费虽资於公给小用亦藉其家财今陛下欲使田布誓心报讐捐躯杀贼伏料宣谕慰问使者道路相望若奉使之人悉须得物臣恐镇州贼徒未殄田布财产已空欲救将来乞从臣始此则求田布物者必息而田布感圣渥倍深责其成功必有可望臣食国家之厚禄居陛下之清官每月俸钱尚慙尸素无名之货岂合苟求伏愿天鉴照临知臣不是饰让臣又非不知如此小事不合尘黷尊严心实不安不敢不奏其前件绢臣寻已却还田布伏乞圣慈许臣不敢取仍望宣示田布令知圣恩谨録奏闻伏待进旨

论左降独孤朗等状【长庆元年十二月十一日奏】

都官员外郎史馆修撰独孤朗可富州刺史起居舍人温造可朗州刺史司勳员外郎李肇可
洋州刺史刑部员外郎王鎰可郢州刺史

右今日宰相送词头左降前件官如前令臣撰词者臣伏以李景俭因饮酒醉诋忤宰相既从远贬已是深文其同饮四人又一例左降臣有所见不敢不陈伏以两省史馆皆是近署聚饮致醉理亦非宜然皆贬官即恐太重况独孤朗与李景俭等皆是僚友旦夕往来一饭一饮盖是常事景俭饮散之後忽然醉发自觉不觉何况他人以此矜量情亦可恕臣又见贞元之末时政严急人家不敢欢宴朝士不敢过从衆心无僇以为不可自陛下临御及此二年圣慈寬和天下欣戴臣恐此诏或下衆情不免惊忧兼恐朝廷官寮从此不敢聚会四方诸远不知事由奔走流传事体非便伏惟宸鉴更赐裁量免至贬官各令罚俸感恩知失亦足戒惩臣不揆

蠢愚輒敢尘黷岂不惧罪岂不惜身但缘进不因人出於圣念自忠州刺史累迁中书舍人已涉二年一无裨补夙夜慙惕实不自安前後制勅之间若非甚不可者恐烦圣听多不备论今者所见若又不奏是图省事有负皇恩伏希天慈以此详察知臣所奏不是偶然其独孤朗等四人出官词头臣已封讫未敢撰进伏待圣旨

论行营状【应缘镇州行营利害事宜谨具如後】

一请专委李光顏东面讨逐委裴度四面临境招谕事

右臣等伏见自幽镇有事以来诏太原魏博泽潞易定沧州等五道节度各领全军又徵诸道兵马计士八十万四面围绕已逾半年王师无功贼势犹盛弓高已失深州甚危者岂不以兵数太多反难为用节将太衆则心不齐莫肯率先递相顾望又以朝廷赏罚近日不行未立功者或先封官已败衄【女穴切】者不闻得罪既无惩劝以至迁延若不改张必无所望今李光顏既除陈许节度尽领本军伏请抽诸道劲兵通前约与三四万人从东速进开弓高粮路合下博诸军解深邢重围与元翼合势令裴度领太原全军兼招讨旧职四面压境观衅而动若乘虚得便即令同力剪除若战胜贼穷亦许受降纳款如此则镇州来攻以分其力招谕以动其心未及诛夷自生变改况光顏久谙战阵素有威名裴度为人忠勇果决加以明悬赏罚使其忧责在身事势驱之自须死战若比向前模樣用命百倍相悬破贼责功无出於此况太原兴王之地天下劲兵今既得人足当一面以此计度无如二人

一请抽拣魏博泽潞易定沧州四道兵马分付光顏事

右伏请诏光顏於前件四道拣选马步精銳者每军各取三四千人并令光顏专统一则藉其兵力讨袭镇州二乃每军抽人不为不用其余放去理亦无妨况令守疆亦足展効或闻泽潞魏博兵马同讨淮西之时素谙光顏勤恤将士必乐为用可望成功今光顏得到下博後即陈许先有八千人昨又发三千人光顏又领凤翔马军一千三百人加以徐泗郑滑河阳等军悉皆劲銳堪用况兼魏博等四道所抽兵马约有三四万人尽付光顏足以成事其襄阳陕府东都汝州等道兵马仍委光顏拣择可否若不堪用不如放还岂唯虚费资粮兼恐挠败军阵今既只留东西二师请各置都监一人诸道兵马监军伏请一时停罢如此则衆齐令一必有成功

一请勒魏博等四道兵马却守本界事

右伏以朝廷本用田布之意以弘正遇害令报父仇望其感激衆心先立功效今领全师出界供给度支数月已来都不进讨非田布固欲如此抑有其由或闻魏博一军累经优赏兵骄将富莫肯为用况其军一月之费计实钱二十七八万贯今天下百计求取不足充其数月衣粮若且依前将何供给则不如使退守本境自供给衣粮省费之间利害明矣其泽潞易定等虽经接战胜负畧均且昭义全军收临城一县不得则其兵力亦可知矣沧州新经败挫叔良又乏将谋势不支任必无可望今请魏博等四道各归本界严守封疆如此则不独减无用之兵

亦可以省有限之费就中魏博尤要退军虚费货粮最可痛惜者也

一请省行营粮料事

右伏以行营最切者岂不以国用将竭军费不充更至春夏已来实恐计无所出今若两道共留六万其余退食本道衣粮即每月所费仅减其半一月之用可给两月唯供六万所费无多既易支持自然丰足责其死战敢不尽心臣以为当今至切无过於此

一请因朱克融授节後速讨王庭湊事

右克融庭湊同恶相济物情事理断在不疑今朝廷特赦克融新授节钺纵终助援必恐迟疑当逗留克融之时是经营庭湊之日迟则心固久则计成三数月间须有次第延引入夏转难用兵今正是时时不可失以臣等所见谨具如前伏以行营今日事宜真可谓急危极矣其间变故远不可知但恐如今救已迟晚若犹可及无出於此何者苟兵数不抽军费不减食既不足衆何以安不安之中何事不有伏料陛下览臣此状必有二疑一者以臣等悉是儒生不谙兵事纵知诚恳的未信行臣亦以此自疑久未敢奏今既事切不敢不言若攻战机宜非臣所习而军国利害虽愚亦知况察羣情兼听衆议与臣此奏所见多同伏望不以臣等儒生轻而不用也二者伏恐行营事势奏报不真皆云贼徒计日合破又陛下以制置既久难於改移前事若得其宜即合旋有成绩至今既无次第安得不务改图古人云收之桑榆事犹未晚若因循且过即救疗转难臣又切有过忧敢不尽吐肝肺实恐军困不济更须百计诛求日引月加以至困极今天下诸色钱内每贯已抽减三百茶盐估价有司并已增加水陆关津四方多请率税不许即用度交阙尽许则人心无繆自古安危皆系於此伏乞圣虑察而念之不以重难改移忽於大计也臣等又忧深州久围救兵不至弓高新陷粮道未通下博诸军致於穷地光顔兵少欲入无由外既救援不来内即餽粮罄竭各求生路谁向死门无可奈何忽然奔散即圣心虽悔其可及乎其鉴不遥在贞元中韩全义五楼之败是也伏望陛下详臣此状思臣此言若以为然速赐裁断臣等受恩日久忧国情深志在恳切言无方便伏望圣鉴俯察愚衷无任感激悃欸之至谨同诣延英门进状以闻伏听勅旨谨奏【长庆二年正月五日朝散大夫守中书舍人上柱国臣白居易状奏】

论姚文秀打杀妻状【长庆二年五月十一日奏】

据刑部及大理寺所断准律非因鬪争无事而杀者名为故杀今姚文秀有事而杀者则非故杀据大理司直崔元式所执准律相争为鬪相击为殴交鬪致死始名鬪杀今阿王被打狼籍以致於死姚文秀检验身上一无损伤则不得名为相击阿王当夜已死又何以名为相争既非鬪争又蓄怨怒即是故杀者右按律疏云不因争鬪无事而杀名为故杀此言事者谓争鬪之事非该他事今大理刑部所执以姚文秀怒妻有过即不是无事既是有事因而殴死则非故杀者此则唯用无事两字不引争鬪上文如此是使天下之人皆得因事杀人杀人了即曰我有事而杀非故杀也如此可乎且天下之人岂有无事而杀人者是明事谓争鬪之事非他事也又凡言鬪殴死者谓事素非憎嫌偶相争鬪一殴一击不意而死如此则非故杀以其本

原无杀心今姚文秀怒妻颇深挟恨既久殴打狼籍当夜便死察其情状不是偶然此非故杀孰为故杀若以先因争骂不是故杀即如有谋杀杀人者先引相骂便是交争一争之後以物殴杀了则曰我因有事而杀非故杀也又如此可乎设使因争理犹不可况阿王已死无以辨明姚文秀自云相争有何凭据又大理寺所引刘士信及骆全儒等殴杀人事承前寺断不为故杀恐与姚文秀事其间情状不同假如畧同何妨误断便将作例未足为凭伏以狱贵察情法须可久若崔元式所议不用大理寺所执得行实恐被殴死者自此长冤故杀者从今得计谨同参酌件録如前奉

勅姚文秀杀妻罪在十恶若从宥免是长凶愚其律纵有互文在理终须果断宜依白居易状委所在决重杖一顿处死

白氏长庆集卷六十

卷六十一

钦定四库全书

白氏长庆集卷六十一

唐白居易撰

奏状四【表附凡十七首】

为宰相贺赦表【长庆元年正月就南郊撰进】

臣某等言伏奉今日制书大赦天下者臣与百执事奉扬宣布与亿兆衆蹈舞欢呼自天降和率土同庆臣等诚欢诚拚顿首顿首伏惟皇帝陛下出震御极建元发号大明升而六合晓一气薰而万物春肆眚措刑涤瑕荡秽凡在圆首纳於欢心矧又祇祀天地孝享宗庙蠲减租赋策徵贤良褒德及先赏功延嗣敬宾养老念旧睦亲生人之积弊尽除有国之颓纲必举况陛下承二百祀鸿业之重纂十一圣耿光之初始奉严禋新开宝历天下之目专专然观陛下之动天下之耳颙颙然听陛下之言斯则陛下出一言不终日必达於朝野举一事不浹辰必闻於华夷当疲人求安思理之秋是陛下敬始慎微之日苟行一善则可以动人听而式歌舞况具衆美信足以感人心而致和平康哉可期天下幸甚臣等谬居重位幸属鸿休慙窃股肱喜深骨髓欢忻悚跃倍万常情无任鼓舞庆幸之至

为宰相请上尊号第二表

臣某等言今月二十四日臣等已陈表章请上尊号愚诚虽悬圣鉴未回躋地局天不胜大愿臣等诚惶诚恐顿首顿首臣闻大道者无求於物物尊而不辞至公者非欲其名名生而不让不让故与天合德不辞故率土归心斯所谓应乎天而顺乎人者也伏惟皇帝陛下嗣兴一德统牧万方致时俗之和平纳生灵於富壽金革已偃销七十载之厉阶玉烛方调启一千年之圣运天人合应书轨混同而鸿名未加盛典犹缺华夷失望史策无光此诚君上之谦然亦臣下之罪也今臣所以上稽天意下酌人情再黷皇明重陈丹慊臣谨按书曰思作睿睿作圣又曰乃圣乃神乃武乃文经曰明王以孝治天下凡此五者历观列辟虽甚盛德莫能兼之伏以陛下自即大位及此二年无巾车汗马之劳而坐平镇冀无亡弓遗镞之费而立定幽燕仁和一薰犷【亡猛切】鬻尽化可不谓睿文乎削平天下震耀八荒北虏求婚以稟命西戎乞盟而纳欵威灵四及奔走来宾可不谓神武乎陛下以万乘之尊四海之富供养长乐道光化成推而置之可塞天地可不谓孝德乎故臣等敢冒死稽首上尊号曰睿文神武孝德伏惟陛下略撝谦之小节弘祖宗之大猷惟十一圣在天岂忘继其志以亿兆人为子宁忍阻其心特回宸衷俯受徽号在玄功不为主宰於盛德有所形容焕乎大哉垂裕无极此实天下之幸甚非

独臣之幸也臣等无任诚愿恳祷之至

为宰相让官表

臣某言伏奉今日制书授臣某官同中书门下平章事者宠擢非次忧惶失图踏地局天不知所措臣某诚兢诚惕顿首顿首臣闻上理阴阳下平法度外抚夷狄内亲黎元使百官各修其职一物不失其所此宰相之任也臣有何功德有何才能越次超伦忽承此命下乖人望上紊朝经致寇速尤无甚於此臣谬因文学忝列班行先朝乏人擢居内职星霜屡改爵秩骤加未逾十年忽登相位名浮於实任过其才岂唯覆餗【苏谷切】是忧实累知人之鉴况陛下肇开历数将致升平辅弼之臣尤宜慎择臣粗知古今敢言本末枢衡要地初不得人则理化劳心终无成日此所以重陈手疏再?血诚乞回此官别授能者臣若得请便不负恩情见於辞非敢饰让皇天白日实鉴臣心无任恳款屏营之至谨奉表陈让以闻

为宰相贺雨表

臣某言臣闻圣明在上刑政叶中则天地气和风雨时若常闻其语今见其时臣某等诚欢诚跃顿首顿首臣伏以阴阳气数盈缩相随去秋多霖今春少雨宿麦犹茂农功未妨陛下念物忧人先时戒事靡神不举有感必通故云出于山月离于毕初洒尘以霖霖渐破块而霏 圃囿田畴无不沾足雨之所致臣知其由自上而来虽因天降从中而得实与心期发於若厉之诚散作如膏之泽凡在率土孰不懽心臣等位忝钧衡职乖變理仰阴阳而增惧顾霖雨而怀慙无任兢惕之至

为宰相贺杀贼表

臣某等言伏承某道逆贼某一某月某日已被某杀戮訖皇灵震耀凶孽梟夷率土普天欢呼鼓舞臣等诚喜诚忭顿首顿首臣闻乱臣贼子阻兵干纪者明则有天讨幽则有鬼诛迟速之间罔不殲殄伏惟文武孝皇帝陛下君临八表子育羣生合天覆地载之德顺春生秋杀之令宿寇遗孽闇然销亡四海九州廓然清晏逆贼某乙一介贱隶两河叛人苞藏祸心窃弄凶器戕害主帅?刘善良幕燕鼎鱼偷活顷刻颠木之余 【呼罪切】瘞【才何切】疽【子余切】之遗种斧斨【千羊切】欲加而先折鍼石未攻而自溃不有吊代孰知德威不有妖氛孰知神算则天下之心有以知顺存逆亡其犹影响者也臣伏以某一既已斩首某一将何保身若不乞降即应生变辅之或在车则相依皮既不存毛将安附况我乘破竹彼继覆车止戈之期翹足可待无任喜庆忭跃之至

贺云生不见日蚀表【为宰相作】

臣某等谨言臣闻尧汤之逢水旱阴阳定数也宋景之感荧惑天人相应也盖天地大统不能无灾皇王至诚可以销慝尝闻此说今偶其时臣等诚欣诚幸顿首顿首伏见司天台奏今月一日太阳亏者陛下举旧章下明诏避正殿降常服礼行於已心祷于天天且不违物宁无应

况正阳月朔亭午时中和气周流密云布濩蒙然暂蔽赫矣复明屏翳朝隲但惊若烟之涌曜
灵昼掩不见如月之初所谓诚至於中而感通於上也臣等敢不再陈事理重考徵祥三光忌
盈必有时蚀万物莫覩与无灾同庆生交感之间喜浹照临之内虽卿云五色瑞景再中除沴
致祥曾何足比百辟伏贺万人仰观事彰天鉴孔明道配日新其德臣等幸遭昌运谬荷殊私
皆乏济时之才同居待罪之地日月薄蚀自慙燮理无功山川出云实赖圣明有感感贺忻戴
倍万常情无任忉跃竦踊之至

为崔相陈情表

臣植言臣有情事久未敢言今辄陈露伏增战灼臣亡父某官亡妣某氏是臣本生亡伯某官
某赠某官臣今承後建中初德宗皇帝念臣亡伯位高无後以犹子之义命臣继绍仍赐臣名
嗣袭虽移孝思则在上荷君命永承继絶之宗中夺私恩遂阻劬劳之报岁月旷久情礼莫伸
自去年以来累有庆泽凡在朝列再蒙追荣或有陈乞皆许回授况臣猥当宠擢谬陟台阶爵
禄之荣实有踰於同辈显扬之命独未及於先人饮泣茹悲哀慙两极臣今请以在身官秩并
前後合叙勲封特乞圣慈回克追赠倘允所请无幸於斯则臣乌鸟之心犹再生而展养犬马
之力誓万死以酬恩?地仰天不胜感咽披陈诚恳烦黷宸严无任惶惧激切之至谨奉表陈露
以闻

忠州刺史谢上表【元和十四年三月二十八日】

臣某言臣以去年十二月二十日伏奉勅旨授臣忠州刺史以今月二十八日到本州当日上
讫殊恩特獎非次陞迁感戴惊惶陨越无地臣诚喜诚惧顿首顿首臣性本疎愚识惟褊狭早
蒙采録擢在翰林仅历五年每知尘忝竟无一事上答圣明及移秩官寮卑冗疎贱不能周慎
自取悔尤犹蒙圣慈曲赐容贷尚加禄食出佐浚阳一志忧惶四年循省昼夜饮食未尝敢安
负霜枯葵虽思向日委风黄叶敢望沾春岂意天慈忽加诏命特从佐郡宠授专城喜极魂惊
感深泣下方今淮蔡底定两河乂宁臣得为昇平之人遭遇已极况居符竹之寄荣幸实多誓
当负刺慎身履水励节下安凋瘵上副忧勤未死之间期展微効局身地远仰首天高蝼蚁之
忱伏希怜察无任感激恳欸彷徨之至谨遣某官某一奉表陈谢以闻臣某诚惶诚恐顿首顿
首谨言

贺平淄青表【元和十四年四月九日】

臣某言伏见二月二十二日制书逆贼李师道已就梟戮者皇灵有截睿算无遗妖氛廓清遐
迕庆幸臣某诚欢诚喜顿首顿首臣闻乱常干纪天殛神诛李师道包藏祸心暴露逆节罪盈
恶稔衆叛亲离未劳师徒自取擒戮伏惟睿圣文武皇帝陛下文经天地武定华夷凡是猖狂
无不除剪两河清晏四海会同昇平之风实自此始臣名参共理职忝分忧忉舞欢呼倍万常
品守官有限不获称庆阙庭无任庆快踊跃之至谨具奏闻谨奏

贺上尊号後大赦天下表

臣某言伏奉七月十三日制书大赦天下跪捧宣布蹈舞欢呼自天降休率土同庆【中谢】臣闻玄功盛德非鸿名不能形容物厉人疵非皇泽不能涤荡自非上圣莫能兼之伏惟元和圣文神武法天应道皇帝陛下纂承大业子育羣生信及豚鱼威殲梟獍削平寰海混一车书亿兆一心愿崇大号从人欲而俯膺盛礼赐时和而广洽皇恩蠲减赋租收拔淹滞命黜陟而别能否开谏议而策贤良宿弊必除旧章咸举帝王能事尽集於今凡在生灵孰不幸甚臣谬当委擢职在颁条忤跃之诚倍万常品限以守官不获称庆阙庭无任庆忤之至

杭州刺史谢上表【长庆二年】

臣某言去年七月十四日蒙恩除授杭州刺史属汴路未通取襄汉路赴任水陆七千余里昼夜奔驰今月一日到本州当日上任讫上分忧寄内省庸虚仰天戴恩局地失次臣某【中谢】臣谬因文学忝厕班行自先朝黜官以来六年放弃逢陛下嗣位之後数月徵还生归帝京宠在郎署不踰年擢知制诰未周岁正授舍人出泥登霄从骨生肉唯有一死拟将报恩旋属方隅不宁朝廷多事当陛下旰食宵衣之日是微臣输肝写胆之时虽进献愚衷或期有补而退思事理多不合宜臣犹自知况在天鉴忝非土木如履冰泉合当鼎鑊之诛尚忝藩宣之寄才小官重恩深责轻欲荅生成未知死所唯当夙兴夕惕焦思苦心恭守诏条勤恤人庶下苏凋瘵上副忧勤万分之恩莫酬一二仰天举首望阙驰心葵藿之志徒倾蝼蚁之诚难达无任感恩激切之至谨奉表称谢以闻

为宰相谢恩赐酒脯饼果等状

右中使某奉宣圣旨赐臣等前件物等俯倭受赐竦跃荷恩天酒来以分甘御羞降而示惠臣等省躬知感因物言情宠过加笏惧多尸素之责荣同置醴慙无麴蘖之功徒沥丹诚岂酬玄造

为宰相谢恩赐吐蕃信物银器锦彩等状

右臣等材愧庸虚职叨辅弼遇天下削平之日当西戎即叙之时遂使殊方致兹远物此皆率由玄化感慕皇风人臣既絶外交问遗敢言已有今蒙重赐益荷圣慈况来自外夷知德广之所及降从中旨仰深恩而不胜感戴慙惶倍万常品

为段相谢恩赐设及酒脯等状

伏蒙圣慈特加宠锡珍羞出於内府旨酒降於上尊捧戴欢容不知所措臣久叨台鼎新忝节旄勤劳无展於股肱醉饱有慙於口腹

为段相谢借飞龙马状

伏以出从内厩行及中涂假飞龙之骏驹代跛鼃之蹇步执鞭拜命借马喻身取其恋主之心

以表为臣之节恩深易感情恳难陈

为段相谢手诏及金刀状

诏赐累加慙惶交集宠来天上感动人间且金韞其坚奉之而永贞王度刀宣其利操之而远耀天威岂唯佩作身荣实可藏为家宝况臣望阙渐远受恩转多比坚而报国有时効死而杀身无地

为宰相谢官表【为微之作】

臣某言伏奉今月日制书授臣守本官同中书门下平章事者殊常之命非望之恩出自宸衷加於凡陋竦骇震越不知所为【中谢】臣伏准近例宰相上後合献表陈谢臣今所献与衆不同伏唯圣慈特赐留听臣伏闻玄宗即位之初命姚元崇为宰相元崇欲救时弊献事十条未得请间不立相位玄宗明圣尽许行之遂致太平实由於此陛下视今日天下何如开元天下微臣自知才用亦远不及元崇若又僴俛安怀因循保位不惟恩德是负实亦军国可忧臣欲候坐对时便陈当今切事下捋时弊上酬君恩臣之誓心为日久矣陛下许行则进不许则退进退之分断之不疑敢於事前先此陈启况臣才本庸浅遭遇盛明天心自知不因人进擢居禁署访以密谋恩獎太深谗谤并至虽内省行事无所愧心然上黷宸听合当死责岂意怜察曲赐安全蝼蚁之生得自兹日今越流辈授以台衡拔於万死之中致在九霄之上扞心抚已审分量恩陛下犹不以衆人之心待臣臣岂敢以衆人之心事上皇天白日实鉴臣心得献前言虽死无恨无任感恩恳欸之至

白氏长庆集卷六十一

卷六十二

<集部,别集类,汉至五代,白氏长庆集>

钦定四库全书

白氏长庆集卷六十二

唐白居易撰

策林一【有序凡二十二道】

元和初予罢校书郎与元微之将应制举退居於上都华阳观闭户累月揣摩当代之事构成策目七十五门及微之首登科予次焉凡有应对者百不用其一二其余自以精力所致不能弃捐次而集之分为四卷命曰策林云耳

一策头【一道】

臣伏见汉成帝以朱云庭辱张禹令持下殿云攀檻檻折成帝容之後尝理檻帝命勿易以旌直臣臣每览汉史至此未尝不三复而叹息也岂不以臣不爱死虽怜其死而必谏乎君能纳谏虽折其檻而必容乎不然何云之竭忠也如此而帝之见容也又如此伏惟陛下以至诚化万国以至明临兆人故数年之间仍降诏至四海之内累徵贤良思酌下言乐闻上失谕以旁求之意询以无隐之辞是则陛下纳谏之旨远出於汉朝微臣献言之罪不虞於折檻矣况清问之下条对之中苟言有可观策有可取陛下必光扬其名氏优崇其爵秩与夫勿易折檻以旌直臣之意又相万也贱臣得不有犯无隐以副陛下纳谏之旨乎殫思极虑以尽微臣献言之道乎唯以直词昧死上对

臣生也幸沐圣朝垂覆育之惠当陛下无忌讳之日斯则朝闻夕死足矣而况於充赋王庭者乎伏念庸虚谬膺诏选诚不足以明辩体用对扬德音欲率尔而言适足重小臣狂简之过若默默而退又何以副陛下虚求之心是以窥玉旒读金策慙惶僂俛不知所裁者久矣然以愚虑之中千或一得而往古之成败耳或妄有所闻当今之得失目或妄有所见进不敢希旨退不敢隐情唯以直言昧死上对

二策项【二道】

臣闻人无常心习以成性国无常俗教则移风故亿兆之所趋在一人之所执是以恭默清静之政立则复朴保和贵德贱财之令行则上让下兢怨已及物之诚着则苍生可致於至理养

老敬长之教治则皇化可升於大宇由是言之盖人之在教若泥金之在陶冶器之良窳由乎匠之巧拙化之善否系乎君之作为伏惟陛下慎而思之勤而行之则太平之风大同之俗可从容而驯致矣

臣闻教无常兴亦无常废人无常理亦无常乱盖兴废理乱在君上所教而已故君之作为为教兴废之本君之举措为人理乱之源若一出善言则天下之人获其福一违善道则天下之人罹其殃若一肆其心而事有以阶於乱一念於德而邦有以渐於兴交应之间实犹影响今陛下以懋建皇极为先则大化不得不流矣以钦若前训为本则大朴不得不复矣以缉熙庶绩为念则五刑不得不措矣以祇奉宗庙为心则五教不得不敷矣而尚有未流未措未复未敷之问【自懋建以下皆叠策问中事】此乃陛下劳谦之德太过故不自见其益也求理之心太速故不自见其功也臣何以知之然臣闻有始有卒者其惟圣人乎此言王者行道非始之难终之实难也陛下又能终之则太平之风大同之俗如指掌耳岂止化流朴复刑措教敷而已哉

三策尾【三道】

臣鄙人也生仁壽之代沐文明之化始以进士举及第又以拔萃选授官臣之名既获二成君之禄已受一命虽天地不求仁於刍狗而畎浍思委润於沧溟惓惓之诚蓄之久矣幸遇陛下发旁求之诏垂下济之恩详延谏猷亲览条对逢不讳之日虽许极言当无过之朝不知所述无裨清问有负皇明仰冒宸严伏待罪戾谨对臣幸逢昭代得列明庭慙无嘉言以充清问辄罄狂瞽惟陛下择之谨对

臣生圣代三十有五年蒙陛下子育之恩覩陛下昇平之化謬膺诏选充赋天庭安足亲承德音条对清问逢旁求之日虽许直言当已理之朝将何极谏尘黷圣鉴俯伏待罪谨对

四美谦让【摠策问中事连赞美之】

臣闻王者之有天下也自谓之理非理也自谓之乱非乱也自谓之安非安也自谓之危非危也何者盖自谓理且安者则自骄自满虽安必危自谓乱且危者则自戒自强虽乱必理理之又理安之又安则盛德大业斯不远矣伏惟陛下嗣建皇极司牧苍生夙兴以忧人夕惕而修己以今日之理陛下视朝廷未以为理以今日之安陛下视海内未以为安而又思酌下言乐闻上失弊无不革利无不兴今则严禋郊庙犹谓敬之不至爱养黎庶犹谓惠之不弘省罢进献犹忧人之困穷蠲免逋租犹虑农之勤匮搜扬俊乂犹畏贤之遗逸涤荡罪戾犹念狱之非辜底定兵戈犹惧其未戢怀柔夷狄犹恐其未宾大化参乎阴阳犹慙之以寡德重光并乎日月犹让之以不明斯乃陛下劳谦之心合天运之不息也勤恤之德合地道之无疆也如臣者何所知焉何所述焉伏以圣聪贵闻庶议苟有愚见敢不极陈

五塞人望归衆心 在慎言动之初

夫欲使人望塞衆心归者无他焉在陛下慎初之所致耳臣闻天子动则左史书之言则右史书之言动不书非盛德也书而不法後嗣何观焉若王者言中伦动中度则千里之外应之百代之後歌之况其迹者乎若言非宜动非礼则千里之外违之百代之後笑之况其迹者乎是以古之天子口不敢戏言身不敢妄动动必三省言必再思况陛下初嗣祖宗新临兆庶臣伏见天下之目专专然以观陛下之动也天下之耳颞颞然以听陛下之言也则陛下出一言不终日而达於朝野动一事不浹辰而闻於华夷盖是非之声无翼而飞矣损益之名无胫而走矣陛下得不慎之哉伏惟观於斯察於斯使一言一动无所苟而已矣言动不苟则天下之望塞焉天下之心归焉

六教必成化必至 在敬其终

问先王之教布在方策事虽易举政则难成岂文之空垂将行之未至思臻其极伫质所疑

夫欲使政必成化必至者无他焉在陛下敬始慎终之所致耳臣闻先王之训不徒言也先王之教不虚行也浅行之则小理深行之则大和浅深小大之应其犹影响矣然则天下至广王化至大增减损益难见其形是以政之损者虽不见其日损必有时而乱也教之益者虽不见其日益必有时而理也陛下但推其诚勤其政慎其始敬其终日用而不知自臻其极此先王终日所务者也终日所行者也不可月会其教化之深浅岁计其风俗之厚薄焉臣又闻易曰圣人久於其道而天下化成诗曰靡不有初鲜克有终此言王者之教待久而成也王者之化待终而至也陛下诚能久而终之则何虑政不成而化不至乎

七不劳而理 在顺人心立教

问方今勤恤忧劳夙夜不怠而政教犹缺惩劝未行何则上古之君无为而理令不严而肃教不劳而成何施何为得至於此

臣请以三五之道言之臣闻三皇之为君也无常心以天下心为心五帝之为君也无常欲以百姓欲为欲顺其心以出令则不严而理因其欲以设教则不劳而成故风号无文而人从刑赏不施而人服三五所以无为而天下化者由此道也後代反是故不及者远焉臣请以三代以後之事言之臣闻後代之天下三五之天下也後代之人三五之人也後代之位三五之位也居其位得其人有其天下而不及三五者何哉臣窃惊怪之然亦粗知其由矣岂不以己心为心抑天下以奉一人之心也以己欲为欲拂百姓以从一人之欲也苟或心与道未合政与时并行得失交争利害相半如此则虽宵衣旰食劳体励精才可以致小康不足以弘大道故出令而吏或犯设教而人敢违刑虽明而寡惩赏虽厚而鲜劝此由舍人而从欲是以勤多而功少也伏惟陛下去彼取此执古御今以三五之心为心则政教何忧乎不治以亿兆之欲为欲则惩劝何畏乎不行政教治则不殷忧而四海宁惩劝行则不勤劳而万人化此由舍己而从衆是以事半而功倍也臣又闻太宗文皇帝尝曰朕虽不及古然以百姓心为心臣以为致贞观之理者由斯一言始矣伏愿陛下从而监之嗣而行之则天下幸甚天下幸甚

八风行浇朴【由教不由时】

问毗俗之理乱风化之盛衰何乃得於往而失於来薄於今而厚於古或曰兴替之道执在君臣又云浇朴之风系於时代二说相反其谁可从

臣闻代之浇漓人之朴畧由上而不由下在教而不在时盖政之臧否定於中则俗之厚薄应於外也何以验核伏请以周秦以降之事言之臣闻周德寢衰君臣凌替蚕食瓜割分为战国秦氏得之以暴易乱曾未旋踵同归覆亡炎汉勃兴奄有四海仅能除害未暇化人迨于文帝景帝始思理道躬行慈俭人用富安礼让自兴刑罰不试昇平之美隣於成康载在汉书陛下熟闻之矣降及魏晋迄於梁隋丧乱弘多殆不足数我高祖始建区夏未遑缉熙迨於太宗玄宗抱圣神文武之姿用房杜姚宋之佐谋猷启沃无怠於心德泽施行不遗於物所以刑措而百姓欣戴兵偃而万方悦随近无不安远无不服虽成康文景无以尚之载在国史陛下熟知之矣然则周秦之乱极矣及文景继出而昌运随焉梁隋之弊甚矣及二宗嗣兴而王道融焉若谓天地生成之德渐衰家国君臣之道渐丧则当日甚一日代甚一代不应衰而复盛浇而复和必不尔者何乃清平朴素之风薄於周秦之交而厚於文景之代耶顺成和动之俗丧於梁隋之际而独兴於贞观开元之年耶由斯言之不在时矣故魏徵有云若言人渐浇讹不反质朴至今应为鬼魅宁可复得而教化耶斯言至矣故太宗嘉之又按礼记曰教者人之寒暑也事者人之风雨也此言万民之从王化如百谷之委岁功也若寒暑以时则禾黍登而菽麦熟若风雨不节即稂莠植而秕稗生故教化优深则谦让兴而仁义作刑政偷薄则讹伪起而奸宄臻虽百谷在地成之者天也虽万物在下化之者上也必欲以凉德弊政严令繁刑而求仁义行奸宄息亦犹飘风暴雨愆阳伏阴而望禾黍丰稂莠死其不可也亦甚明矣故曰尧舜率天下以仁比屋可封桀纣率天下以暴比屋可戮斯则由上在教之明验也伏惟圣心无疑焉

九致和平复雍熙 在念今而思古也

问今欲感人心致和平致王化於朴厚何思何念得至於斯

臣闻政不念今则人心不能交感道不思古则王化不能流行将欲感人心於和平则在乎念今而已伏惟陛下知人安之至难也则念去烦扰之吏爱人命之至重也则念黜苛酷之官恤人力之易罢也则念省修葺之劳忧人财之易匱也则念减服御之费惧人之有馁也则念薄麦禾之税畏人之有寒也则念轻布帛之征虑人之有愁苦也则念损嫔嬙之数故念之又念之则人心交感矣感之又感之则天下和平矣将欲致王化於雍熙则在乎思古而已伏惟陛下仰羲轩之道也则思兴利而除害侔唐虞之圣也则思明目而达聪师夏禹之德也则思泣辜而恤人法殷汤之仁也则思祝网而爱物鉴汉之盛也则思罢露台而海内流化观周之兴也则思葬枯骨而天下归心弘贞观之理也则思闻房杜之谏议以致昇平嗣开元之政也则思得姚宋之嘉谋而臻富壽故思之又思之则王泽流行矣行之又行之则天下雍熙矣

十王泽流人心感 在恕已及物

夫欲使王泽旁流人心大感则在陛下恕已及物而已夫恕已及物者无他以心度心以身观身推其所为以及天下者也故已欲安则念人之重扰也已欲壽则念人之嘉生也已欲逸则念人之憚劳也已欲富则念人之恶贫也已欲温饱则念人之冻馁也已欲声色则念人之怨旷也陛下念其重扰则烦暴之吏退矣念其嘉生则苛虐之官黜矣念其憚劳则土木之役轻矣念其恶贫则服御之费损矣念其冻馁则布帛麦禾之税轻矣念其怨旷则妓乐宾嬭之数省矣推而广之念一知十盖圣人之道也始则恕已以及人终则念人而及已故恕之又恕之则王泽不得不流矣念之又念之则人心不得不感矣泽流心感而天下不太平者未之闻也十一黄老术 在尚寬简务清淨则人俭朴俗和平

夫欲使人情俭朴时俗清和莫先於体黄老之道也其道在乎尚寬简务俭素不眩聪察不役智能而已盖善用之者虽一邑一郡一国至於天下皆可以致清淨之理焉昔宓贱得之故不下堂而单父之人化汲黯得之故不出合而东海之政成曹参得之故狱市勿扰而齐国大和汉文得之故刑罰不用而天下大理其故无他清淨之所致耳故老子曰我无为而人自化我好静而人自正我无事而人自富我无欲而人自朴此四者皆黄老之要道也陛下诚能体而行之则人俭朴而俗清和矣

十二政化速成 由不变礼不易俗

夫欲使政化速成则在乎去烦扰弘简易而已臣请以齐鲁之事明之臣闻伯禽之理鲁也变其礼革其俗三年而政成太公之礼齐也简其礼从其俗五月而政成故周公叹曰夫平易近人人必归之鲁後代其北面事齐矣此则烦简迟速之効明矣伏惟陛下鉴之

十三号令 令一则行推诚则化

问号令者所以齐其俗一其心故圣人专之慎之然则号令既出而俗犹未齐者其故安在号令既行而心犹未一者其失安归欲使下令如风行出言如响应导之而人知劝防之而人不踰将致於斯岂无其要

臣闻王者发号施令所以齐其俗一其心俗齐则和心一则固人於是乎可任使也传曰人心不同如其面焉故一人一心万人万心若不以令一之则人人之心各异矣於是积异以生疑积疑以生惑除乱莫先乎令者也故圣王重之然则令者出於一人加於百辟被於万姓渐于四夷如风行如雨施有往而无返也其在周易涣汗之义言号令如涣汗然一出而不可复也故圣王慎之然则令既出而俗犹未齐者由令不一也非独朝出夕改晨行暮止也盖谨於始慢於终则不一也张於近弛於远则不一也急於贱寬於贵则不一也行於疎废於亲则不一也且人之心犹不可以不一而理况君之令其可二三而行者乎然则令既一而天下之心犹未悦随者由上之不能行於已推於诚者也凡下从上也不从口之言从上之所好也不从力之制从上之所为也盖行诸已也诚则化诸人也深若不推之於诚虽三令五申而令不明也苟不行之於已虽家至户晓而人不信矣圣王知其如此故以礼自修以法自理慎其所好重其所为有诸已者而後求诸人责於下者必先禁於上是以推之而往引之而来道之斯行禁

之斯止使天下之心顚顚然唯望其令听其言而已故言出则千里之外应如响令下则四海之内行如风故曰禁胜于身则令行於人者矣又曰下令如流水发源盖是谓也如此则何虑乎海内之令不如身之使臂臂之使指者哉

十四辨兴亡之由 由善恶之积

问万姓亲怨之由百王兴亡之渐将独系於人乎抑亦系於君乎

臣观前代邦之兴由得人也邦之亡由失人也得其人失其人非一朝一夕之故也其所由来者渐矣天地不能顿为寒暑必渐於春秋人君不能顿为兴亡必渐於善恶善不积不能勃焉而兴恶不积不能忽焉而亡善与恶始系於君也兴与亡终系於人也何则君苟有善人必知之知之又知之其心归之归之又归之则载舟之水由是积焉君苟有恶人亦知之知之又知之其心去之去之又去之则覆舟之水由是作焉故曰至高而危者君也至愚而不可欺者人也圣王知其然故则天上不息之道以修己法地下不动之德以安人修己者慎於中也栗然如履春冰安人者敬其下也凛乎若驭朽索犹惧其未也加以乐人之乐人亦乐其乐忧人之忧人亦忧其忧忧乐同於人敬慎着於已如是而不兴者反是而不亡者自生人已来未之有也臣愚以为百王兴亡之渐在於此也

十五忠敬质文损益

问忠敬质文百代循环之教也五帝何为而不用三王何故而相承将时有同异耶道有优劣耶又三代之际损益不同所祖三才其义安在岂除旧布新务於相反相异乎复扶衰救弊其道不得不然乎又国家祖述五帝宪章三代质文忠敬大备于今然而人鲜朴而忠俗多利而巧欲救斯弊其道如何

臣闻步骤殊时质文异制五帝以道化三王以礼教道者无为无为故无失无失故无革是以唐虞相承无所改易也礼者有作有作则有弊有弊则有救故殷周相代有所损益也损益之教本乎三才夏之教尚忠忠本於人人道以善教人忠之至也故曰忠者人之教也忠之弊其民野救野莫若敬故殷之教尚敬敬本於地地道谦卑天之所生地敬养之故曰敬者地之教也敬之弊其人诡救诡莫若文故周之教尚文文本於天天道垂文而人则之故曰文者天之教也文之弊其人僇救僇莫若忠然则三王之所祖不同者非欲自异而相反也盖扶衰救弊各随其运也运苟有异教亦不同虽忠与敬各系於时而质与文俱致於理标其教则殊制臻其极则同归亦犹水火之相形同根於冥化共济於人用也寒暑之相代同本於元气共成於岁功也三王之道亦如是焉我国家钦若五帝宪章三代典谟不易之道祖述而大用忠敬迭救之教具举而兼行可谓文质协和礼乐明备之代也然臣闻孔子曰殷因於夏礼周因於殷礼损益始终若循环然其继周者百代可知也臣观周之弊也爵赏黜刑罚穷而秦反用刑名祚因中絕及汉杂以霸道德又下衰迨于魏晋以还未有继而救者是以周之文弊今有遗风故人鲜朴而忠俗犹利而巧伏愿陛下以继周为己任以行夏为时宜稍益质而损文渐尚忠而救僇斟酌於教经纬其人使瞻前而道继三王顾後而光垂万叶则尽善之道大同之风不

专於上古矣

十六议祥瑞 辨妖灾

问国家将兴必有祲祥国家将亡必有妖孽斯岂国之兴灭系於天地之灾祥欤将物之妖瑞生於时政之昏明欤又天地有常道灾祥有常应此必然之理也何则桑穀之妖反为福於太戊大鸟之庆竟成祸於帝辛岂吉凶或僭在人将休咎不常其道儆戒之徵安在改悔之効何明又祥必偶圣妖必应昏何以明时不能为无灾乱代或闻其有瑞报施之道何繆滥哉

臣闻国家将兴必有祲祥国家将亡必有妖孽者非孽生而後邦丧非祥出而後国兴盖瑞不虚呈必应圣哲妖不自作必候淫昏则昏圣为祥孽之根妖瑞为兴亡之兆矣文子曰阴阳陶冶万物皆乘人气而生然则道之休明德动乾坤而感者谓之瑞政之昏乱腥闻上下而应者谓之妖瑞为福先妖为祸始将兴将废实先后焉然有人君德未及于休明政不至于昏乱而天文有异地物不常则为瑞为妖未可知也或者天示儆戒之意以寤君心俾乎君修改悔之诚以荅天鉴如此则转乱为治变灾为祥自古有之可得而考也臣闻高宗不聪飞雉雊于鼎宋景有罰荧惑守于心及乎懋懿德以修身出善言而罪已则升耳之异自殄退舍之庆自臻天人相感可谓明矣速矣且高宗三代之贤主也有一德之违亦谪见于物宋景列国之常主也有一言之感亦冥应乎天则知上之鉴下虽贤主也苟有过而必知下之感上虽常主也苟有诚而必应故王者不惧妖之不灭而惧过之不悛不惧瑞之不臻而惧诚之不至足明休徵在德吉凶由人矣失君道者祥反成妖悟天鉴者灾亦为瑞必然而已矣抑臣又闻王者之大瑞在乎天地泰阴阳和风雨时寒暑节百谷熟万人安赋役轻服用俭兵革偃刑罰措贤者出不肖者退声教日被讴歌日兴此之谓休徵此之谓嘉瑞也王者之大妖在乎两仪不泰四气不和风雷不时水旱不节五谷不稔百脰不藏徭役烦征赋重干戈动刑狱作君子隐小人见政令日缺怨讟日兴此之谓咎徵此之谓妖孽也至若一星一辰之瑞一云一露之祥一鸟一兽之妖一草一木之怪或偶生於气象或偶得於陶钧信非休咎之徵兴亡之兆也何则隐见出处亦不干常明圣之朝不能无小灾小沴衰乱之代亦或有小瑞小祥固未足质帝王之疑明天地之意耳王者但外思其政内省其身自谓德之不修诚之不着虽有区区之瑞不足嘉也自谓政之能立道之能行虽有琐琐之妖不足惧也臣窃谓妖祥废兴之由实在於此故虽辞费不敢不备而言之

十七兴五福销六极

问昔周着九畴之书汉述五行之志皆所以精究天人之际穷探政化之源然则五福之祥何从而作六极之沴何感而生将欲辨行可明本末又今人财耗费既贫且忧时沴流行或疾而夭思欲销六极致五福馭一代於富壽纳万人於康宁何所施为可致於此

臣闻圣人兴五福销六极者在乎立大中致大和也至哉中和之为德不动而感不劳而化以之守则仁以之用则神卷之可以理一身舒之可以济万物然则和者生於中也中者生於不偏也不邪也不过也不及也若人君内非中勿思外非中勿动动静进退皆得其中故君得其

中则人得其所人得其所则和乐生焉是以君人之心和则天地之气和天地之气和则万物之生和於是乎三和之气欣合絪縕积为壽蓄为富舒为康宁敷为攸好德益为考终命其美者则融为甘露凝为庆云垂为德星散为景风流为醴泉六气叶乎时七曜顺乎轨迨于巢穴羽毛之物皆煦妪而自蕃草木鳞介之祥皆丛萃而继出夫然者中和之气所致也若人君内非中是思外非中是动动静进退不得其中故君不得其中则人不得其所人不得其所则怨叹兴焉是以君人之心不和则天地之气不和天地之气不和则万物之生不和於是乎三不和之气交错堙郁伐为凶短折攻为疾聚为忧损为贫结为怨耗为弱其美者潜为伏阴淫为愆阳守为彗星发为暴风降为苦雨四序失其节三辰乱其行迨于襁褓卵胎之生皆夭阏【阿葛切】而不遂木石华虫之怪皆揉杂而毕呈夫然者不中不和之气所致也则天人交感之际五福六极之来岂不昭昭然哉臣伏见比者兵赋未减人鲜无忧时疹所加衆或有疾德宗皇帝病人之病忧人之忧於是救之以广利之方悦之以中和之乐将使易忧为乐变病为和惠化之恩莫斯甚也然臣窃闻善除害者察其本善理疾者絕其源伏惟陛下欲纾人之忧先念忧之所自欲救人之病先思病之所由知所自以絕之则人忧自弭也知所由以去之则人病自瘳也然後申之以救疗之术则人易康宁鼓之以安乐之音则人易和悦斯必应疾而化速利倍而功兼六极待此而销五福待此而作如是可以陶三才繆濫之气发为休祥馭一代鄙夭之人臻乎仁壽中和之化夫何远哉

十八辨水旱之灾 明存救之术

问狂常雨若僭常阳若此言政教失道必感於天也又尧之水九年汤之旱七年此言阴阳定数不由於人也若必系於政则盈虚之数徒言如不由於人则精诚之祷安用二义相戾其谁可从又问阴阳不测水旱无常将欲均岁功於丰凶救人命於冻馁凶歉之岁何方可以足其食灾危之日何计可以固其心将备不虞必有其要历代之术可明徵焉

臣闻水旱之灾有小有大大者由运小者由人由人者由君上之失道其灾可得而移也由运者由阴阳之定数其灾不可得而迁也然则小大本末臣粗知之其小者或兵戈不戢军旅有强暴者或诛罰不中刑狱有冤滥者或小人入用谗佞有得志者或君子失位忠良有放弃者或男女臣妾有怨旷者或鰥寡孤独有困死者或赋歛之法无度焉或土木之功不时焉於是乎忧伤之气愤怒之心积以伤和变而为疹古之君人者逢一灾遇一异则回视反听察其所由且思乎军镇之中无乃有纵暴者耶刑狱之中无乃有冤滥者耶权宠之中无乃有不肖者耶放弃之中无乃有忠贤者耶内外臣妾无乃有幽怨者耶天下穷人无乃有困死者耶赋入之法无乃有过厚者耶土木之功无乃有屡兴者耶若有一於此则是政令之失而天地之譴也又洪范曰狂常雨若僭常阳若言不信不义亦水旱应之然则人君苟能改过塞违率德修政励敬天之志罪已之心则虽踰月之霖经时之旱至诚所感不能为灾何则古人或牧一州或宰一县有暴身致雨者有救火反风者有飞蝗去境者郡邑之长犹能感通况王者为万乘之尊居兆人之上悔过可以动天地迁善可以感神明天地神明尚且不违而况於水旱风雨虫蝗者乎此臣所谓由人可移之灾也其大者则唐尧九载之水殷汤七年之旱是也夫以尧之大圣汤之至仁于时德俭人和刑清兵偃上无狂僭之政下无怨嗟之声而卒有浩浩滔天之灾炎炎烂石之疹非君上之失道盖阴阳之定数尔此臣所谓由运不可迁之灾也然则圣

人不能迁灾能御灾也不能违时能辅时也将在乎廩积有常仁惠有素备之以储蓄虽凶荒而人无菜色固之以恩信虽患难而人无离心储蓄者聚於丰年散於歉岁恩信者行於安日用於危时夫如是则虽阴阳之数不可迁而水旱之灾不能害故曰人强胜天盖是谓矣斯亦图之在早备之在先所谓思危於安防劳於逸若患至而方备灾成而後图则虽圣人不能救矣抑臣又闻古者圣王在上而下不冻馁者何哉非家至日见衣之食之盖能均节其衣食之源也夫天之道无常故岁有丰必有凶地之利有限故物有盈必有缩圣王知其必然於是作钱刀布帛之货以时交易之以时敛散之所以持丰济凶用盈补缩则衣食之费谷帛之生调而均之不啻足矣盖管氏之轻重李悝之平糴耿壽昌之常平者可谓不涸之食不竭之府也故丰稔之岁则贵糴而以利农人凶歉之年则贱糴以活饿殍若水旱作沴则资为九年之蓄若兵甲或动则馈为三军之粮上以均天时之丰凶下以权地利之盈缩则虽九年之水七年之旱不能害其人危其国矣至若禳祷之术凶荒之政历代之法臣粗闻之则有雩天地以牲牢禋【为命切禋风雨祭】山川以圭璧祈土龙於玄寺舞羣巫於灵坛徙市修城贬食彻乐缓刑省礼务嗇劝分杀哀多婚弛力舍禁此皆从人之望随时之宜勤恤下之心表恭天之罰但可以济小灾小弊未足以救大危大荒必欲保邦邑於危安人心於困则在乎储蓄充其腹恩信结其心而已盖羲农唐虞禹汤文武皆由此涂而王也

卷六十三

钦定四库全书

白氏长庆集卷六十三

唐白居易撰

策林二【凡二十七首】

十九息游惰 劝农桑议赋税复租庸罢缗钱用谷帛

问一夫不田天下有受其馁者一妇不蚕天下有受其寒者斯则人之性命系焉国之贫富属焉方今人多游心地有遗力守本业者浮而不固逐末作者荡而忘归夫然岂惩戒游惰之法失其道耶将敦劝农桑之教不得其本耶

臣伏见今之人舍本业趋末作者非恶本而爱末盖去无利而就有利也夫人之趋利者甚矣苟利之所在虽水火蹈焉虽白刃冒焉故农桑苟有利也虽日禁之人亦归矣而况於劝之乎游惰苟无利也虽日劝之亦不为矣而况於禁之乎当今游惰者逸而利农桑者劳而伤所以伤者由天下钱刀重而谷帛轻也所以轻者由赋敛失其本也夫赋敛之本者量桑地以出租计夫家以出庸租庸者谷帛而已今则谷帛之外又责之以钱钱者桑土不生铜私家不敢铸业於农者何从得之至乃吏胥追徵官限迫蹙则易其所有以赴公程当丰岁则贱余半价不足以充缗钱遇凶年则息利倍称不足以偿逋债丰凶既若此为农者何所望焉是以商贾大族乘时射利者日以富豪田垄罢人望岁勤力者日以贫困劳逸既悬利病相诱则农夫之心尽思释耒而倚市织妇之手皆欲投杼而刺文至使田卒污莱室如悬罄人力罕施而地利多郁天时虚运而岁功不成臣常反覆思之实由谷帛轻而钱刀重也夫余甚贵钱甚轻则伤人余甚贱钱甚重则伤农农伤则生业不专人伤则财用不足故王者平均其贵贱调节其重轻使百货通流四民交利然後上无乏用而下亦阜安方今天下之钱日以减耗或积於国府或滞於私家若复日月徵求岁时输纳臣恐谷帛之价转贱农桑之业转伤十年以後其弊或甚於今日矣非所谓平均调节之道也今若量夫家之桑地计谷帛为租庸以石斗登降为差以匹夫多少为等但书估价并免税钱则任土之利载兴易货之弊自革弊革则务本者致力利兴则趋末者回心游手於道途市肆者可易业於西成托迹於军籍释流者可返躬於东作欲其浮惰其可得乎加以陛下念稼穡之艰难则薄敛而人足食矣念纺绩之勤苦则省用而人丰财矣念异货之败度则寡欲而人着诚矣念奇器之荡心则正德而人归厚矣其兴利除害也如彼又修己化人也如此是必应之如响荅顺之如风行斯可谓下令如流水之源系人於苞桑之本者矣欲其浮惰其可得乎

二十平百货之价 陈敛散之法请禁销钱为器

问今田畴不加辟而菽粟之佑日轻桑麻不加植而布帛之价日贱是以射时利者贱收而日富勤力穡者轻用而日贫夫然岂殖货歛散之节失其宜耶将泉布轻重之权不得其要也

臣闻谷帛者生於农也器用者化於工也财物者通於商也钱刀者操於君也君操其一以节其三三者和均非钱不可也夫钱刀重则谷帛轻谷帛轻则农桑困故散钱以敛之则下无遗谷遗帛矣谷帛贵则财物贱财物贱则工商劳故散谷以收之则下无废财弃物矣歛散得其节轻重便於时则百货之价自平四人之利咸遂虽有圣智未有易此而能理者也方今关辅之间仍岁大稔此诚国家散钱歛谷防险备凶之时也时不可失伏惟陛下惜之臣又见今人之弊者由铜利贵於钱刀也何者夫官家采铜铸钱成一钱破数钱之费也私家销钱为器破一钱成数钱之利也铸者有程销者无限虽官家之岁铸岂能胜私家之日销乎此所以天下之钱日减而日重矣今国家行挟铜之律执铸器之禁使器无用铜铜无利也则钱不复销矣此实当今权节重轻之要也

二十一一人之困穷由君之奢欲

问近古以来君天下者皆患人之困而不知困之由皆欲人之安而不得安之术今欲转劳为逸用富易贫究困之由矫其失於既往求安之术致其利於将来审而行之以康天下

臣闻近古以来君天下者皆患人之困而不知困之由皆欲人之安而不得安之术臣虽狂瞽然粗知之臣窃观前代人庶之贫困者由官吏之纵欲也官吏之纵欲者由君上之不能节俭也何则天下之人亿兆也君者一而已矣以亿兆人之奉其一君则君之居处虽极土木之功殫金玉之饰君之衣食虽穷海陆之味尽文采之华君之耳目虽恣郑卫之音厌燕赵之色君之心体虽倦畋渔之乐疲辙迹之游犹未全扰於人伤於物何者以至多奉至少故也然则一纵一放而弊及於人者又何哉盖以君之命行於左右左右颁於方镇方镇布於州牧州牧达於县宰县宰下於乡吏乡吏转於村胥然後至於人焉自君至臣等级若是所求既衆所费滋多则君取其一而臣已取其百矣所谓上开一源下生百端者也岂直如此而已哉盖亦君好则臣为上行则下效故上苟好奢则天下贪冒之吏将肆心焉上苟好利则天下聚歛之臣将寘力焉雷动风行日引月长上益其侈下成其私其费尽出於人人实何堪其弊此又为害十倍於前也夫如是则君之躁静为人劳逸之本君之奢俭为人富贫之源故一节其情而下有以获其福一肆其欲而下有以罹其殃一出善言则天下之心同其喜一违善道则天下之心共其忧盖百姓之殃不在乎鬼神百姓之福不在乎天地在乎君之躁静奢俭而已是以圣王之修身化下也宫室有制服食有度声色有节畋游有时不徇己情不穷己欲不殫人力不耗人财夫然故诚发乎心德形乎身政加乎人化达乎天下以此禁吏则贪欲之吏不得不廉矣以此牧人则贫困之人不得不安矣困之由安之术以臣所见其在兹乎

二十二不夺人利 议盐铁与榷酤减厚歛及杂税

问盐法之谋榷酤之法山海之利关市之征皆可以助佐征徭又虑其侵削黎庶舍之则乏用於军国取之则夺利於生人取舍之间孰为可者

臣闻君之所以为国者人也人之所以为命者衣食也衣食之所从出者农桑也若不本於农桑而兴利者虽圣人不能也苟有能者非利也其害也何者既不自地出又非从天来必是巧取於人曲成其利利则日引而月长人则日削而月朘至使人心穷王泽竭故臣但见其害不见其利也所以王者不殖货利不言有无耗羨之财不入於府库析毫之计不行於朝廷者虑其利穴开而罪梯构然则圣人非不好利也利在於利万人非不好富也富在於富天下节欲於中人斯利矣省用於外人斯富矣故唐尧夏禹汉文之代虽薄农桑之税除关市之征弃山海之饶散盐铁之利亦国足而人富安矣何则欲节而用省也秦皇汉武隋炀之时虽入大半之赋徵逆折之租建榷酤之法出舟车之筭亦国乏而人贫弊矣何则欲不节而用不省也盖所谓山林不能给野火江海不能实漏卮夫利散於下则人逸而富利壅於上则人劳而贫故下劳则上无以自安人富则君孰与不足礼记曰民以君为心君以民为体诗曰恺悌君子民之父母由此而言未有圣劳而心逸者也未有子富而父贫者也臣又闻地之生财多少有限人之食利衆寡有常若盈於上则耗於下利於彼则害於此而王者四海一家兆人一统国无异政家无异风若夺其利则害生害不加於人欲何加乎若除其害则利生利不归於人欲何归乎故夺之也如皮尽於毛下本或不存与之也同囊漏於贮中利将焉往与夺利害断可知焉是以善为国者不求非农桑之产不重非衣食之货不用计数之吏不蓄聚敛之臣臣闻榷筦之谋则思侵削于下见羨余之利则念诛求於人然後德泽流而歌咏作矣故曰利出一孔者王利出二孔者强利出三孔者弱此明君立国子民者贵本业而贱末利也

二十三议盐法之弊 论盐商之幸

臣伏以国家盐之法久矣盐之利厚矣盖法久则弊起弊起则法隳利厚则奸生奸生则利薄臣以为隳薄之由由乎院塲太多吏职太衆故也何者今之主者岁考其课利之多少而殿最焉赏罚焉院塲既多则各虑其商旅之不来也故羨其盐而多与焉吏职既衆则各惧其课利之不优也故慢其货而苟得焉盐羨则幸生而无厌之商趋矣货慢则滥作而无用之物入矣所以盐愈费而官愈耗货愈虚而商愈饶法虽行而奸缘课虽存而利失今若减其吏职省其院塲审货帛之精麓谨盐量之出入使月有常利岁有常程自然盐不诱商则出无羨盐矣吏不争课则入无滥货矣盐不滥出货不滥入则法自张而利复兴矣利害之効岂不然乎臣又见自关以东上农大贾易其资产入为盐商率皆多藏私财别营裨贩少出官利唯求隶名居无征徭行无榷税身则庇於盐籍利尽入於私室此乃下有耗於商农上无益於筦榷明矣盖山海之饶盐铁之利利归於人政之上也利归於国政之次也若上不归於人次又不归於国使幸人奸党得以自资此乃政之疵国之蠹也今若剗革弊法沙汰奸商使下无侥幸之人上得析毫之计斯又去弊兴利之一端也唯陛下详之

二十四议罢漕运可否

问秦居上腴利号近蜀然都畿所理征赋不充故岁漕山东谷四百万斛用给京师其间水旱

不时赈贷贫乏今议者罢运谷而收脚价杂户粟而折税钱但未知利於彼乎而害於此乎

臣闻议者将欲罢漕运於江淮请和采於关辅以省其费以便於人臣愚以为救一时之弊则可也若以为长久之法则不知其可也何者方今自淮以南逾年旱歉自洛而西仍岁丰稔彼人困於艰食此谷贱於伤农困则难於发租贱则易於乞采斯则不便於彼而无害於此矣此臣所谓救一时之弊则可也若举而为法徇以为常臣虽至愚知其不可何者夫都畿者四方所凑也万人所会也六军所聚也虽利称近蜀之饶犹未能足其用虽田有上腴之利犹不得充其费况可日削其谷月朘其食乎故国家岁漕东南之粟以给焉时发中都之廩以赈焉所以瞻关中之人均天下之食而古今不易之制也然则用舍利害可明徵矣夫賫敛采之资省漕运之费非无利也盖利小而害大矣故久而不胜其害挽江淮之租赡关辅之食非无害也盖害小而利大矣故久而不胜其利大凡事之大害者不能无小利也事之大利者不能无小害也盖恤小害则大害不去爱小利则大利不成也古之明王所以能兴利除害者非他盖弃小而取大耳今若恤泛舟之役忘移谷之用是知小计而不知大会矣此臣所谓若以为长久之法则不知其可也

二十五立制度 节财用均贫富禁兼并止盗贼起廉让

问天地之利有限也人之欲无穷也以有限奉无穷则必地财耗於僭奢人力屈於嗜欲故不足者为奸为盗有余者为骄为滥今欲使食力相充财欲相称贵贱别而礼让作贫富均而廉耻行作为何方可至於此臣闻天有时地有利人有欲能以三者与天下共者仁也圣也仁圣之本在乎制度而已夫制度者先王所以下均地财中立人极上法天道者也且天之生万物也长之以风雨成之以寒燠圣人之牧万人也活之以衣食济之以器用若风雨淫寒燠甚则反伤乎物之生焉若衣食奢器用费则反伤乎人之生焉故作四时八节所以时寒燠节风雨不使之过差为沴也圣人制五等十伦所以伦衣食等器用不使之踰越为害也此所谓法天而立极者也然则地之生财有常力人之用财有常数若羨於上则耗於下也有余於此则不足於彼也是以地力人财皆待制度而均也尊卑贵贱皆待制度而别也大凡爵禄之外其田宅栋宇车马仆御器服饮食之制暨乎冠?祀葬之度自上而下皆有数焉若不节之以数用之以伦则必地力屈於僭奢人财消於嗜欲而贫困冻馁奸邪盗贼尽生於此矣圣王知其然故天下奢则示之以俭天下俭则示之以礼俾乎贵贱区别贫富适宜上下无羨耗之差财力无消屈之弊而富安温饱廉耻礼让尽生於此矣然则制度者出於君而加於臣行於人而化於天下也是以君人者莫不唯欲是防唯度是守守之不固则外物攻之故居处不守其度则峻宇崇台攻之饮食不守其度则殊滋异味攻之衣服不守其度则奇文诡制攻之视听不守其度则奸声艳色攻之喜怒不守其度则僭赏淫刑攻之翫好不守其度则妨行之货荡心之器攻之献纳不守其度则谗谄之言聚敛之计攻之道术不守其度则不死之方无生之法攻之夫然则安得不内固其守甚於城池焉外防其攻甚於寇戎焉将在乎寢食起居必思其度思而不已则其下化之诗曰仪刑文王万邦作孚此之谓矣

二十六养动植之物 以丰财用以致麟凤龟龙

臣闻天育物有时地生财有限而人力无极以有时有限奉无极之欲而法制不生其间则必物暴殄而财乏用矣先王恶其及此故川泽有禁山野有官养之以时取之以道是以豺獭未祭置网不布於野泽鹰隼未击矰弋不施於山林昆虫未蛰不以火田草木未落不加斧斤渔不竭泽畋不合围至於麋【忙皮切】卵【鲁管切】蛇【胡田切百足虫似蜈蚣而小能毒人】蝮【于权切蝮蝗之类】五谷百果不中杀者皆有常禁夫然则禽兽鱼鼈不可胜食矣财货器用不可胜用矣臣又观之岂直若此而已哉盖古之圣王使信及豚鱼仁及草木鸟兽不狘【呼 切惊走貌】胎卵可窥麟凤效灵龟龙为畜者亦由此涂而致也

二十七请以族类求贤

问自古以来君者无不思求其贤贤者罔不思効其用然而君求贤而不得臣効用而无由岂不以贵贱相悬朝野相隔堂远於千里门深於九重虽臣有懷【卢侯切又音闻】懷之诚何由上达虽君有孜孜之念无因下知上下茫然两不相遇如此则岂唯贤者不用矧又用者不贤所以从自古以来乱多而理少者职此之由也臣以为求贤有术辨贤有方方术者各审其族类使之推荐而已近取诸喻其犹线与矢也线因鍼而入矢待弦而发虽有线矢苟无鍼弦求自致焉不可得也夫必以族类者盖贤愚有贯善恶有伦若以类求必以类至此亦犹水流湿火就燥自然之理也何则夫以德义立身者必交於德义不交於险僻以正直克己者必用於正直不用於颇邪以贪冒为意者必比於贪冒不比於贞廉以悖慢肆心者必狎於悖慢不狎於恭谨何者事相害而不相利性相戾而不相从此乃天地常伦人物常理必然之势也则贤与不肖以此知之伏惟陛下欲求而致之也则思因鍼待弦之势欲辨而别之也则察流湿就燥之徒得其势必彙征而自来审其徒必羣分而自见求人之术辨人之方於是乎在此矣

二十八尊贤 请厚礼以致大贤也

问国家岁贡俊造日求贤良何则所得者率寻常之才所来者非师友之佐岂时无大贤乎将求之不得其道乎

臣闻致理之先先於行道行道之本本於得贤得贤之由由乎审理若礼之厚薄定於此则贤之优劣应於彼故黜位而朝西面而事则师之才至矣先之以身下之以色则友之才至矣展皮币之礼尽揖让之仪则大臣之才至矣南面而坐使者先焉则左右之才至矣凭几据杖以令召焉则厮役之才至矣是以得师者帝得友者王得大臣者霸得左右者弱得厮役者乱然则求师而得友求友而得臣者有矣未有求臣而得友求友而得师者也是故图帝而成王图王而成霸者有矣未有图霸而成王图王而成帝者也夫以夷吾之贤为不可召之臣桓公所以霸齐也孔明之才为非屈致之士刘氏所以图蜀也夫欲霸一国图一方犹审其礼行其道焉况开帝王之业垂无疆之休苟无尊贤之风师友之佐则安能弘其理恢其化乎国家有天下二百年政无不施德无不备唯尊贤之礼未与三代同风陛下诚能行之则尽美尽善之事毕矣

二十九请行赏罚以劝举贤

问顷者累下诏旨令举所知献其状莫匪贤能授以官罕闻政绩将人不易知耶将容易其举耶

臣伏见顷者德宗皇帝颁下诏旨令举所知自是内外百寮岁有闻荐有司各详其状咸命以官语其数诚得多士之名考其才或非尽善之实何则得贤由举择慎审慎审由赏罚必行自十年以来未闻有司以得所举赏一人以失所举罪一人则内外之荐恐未专精出处之贤或有违滥斯所以令陛下尚有未得贤之叹也伏惟申命所举深诏有司量其短长之材授以大小之职然後明察臧否精考殿最得人者行进贤之赏谬举者坐不当之辜自然上下精详远近惩劝谨关梁以相保责辕轮以相求俾夫草靡风行达於上下天下之耳尽为陛下听天下之目尽为陛下视明其视则举不失德广其听则野无遗贤而後官得其才事得其序如此则陛下但凝神端拱而天下理矣

三十审官 量才授职则政成事举

问官既备而事未举才既用而政未成者由官与才不相得也且官有大小繁简之殊才有短长能否之异称其任则政立枉其能则事乖故先王立庶官而後求人使乎各司其局也辩衆才而後入仕使乎各尽其能也如此则官虽省才虽半可得而理矣若以短任长以大授小委其不可而望其可强其不能而责其能如此则官虽能才虽倍无益於理矣故曰任小能於大事者犹狸搏虎而刀伐木也展长才於短用者犹骥捕鼠而斧剪毛也所不相及岂不宜哉王者诚能量衆才之短长审庶官之小大俾操凿柄【如税切】者无圆方之谬备轮辕者适曲直之宜自然人尽其能职修其要彝伦日叙庶绩日凝又何患乎事不举而政未成哉

三十一大官乏人 由不慎选小官也

问国家台衮之才台省之器胡然近日稍乏其人将欲救之其故安在

臣伏见国家公卿将相之具选於丞郎给舍丞郎给舍之材选於御史遗补郎官御史遗补郎官之器选於秘着校正畿赤簿尉虽未尽是十常六七焉然则畿赤之吏不独以府县之用求之秘着之官不独以按勘之用取之其所责望者乃丞郎之椎轮公卿之濫觴也则选用之际宜得其人臣窃见近日秘着校正或以门地授畿赤簿尉唯以资序求不商较其器能不研核其才行至使顷年以来台官空不知所取省郎阙不知所求岂直乏贤诚亦废事且以资序得者仅能参於簿领以门地进者或未任於铅黄臣恐台衮之才台省之器十年以後稍乏其人又顷者有司惩趋竞之流塞徼幸之路俾进士非科第者不授校正校正欠资考者不署畿官立而为文权以救弊盖一时之制非可久之术今者有司难於抡材易於注拟因循勿改守以为常至使两畿之中数县之外虽资序皆当其任而名实莫得而闻故每台省缺员曾莫敢议则守文之弊一至於斯伏愿思以後难革其前失正丞郎椎轮之本疏公卿濫觴之源如此则良能之才必足用矣要剧之职不乏人矣

三十二议庶官迁次之迟速

问先王建官升降有制迁次有常此经久之道也或云赏善罚恶者不踰时月又曰为官吏者可长子孙岂今古之制殊乎不然何迟速之异如此也今欲速迁而劝善恐诱躁求之心将令久次而望功虑兴滞用之叹疾徐之制何以为中

臣闻孔子曰苟有用我者三年而有成舜典曰三载考绩三考黜陟幽明虽圣贤为政未及三年不能成也虽善恶难知不过九载必自着也由此而论为官吏者不可速迁也不可久次也若未三年而迁则政未立绩未成且躁求之心生而驯致之化废矣若过九载而不转则明不陟幽不黜且劝善之法缺而惩恶之典隳矣大凡内外之官其略如此然则最与天子共理者莫先於二千石乎臣窃见近来诸州刺史有未两考而迁者岂为善成政之速速於圣贤耶将有司考察之不精耶不然何迁之遽也又有踰一纪而不转者岂善恶未着莫得而知耶将有司遗忘而不举耶不然何转之迟也臣伏见顺宗皇帝诏曰凡内外之职四考递迁斯实革今之弊行古之道也然臣犹以为吏能有闻者既以四考迁之政术无取者亦宜四考黜之将欲循其名辨其实则在陛下獎纠察之吏督考课之官使别其否臧明知白黑仍命曰虽久次者不得逾於四载虽速迁者亦待及於三年此先王较能之大方致理之要道也伏惟陛下试垂意而察焉

三十三革吏部之弊

问吏部之弊为日久矣今吏多於员其故何因官不得人其由何在奸伪日起其计何生弛骛日滋其风何自欲使吏与员而相得名与实而相符趋竞巧滥之弊销公平政理之道长妍媸者不能欺於藻镜锱铢者不敢诈於铨衡岂无良谋以救其弊

臣伏见吏部之弊为日久矣时皆共病不知其然臣请备而言之臣闻古者计户以贡士量官而署吏故官不乏吏士不乏官士吏官员必相参用今则官倍於古吏倍於官入色者又倍於吏也此由每岁假文武而筮仕者衆冒资廕而出身者多故官不得人员不充吏是以争求日至奸滥日生斯乃为弊之一端也臣又闻古者州郡之吏牧守选而举之府寺之寮公卿辟而署之其余者乃归有司有司所领既少则所选必精此前代所以得人也今则内外之官一命以上岁美千数悉委吏曹吏曹案资署官犹惧不给则何暇考察名实区别否臧者乎至使近代以来浸而成弊真伪争进共徵循资之书贤愚莫分同限停年之格才能者淹滞而不振巧诈者因缘以成奸此又为弊之一端也今若使内外师长各选其人分署其吏则庶乎官得其才矣使诸色入仕者量省其数或间以年则庶乎士不乏官矣官得其才则公平政理之道所由长也士不乏官则趋竞巧滥之弊所由销也矧又减铨衡之偏重则力不挠而易平矣分藻镜之独鉴则照不疲而易明矣与夫千品折於一面百职断於一心功相万也得失相悬岂不远矣臣以为芟烦剗弊莫尚於斯

三十四牧宰考课 议殿最未精又政不由已

问今者勤恤黎元之隐精求牧宰之才亦既得人使之为政何以抚字之方尚未副我精求之旨疲困之俗尚未知我勤恤之心岂才未称官将人不求理备陈其故以革其非

臣闻王者之设庶官无非共理者也然则庶官之理同归而牧宰之用为急盖以邦之赋役由之而後均王之风教由之而後行人之性命系焉国之安危属焉故与夫庶官之寄轻重不可齐致也臣伏见陛下勤恤黎元之心至矣慎择牧宰之旨深矣然而黎元之理尚未副陛下勤恤之心牧宰之政尚未称陛下慎择之旨非人不求理非才不称官以臣所窥粗知其由矣臣闻贤者为善不待劝矣何哉性不忍为恶耳愚者为不善虽劝而不迁也何哉性不能为善耳贤愚之间谓之中人中人之心可上可下劝之则迁於善舍之则陷於恶故曰惩劝之废也推中人而坠於小人之域惩劝之行也引中人而纳诸君子之涂是知劝沮之道不可一日无也况天下牧宰中人者多去恶迁善皆得劝沮伏以方今殿最之法甚备黜陟之令甚明然则就备之中察之者未甚精也就明之中奉之者未甚行也未甚精则臧否同贯未甚行则善恶齐驱虽有和璞之贞不能识也虽有齐竽之滥何由知之如此则岂独利淫亦将失善善苟未劝淫或未惩欲望副陛下勤恤之心称陛下慎择之旨或恐难矣臣又请以古事验之臣闻唐虞之际也敷求俊乂而四凶见用及三考黜陟而四罪乃彰则知虽至明也尚或迷真伪之徒虽至圣也不能去考察之法故其法张则变曲为直如蓬生於麻也其法弛则变香为臭使兰化为艾也且圣人之为理岂尽得贤而用之乎岂尽知不肖而去之乎将在夫秉其枢操其要剗邪为正削觚为圆能使善之必迁不谓善之尽有能使恶之必改不谓恶之尽无成此功者无他惩劝之所致也则考课之法其可轻乎臣又见当今牧宰之内甚有良能委之理人亦足成政所未至者又有其由臣闻牧宰古者五等之国也於人有父母之道焉於吏有君臣之道焉所宜弛张举措由其心威福赏罚悬於手然後能镇其俗移其风也今县宰之权受制於州牧州牧之政取则於使司迭相拘持不敢专达虽有政术何由施行况又力役之限赋敛之期以用之费省为求不以人之贫富为度以上之缓急为节不以下之劳逸为程县畏於州州畏於使虽有仁惠何由抚绥此犹束舟楫而望济川绊骐驎而求致远臣恐龚黄卓鲁复生於今日亦不能为理矣

三十五使百职修皇纲振 在乎革慎默之俗

夫百职不修万事不举皇纲弛而不振颓俗荡而不还者由君子说直之道消小人慎默之道长也臣伏见近代以来时议者率以拱默保位者为明智以柔顺安身者为贤能以直言危行者为狂愚以中立守道者为凝滞故朝寡敢言之士庭鲜执咎之臣自国及家寢而成俗故父训其子曰无介直以立仇敌兄教其弟曰无方正以贾悔尤识者腹非而不言愚者心竞而是効至使天下有目者如瞽也有耳者如聋也有口者如含锋刃也慎默之俗一至於斯此正士直臣所以退藏而长太息也岂直若此而已哉盖慎默积於中则职事废於外强毅果断之心屈畏忌因循之性成反谓率职而举正者不达於时宜当官而行法者不通於事变是以殿最之文虽书而不实黜陟之法虽备而不行欲望善者劝恶者惩百职修万事举不可得也然臣以为历代之颓俗非国朝不能革也国朝之皇纲非陛下不能振也革振之术臣粗知之何者夫人之蚩蚩唯利是务若利出於慎默则慎默之风大起若利出於说直则说直之风大行亦犹冬月之阳夏日之阴不召物而自归之者无他温凉之利所在故也伏惟陛下以至公统天下以至明御羣臣使情伪无所逃言行无所隐有若说直强毅举正弹违者引而进之有若慎默畏忌吐刚茹柔者推而远之使此有利彼无利安得不去彼取此乎斯所谓俾人日从善远罪而不自知也如此则百职修万事举皇纲振颓俗移太平之风由斯而致矣

白氏长庆集卷六十三

卷六十四

<集部,别集类,汉至五代,白氏长庆集>

钦定四库全书

白氏长庆集卷六十四

唐白居易撰

策林三【凡十九首】

三十六达聪明致理化

夫欲达聪明致理化则在乎奉成式不必乎创新规也臣闻尧之所以神而化者聪明文思也舜之所以圣而理者明四目达四聪也盖古之理化皆由聪明出也自唐虞以降斯道寢衰秦汉以还斯道大丧上不以聪接下下不以明奉上聪明之道既阻於上下则讹伪之俗不得不流於内外也国家承百王已弊之风振千古未行之法於是始立匭使始加谏员始命待制官始设登闻鼓故遗补之谏入则朝廷之得失所由知也匭使之职举则天下之壅蔽所由通也待制之官进则衆臣之谋猷所由展也登闻之鼓鸣则羣下之冤滥所由达也此皆我烈祖所剏累圣所奉虽尧舜之道无以出焉故贞观之太和开元之至理率由斯而驯致矣自贞元以来抗疏而谏者留而不行投书於匭者寢而不报待制之官经时而不見於一问登闻之鼓终岁而不闻於一声臣恐衆臣之谋猷或未尽展朝廷之得失或未尽知壅蔽者有所未通冤滥者有所未达今幸当陛下践祚体元之始施令布和之初则宜申明旧章条举废事使列圣之述作不坠陛下之聪明惟新以初为常今其时矣时不可失惟陛下惜而行之则尧舜之化祖宗之理可得而致矣臣故曰达聪明致理化在乎奉成式不必乎剏新规也

三十七决壅蔽【在不使人知所欲】

臣闻国家之患患在臣之壅蔽也壅蔽之生生於君之好欲也盖欲见於此则壅生於彼壅生於彼则乱作其间历代有之可略言耳昔秦二代好佞赵高饰谄谀之言以壅之周厉好利荣夷公陈聚斂之计以壅之殷辛好音师涓作靡靡之乐以壅之周幽好色褒人纳艳妻以壅之齐桓好味易牙蒸首子以壅之虽所好不同同归於壅也所壅不同同归於乱也故曰人君无见其意将为下饵盖谓此矣然则明王非无欲也非无壅也盖有欲则节之有壅则决之节之又节之以至於无欲也决之又决之以至於无壅也其所以然者将在乎静思其故动防其微故闻甘言则虑赵高之谀进於侧矣见厚利则虑荣夷公之计陈於前矣听新声则虑师涓之音诱於耳矣顾艳色则虑褒氏之女惑於目矣尝异味则虑易牙之子入於口矣夫如是安得

不昼夜慮之寤寐思之立則見其參於前行則想其隨於後自然兢兢業業日慎一日使左不知其所欲右不知其所好雖欲壅蔽其可得乎此明王節欲決壅之要道也

三十八君不行臣事【委任宰相】

臣聞建官施令者君所執也率職知事者臣所奉也臣行君道則政專君行臣道則事亂專與亂其弊一也然則臣道者百職至衆萬事至繁誠非一人方寸所能盡也故王者但操其要擇其人而已將在乎分務於羣司各令督責其課受成於宰相不以勤倦自撓然後謹殿最而賞罰焉審幽明而黜陟焉則萬樞之要畢矣故失君道者雖多夕惕若厲之慮而彝倫未必序也行臣事者雖多日昃不食之勤而庶績未必凝也得其要逸而有終非其宜勞而无功故也臣又聞坐而論道三公之任也作而行之卿大夫之職也故陳平不肯知錢穀邴吉不問死傷者此有司之職也非宰相之任也夫以宰相尚不可侵有司之職況人君可侵宰相之任乎可侵百執事之事乎臣又聞宰相之任者上代天工下執人柄羣職由之而理亂庶政由之而弛張君之心膺待宰相而啓沃君之耳目待宰相而聰明設其位不可一日非其人得其人不可一日无其寵疑則勿用用則勿疎然後能欣合其心馴致其道蓋先王所以端拱凝旒而天下大理者无他焉委務於有司也仰成於宰相也

三十九使官吏清廉【在均其祿厚其俸也】

臣聞爲國者皆患吏之貪而不知去貪之道也皆欲吏之清而不知致清之由也臣以爲去貪致清者在乎厚其祿均其俸而已夫衣食闕於家雖嚴父慈母不能制其子況君長能儉其臣吏乎凍餒切於身雖巢由夷齊不能固其節況凡人能守其清白乎臣伏見今之官吏所以未盡貞廉者由祿不均而俸不足也不均者由所在課料重輕不齊也不足者由所在官長侵刻不已也其甚者則有官秩等而祿殊郡縣同而俸異或削奪以過半或停給而弥年至使衣食不充凍餒并至如此則必冒白刃蹈水火而求私利也況可使抚人字物斷獄均財者乎夫上行則下从身窮則心濫今官長日侵其利而望吏之不日侵於人不可得也蓋所謂渴馬守水餓犬護肉則雖日用刑罰不能懲貪而勸清必矣陛下今欲革時之弊去吏之貪則莫先於均天下課料重輕禁天下官長侵刻使天下之吏溫飽充於內清廉形於外然後示之以耻糾之以形如此則縱慾爲非者百无一二也

四十省官并俸減使職

臣聞古者計人而置官量賦而制祿故官之省繁必稽人戶之衆寡祿之厚薄必稱賦入之多少俾乎官足以理人人足以奉吏更有常祿財有常征財賦吏員必參相得者也頃以兵戎屢動荒沴荐臻戶口流亡財征減耗則宜量其官而省之并其祿而厚之故官省則事簡事簡則人安祿厚則吏清吏清則俗阜而天下所由理也然則知清其吏而不知厚其祿則飾詐而不廉矣知厚其祿而不知省其官則財費而不足矣知省其官而不知選其能則事壅而不理矣此三者迭爲表里相須而成者也伏惟陛下詳而行之臣又見兵興以來諸道使府或因權宜而置職一置而不停或因暫勞而加俸一加而无減至使職多於郡縣之吏俸優於台省之官

积习生常烦费滋甚今若量其职员审其禄秩使衆寡有常数厚薄得其中故禄得其中则费不广而下无侵削之患矣职有常数则事不烦而人无劳扰之弊矣此又利害相悬远者伏惟陛下念而救之

四十一议百司食利钱

臣伏见百司食利利出於人日给而经费有常月徵而倍息无已然则举之者无非贫户徵之者率是远年故私财竭於倍利官课积於逋债至使公食有阙人力不堪弊既滋深法宜改作且王者恶言求利患在不均况天下之钱一也谓之曰利曷若谓之曰征乎取之於寡曷若取之於衆乎今若日计其费岁会其用举为定数命曰食征随两税以分徵使万民而均出散之天下其数几何均之於衆则贫户无倍息之弊矣入之有程则公食无告阙之虑矣公私交便其在兹乎

四十二议百官职田

臣伏以职田者职既不同田亦异数内外上下各有等差此亦古者公田稍食之制也国家自多事已来厥制不举故稽其地籍而田则具存考以户租而数多散失至有品秩等官署同廩禄厚薄之相悬近乎十倍者矣今欲辨内外之职均上下之田不必乎创新规其在乎举旧典也臣谨按国朝旧典量品而授地计田而出租故地之多少必视其品之高下租之厚薄必视其田之肥瘠如此则沃瘠齐而户租均等列辨而禄食足矣今陛下求其典而典存焉索其田而田在焉诚能申明举而行之则前弊必自革矣

四十三议兵【用舍逆顺兴亡】

问传曰谁能去兵兵之设久矣又曰先王耀德不观兵二者古之明训也然则君天下者废而不用且涉去兵之非资以定功又乖耀德之美去就之理何者得中又问兵不妄动师必有名议之者颇辨否臧用之者多迷本末故有一戎而业成王霸一战而祸及危亡兴灭之迹何由逆顺之要安在

臣闻天下虽兴好战必亡天下虽安妄战必危不好不忘天下之王也祭公曰先王耀德不观兵老子曰兵者不祥之器不得已而用之斯则不好之明训也传曰谁能去兵兵之设久矣又周定天下偃武修文犹立司马之官六军之衆以时教战斯又不忘之明训也然则君天下者不可去兵也不可黜武也在乎用之有本末行之有逆顺逆顺之要大畧有三而兵之名随焉夫兴利除害应天顺人不为名先义然後动谓之义兵相时观衅取乱侮亡不为祸先敌至而应谓之应兵恃力宣骄作威逞欲轻人生命贪人土田谓之贪兵兵贪者亡兵应者强兵义者王王之兵无敌於天下也故有征无战焉强之兵先弱敌而後战也故百战百胜焉亡之兵先自败而後战也故胜与不胜同归於亡焉然历代君臣惑於本末闻王者之无敌则思耀武是获一兔而欲守株也见亡者之自败则思弭兵是因一咽而欲去食也曾不知无敌者根於义自败者本於贪而欲归咎於兵责功於武不其惑欤兴废之由逆顺之要昭然可见唯陛下择

之

四十四销兵数【省军费在断召募除虚名】

臣伏见自古以来军兵之衆资粮之费未有如今日者时议者皆患兵之衆而不知衆之由皆欲兵之销而不得销之术故散之则军情怨而戎心启聚之则财用竭而人力疲为日既深其弊亦甚臣以为销兵省费者在乎断召募去虚名而已伏以贞元军兴以来二十余年陛下念其劳効固不可散弃幸以时无战伐又焉用增加臣窃见当今募新兵占旧额张虚簿破现粮者天下尽是矣斯则致衆之由积费之本也今若去虚名就实数则一日之内十已减其二三矣若使逃不补死不填则十年之间又十减其三四矣故不散弃之则军情无怨也不增加之则兵数自销也去虚就实则名不诈而用不费也故臣以为销兵之方省费之术或在於此唯陛下详之

四十五复府兵置屯田【分兵权存戎备助军食】

夫欲分兵权存戎备助军食则在乎复府兵置屯田而已昔高祖始受隋禅太宗既定天下以为兵不可去农不可废於是当要冲以开府因隙地以营田府有常官田有常业俾乎时而讲武岁以劝农分上下之番递劳逸之序故有虞则起为战卒无事则散为农夫不待徵发而封域有备矣不劳馈饷而军食自充矣此亦古者尉侯之制兵赋之义也况今关畿之内镇垒相望皆仰给於县官且无用於战伐若使反兵於旧府兴利於废田张以簿书颁其廩积因其卒也安之以田宅因其将也命之以府官始复於关中稍置於天下则兵权渐分而屯聚之弊日销矣戎备渐修而训习之利日兴矣军食渐给而飞挽之费日省矣一事作而三利立唯陛下裁之

四十六选将帅之方

臣闻君明则将贤将贤则兵胜故有不能理兵之将而无不可胜之兵有不能选将之君而无不可得之将是以前君功见於选将将功见於理兵者也然则选将之术在乎因人之耳而听之因人之目而视之因人之好恶而取舍之故明王选将帅也访于衆询于人若十人爱之必十人之将也百人悦之必百人之将也万人伏之必万人之将也臣以为贤愚之际优劣之间以此而求十得八九矣

四十七御功臣之术

臣闻明王之御功臣也量其功而限之以爵审其罪而纠之以法限之以爵故爵加而知荣矣纠之以法故法行而知恩矣恩荣并加畏爱相济下无疑心此明王所以念功劳而全君臣之道也若不限之以爵则无厌之心生矣虽极人臣之位而不知荣也若不纠之以法则不忌之心启矣虽竭人主之宠而不知恩也恩荣不知畏爱不立而望奉上之心尽念功之道全或难矣故传曰报者倦矣施者未厌此由爵无限而法不行使之然也唯陛下察之

四十八御戎狄【徵历代之策陈当今之宜】

问戎狄之患久矣备御之畧多矣故王恢陈征讨之谋贾生立表饵之术娄敬兴和亲之讞晁错建农战之策然则古今异道利害殊宜将欲采之孰为可者

又问今国家北虏欵诚南夷请命所未化者其唯西戎乎讨之则疲顿师徒舍之则侵轶边鄙许和亲则启贪而厚费约盟誓则饰诈而不诚今欲遏彼?刘化其桀骜来远人於朔漠复旧土於河湟上策远谋备陈本末臣闻戎狄者一气所生不可剪而灭也五方异族不可臣而蓄也故为侵暴之患久矣而备御之畧亦多矣考其要旨大较有四焉若以选将练兵长驱深入之谋自王恢始建以三表诱以五饵之术自贾谊始厚以赂遗结以和亲之计自娄敬始徙人实边劝农教战之策自晁错始然则用王恢之谋则殫财耗力罢竭生人祸结兵连功不偿费故汉武悔然而下哀痛之诏也用贾谊之术则羌胡之耳目心腹虽诱而荒矣而华夏之财力风教亦随而弊矣故汉文知其不可而不行也用娄敬之计则启宠纳侮厚费偷安虽侵畧之患暂宁而和好之约屡背故汉氏四代为匈奴所欺也用晁错之策则边人有安土之患未免攻战之劳匈奴无得志之虞亦絶归心之望故汉武犹病之有广武之役也是以讨之以兵不若诱之以饵诱之以饵不若和之以亲和之以亲不若备之有素斯皆前代以验之事可覆而视也以今参古弃短取长亦可择而用焉然臣终以为近算浅图非帝王久远安边之上策何者臣观前代若政成国富德盛人安则虽六月有北伐之师不足忧也若政缺国贫德衰人困则虽一时无南牧之马不足庆也何则国富则师壮师壮则令严人安则心固心固则思理如此久久则天子之守不独在於诸侯将在於四夷矣则暂虽有事何足忧焉若国贫则师弱师弱则不虞人困则心离心离则思乱如此久久则天子之忧不独在於边陲或在於萧墙矣则暂虽无事何足庆焉盖古之王者庆在本而不在末忧在此而不在彼也今国家柔中怀外近悦远来北虏向风南蛮底贡所未化者其余几何伏愿陛下畜之如臣妾视之如蜂虿不以士马强而才力盛恃之而务战争不以亭障静而烟尘销轻之而去守备但且防其侵轶遏其?刘去而勿追来而勿纵而已然後畧四子之小术弘三王之大猷以政成德盛为图以人安师壮为计故德盛而日闻则服服必怀柔师壮而时动则威威必震讐夫然可以不糜财用不烦师徒不盟誓而外服不和亲而内附如此则四海之内五年之间要荒未服之戎必匍匐而来河陇已侵之地庶从容以归上策远谋不出於此矣

四十九备边并将置帅

臣伏见方今备边之计未得其宜何则京师之兵其数颇衆城堡甚备器械甚精以之遏侵掠禁夺攘则可矣若犬戎大至长驱而来臣恐将卒虽多无能抗者今所以轡陛下虑者岂非此乎其所以然者盖由镇垒太多主将太衆故也夫镇多则兵散兵散则威不相合而力不相济矣将衆则心异心异则胜不相让而败不相救矣卒然有事谁肯当之今若合之为五将统之以一帅将合则戮力帅一则同心仍使均握其兵分守其界明察功罪必待赏罚然後据便宜之地扼要害之冲以逸待劳以寡制衆则虽黠虏无能为也臣又以为自古及今有不能守塞之兵而无不可守之塞有不能备戎之将而无不可备之戎故曰十围之木持千钧之屋得其宜也五寸之关能制其开阖居其要也伏惟陛下握戎之要操塞之关则西陲之忧可以少息

矣

五十议守险【德与险兼用】

问易曰王公设险以守其国记曰在德不在险然则用之则乖在德之训弃之则违守国之诫二义相反其旨何从

又问以山河为宝者万夫不能当也以道德为藩者四夷为之守也何以苗恃洞庭负险而亡汉都天府用险而昌又何故也今欲鉴昌亡审用舍复何如哉

臣闻易曰王公设险以守其国又秦得百二以吞天下齐得十二而霸诸侯盖恃险之论兴於此矣史记曰在德不在险传曰九州之险是不一姓盖弃险之议生於此矣臣以为险之为用用舍有时恃既失之弃亦未为得也何者夫险之为利大矣为害亦大矣故天地闭否守之则为利天地交泰用之则为害盖天地有常险而圣人无常用也然则以道德为藩以仁义为屏以忠信为甲冑以礼法为干櫓者教之险政之守也以城池为固以金革为备以江山为襟带以丘陵为咽喉者地之险人之守也王者之兴也必兼而用之昔汉高帝除害兴利以安天下自谓德不及於周而贤於秦故去洛之易即秦之险建都创业垂四百年是能兼而用之也桀纣三苗之徒负大河凭太行保洞庭而不修德政坐取覆亡者是专恃其险也莒子恃其僻陋不修城郭浹辰之间丧其三都者是怠弃其险也由斯而观之山河之阻沟壑之固可用而不可恃也可戒而不可弃也智以险昌愚以险亡昌亡之间唯陛下能鉴之

五十一议封建论郡县

问周制五等其弊也王室衰微秦废列国其败也天下崩坏汉封子弟其失也侯王僭乱何则为制不同同归於弊也故自古及今议其是非者多矣今若建侯开国恐失随时之宜如置守专城虑乖稽古之义考其要旨其谁可从

又问封建之制肇自黄唐郡县之规始於秦汉或沿或革以至国朝今欲子兆人家四海建不拔之业垂无疆之休大鉴兴亡从长而用无论古今择善而行侯与守而何先郡与国而孰愈具书于策当举行之

臣闻封建之废久矣是非之论多矣异同之要归于三科或曰周人制五等封亲贤其弊也诸侯擅战伐陪臣执国命故闻蚕食瓜剖以至於衰灭也而李斯周青之议繇是兴焉又曰秦皇废列国弃子弟其败也万民无定主九族为匹夫故鱼烂土崩以至於覆亡也而曹冏士衡之论繇是作焉又曰汉氏侯功臣王同姓其失也爵号太尊土宇太广故?张瓦解以至於悖乱也而晁错主父之计繇是行焉然则秦惩周之弊也既以亡而易衰汉鉴秦之亡也亦矫枉而过正历代之说无出於此者以臣所观窃谓知其一未知其二也何者臣闻王者将欲家四海子兆人垂无疆之休建不拔之业者在乎操理柄立人防导化源固邦本而已盖刑行德立近悦远安恩信推於中惠化流於外如此则四夷为臣妾况海内乎虽置守罢侯亦无害也若法坏

政荒亲离贤弃王泽竭於上人心叛於下如此则九族为讐敌况天下乎虽废郡建邦又何益也故臣以为周之衰灭者上失其道天厌其德非为封建之弊也秦之覆亡者君流其毒人离其心非唯郡县之咎也汉之祸乱者宠而失教立不选贤非独强大之故也繇是观之苟固其本导其源虽郡与国俱可理而安矣苟踰其防失其柄虽侯与守俱能乱且危矣伏惟陛下虑远忧近鉴古观今以敦睦亲族为先不以封王为急以优劝劳逸为念不以建侯为思以尊贤宠德为心不以开国为意以安抚黎元为事不以废郡为谋则无疆之休不拔之业在於此矣况国家之制垂二百年法着一王理经十圣变革之议非臣敢知

五十二议井田阡陌【息游惰止兼并实版图】

问三代之牧人也立井田之制别都鄙之名其为名制可得而知乎其为功利可得而闻乎

又问自秦坏井田汉修阡陌兼并大启游惰实繁虽历代因循诚恐弊深而害甚如一朝改作或虑失业而扰人既废之甚难又复之非便斟酌其道何者得中臣闻王者之贵生於人焉王者之富生於地焉故不知地之数则生业无从而定财征无从而平也不知人之数则食力无从而计军役无从而均也不均不平则地虽广人虽多徒有贵之名而无富之实是以先王度土田之广狭画为井量人户之衆寡分为邑居使地利足以食人人力足以辟土邑居足以处衆人力足以安家野无余田以启专利邑无余室以容游人逃刑避役者往无所之败业迁居者来无所处於是生业相因食力相济其出财征也不待徵书而已平矣其起军役也不待料人而已均矣然後天子可以称万乘之贵四海之富也洎三代之後厥制崩坏故井田废则游惰之路启阡陌作则兼并之门开至使贫苦者无容足立锥之居富强者专笼山给野之利故自秦汉迄於圣朝因循未迁积习成弊然臣以为井田者废之颇久复之稍难未可尽行且宜渐制何以言之昔商鞅开秦之利也荡然废之故千载之间豪奢者得其计王莽革汉之弊也卒然复之故一时之间农桑者失其业斯则不可久废不可速成之明验也故臣请斟酌时宜参详古制大抵人稀土广者且修其阡陌户繁乡狭者则复以井田使都鄙渐有名家夫渐有数夫然则井邑兵田之地衆寡相维门閭族党之居有亡相保相维则兼并者何所取相保则游惰者何所容如此则庶乎人无浮心地无遗力财产丰足赋役平均市利归於农生业着於地者矣

五十三议肉刑【可废不可用】

问肉刑者其来尚矣其废久矣前贤之论是非纷然今欲弃之而不行法或乖於稽古若举而复用义恐失於随时取舍之间何者为可

臣伏以汉除肉刑迨今千有余祀其间博闻达识之士议其是非者多矣其欲废之者则曰刻肤革断支体人主忍而用之则愷悌惻隐之心乖矣此缙紫所谓虽欲改过自新其道亡繇者也其欲复之者则曰任箠令用鞭刑酷吏倚而行之则专杀滥死之弊作矣此班固所谓以死罔人失本惠者也臣以为议事者宜徵其实用刑者宜酌其情若以情实言之则可废而不可复也何者夫肉刑者盖取劓腓黥刖之类耳书所谓五虐之刑也昔苗人始淫为之而天既降

咎及秦人又虐用之而天下亦离心夫如是则岂无滥死者耶汉文帝始除去之而刑罰以清我太宗亦因而弃之而人用不犯夫如是则岂有罔人者耶此臣所谓徵其实者也臣又闻圣人之用刑也轻重适时变用舍顺人情不必乎反今之宜复古之制也况肉刑废之久矣人莫识焉今一朝卒然用之或絕筋或折骨或面伤则见者必痛其心闻者必骇其耳又非圣人适时变顺人情之意也徵之於实既如彼酌之於情又如此可否之验岂不明哉传曰君子为政贵因循而重改作又曰利不百不变法臣以为复之有害而无利也其可变而改作乎

五十四刑礼道【迭相为用】

问圣王之致理也以刑纠人恶故人知劝惧以礼导人情故人知耻格以道率人性故人反淳和三者之用不可废也意者将偏举而用邪将并建而用邪从其宜先後有次耶成其功优劣有殊耶然则相今日之所宜酌今日之所急将欲致理三者奚先

臣闻人之性情者君之土田也其荒也则薙之以刑其辟也则蒔之以礼其植也则获之以道故刑行而後礼立礼立而後道生始则失道而後礼中则失礼而後刑终则修刑以复礼修礼以复道故曰刑者礼之门礼者道之根知其门守其根则王化成矣然则王化之有三者犹天之有两曜岁之有四时废一不可也并用亦不可也在乎举之有次措之有伦而已何者夫刑者可以禁人之恶不能防人之情礼者可以防人之情不能率人之性道者可以率人之性又不能禁人之恶循环表里迭相为用故王者观理乱之深浅顺刑礼之後先当其惩恶抑淫致人於劝惧莫先於刑剗邪窒欲致人於耻格莫尚於礼反和复朴致人於敦厚莫大於道是以衰乱之代则弛礼而张刑平定之时则省刑而弘礼清静之日则杀礼而任道亦如祁寒之节则疎水而附火徂暑之候则远火而狎水顺岁候者适水火之用达时变者得刑礼之宜适其用达其宜则天下之理毕矣王者之化成矣将欲较其短长原其始终顺其变而先後殊备其用而优劣等离而言之则异致合而理之则同功其要者在乎举有次措有伦适其用达其理而已方今华夷有截内外无虑人思休和俗已平泰是则国家杀刑罰之日崇礼乐之时所以文易化成道易驯致者由得其时也今则时矣伏惟陛下惜而不失焉

卷六十五

钦定四库全书

白氏长庆集卷六十五

唐白居易撰

策林四【凡二十一道】

五十五止狱措刑 在富而教之

问成康御宇圜圉空虚文景继统刑罰不用太宗化下而人不犯成此功者其効安在桀纣在上比屋可诛秦氏为君赭衣满道致此弊者其故安在今欲鉴桀纣秦氏之弊继周汉太宗之功使人有耻且格刑措不用备详本末着之于篇

臣闻仲尼之训也既庶矣而後富之既富矣而後教之管子亦云仓廩实知礼节衣食足知荣辱然则食足财丰而後礼教所由兴也礼行教立而後刑罰所由措也盖前事之不忘後事之元龟臣请以前事明之当周成康之时天下富壽人知耻格故圜圉空虚四十余年当汉文景之时节用劝农海内殷实人人自爱不犯刑法故每岁决狱仅至四百及我太宗之朝勤俭化人人用富庶加以德教至于昇平故一岁断刑不满三十虽则明圣慎刑贤良恤狱之所致也然亦由天下之人生厚德正而寡过也当桀纣之时暴征讐斂万姓穷苦有怨无耻奸宄并兴故是时也比屋可戮及秦之时厚赋以竭人财远役以殫人力力殫财竭尽为寇贼羣盗满山赭衣塞路故每岁断罪数至十万虽则暴君淫刑奸吏弄法之所致也然亦由天下之人贫困思奸而多罪也由是观之刑之繁省系於罪之衆寡也教之废兴系於人之贫富也圣王不患刑之繁而患罪之衆不患教之废而患人之贫故人苟富则教斯兴矣罪苟寡则刑斯省矣是以财产不均贫富相并虽尧舜为主不能息忿争而省刑狱也衣食不充冻餒并至虽咎陶为士不能止奸宄而去盜賊也若失之於本求之於末虽圣贤并生臣窃以为难矣至若察小大之狱审轻重之刑定加減於科条得情伪於察色此有司平刑之要也非王者恤刑之德也至若尽钦恤之道竭哀矜之诚使生者不怨死者不恨此王者恤刑之法也非圣人措刑之道也必欲端影於表澄流於源则在乎富其人崇其教开其廉耻之路塞其冤濫之门使人内乐其生外畏其罪则必过犯自省刑罰自措斯所谓致羣心於有耻立大制於不严古者有画衣冠异章服而人不犯者由此道素行也

五十六论刑法之弊 升法科选法吏

问今之法贞观之法今之官贞观之官昔何为而太和今何为而未理事同効异其故何哉将

刑法不便於时耶抑官吏不得其人耶

臣伏以今之刑法太宗之刑法也今之天下太宗之天下也何乃用於昔而俗以宁壹行於今而人未休和臣以为非行法不便於时是官吏不循其法也此由朝廷轻法学贱法吏故应其科与补其吏者率非君子也甚多小人也盖刑者君子行之则诚信而简易简易则人安小人习之则诈伪而滋彰滋彰则俗弊此所以刑一而用二法同而理殊者也矧又律令尘蠹於棧【鉏限切棚也亦阁也】阁制勅堆盈於案几官不徧覩法无定科今则条理轻重之文尽询于法直是使国家生杀之柄假在於小人小人之心孰不可忍至有黠货贿者矣有怙亲爱者矣有陷讐怨者矣有畏权豪者矣有欺贱弱者矣是以重轻加减随其喜怒出入比附由乎爱憎官不察其所由人不知其所避若然则虽有贞观之法苟无贞观之吏欲其刑善无乃难乎陛下诚欲申明旧章剗革前弊则在乎高其科重其吏而已臣谨按汉制以四科辟士其三曰明习律令足以决狐疑能按章覆问文中御史者辟而用之伏惟陛下悬法学为上科则应之者必俊乂也升法直为清列则授之者必贤良也然後考其能獎其善明察守文者擢为御史钦恤用情者迁为法官如此则仁恕之诚廉平之气不散於简牘之间矣掊刻之心舞文之弊不生於刀笔之下矣与夫愚诈小吏窃而弄之者功相万也臣又闻管仲夺伯氏之邑没无怨言季羔刖门者之足亡而获宥孔明黜廖立之位死而垂泣三子者可谓能用刑矣臣伏思之亦何代无其人哉在乎求而用之考而獎之而已伏惟陛下再三察焉五十七使人畏爱悦服理大罪赦小过

问政不可寬寬则人慢刑不可急急则人残故失於恢恢则漏网而为弊务於察察则及泉而不祥将使寬猛适宜疎密合制上施畏爱之道下有悦服之心刑政之中何者为得

臣闻圣人在上使天下畏而爱之悦而服之者由乎理大罪赦小过也书曰宥过无大况小者乎刑故无小况大者乎故宥其小者仁也仁以容之则天下之心爱而悦之矣刑其大者义也义以纠之则天下之心畏而服之矣臣窃见国家用法似异於是何则急察之政急於朝官而寬於外官惩戒之刑加於小吏而纵於长吏是则权轻而过小者或反绳之寄重而罪大者或反舍之臣复思之恐非先王宥过刑故之道也然则小大之喻其犹鱼耶鱼之在泉者小也察之不祥鱼之吞舟者大也漏之不可刑烦犹水浊水浊则鱼喁政寬犹防决防决则鱼逝是以善为理者举其纲疎其网纲举则所罗者大矣网疎则所漏者小也伏惟陛下举其纲於长吏疎其网於朝官舍小过以示仁理大罪而明义则畏爱悦服之化闡然而日彰於天下矣

五十八去盗贼 在举德选能安业厚生

臣闻圣王之去盗贼也有二道焉始则举有德选有能使教化大行奸宄者去次又安其业厚其生使廉耻大兴贪暴者息故舜举皋陶不仁者远晋用士会盗奔于秦此举德选能之效也成康阜其俗礼让兴行文景富其仁盗贼屏息此安业厚生之验也由是观之则俗之贪廉盗之有无系於人之劳逸吏之贤否也方今禁科虽严桴鼓未静斂【与夺同】■〈襄攵〉【如羊切盗也】者时闻於道路穿窬者或纵於乡闾无乃陛下之人有多困穷冻馁者乎无乃陛下之吏有非循良明白者乎伏惟陛下大推爱人之诚广喻称善之旨厚其生业使俗知耻

格举以贤德使国无幸人自然廉让风行奸滥日息则重门罕闻於击析外户庶见於不扃者矣

五十九议赦

臣谨按书曰眚灾肆赦又易曰雷雨作解君子以赦过宥罪斯则赦之不可废也必矣管子曰赦者奔马之委轡也不赦者痊【才何切】疽【女余切】之【乃盐切】石也又谚曰一岁再赦妇儿暗哑【倚下切】斯又赦之不可数也明矣然则赦之为用用必有时数既失之废亦未为得也何者赦之为德大矣为贼亦甚矣大凡王者践祚改元之初一用之则为德也居常致理之际数用之则为贼也故践祚而无赦则布新之义缺而好生之德废矣居常而数赦则惠奸之路启而召乱之门开矣由此而观盖赦者可疎而不可数也可重而不可废也用舍之要其在兹乎

六十救学者之失礼乐诗书

问学者教之根理之本国家设庠序以崇儒术张礼乐而厚国风师资肃以尊严文物焕其明备何则学诗书者拘於文而不通其旨习礼乐者滞於数而不达其情故安上之礼未行化人之学将落今欲使工祝知先王之道生徒究圣人之心诗书不失於愚诬礼乐无闻於盈减积之为言行播之为风化何为何作得至於斯臣闻化人动衆学为先焉安上尊君礼为本焉故古之王者未有不先於学本於礼而能建国君人经天纬地者也国家删定六经之义裁成五礼之文是为学者之先知生人之大惠也故命太常以典礼乐立太学以教诗书将使乎四术并举而行万人相从而化然臣观之太学生徒诵诗书之文而不知诗书之旨太常工祝执礼乐之器而不识礼乐之情遗其旨则作忠兴孝之义不彰失其情则合敬同爱之诚不着所谓去本而从末弃精而好粗至使陛下语学有将落之忧顾礼有未行之叹者此由官失其业师非其人故但有修习之名而无训导之实也伏望审官师之能否辨教学之是非俾讲诗者以六义风赋为宗不专於鸟兽草木之名也读书者以五代典谟为旨不专於章句诂训之文也习礼者以上下长幼为节不专於俎豆之数裼裘之容也学乐者以中和友孝为德不专於节奏之变缀兆之度也夫然则诗书无愚诬之失礼乐无盈减之差积而行立者乃升之於朝廷习而事成者乃用之於宗庙是故温柔敦厚之教疏通知远之训畅於中而发於外矣庄敬威严之貌易直子谅之心行於上而流於下矣则覩之者莫不承顺闻之者莫不率从管乎人情出乎理道欲人不化上不安其可得乎

六十一黜子书

臣闻仲尼没而微言絶七十子丧而大义乖大义乖则小说兴微言絶则异端起於是乎岐分???别而百氏之书作焉然则六家之异同马迁论之备矣九流之得失班固叙之详矣是非取舍较然可知今陛下将欲抑诸子之殊途遵圣人之要道则莫若弘四术之正义崇九经之格言故正义着明则六家之异见不除而自退矣格言具举则九流之偏说不禁而自隐矣夫如是则六家九流尚为之隐退况百氏之殊文诡制得不藏匿而销荡乎斯所谓排小说而扶大

义斥异端而阐微言辨惑向方化人成俗之要也伏惟陛下必行之

六十二议礼乐

问礼乐并用其义安在礼乐共理其効何徵礼之崩也何方以救之乎乐之坏也何术以济之乎

臣闻序人伦安国家莫先於礼和人神移风俗莫尚於乐二者所以并天地参阴阳废一不可也何则礼者纳人於别而不能和也乐者致人於和而不能别也必待礼以济乐乐以济礼然後和而无怨别而不争是以先王并建而用之故理天下如指诸掌耳志曰六经之道同归而礼乐之用为急故前代有乱亡者由不能知之也有知而危败者由不能行之也有行而不至於理者由不能达其情也能达其情者其唯宗周乎周之有天下也修礼达乐者七年刑措不用者四十年负屨垂拱者三百年龟鼎不迁者八百年斯可谓达其情臻其极也故孔子曰吾从周然则继周者其唯皇家乎臣伏闻礼减则销销则崩乐盈则放放则坏故先王减则进之盈则反之济其不及而泄其过用能正人道反天性奋至德之光焉国家承齐梁陈隋之弊遗风未弭故礼稍失於杀乐稍失於奢伏惟陛下虑其减销则命司礼者大明唐礼防其盈放则诏典乐者少抑郑声如此则礼备而不偏乐和而不流矣继周之道其在兹乎

六十三沿革礼乐

问礼乐之用百王共之然则历代以来或沿而理或革而乱或损而兴或益而亡何述作之迹同而得失之効异也方今大致虽立至理未臻岂沿袭损益未适其时宜将文物声明有乖於古制思欲究盛礼之旨审至乐之情不和者改而更张可继者守而不失具陈其要当举而行

臣闻议者曰礼莫备於三王乐莫盛於五帝非殷周之礼不足以理天下非尧舜之乐不足以和神人是以总章辟雍冠服簠簋之制一不备於古则礼不能行矣干戚羽旄屈伸俯仰之度一不修於古则乐不能和矣古今之论大率如此臣窃谓斯言失其本得其末非通儒之达识也何者夫礼乐者非天降非地出也盖先王酌於人情张为通理者也苟可以正人伦宁家国是得制礼之本意也苟可以和人心厚风俗是得作乐之本情也盖善沿礼者沿其意不沿其名善变乐者变其数不变其情故得其意则五帝三王不相沿袭而同臻於理失其情则王莽屑屑习古适足为乱矣故曰行礼乐之情者王行礼乐之饰者亡盖谓是矣且礼本於体乐本於声文物名数所以饰其体器度节奏所以文其声圣人之理也礼至则无体乐至则无声然则苟至於理也声与体犹可遗况於文与饰乎则本末取舍之宜可明辨矣今陛下以上圣之资守烈祖之制不待损益足以致理然苟有沿革则愿陛下审本末而述作焉盖礼者以安上理人为体以别疑防欲为用以玉帛俎豆为数以周旋裼裘为容数与容可损益也体与用不可斯须失也乐者以易直子谅为心以中和孝友为德以律度铿锵为饰以缀兆舒疾为文饰与文可损益也心与德不可斯须失也夫然则礼得其本乐达其情则沿革损益不同同归于理矣

六十四复乐古器古曲

问时议者或云乐者声与器迁音随曲变若废今器用古器则哀淫之音息矣若舍今曲奏古曲则正始之音兴矣其说若此以为如何

臣闻乐者本於声声者发於情情者系於政盖政和则情和情和则声和而安乐之音由是作焉政失则情失情失则声失而哀淫之音由是作焉斯所谓声音之道与政通矣伏覩时议者臣窃以为不然何者夫器者所以发声声之邪正不系於器之今古也曲者所以为乐乐之哀乐不系於曲之今古也何以考之若君政骄而荒人心动而怨则虽舍今器用古器而哀淫之声不散矣若君政善而美人心平而和则虽奏今曲废古曲而安乐之音不流矣是故和平之代虽闻桑间濮上之音人情不淫也不伤也乱亡之代虽闻咸濩韶武之音人情不利也不乐也故臣以为销郑卫之声复正始之音者在乎善其政和其情不在乎改其器易其曲也故曰乐者不可以伪唯明圣者能审而述作焉臣又闻若君政和而平人心安而乐则虽援蕢桴击野壤闻之者亦必融融泄泄矣若君政骄而荒人心困而怨则虽撞大钟伐鸣鼓闻之者适足惨惨戚戚矣故臣以为谐神人和风俗者在乎善其政欢其心不在乎变其音极其声也

六十五议祭祀

问圣王立郊庙重祭祀者将以展诚敬而事鬼神乎将欲裨教化而利生人乎

又问近者敬失於鬼祭祀以淫禳祷者有僭滥谄媚之风蒸尝者失疏数丰俭之节今欲使俗无淫祀家不黷神物省费而厚生人守义而不惑何为何作可以救之臣闻祭祀之义大率有三禋於天地所以示人报本也祠於圣贤所以训人崇德也享於祖考所以教人追孝也三者行於天下则万人顺百神和此先王所以重祭祀者也臣又观之岂直若是而已哉盖先王因事神而设教因崇祀以利人俾乎人竭其诚物尽其美美致於鬼则利归於人焉故阜其牲牷则牛羊不得不蕃矣丰其黍稷则仓廩不得不实矣美其祭服则布帛不得不精矣不畜者无牲不田者无盛则游惰者不得不惩矣勤本者不得不勉矣四者行於天下虽曰事鬼神其实厚生业也故曰礼行於祭祀则百货可极焉斯之谓矣然则物力有余则奢侈之弊起祀事不节则谄黷之萌生先王又防其然也是以宗庙有数丰约有度疏数有时非其度者则鬼不享而礼不容非其类者则神不歆而刑不舍二者行於天下则人与神不相黷矣不相伤矣近代以来稍违祀典或礼物失於奢俭或巫史假於淫昏追远者昧从生之文徼福者有媚神之祭虽未甚弊亦宜禁之伏惟陛下崇设人防申明国典蒸尝不经者示之以礼禳祷非鬼者纠之以刑所谓存其正抑其邪则人不惑矣着其诚谨其物则人厚生矣斯以齐风俗和人神之大端也惟陛下详之

六十六禁厚葬

臣伏以国朝参古今之仪制丧葬之纪尊卑丰约焕然有章今则郁而不行於天下者久矣至使送终之礼大失其中贵贱昧从死之文奢侈乖称家之义况多藏必辱於死者厚费有害於

生人习不知非寢而成俗此乃败礼法伤财力之一端也陛下诚欲革其弊抑其淫则宜乎振举国章申明丧纪奢侈非宜者齐之以礼凌僭不度者董之以威故威行於下则坏法犯贵之风移矣礼适其中则破产伤生之俗革矣移风革俗其在兹乎

六十七议释教 僧尼

问汉魏以降像教寢兴或曰足以耗蠹国风又云足以辅助王化今欲禁之勿用恐乖诱善崇福之方若许之大行虑成异教殊俗之弊裨化之功诚着伤生之费亦深利病相形从其远者

臣闻上古之化也大道惟一中古之教也精义无二盖上率下以一德则下应上无二心故儒墨六家不行於五帝道释二教不及於三王迨乎德既下衰道又上失源离????别朴散器分於是乎儒道释之教鼎立于天下矣降及近代释氏犹甚焉臣伏覩其教大抵以禅定为根以慈忍为本以报应为枝以斋戒为叶夫然亦可诱掖人心辅助王化然臣以为不可者有以也臣闻天子者奉天之教令兆人者奉天子之教令令一则理二则乱若参以外教二三孰甚焉况国家以武定祸乱以文理华夏执此二柄足以经纬其人矣而又区区西方之教与天子抗衡臣恐乖古先惟一无二之化也然则根本枝叶王教备焉何必使人去此取彼若欲以禅定复人性则先生有恭默无为之道在若欲以慈忍厚人德则先王有忠恕惻隐之训在若欲以报应禁人僻则先王有惩恶劝善之刑在若欲以斋戒抑人淫则先王有防欲闲邪之礼在虽臻其极则同归或能助於王化然於异名则殊俗足以贰乎人心故臣以为不可者以此也况僧徒月益佛寺日崇劳人力於土木之功耗人利於金宝之饰移君亲於师资之际旷夫妇於戒律之间古人云一夫不田有受其馁者一妇不织有受其寒者今天下僧尼不可胜数皆待农而食待蚕而衣臣窃思之晋宋齐梁以来天下凋弊未必不由此矣伏惟陛下察焉

六十八议文章 碑碣词赋

问国家化天下以文明獎多士以文学二百余载文章焕焉然则述作之间久而生弊书事者罕闻於直笔褒美者多覩其虚辞今欲去伪抑淫芟芜剗秽黜华於枝叶反实於根源引而救之其道安在

臣谨按易曰观乎人文以化成天下记曰文王以文治则文之用大矣哉自三代以还斯文不振故天以将丧之弊授我国家国家以文德应天以文教牧人以文行选贤以文学取士二百余年焕乎文章故士无贤不肖率注意於文矣然臣闻大成不能无小弊有美不能无小疵是以凡今秉笔之徒率尔而言者有矣斐然成章者有矣故歌咏诗赋碑碣赞诔之制往往有虚美者矣有媿辞者矣若行於时则诬善恶而惑当代若传於後则混真伪而疑将来臣伏思之大非先王文理化成之教也且古之为文者上以纫王教系国风下以存炯戒通讽谕故惩劝善恶之柄执於文士褒贬之际焉补察得失之端操於诗人美刺之间焉今褒贬之文无核实则惩劝之道缺矣美刺之诗不稽政则补察之义废矣虽雕章缕句将焉用之臣又闻稂莠秕稗生於谷反害谷者也淫辞丽藻生於文反伤文者也故农者芸稂莠簸秕稗所以养谷也王者删淫辞削丽藻所以养文也伏惟陛下诏主文之司谕养文之旨俾辞赋合炯戒讽谕者虽

质虽野采而獎之碑誅有虚美媿辞者虽华虽丽禁而絕之若然则为文者必当尚质抑淫着诚去伪小疵小弊荡然无遗矣则何虑乎皇家之文章不与三代同风者欤

六十九采诗 以补察时政

问圣人之致理也在乎酌人言察人情而後行为政顺为教者也然则一人之耳安得徧闻天下之言乎一人之心安得尽知天下之情乎今欲立采诗之官开讽刺之道察其得失之政通其上下之情子大夫以为如何臣闻圣王酌人之言补已之过所以立理本导化源也将在乎选观风之使建采诗之官俾乎歌咏之声讽刺之兴日采於下岁献於上者也所谓言之者无罪闻之者足以自诫大凡人之感於事则必动於情然後兴於嗟叹发於吟咏而形於歌诗矣故闻蓼萧之篇则知泽及四海也闻禾黍之咏则知时和岁丰也闻北风之诗则知威虐及人也闻硕鼠之刺则知重斂於下也闻广袖高髻之謡则知风俗之奢荡也闻谁其获者妇与姑之言则知征役之废业也故国风之盛衰由斯而见也王政之得失由斯而闻也人情之哀乐由斯而知也然後君臣亲览而斟酌焉政之废者修之阙者补之人之忧者乐之劳者逸之所谓善防川者决之使导善理人者宣之使言故政有毫髮之善下必知也教有锱铢之失上必闻也则上之诚明何忧乎不下达下之利病何患乎不上知上下交和内外胥悦若此而不臻至理不致昇平自开辟以来未之闻也老子曰不出户知天下斯之谓欤

七十纳谏 上封章广视听

问国家立谏诤之官开起沃之路久矣而謇谔者未尽其节谋猷者未竭其诚思欲取天下之耳目裨我视听尽天下之心智为我思谋政之壅蔽者决於中令之絕灭者通於外上无违德下无隱情何为何方得至於此又问先王立训唯谏是从然则历代君臣有贤有否至若献替之际是非之间若君过臣规固宜有言必纳如上得下失岂可从谏如流以是训人其义安在

臣闻天子之耳不能自聪合天下之耳听之而後聪也天子之目不能自明合天下之目视之而後明也天子之心不能自圣合天下之心思之而後圣也若天子唯以两耳听之两目视之一心思之则十步之内不能闻也百步之外不能见也殿庭之外不能知也而况四海之大万几之繁者乎圣王知其然故立谏诤讽议之官开献替起沃之道俾乎补察遗阙辅助聪明犹惧其未也於是设敢谏之鼓建进善之旌立诽谤之木工商得以流议士庶得以传言然後过日闻而德日新矣是以古之圣王由此涂出焉臣又闻不弃死马之骨然後良驥可得也不弃狂夫之言然後嘉谋可闻也苟臣管见之中有可取者陛下取而行之苟臣藟言之中有可采者陛下采而用之则闻之者必曰如某之言如某之见犹且不弃况愈於某之徒欤则天下谋猷之士得不比肩而至乎天下謇谔之臣得不继踵而来乎故览其谋猷则天下之利病如悬於握中矣纳其謇谔则朝廷之得失如指诸掌内矣所谓用天下之耳听之则无不聪也用天下之目视之则无不明也用天下之心识思谋之则无不圣神也圣神启於上聪明达於下如此则何壅蔽之有耶何絕灭之有耶臣又尝观历代人君有愚有贤举事非尽失也人臣有能有否出言非尽得也然则先王勤勤恳恳劝从谏诚自用者又何哉岂不以自古以来君虽有得未有愎谏而理者也况其有失乎臣虽有失未有从谏而乱者也况其有得乎勤恳劝诫之

义在於此矣伏惟陛下鉴之

七十一去谄佞 从谏直

问天地无私贤愚间生焉理乱有时邪正迭用焉然则理代岂无愚邪者耶将有而不任耶乱代岂无贤正者耶将有而不用耶思决所疑可徵其验

又问历代之君无不知用贤则理用愚则乱从谏兴从佞亡也而取舍之际纷然自迷故诛放者多非小人宠用者鲜有君子至使衰亡危乱历代相望岂臣之邪正惑其心乎将已之爱恶昏其鉴乎昏惑之由必有其故臣闻昏明不并兴邪正不两废盖贤者进则愚者退矣曲者用则直者隐矣亦由昼夜相代寒暑相推必然之理也然则盛明之代非无小人小人之道消不能见而为乱也昏衰之代非无君子君子之道消不肯出而为理也故殷纣之末三仁在朝虞舜之初四凶在位虽仁在朝不能用之所以丧天下速於旋踵也虽凶在位卒能去之所以理天下易如覆【方六切】掌也用舍兴亡之验唯明主能察之然则历代之主莫不知邦以贤盛以愚衰君以谏安以佞危然则有前车覆而後车不诫者何也盖常人之情悦其从命逊志者恶其违已守道者又君子难进而易退况恶之乎小人易进而难退况悦之乎是则常主之待君子也必敬而疎其遇小人也必轻而狎狎则恩易下及疎则情难上通是以面从者日亲动则假虎威而自负也骨鯁者日疎言则犯龙鳞而必死也故政令日以坏邦家日以倾斯所以变盛为衰转安为危者矣是以明王知君子之守道也虽违於已引而进之知小人之徇惑也虽从於命推而远之知谏言之为良药也虽逆于耳恕而容之知佞言之为美疹【止忍切】也虽逊于心忍而絶之故政令日以和邦家日以理斯所以变衰为盛转危为安者矣盛衰安危之効唯明主能鉴之

七十二使臣尽忠人爱上 在乎明报施之道

夫欲使臣节尽忠人心爱上则在乎明报施之道也传曰美恶周必复又曰其事好还然则复与还皆报施之谓也夫日月不复则昼夜不生阴阳不复则寒暑不行善恶不复则君臣不成昔者五帝接其臣以道故其臣致君以德也三王使其臣以礼故其臣事君以忠也秦汉以降任其臣以利故其臣奉君以贾道贾道者利则进不利则退故君昏寡救恶之士国危鲜致命之臣是以其君独安独危其臣亦独忧独乐君臣之道既阻於上则兆庶之心不得不离於下也故曰君视臣如股肱则臣事君如元首君待臣如犬马则臣待君如路人君爱人如赤子则人爱君如父母君视人如土芥则人视君如寇讐孔子云审吾之所以适人知人之所以来我也则尽忠爱上之策在於此不在於彼矣

七十三养老 在使之壽富贵

臣闻昔者西伯善养老而天下归心善养者非家至户见衣而食之盖能为其立田里之制以安其业导树畜之产以厚其生使生有所养老有所终死有所送也近代之主以为老者非帛不暖非肉不饱而特颁其布帛肉粟之赐则谓养老之道尽於是矣臣以为此小惠也非大德

也何则赐之以布帛仁则仁矣不若劝其桑麻之业使天下五十者可以衣帛矣赐之以肉粟惠则惠矣不若教其鸡豚之畜使天下七十者可以食肉矣然後牧以仁贤慎其刑罰虽不与之年而老者得以壽矣不夺其力不扰其时虽不与之财而老者得以富矣使幼者事长少者敬老虽不与之爵而老者得以贵矣此三代盛王所以不遗年而兴孝者用此道也

七十四睦亲 选用

臣闻圣人南面而理天下自人道始矣人道之始始於亲亲故尧之教也睦九族而平百姓文王之训也刑寡妻而御家邦斯可谓教之源理之本也今陛下诚欲推其恩广其爱使惠洽九族化流万人则宜乎先亲後疎自近及远者也然後置其师傅闲之以教训选其贤能授之以官政或出为牧守入为公卿如此则虽无三代封建之名而有三代翼戴之实也使棣华之咏协于内麟趾之风着于外所谓枝叶茂而根本可庇骨肉厚而家国俱肥则天下之人相从而化矣故曰未有九族睦而万人叛者也未有九族离而万人和者也盖先王所以布六顺而化百姓敷五教而协万邦者由此道素行也

七十五典章教令

问子大夫才膺间出副我旁求宜当悉心靡有所隐其或典章有违於古禁令不便於今尔无面从予将亲覽臣伏以今之典章百王之典章也安有戾於古道者欤今之禁令列圣之禁令也安有乖於昔时者欤但在乎奉与不奉行与不行耳陛下之念至此诚思理之心切好问之旨深也此臣所以极千虑昧万死而献狂直者以副天心之万一焉臣闻典章不能自举待教令而举教令不能自行待诚信而行今百王之典具在列圣之法明备而禁未甚止令未甚行者臣愚以为待陛下诚信以将之昔宓贱行化德及泉鱼非严刑所致也推其诚而已鲁恭为理仁及春翟非猛政所驱也委其信而已今以陛下上圣之资仁惠之力令行禁止之势万万於一邑一宰也何虑教不敷而化不洽乎臣闻周公之理也周年而变三年而化五年而定陛下苟能勤教令以抚之推诚信以奉之则三年化成五年理定臣窃未以为迟矣伏惟陛下少垂意而待焉

白氏长庆集卷六十五

卷六十六

<集部,别集类,汉至五代,白氏长庆集>

钦定四库全书

白氏长庆集卷六十六

唐白居易撰

判【凡五十一道】

得甲去妻後妻犯罪请用子?赎罪甲怒不许

二姓好合义有时絶三年生育恩不可遗凤虽阻於和鸣鸟岂忘於返哺旋观怨偶遽抵明刑王吉去妻断弦未续孔氏出母疎网将加诚鞠育之可思何患难之不救况不安尔室尽孝犹慰母心薄送我畿赎罪宁辞子?纵下山之有怒曷陟配之无情想茱苴之歌且闻乐有其子念葛藟之义岂忍不庇于根难抑其辞请敦不匮

得辛氏夫遇盗而死遂求杀盗者而为之妻或责其失贞行之节不伏

亲以恩成有讐寧舍嫁则义絶虽报奚为辛氏姑务雪冤靡思违礼励释憾之志将殄萑【朱惟切】蒲蓄许嫁之心则乖松竹况居丧未卒改适无文苟失节于未亡虽复仇而何有夫讐不报未足为非妇道有亏诚宜自耻诗着靡他之誓百代可知礼垂不嫁之文一言以蔽无效尤於邾妇庶继美于恭姜

得乙与丁俱应拔萃乙则趋时以求名丁则勤学以待命互有相非未知孰是

立已徇名则由进取修身俟命宁在躁求智乎虽不失时仁者岂宜弃本属科悬拔萃才选出羣勤苦修辞乙不能也吹嘘附势丁亦耻之躁静既殊性习遂远各从所好尔由径而方行难强不能吾舍道而奚适观得失之路或似由人推通塞之门诚应在命所宜励志焉用趋时若弃以菲葑失则自求诸已悦中其正鹄得亦不媿于人母尚苟求盍嘉自致

得丁冒名事发法司准法科罪节度使奏丁在官有美政请免罪授真以劝能者法司以乱法不许

宥则利淫诛则伤善失人犹可坏法实难丁僭滥为心僇俛从事始假名而作伪咎则自贻终

励节而为官政将何取节使以功惟补过请欲劝能宪司以仁不惠奸议难乱纪制宜经久理贵从长见小善而必求材虽苟得踰大防而不禁弊将若何济时不在于一夫守法宜遵乎三尺盍惩行诈勿许拜真

得乙上封请求不用赦大理云废赦何以使人自新乙云数赦则奸生恐弊转甚

刑乃天威赦惟王泽于以御下存乎建中上封以宥过利淫幸门宜闭大理以荡邪除旧权道当行皆推济国之诚未达随时之义何则政包寛猛法有弛张习以生常则起为奸之弊废而不用何成作解之恩请思砭石之言兼咏蓼萧之什数则不可无之亦难

得景居丧年老毁瘠或非其过礼景云哀情所鍾

孝乃行先则当衔恤子为亲後安可危身景丧则未终老其将至怀荼蓼之慕诚合尽哀迨桑榆之光岂宜致毁所以爰资肉食惟服麻纁况血气之既衰老夫耄矣纵哀情之罔极吾子忍之苟灭性而不胜则伤生而非孝因杀立节庶毕三年之丧顺变从宜无及一朝之患既亏念始当媿或非

得辛奉使遇昆弟之仇不鬪而过为友人责辞云衔君命

居兄之仇避为不悌衔君之命鬪则非忠将灭私而奉公宜弃小而取大辛时惟奉使出乃遇讐断手之痛不忘诚难共国饮冰之命未复安可害公节以忠全情由礼抑未失使臣之体何速诤友之规與骈立言尝闻之矣子夏有问而忘诸乎是谓尽忠于何致责

闻军帅选将多用文儒士兵部诘其无武艺帅云取其谋也

忘身死节诚重武夫制敌伐谋则先儒士将筹策而可尚奚骑射之足称军帅明以知兵精於选将以为弯弧学劒用无出於一夫悦礼敦诗道可弘於七德功宜保大理贵从长若王师之有征以谋则可苟戎畧之无取虽艺何为况晋谋中军选於义府汉求上将举在儒流岂惟我武惟扬诚亦斯文不坠元戎举德未爽能军兵部执言恐为辱国

得甲至华岳庙不祷而过或非其违衆甲云祷非礼也

岳则配天自修常事神虽福善安可苟求宜率道以去邪岂从衆而失正甲志惟守义言乃合经以为视以三公实天子之所飡降其百福宁匹夫之可禳如修苹藻之诚是用秕【补委切】稗【兵媚切】之礼况人之僭滥徒欲乞灵而神实聪明岂歆淫祀非鬼是为谄也黷神无乃吐之旅于泰山古犹致诹祷于华岳今岂不非谅正直之难诬虽馨香而勿用将劝来者所宜救欤

得乙隐居徵辟不起子孙请以所辟官用?所司不许

修身独善宠则可惊制爵尊贤命其难废形虽遗於轩冕?宜及於子孙乙贞以自居辟而不起鹤书莫顾虽忘恤後之心爵命已行宁阙赏延之典若使死无用?生不及荣何成旌善之风且是废君之命场苗不食诚自絶于絜维葛藟有陰义难亏於燕翼请优後嗣以獎外臣

得江南诸州送庸调四月至上都户部科其违限诉云冬月运路水浅故不及春至

赋纳过时必先问罪淹恤有故亦可徵辞月既及于正阳事宜归於宰旅展如泽国盖纳地徵岁有入贡之程敢忘慎守川无负舟之力宁免稽迟苟利涉之惟难虽愆期而必有地官致诘虚月其忧江郡执言後时可愍然恐事非靡鹽辞或凭虚请验所届公文而後可遵令典

得景为县令教人煮木为酪州司责其烦扰辞云以备凶年

事不举中有灾宁救政或扰下虽惠何为景念在济时动非率法且烦人而不恤是昧烹鲜何歉岁以为虞将勤煮酪信作劳於无用岂为教之有方必也志切救灾道敦行古周官荒政自可择其善者新室弊法焉用尤而效之宜听责言勿迷知过

得丁为郡守行县见昆弟相讼者乃闭阁思过或告其矫辞云欲使以田相让也

化本自家政先为郡礼宁下庶宜寬不悌之刑训在知非是得长人之道况天伦不睦地讼攸兴利方竞於膏腴恩难亏於骨肉教宜引古过贵自新虽闻争以?【许激切】墙有伤鲁卫之政庶使媿而让畔将同虞芮【儒税切】之风苟无讼之可期则相容而何远推田以让尔诚谢於孟光闭阁而思吾何慙於延壽宜嘉静理勿谓矫诬得甲献弓蹲甲而射不穿一扎有司诘之辞云液角者不得牛戴牛角

贯革乖方则宜致诘相角失理亦可徵辞甲奠体以成执箫而献中规不挠六材虽则合三舍拔有愆七扎不能穿一宜恐伤人之甲不曰坚乎而非戴牛之弓无自入也液信亏于巧者射遂爽于臧兮周典足徵彼自乖於三色楚君明试此无愧于二臣咎且有归责之非当得乙有同门生丧亲将往吊之其父怒而撻之使遗嫌而已或诘其故云交道之难

子道贵恭当从理命交游重义盖恤哀情孝不在於诡随仁岂忘於惻隐乙父训乖爱子道昧择交况求益之初无友不如已者及居丧之际凡人犹合救之既罔念於一哀是不遵於久要苟知生而不吊虽赠死以何为旧馆遇丧宣父尚宜出涕同门在戚王丹未可忘情纵申遗帛之诚岂补赠葛之义肆一杖之怒父兮既爽义方杜三谏之辞子也亦亏孝道宜哉或诘允兮知言得转运使以汴河水浅运水不通请筑塞两河斗门节度使以当军营田悉在河次若斗门筑塞无以供军

川以利涉竭则雍税水能润下塞亦伤农将舍短以从长宜去彼而取此汴河决能降雨流可通财引漕运之千艘实资积水生稻梁於一溉亦藉余波利既相妨用难兼济节度使以军储务足思开窦而有年转运司以邦赋贵通恐负舟而无力辞虽执竟理可明徵壅四国之征其

伤多矣专一方之利所获几何贍军虽望於秋成济国难亏于日用利害斯见与夺可知

得景为宰秋雩刺史责其非时辞云旱甚若不雩恐为灾

居常授时政则行古恤人救弊道在从宜旱将害於粢盛雩难拘于秋夏景象雷是职不雨其忧苟旱魃之愆时虐既太甚虽蓐收之戒序雩亦何伤冀有闻於鸛鸣庶无虑於狼顾馨香以感夕且望於月离稼穡其伤时难遵於龙见虽事乖鲁史而义合随时制锦执言是亦为政褻帷致诘未可与权

得丁为郡岁凶奏请赈给百姓制未下散之本使科其专命丁云恐人困

临邦匡乏情本由衷为国救灾美终归上丁分条出守求瘼居心岁不顺成人既忧於二鬴【与釜同】公有滞积户将饥於一鍾是输济衆之诚允协分忧之政然以事虽上请恩未下流稍违主守之文遽见职司之举使以未有君命何其速欤郡以苟利国家专之可也恤贫振廩邓攸虽见免官矫制发官汲黯不闻获罪请宥自专之过用旌共理之心

得戊兄为辛所杀戊遇卒不杀之或责其不弟辞云辛以义杀兄不敢返杀

舍则崇讐报为伤义当断友于之爱以遵王者之章戊居兄之仇应执兵而不返辛杀人以义将傳【资四切】刃而攸难虽鲁策垂文不可莫之报也而周官执禁安得苟而行之将令怨是用希实在犯而不校揆子产之诚损怨为忠徵史骈之言益仇非智难从不弟之责请听有孚之辞

得甲为将以箠醪投河命衆饮之或非其矫节甲云推诚而已何必在醉

将主军情酒存人欲推诚之义必在於均饱德之文不专於醉甲寄分外阃令出中权九醞投河义山独断一瓢饮水惠在同沾倘师人之多寒恩逾挟纊如战士之载渴功倍望梅分少以表无颇和衆宁宜及乱岂资满腹所贵归心少卿絶甘见称汉代子反独醉实败楚军苟臧否之必由何古今之有异非其矫节是不知言得乙有罪丁救以免乙不谢或责之乙云不为已

在公而行诚非为已怀惠以谢则涉徇私彼既求仁而得仁此宜以直而报直乙惟获戾丁乃解纷以为非罪而拘冶长见称于尼父直言以免叔向宁谢於祁奚论恩则邱山不胜在道而江湖可忘况情非私谒可以不媿于人义在公行实以无求于我合嘉遗直勿听责言得景妻有丧景於妻侧奏乐妻责之不伏

丧则有哀见必存敬乐惟饰喜举合从宜夫妇所贵同心吉凶固宜异道景室方在疚庭不彻悬鏗鏘无倦於鼓钟好合有伤於琴瑟既愆夫义是弃人丧俨麻纁之在躬是吾忧也调丝竹以盈耳於汝安乎如宾之敬颇乖若往之哀斯瀆遂使倡和不应忧喜相干道路见纁犹闻必变邻里有殡亦为不歌诚无惻隐之心宜受庸奴之责

得甲年七十余有一子子请不从政所由云人户减耗徭役繁多不可执礼而废事

役且有辞信非懋力老而不养岂谓爱亲恋若阻於循陔怨必兴於陟岵顾惟甲子及此丁年户减事繁政宜勤于昼夜家贫亲老养难阙於晨昏在子道而可矜虽王徭之宜免事闻诸礼情见乎辞天子敦风犹劝养其三老庶人从政亦何假于一夫况当孝理之朝难抑亲人之请所由之执愚谓不然

得景於逆旅食噬腊遇毒而死其党讼之主人云买之有处

生不可保死必有因盍知命于丧予岂尤人於食我景秋蓬方转朝薤【何戒切】欲曦旅次爰来将受餐而已生涯湮尽当终食之间且非祭地之疑自是逢天之戚永言其党不察所由死且焉知徒云噬腊之毒买而有处请无寘堇之嫌诚虐士之可哀在主人而何咎幸思怨物无妄罪人

得诏赐百寮资物甲独以物委地而不拜有司劾其不敬云本赃物故不敢拜

赐表主恩拜明臣礼苟临事而不敬虽有辞而勿听甲列在朝行颁其资物宜荷天而受赐何委地而如遗曾是奸赃诚可恶於清德今为宠锡谅难拒于鸿私既为善而近名亦失恭而远礼必也志疾贪冒节励贞廉自当辞让有仪岂得弃捐不拜况人不易物锺离委珠而徒为心苟无瑕伯夷饮泉而可爽宜许有司之劾用惩不恪之辜

得乙为大夫请致仕有司诘其未七十乙称羸病不任事

时制未及尚可俟朝疾疹所加固难陈力乙位参食采志在悬车揆以纪年桑榆之光未暮验其羸病蒲柳之质先零既称量力而行所谓奉身以退虽发未种种告老无乃速欤而心既諄諄致政固其宜矣请高知止无强不能

得景为县官判事案成後自觉有失请举牒追改刺史不许欲科罪景云令式有文

政尚从宽过宜在宥苟昨非之自悟则夕改而可嘉景乃案寮参诸簿领当推案务剧讎免毫厘之差属褰帷政苛不容笔削之改误而不隐悔亦可追县无罔上之奸州有刻下之虐先迷後觉判事虽不三思苟有必知牒举明无二过揆人情而可恕徵国令而有文将欲痛绳恐非直笔

得甲替乙为将甲欲到乙严兵守备不出迎发制书勘合符以法从事御史纠其无宾主之礼科罪不伏

师律贵贞兵符示信苟未会合敢忘戒严乙奉中权甲承後命推轮相代言赴及瓜之期衷甲自防犹軫前茅之虑且信惟守器权在隐情符节既未合同军卫如何彻警所宜虑远安可徇

私阙於将迎虽乖主礼究其守备是叶军谋无责建牙恐非直指

得乡老不输本户租税所司诘之辞云年八十余岁有颁赐请预折输纳所司以无例不许

丹制既登诚宜加惠岁赋不入何以奉公苟布常而是违虽移用而不可乡老年参耆耄名系版图天赐未颁且有躁求之请地征合纳非无苟免之心曾是徇私固难违例况时逢恤老节合勤王尚齿肆筵我岁敦於善养食毛入赋尔奚忘於乐输受赐任待於时颁量入难亏於岁杪不从妄请诚谓职司

得乙女将嫁於丁既纳币而乙悔丁诉之云未立婚书

女也有行义不可废父兮无信讼所由生虽必告而是遵岂约言之可爽乙将求佳壻曾不良图入币之仪既从五两御轮之礼未及三周遂违在耳之言欲阻齐眉之请况卜凤以求士且靡咎言何奠鴈而从人有乖宿诺婚书未立徒引以为辞聘财已交亦悔而无及请从玉润之诉无过桃夭之时

得景请与丁卜丁云死生付天不付君也遂不卜或非之

圣人建易虽用稽疑君子乐天固宜知命苟吉凶之罔僭何中否之足询丁执心不回出言有中尔考前知之兆识足决疑吾从昆命之文必先蔽志以为甌福由已休咎则系於慎行生死付天修短乃存乎阴鹭当脱身於木鴈宁问命於蓍龟言既中伦理亦穷性况詹尹释策有问焉知鬪廉立言不疑何卜不从握粟是谓忘筮得耆老称甲多智县司举以理人或云多智贼也未知合用否

道虽弃智政且使能苟养之以恬则用之不惑甲称予智县举尔知时老者之审才得贤斯美何或人之懵理为贼是虞诚蔽荡之无闻庶利仁之可取然以智殊小大用有否臧识若限於挈瓶或当害物道能弘於乐水何爽理人请审两端方从一见

得乙为边将虏至若涉无人之地监军责其无勇略辞云内无糗粮外无犄角

封疆贵安伍候尚警苟不固吾圉则速即尔刑乙登以将坛镇于边垒诚可戒严走集罔有敌于我师何乃启纳寇戎若无人于吾地是昧安边之略信貽失律之凶拳勇蔑闻罪戾谁执如或寇强师老食绝城孤期尽敌而还且勤于坚守苟知难而退犹愈於覆亡宜矜犄角之辞难议建牙之罪

得景进柑子过期坏损所由科之称于浙江扬子江口各阻风五日

进献失期罪难逃责稽留有说理可原情景乃行人奉兹锡贡荐及时之果诚宜无失其程阻连日之风安得不愆于素览所由之语听使者之辞既异遑宁难科淹恤限沧波於于役匪我

愆期販朱實於厥苞非予有咎舍之可也誰曰不然

得丁喪所知於野張帷而哭鄰人詰云夫子惡野哭者

死喪有別哭泣從宜情或異於親疎禮則殊於內外丁義勤交道動循容止未忘半面嘗同傾蓋之歡永念重泉遂展張帷之哭雖聲非有恻而分止所知未乖夫子之言何致鄰人之詰如或肆號咷于路左物或惡之今則具威儀于野中禮無違者允符前志奚恤斯言得甲妻於姑前叱狗甲怒而叱之訴稱非七出甲云不敬

細行有亏信乖婦順小過不忍豈謂夫和甲孝務恪恭義輕好合饋豚明順未聞爽於听从叱狗愆儀盍勿庸於疾怨雖怡聲而是昧我則有尤若失口而不容人誰無過雖敬君長之母宜還王吉之妻

得乙為軍昧夜進軍諸將不發欲罪之辭云不見月章

表旗示信戎政貴明在九章而或乖雖三令而惟反乙是稱戎帥未達軍容奉明罰之辭無聞月捷月潛師之計方事宵征徒欲董以爪牙曾不明其耳目況將經武必在昭文夜號未申有虞固宜不進月章莫舉毀置自可當辜訴非失辭責乃當罪

得景嫁殤鄰人告違禁景不伏

生而異族死豈同歸且非合祔之儀爰抵嫁殤之禁景夭?是恤窀穸斯垂以處子之舜華遷他人之蒿里曾靡卜於鳴鳳各異室家胡為相以青烏欲同宅兆徒念幼年無偶豈宜長夜有行況生死寧殊男女貴別縱近傾倒之歲且未從人雖有游岱之?焉能事鬼既違國禁是亂人倫請徵媒氏之文無抑鄰人之告

得丁陳計請輕過移諸甲兵省司以敗法不許丁云宥罪濟時行古之道何故不可

軍興事亟則務益兵時泰教成固難敗法丁志崇陳計識昧相時當兵戢之朝詎資凶器在刑行之日寧利幸人是廢國章欲崇軍實禍關黷武弊起惠奸宥罪未若慎行濟軍不如經國況王霸道異古今代變小哉管氏之器會是行權嗇矣省司之言孰非經久得失斯在用舍可知

得甲在獄病久請將妻入侍法曹不許訴稱三品以上散官

獄雖慎守病則哀矜苟或無瘳如何罔詔甲罪抵刑究身從幽繫忱能成疾膏肓之上未痊危則思親縲紲之中有請勢窮搖尾念切齊眉卧或十旬既軫彌留之懼官惟三品宜從侍執之辭敢請法曹式遵令典

得乙聞牛鳴曰是生三牲皆用之矣問之皆信或謂之妖不伏

上禀天性旁通物情是谓生知孰云行怪况形虽异类心则同归四鸟分飞听音既称有信三牺皆用闻鸣岂可为妖且叶前言殊非左道尔惟不讲我则有辞揆以周官业将同於夷隶详夫鲁史责不及於葛卢兽语可徵人言奚恤

得丁母乙妻俱为命妇每朝参丁母云母尊妇卑请在妇上乙妻云夫官高不合在下未知孰是

肃恭成德卑则敬尊着定辨仪贱无加贵眷彼母妻之品视其夫子之官敬将展於君前礼且殊於门内闺阃垂训长幼虽合有伦朝廷正名等列岂宜无别妇道虽云守顺国章未可易班母则失言妻惟得礼且子兮位下尚欲宗予而夫也官崇如何卑我请依序守无使名愆

得景请预驸马所司纠云景庶子也且违格令欲科家长罪不伏

冒婚傲幸既抵官刑罔上失忠亦亏臣节在幼贱而不禁岂尊长之无辜属下嫁王姬旁求都尉选吹箫之匹虽则未获贞人预傅粉之郎岂可滥收庶子况姻连天族荣冠人伦词既异於承祧礼难当於厘降掩藏庶孽唯虑其不谐贪冒宠荣诎思於有罪岂非或益而损曾是欲盖而彰国章宁舍於面欺家长宜从於首坐得甲夜行所由执之辞云有公事欲早趋朝所由以犯禁不听

趋朝有时则当蚤作防奸以法宁纵晨行虽夙夜之自公岂警巡之可犯甲陈力是念相时斯昧方鸣三鼓知行夜之犹严未辟九门信将朝而尚早趋进合遵於辨色夙兴宜同其啓明既爽时然後行必是动而有悔非巫马为政焉用出以戴星同宣子俟朝胡不坐而假寐宜遵街禁用表司存

得郡举乙清高廉使以为通介无常罪举不当郡称往通今介时人无常乙有常也

退藏守道自合销声待用济时则难背俗乙行藏未达通介不常若德至而无称固当灭迹既名彰而见举诚合随时徒立身以清高且於物而凝滞无固无必盍守宣尼之言独清独醒信贻渔父之诮兼济岂资於絶俗全真未爽于同尘宜从不当之科俾慎无常之举得景於私家陈钟磬邻人告其僭云无故不彻悬

器不假人易而生乱乐惟节事过则有刑礼既异於古今法且禁其钟磬景苟求饰喜罔念速尤窃笋簴以陈乐由奢失僭金石而奏罪以声闻雅当犯贵之辜难许彻悬之诉然恐赐同魏绛僭异于奚且彰北阙之恩何爽南邻之击是殊国禁无告家藏

得丁氏有邑号犯罪当赎请同封爵之例所司不许辞云邑号不因夫子而致

邑号旌贤国章议贵如或不能自庇则将焉用其封丁氏恩降闺门罪罹邦宪宠非他致既因表以勲贤咎虽自贻亦可免於刑戮若不从其宽典则何贵於虚封汉恤缙紫犹闻赎父齐分

石?岂不庇身宜听辑矣之辞难夺赎兮之请

得景与乙同贾景多收其利人刺其贪辞云知我贫也

仁无贪货义有通财在洁身而虽乖於知己而则可景乙奇羸何业气类相求竟以锥刀始闻小人喻利推其货贿终见君子用心情表深知事符往行如或贫富必类自当兴让立廉今则有无相悬固合损多益寡是为狗义岂曰竭忠受粟益亲孔氏用敦吾道分财损已叔牙尝谓我贫无畏人言俾彰交态

得景夜越关为吏所执辞云有追捕

设以关防辩其出入既慎守而无怠岂伪游而能过景勤恪居怀夙夜奔命以谓寇攘事切宜早图之罔思呵察戒严不可踰也崔【朱惟切】蒲乃司败小事襟带实国家大防仰老氏之文虽知善闭稽周公之制尚曰不征责已具於有司理难辞於靡盬盍从致诘无信饰非得乙以庶男冒婚丁女事发离之丁理馈贺衣物请以所下聘财折之不伏

婚以匹成嫡庶宜别讼由情察曲直可知将令人有所惩必在弊之不及隐其庶孽冒乃婚姻情以矫诬始闻好合事斯彰露旋见伉离既生非偶之嫌遂起纳徵之讼词多执竞理有适归乙则隐欺在法而聘财宜没丁非罔冒原情而馈礼可追是非足明取与斯在

得乙在田妻饷不至路逢父告饥以饷馈之乙怒遂出妻妻不伏

象彼坤仪妻惟守顺根乎天性父则本恩饌宜进於先生饕可辍於田峻夫也望深饕彼方期相敬如宾父兮念切嚚然旋闻受哺於子义虽乖于齐体孝则见於因心盍喜陟岵之仁翻肆送畿之怒孰亲是念难忘父一之言不爽可徵无效士二其行犬马犹能有养尔岂无闻凤凰欲阻于飞吾将不取

白氏长庆集卷六十六

卷六十七

钦定四库全书

白氏长庆集卷六十七

唐白居易撰

判【凡五十道】

得丁上言豪富人畜奴婢过制请据品秩为限约或责其越职论事不伏

品秩异伦臧获有数苟踰等列是紊典常丁志在作程恶夫过制爰陈诚於白奏俾知禁於素封将使豪富之徒资虽积於钜万僮仆之限数无踰於指千抑淫义叶於隋时革弊道符於汉日责其论事无乃失辞若守职以越思则为出位将尽忠于陈计难伏嘉言楚既失之郑有辞矣

得甲为邠州刺史正月令人修耒耜廉使责其失农候诉云土地寒

教有权节业无易宜地苟异于寒温农则殊于早晚甲分忧率职从俗勉人天时有常农宜先定地气不类寒则晚成虽愆揉木之时未违把草之候正惟廉使何昧遗风纵稼器之已修先成焉用苟土膏之不起欲速何为诚宜嘉乃辨方岂可诘其行古循诸周礼修耒虽在於季冬训此幽人于耒耜乖於正月责则迂也诉之宜哉

得乙掌宿息井树客至不诛相翔者御史纠之辞云罪在守涂之人

奸或不诛吏将焉用苟欲科其官失必先辨以司存乙慎守无闻尤徒有怠嘉宾戾止诚宜虑以相翔暴客聿来固合擒而勿佚既隳官禁是纵公行且戒事之前不申严於聚托慢官之後欲移過於守涂诚乖率属之方宜甘责帅之罚然以官虽联事等列或殊罪不同科重轻宜别比夫所属请以异论

得景为私客擅入馆驿欲科罪辞云虽入未供

传舍是崇使车攸处将供行李必辨公私何彼客游欲从公食岂无逆旅宜受馈於盘飧既匪使臣何苟求於馆穀信饕餮而是启宁僭滥之可容同周官之庐入宜衔命非郑氏之驿置岂延宾法既自干咎将谁任然则不应入而妄入刑固难逃而已供与未供罪宜有别请从减降庶叶科条

得洛水暴涨决破中桥往来不通人诉其弊河南府云雨水犹涨未可修桥纵苟施功水来还破请待水定人又有辞

大水为灾中桥其坏车徒未济诚有阻於往来修造从宜亦相时之可否顾兹浩浩阻彼憧憧人诉川梁不通壅而为弊府虑水沴荐至毁必重劳苟後患之不图则前功之尽弃将思济衆固合俟时徵啓塞之文虽必葺於一日防怀襄之害未可应乎七星无取人辞请依府见

得景为将敌人遗之药景受而饮之或责失人臣之节不伏

军尚隐情臣宜守道况握中权之要当絶外交之嫌景受命建牙遇敌饮药直虽可举忠则不知且事君在公训旅贵信失人臣之节尔岂自明惑士卒之心吾将安仰况兵惟尚诈人不易知同馈醪而无他推诚犹可苟流毒而不察虽悔宁追无谋既昧三思不伏恐涉贰过勿疑以饮徒徇陆抗之名未达而尝且坠宣尼之训是违师律难偿邻言

得丁将在别屯士卒有犯每专杀戮御史举劾诉称曾受桀戟之赐

将非处右莫敢示威军或别屯则宜专命丁位虽佐理分以戎行执专征之权锡弓於周典操司狱之柄受桀於汉仪既有命而必行信无瑕而可戮实握兵之能政奚执简之举违如或稟命於连营畏予不敢今则分部而赐戟无我有违宜崇魏绛之威勿议秦彭之罪得甲告老请立长为嗣长辞云不能请让其弟或诘之云弟好仁

让贤虽仁废长非顺徒闻建善则理其如乱嗣不祥甲告老於朝立子为後虽急难自举必有可观者焉而长幼以伦无所苟而已矣况欲正其爵位岂宜越以鴈行于弟克恭厥兄徒见好仁之请知子莫若於父盍从立长之言无忌虽欲传家季札终当弃室谅可致诘罔听不能

得甲出妻妻诉云无失妇道乙云父母不悦则出何必有过

孝养父母有命必从礼事舅姑不悦则出乙亲存为子年壮有妻兆啓和鸣授室之仪虽备德非柔淑宜家之道则乖若无爽於听从曷见尤於譴怒信伤婉婉【武馆切】理合牝离且闻莫慰母心则宜去矣何必有亏妇道然後弃之未息游词请稽往事姜诗出妇盖为小瑕鲍永去妻亦非大过明徵斯在薄诉何为

得景有姊之丧合除而不除或非之称吾寡兄弟不忍除也

丧虽宁戚礼宜节哀俾不足与有余必跂及而俯就景爱深血属礼过时制兴鲜兄之叹情既鍾於孔怀及居姊之丧服将除而不忍虽志崇敦睦而事越典彝况仪贵适中哀不在外宜抑情而顺变多奚以为苟在礼而或踰过犹不及请遵仲尼之训无执季路之辞

得丁陷贼庭守道不仕贼帅逼之辞云尧舜在上下有巢许遂免所司欲旌其节大理执不许

臣节贵忠国经懋赏宜遵善道难废彝章丁陷在贼庭强其禄仕敦在三之义因时难而名闻守无二之忠经岁寒而节见逼夷齐以周粟引巢许於唐臣身以道存情非利动所当厚獎何乃深疑且人无不臣之心所谓顺也邦有惟重之典其可废乎从乱则必论辜守道岂无旌善野哉大理信乃执迷展矣所司诚为劝沮得景为大夫有丧丁为士而特吊或责之不伏

官有常尊礼无不敬位若殊於等列吊则异其节文景为大夫丁乃元士居丧而哭合遵朝夕之期特吊以行奚越尊卑之序既乖前典乃速斯言且礼贵明徵位宜慎守俟非其事信干食菜之荣仪失其宜徒展赠葛之意是曰无上将何以观

得吏部选人入试请继烛以尽精思有司许之及考其书判善恶与不继烛同有司欲不许未知可否

旁求俊造迨将筮仕历试文辞俾从卜夜苟狂简而无取宜确执而勿听萃彼羣材登于会府惟贤是急虑失宝于握珠有命则从许借光于秉烛及乎考核罕有菁英属辞既谢於拣金待问徒烦於举火将期百鍊之後思苦弥精何意一场之中心劳逾拙曷如早已焉用晚成敢告有司勿从所请

得乙贵达有故人至坐於堂下进以仆妾之食或诮之乙曰恐以小利而忘大名故辱以激之也

贵贱苟合曾是泛文穷达相致乃为执友乙既登贵任爰有故人以为念旧追欢知己之心未至行权励节成人之美则多不登夫子之堂乃进仆人之食苟推诚而相激虽屈辱以何伤安实败名重耳竟慙於子犯感而成事张仪终谢於苏君是勉後图且符往行如或识才半面契未同心虽发愤以达人必取怨於谤已以斯致诮亦谓合宜

得景领县府无蓄廩无储管郡诘其慢职景云王者富人藏於下故也

赋敛异名君臣殊政藏诸百姓在王者而则然虚我千仓於职司而不可景匱兹国用丰彼家财人不诛求诚为寛政府无储蓄宁匪慢官况今征税有常公私兼济苟能取之以道则下自乐输何必藏之于人使上将乏用既爽奉公之节宜甘掠美之科罔纵县辞请依郡诘得丁食於丧者之侧而饱或责之辞云主人食我以礼故饱

饮食以陈庶无求饱齐衰可恤仁岂忘情丁靡念人丧故求主礼遇加筮之膳诚可疗饥对泣血之哀亦宜忘味既念吉蠲之饈是忘惻隐之心况春於其邻相犹违礼而食於其侧饱亦非仁徒嘉施氏之仪且昧宣尼之教勿思变色当顾戚容

得甲为狱吏囚走限内他人获之甲请免罪

圜土不严罪人其遁亡而由已诚曰慢官获则因人其何补过相维彼甲所谓攸司不念恪居

傲于美里旋闻失守逸乃楚囚虽非故纵所为曾是慢常而致徒称勿佚未可塞违得於他人自是疎网无漏失其所职岂可出匣不科无贪假手之功固合甘心於罚

得乙川游所由禁之云有故要渡

示衆知防必修水禁救人鲜死无纵川游乙行险不思冯河无悔慕吕梁之术习於浮水违周官之令忌彼危身将不吊而是虞虽有故而宜禁忘子产喻政尔则狎而翫之引仲尼格言吾恐蹈而死者既殊利涉当戒善游未可加刑且宜知惧

得景为将每军休止不缮营部监军使劾其无备辞云有警军阵必成何必劳苦

将苟有谋劳而後逸师不用律臧亦为凶况未靖方隅尚勤征伐即戎推轂既崇四七之名临敌屯营何乖什伍之列是使人慢孰谓戎昭薄威虽欲恤劳彻警恐为懈怠且有严有翼犹夺先人之心不备不虞宁救长蛇之尾必也权能制胜谋必出奇亦待临事有成然後斯言可信监军之劾举未失中彼景之辞试可乃已得丁乘车有醉吐车茵者丁不科而吏请罪之丁不许

克寛克仁所谓易事不知不愠是曰难能况乎醉起瓮间呕盈车上小人沉湎自贻诮于彼昏君子含弘乃忘情于斯怒有过所宜无大知非庶使有慙未乖观过之仁雅叶谛思之义且恕当及物察贵用情絶纓继淫醉而犹舍吐茵及乱误岂不容无从下吏之规庶叶前贤之美

得甲牛觥乙马死请偿马价甲云在放牧处相觥请陪半价乙不伏

马牛于牧蹄角难防苟死伤之可徵在故误而宜别况日中出入郊外寝讹既品量以齐驱或风逸之相及尔牛孔阜奋騂角而莫当我马用伤踠骏足而致毙情非故纵理合误论在阜栈以来思罚宜惟重就桃林而招损偿则从轻将息讼端请徵律典当陪半价勿听过求得景娶妻三年无子舅姑将出之诉云归无所从

承家不嗣礼许此离去室无归义难弃背景将崇继代是用娶妻百两有行既啓飞凤之兆三年无子遂操别鹄之音将去舅姑终鲜亲族虽配无生育诚合比於断弦而归靡适从庶可同於束蘊固难効於牧子宜自哀於邓攸无抑有辞请从不去

得丁丧亲卖宅以奉葬或责其无庙云贫无以为礼

慎终之道必信必诚死葬之仪有丰有省谅欲厚於卜宅亦难轻於虑居丁昊天降凶远日叶吉思葬具之丰备欲祔九原顾家徒之屡空将鬻五亩爱虽深於送死义且涉於伤生念顔氏之贫岂宜厚葬览子游之问固合称家礼所贵於从宜孝不在于益侈盍伸破产之禁以避无庙之嫌

得甲之周亲执工伎之业吏曹以甲不合仕甲云今见修改吏曹又云虽改仍限三年後听仕未知合否

业有四人职无二事如或居肆则不及任甲爰有周亲是称工者方耻役以事上且思禄在其中有慕九流虽欲自迁其业未经三载安可同升诸公难违令甲之文宜守吏曹之限如或材高拔俗行茂出羣岂惟限以常科自可登乎大用以斯而议谁曰不然

得乙请用父?所司以赠官降正官?一等乙云父死王事合与正官同

官分正赠荫别品阶如酬死继之勲则厚赏延之宠追思乙父励乃臣节捐躯致命尚克底定尔功继代劝能岂忘勤恤我後椒聊既称有实桃李未可无陰忠且忘身优宜及嗣如或病捐馆舍赠官当合降阶今则死卫国家叙?所宜同正庶旌义烈用叶条章

得景为録事参军刺史有违法事景封状奏闻或责其失事长之道景云不敢不忠於国

守位居常小宜事大持法举正卑可纠尊景名署外台身由中立直而自守郡邮之政必行明不相蒙州将之邪无隐且六条枉挠百事滋昏苟不提纲是为漏网虽举违犯上亏敬长之小心而陈奏尽忠得事君之大节既非下讪难抑上闻

得丁私发制书法司断依漏泄坐丁诉云非密事请当本罪

君命是专刑其无小王者非密罪则从轻丁乃攸司属当行下不慎厥德擅发如纶之言自灾于身难求疎网之漏然则法通加减罪有重轻必也志在私行唯当专达之责如或事关枢密则科漏泄之辜请验迹於紫泥方定刑於丹笔

得甲为所由稽缓制书法直断合徒一年诉云违未经十日

王命急宣行无停晷【古委切】制书稽缓罪有常刑将欲正其科绳必先揆以时日甲懈位败度慢令速尤蓄怠弃之心既亏臣节壅骏奔之命自犯国章然则审时勾稽考程定罪法直以役当期月所由以违未浹辰将计年以断徒恐乖阅实请据日而加等庶叶公平是曰由文俾乎息讼

得乙盗买印用法直断以伪造论诉云所由盗卖因买用之请减等

贿以公行印惟盗用罪之大者法可逃乎伊人无良同恶相济所由既败官为墨予取予求彼乙乃窃器成奸不畏不入潜谋斯露窃弄难容犹执薄言将求末减用因於买比自作而虽殊情本於奸与伪造而何以兹降等诚恐利淫

得有圣水出饮者日千数或谓伪言不能愈疾且恐争鬪请禁塞之百姓云病者所资请从人

欲

执禁之要在乎去邪为政之先必也无讼恣彼泉水流于道周饮瓢之人孔多蔑闻病间滥觞之源不足必起争端讼所由生欲不可纵上善未能利物左道足以惑人且稽以祥符徵之时事地不藏宝当今自出醴泉天之爱人从古未闻圣水无听虚诞之说请塞讹伪之源得景有志行隐而不仕为郡守所辟称是巫家不当选吏功曹按其诡诈景不伏

鹤鸣处陰声闻于外元豹隐雾乐在其中此将适於退藏彼何强之维繫景业敦道行志薄宦情太守以举尔所知将申蒲帛之聘夫子以从吾所好不顾弓旌之招惧俗吏之徒劳引巫家以自秽冀其言逊获免翻以行诈论辜况商洛拂衣汉且求之不得颍川洗耳尧亦存而勿论天子尚不违情功曹如何按罪

得丁为刺史见冬涉者哀之下车以济之观察使责其不顺时修桥以徼小惠丁云恤下

津梁不修何以为政车服有命安可假人丁职是崇班体非威重轻汉臣之宠失位於高车徇郑相之名济人於大水志虽恤下道昧叶中与其熊轼涉川小惠未遍曷若虹桥通路大道甚夷啓塞既闕於日修揭厉徒哀其冬涉事关失政情近沾名宜科十月不成庶辨二天无政

得甲告其子行盗或谓其父子不相隐甲云大义灭亲

法许原亲慈通隐恶俾恩流于下亦直在其中甲忝齿人伦忍伤天性义方失教曾莫愧於父顽攘窃成奸尚不为其子隐道既亏於庭训礼遂阙于家肥且情比乐羊可谓不慈伤教况罪非石厚徒云大义灭亲是不及情所宜致诮

得州府贡士或市井之子孙为省司所诘申称羣萃之秀出者不局限以常科

惟贤是求何贱之有况士之秀者而人其舍诸惟彼郡贡或称市籍非我族类则嫌杂以萧兰举尔所知安得弃其翹楚诚其恶於稗败谅难舍其茂异拣金於砂砾岂为类贱而不收度木於涧松宁以地卑而见弃但恐所举失德不可以贱废人况乎识度冠时出自牛医之後心计成务擢於贾豎之中在往事而足徵可常科而是限州申有据省诘非宜

得乙充选人职官选人代试法司断乙与代试者同罪诉云实不知情

官择贤良选稽名实苟作伪而心拙必代斲而手伤乙情非容奸行乖周慎将如吾面遂充识以不疑未见子心果代试而有悔既彰闻而貽戚乃连坐以论辜察情谅不同谋诘罪诚应异罚法无攸赦选者当准格论人不易知职官所宜情恕削夺恐为过当贬降庶叶决平得甲与乙爵位同甲以齿长请居乙上乙以皇宗不伏在甲下有司不能断

庠序辨仪则先长长朝廷列位必尚亲亲惟彼周行是名同位德非心竞礼失肩随甲以桑榆

年高何以卑我乙以葛藟族贵奚独後予各兴争长之辞遂昧常尊之位然礼经尚齿且王室贵亲晋郑同侪信高卑之或等滕薛异姓谅先後之可知难遵少长之伦宜守亲疎之序

得选用举司取有名之士或云不息驰骛恐难责实

声虽非实善岂无名不可苟求亦难尽弃属时当侧席任重抡材思得士於声华惧诱人於奔竞若驰骛而方取虑非岁贡之贤如寂寥而後求恐失日彰之善将期摭实必在研精但取舍不私是开乎公道则吹嘘无益自闭其幸门名勿论於有无鉴自精于举措

得太学博士教胄子毀方瓦合司业以非训导之本不许

教惟驯致道在曲成将逊志以乐羣在毀方而和衆况化人由学成性因师虽和光以同尘德终不杂苟圆凿以方枘物岂相容道且尚於无隅义莫先於不?【呼对切】司业以训导贵别或虑雷同学官以容衆由寛何伤瓦合教之未坠盖宣尼之言然文且有徵则戴氏之典在将劝学者所宜黜之

得甲居家被妻毆笞之邻人告其违法县断徒三年妻诉云非夫告不伏

礼贵妻柔则宜禁暴罪非夫告未可丽刑何彼无良於斯有怒三从罔敬待以庸奴之心一杖所加辱於女子之手作威信伤於妇道不告未爽为夫和招讼於邻诚愧声闻于外断徒不伏未乖直在其中虽昧家肥难从县见

得乙居家理廉使举请授官吏部以无出身不许使执云行成於内可移於官

调选正名诚宜守序敷求懋德安可拘文乙积行於中闇彰於外廉使以道敦知己欲致我於青云天官以限在出身将弃予於白屋事虽异见理可明徵抡琐琐之材则循旧格刈翹翹之楚宁守常科幸当侧席之求无惑刻舟之执况自家刑国移孝入忠既闻道不虚行足见举非失德所宜坚决无至深疑

得景定婚讫未成而女家改嫁不还财景诉之女家云无故三年不成

义敦好合礼重亲迎苟定婚而不成虽改嫁而无罪景谋将着代礼及问名二姓有行已卜和鸣之兆三年无过竟愆嬿婉之期桃李恐失於当年榛栗遂移於他族既闻改适乃诉纳徵揆情而嘉礼自亏在法而聘财不返女兮不爽未乖九十之仪夫也无良可谓二三其德去礼逾远责人斯难

得丁为大夫与管库士为友或非之云非交利也

见贤不称且亏事上之节非义苟合则涉黷下之嫌丁贵乃立家友其管库不思进善徒务降

尊若接而或非自貽交利之责悦知而不举则速蔽贤之尤既未核於是非故欲案乎贵贱况公叔荐士家臣尚见同升虽文子好能管库不闻为友信乖慎守宜及或非

得四军帅令禁兵於禁街中种田御史劾以无勅文辞云因循岁久且有利於军

为国劝农田畴有制示人知禁衢路攸先瞻彼三农艺斯五稼且町【他顶切田践处】疇【土旱切禽兽所践处】是务岂是贍军虽辙迹不加未为旷土犂穀必资于平易康庄难纵以荒芜务有畔之农秋成而利亦盖寡侵如砥之道岁久而弊则滋多请论环卫之非式表铁冠之劾

得甲为郡守部下渔色御史将责之辞云未授官已前纳采

诸侯不下用戒淫风君子好逑未乖婚义甲既荣为郡且念宜家礼未及於结褵责已加於执宪求娶於本部之内虽处嫌疑订婚於授官之前未为纵欲况礼先纳采足明嫵婉之求聘则为妻殊非强暴之政宜听隼旟之诉难科渔色之辜

得乙为三品见本州刺史不拜或非之称品同

桑梓攸重必在恪恭官品斯同则宜抗礼乙班荣是践威重可观况衣锦还乡已崇三品之秩虽剖符临郡应无再拜之仪岂以州里版图而紊邦家典制如或商周不敌敢不尽礼事君今且晋郑同侪安得降阶卑我既不愆素何恤或非

得景为兽人冬不献狼责之诉云秦地无狼

鲜或不给既旷乃官辞且无徵是重而罪景兽人斯掌禽兽罔供当路可求曾不思於鼯尾充庖为用遂有阙於充肠既愆冬献之期难偿西邻之责载详地产重振国章荐必以时吾能言於周有生靡常所子勿谓其秦无纵口给之不慙在面欺而无舍

得景负丁财物丁不告官强取财物过本数县司以数外赃论之不伏

人纵於贪动而生悔物非其道取则有赃丁放利欲赢景逋债未偿怀不忌而强取姑务丰财逞无?之过求岂非黷货情难容於强暴法必禁以夺攘以交易而求多尚宜准盗在倍称而过数孰谓非赃若以律论当从县断

得乙请袭爵所司以乙除丧十年而後申请引格不许乙云有故不伏

爵命未坠嗣袭有期在纪律而或愆当职司而宜举乙旧德将继新命未加所宜纂彼前修相承以一子何乃废其後嗣自弃於十年岁月既已滋深公候固难必复然以法通议事理贵察情如置身於宴安则宜夺爵若居家而有故尚可策名须待毕辞方期析理

得丁为士葬其父用大夫礼或责其僭辞云从死者

礼惟辨贵孝不贬亲是谓奉先孰云僭上丁庆加一命忧及三年凶降昊天且结茹荼之痛吉从远日方追食菜之荣既贵贱之殊宜亦父子之异道同曾元易箒正符於大夫殊宴娶遣车见非於君子未爽慎终之义允符从死之文辞则有徵责之非当

得甲将死命其子以嬖妾为殉其子嫁之或非其违父之命子云不敢陷父於恶

观行慰心则禀父命辨惑执礼宜全子道甲立身失正没齿归乱命子以邪生不戒之在色爱妾为殉死而有害於人违则弃言顺为陷恶三年之道虽奉先而无改一言以失难致亲於不义诚宜嫁是岂可顺非况孝在慎终有同魏颗理命事殊改正未伤庄子难能宜忘在耳之言庶见因心之孝

白氏长庆集卷六十七

卷六十八

钦定四库全书

白氏长庆集卷六十八

唐白居易撰

碑志序记表赞论衡书【凡十三首】

故京兆元少尹文集序

天地间有粹灵气焉万类皆得之而人居多就人中文人得之又居多盖是气凝为性发为志散为文粹胜灵者其文冲以恬灵胜粹者其文宣以秀粹灵均者其文蔚温雅渊疏朗丽利检不扼达不放古淡而不鄙新奇而不怪吾友居敬之文其殆庶几乎居敬姓元名宗简河南人自举进士历御史府尚书郎讫京兆尹二十年着格诗一百八十五律诗五百九赋述铭记书碣讚序七十五总七百六十九章合三十卷长庆三年冬疾弥笃将啓手无他语语其子途云吾生平酷嗜诗白乐天知我者我歿其遗文得乐天为之序无恨矣既而途奉理命号而告予无几何会予自中书舍人出牧杭州岁余改右庶子移疾东洛明年复刺苏州四年间三换官往复奔命不啻万里席不遑煖矧笔砚乎故所托文久未果就及刺苏州又剧郡治数月政方暇因发阅篋裘睹居敬所着文其间与予唱和者数十首烛下讽读惻惻久之恍然疑居敬在旁不知其一生一死也遂援笔草序序成复视涕与翰俱悲且吟曰黄壤讵知我白头徒念君唯将老年泪一洒故人文重曰遗文三十轴轴轴金玉声龙门原上土埋骨不埋名呜呼居敬若职业之恭慎居处之庄洁操行之贞端襟灵之旷淡骨肉之敦爱邱园之安乐山水风月之趣琴酒啸咏之态与人久要遇物多情皆布在章句中开卷而尽可知也故不序时宝历元年冬十二月乙酉夕在吴郡西园北斋东牖下作序

海州刺史裴君夫人李氏墓志铭【并序】

夫人赞皇县君李氏赵郡高邑人也六代祖素立安南都护五代祖休烈赵州刺史高祖讳至远天官侍郎曾祖畬国子司业祖讳承工部尚书河南观察使考讳藩门下侍郎同平章事赠户部尚书夫人讳娥相国长女也适河东裴君克谅今为海州刺史一子曰鐕左卫骑曹参军一女适陇西李遂遂为壽州录事参军由此而上得於国家史牒云夫人为相门女邦君妻不以华贵骄人能用恭俭克已抚下若子敬夫如宾衣食之余旁给五服亲族之饥寒者又有余散沾先代仆使之老病者又有余分施佛寺僧徒之不足者澣衣菲食服勤礼法礼法之外讽释典持真言栖心空门等观生死故治家之日欣然自适捐馆之夕恬然如归宝历三年三月一日疾终于海州官第其岁十一月十四日归祔于某所先莹年五十有四夫人之从裴君也

历官九任凡三十一年族睦家肥辅佐之力也由此而上得於裴君状云夫源远者流长根深者枝茂噫李氏之世祿世德有所从来矧相国端方廉雅孝友忠肃自从事彭城登庸宰府不以夷险而迁其道宜乎居极位享名贤也夫人敬恭勤俭柔顺慈惠自女於室妇於家不以初终而怠其行宜乎啓封邑光德门也裴君修文达政洁已爱人自佐邑从军连牧二郡不以寒暑而易其心宜乎荷百祿号良二千石也呜呼非此父不生此女非是夫不称是妻斯所谓类以相从合而具美者也论譔表志其可阙乎铭曰

高邑之祥降于李氏相门之庆鍾于女子女子有行归于裴君君亦良士宜贤夫人夫人虽歿风躅具存勒名泉户作范闺门

如信大师功德幢记

有唐东都临坛开法大师长庆四年二月十三日终于圣善寺华严院春秋七十有五夏臘五十二是月二十二日移窆于龙门山之南岗宝历元年某月某日迁葬于奉先寺附其先师塔庙穴之上不封不树不庙不碑不劳人不伤财唯立佛顶尊胜陀罗尼一幢幢高若干尺圍若干尺六隅七层上覆下承佛仪在上经咒在中记讚在下皆师所嘱系门人奉遗志也师姓康号如信襄城人始成童授莲花经於释岩既则戒学四分律於释晤後传六祖心要於本院先师净名楞伽俱舍百法经根论枝罔不通焉由是禅与律交修定与慧相养蓄为通粹揭为僧豪自建中讫长庆凡九迁大寺居十补大德位莅法会主僧盟者二十二年勤宣佛令卒复祖业若贵贱若贤愚若小大中乘人游我门绕我座礼我足如羽附凤如水会海於戏非夫动为仪言为法心为道場则安能使化缘法衆悦随欣戴一至於耶同学大德继居本院者曰智如弟子上首者曰严隐暨归靖藏周常贲怀嵩圆恕圆昭贞操等若干人聚谋幢事琢刻既成将师理命请苏州刺史白居易为记记既讫因书二四句偈以赞云

师之度世以定以慧为医药师救疗一切师之闍维不塔不祠作功德幢与衆共之

华严经社石记

有杭州龙兴寺僧南操当长庆二年请灵隐寺僧道峯讲大方广佛华严经至华藏世界品闻广博严净事操欢喜发愿愿於白黑衆中劝十万人人转华严经一部十万人又劝千人人讽华严经一卷每岁四季月其衆大聚会於是撮之以社齐之以斋自二年夏至今年秋凡十有四斋每斋操捧香跪啓於佛曰顾我来世生华藏世界大香水海上宝莲金轮中毗卢遮那如来前与十万人俱斯足矣又於衆中募财置良田十顷岁取其利永给斋用予前牧杭州时闻操发是愿今牧苏州时见操成是功操自诣苏凡三请於予曰操八十一矣朝夕待尽恐社与斋来者不能继其志乞为记诚俾无废坠予即十万人中一人也宜乎志而赞之噫吾闻一毛之施一饭之供终不坏灭况田千亩斋四时用不竭之征备无穷之供乎噫吾闻一愿之力一偈之功终不坏灭况十二部经常出於千人口乎况十万部经常入於百千人耳乎吾知操徒必果是愿若经之句义若经之功神则存乎本传若社人之姓名若财施之名数则列于别碑斯石之文但叙见愿集来缘而已宝历二年九月二十五日前苏州刺史白居易记

吴郡诗石记

贞元初韦应物为苏州牧房孺复为杭州牧皆豪人也韦嗜诗房嗜酒每与宾友一醉一咏其风流雅韵多播於吴中或曰韦房为诗酒仙时予始年十四五旅二郡以幼贱不得与游宴尤觉其才调高而郡守尊以当时心言异日苏杭苟获一郡足矣及今自中书舍人间领二州去年脱杭印今年佩苏印既醉於彼又吟於此酣歌狂什亦往往在人口中则苏杭之风景韦房之诗酒兼有之矣岂始愿及此哉然二郡之物状人情与曩时不异前後相去三十七年江山是而齿发非又可嗟矣韦在此州歌诗甚多有郡宴诗云兵卫森画戟燕寝凝清香最为警策今刻此篇于石传贻将来因以予旬宴一章亦附于後虽雅俗不类各咏一时之志偶书石背且偿其初心焉宝历元年七月二十日苏州刺史白居易题

吴兴灵鹤赞【事具黄录斋记中】

有鸟有鸟从西北来丹脑火缀白翎雪开辽水一去缙山不回噫吴兴郡孰为来哉宝历之初三元四斋天无微颺地无纤埃当白昼下与紫云偕三百六十拂坛徘徊上昭玄贶下属仙才谁其居之太守姓崔

钱塘湖石记

钱塘湖事刺史要知者四条具列如左

钱塘湖一名上湖周回三十里北有石函南有笕凡放水溉田每减一寸可溉十五余顷每一复时可溉五十余顷先须别选公勤军吏二人立於田次与本所由田户据顷亩定日时量尺寸节限而放之若岁旱百姓请水须令经州陈状刺史自便押帖所由即日与水若待状入司符下县县帖乡乡差所由动经旬日虽得水而旱田苗无所及也大抵此州春多雨秋多旱若堤防如法蓄泄及时即濒湖千余顷田无凶年矣【阙】

【州图经云湖水溉田五百余顷谓系田也今按水利所及其公私田不啻千余顷也】自钱塘至盐官界应溉夹官河田湖放湖入河从河入田淮盐铁使旧法又须先量河水浅深待溉田毕却还本水尺寸往往旱甚即湖水不充今年修筑湖堤高加数尺水亦随加即不啻足矣晚或不足即更决临平湖添注官河又有余矣【虽非浇田时若官河乾浅但放湖水添注可以立通舟船】俗云决放湖水不利钱塘县官县官多假他词以惑刺史云鱼龙无所托或云菱芡失其利且鱼龙与生民之命孰急菱芡与稻粱之利孰多断可知矣又云放湖即郭内六井无水亦妄也且湖底高井管低湖中又有泉数十眼湖耗则泉涌虽尽竭湖水而泉用有余况前後放湖终不至竭而云井无水谬矣其郭中六井李泌相公典郡日所作甚利於人与湖相通中有陰窞往往堙塞亦宜数察而通理之则虽大旱而井水常足湖中有无税田约十数顷湖浅则田出湖深则田没田户多与所由计会盗泄湖水以利私田其石亟南笕并诸小笕閼非浇田时并须封闭筑塞数令巡检小有漏泄罪责所由即无盗泄之弊矣又若霖雨三日已上即往往堤决须所由巡守预为之防其笕之南旧有缺岸若水暴涨即於缺岸泄之又不可

減兼於石函南筑泄之防堤潰也【大约水去石函口一尺为限过此须泄之】予在郡三年仍岁逢旱湖之利害尽究其由恐来者要知故书于石欲读者易晓故不文其言长庆四年二月十九日杭州刺史白居易记

苏州刺史谢上表

臣居易言伏奉三月四日恩制授臣使持节苏州诸军事守苏州刺史臣以某月二十九日发东都今月五日到州当日上讫时当明盛宠在藩条祇命荷恩以感以惧臣某诚欢诚幸顿首顿首伏惟皇帝陛下嗣膺历数重造寰区将至昇平在先政化询求牧守勤恤黎元实陛下慎选惟良之秋责成共理之日也臣以微陋早忝班行前自中书舍人出为杭州刺史幸免败阙实无政能已蒙宠荣入改宫相今奉恩寄又分郡符獎饰具载於诏中庆幸实生於望外况当今国用多出江南江南诸州苏最为大兵数不少税额至多土虽沃而尚劳人徒庶而未富宜择循良之吏委以抚绥岂臣琐劣之才合当任使然既奉成命敢不誓心必拟夕惕夙兴焦心苦节唯诏条是守唯人瘼是求谕陛下忧勤之心布陛下慈和之泽则涵育之下疲人自当感恩而岁时之间微臣式希报政尘瀆皇鉴吐露赤诚宠至空惊恩深未答无任慙惶恳激之至谨差军事散将某乙奉表陈谢以闻臣某诚惶诚恐顿首顿首谨言

三教论衡

太和元年十月皇帝降诞日奉勅召入麟德殿内道场对御三教谈论畧录大端不可具载

第一座 秘书监赐紫金鱼袋白居易安国寺赐紫引驾沙门义休太清宫赐紫道士杨弘元

序

中大夫守秘书监上柱国赐紫金鱼袋臣白居易言谈论之先多陈三教讚扬演说以啓谈端伏料圣心饱知此义伏计圣听饫闻此谈臣故畧而不言唯序庆诞賛休明而已圣唐御区宇二百年皇帝承祖宗十四叶太和初岁良月上旬天人合应之期元圣庆诞之日虽古者有祥虹流月瑞电绕枢彼皆琐微不足引谕伏惟皇帝陛下臣妾四夷父母万姓恭勤以修己慈俭以养人戎夏乂安朝野无事特降明诏式会嘉辰开达四聪阐扬三教儒臣居易学浅才微谬列禁筵猥登讲座天顔咫尺隕越于前窃以释门义林法师明大小乘通内外学灵山岭岫苦海津梁於大衆中能狮子吼所谓彼上人者难为酬对然臣稽先王典籍假陛下威灵发问既来敢不响答

僧问

义休法师所问毛师称六义论语列四科何者为四科何者为六义其名与数请为备陈者

对

孔门之徒三千其贤者列为四科毛诗之篇三百其要者分为六义六义者一曰风二曰赋三曰比四曰兴五曰雅六曰颂此六义之数也四科者一曰德行二曰言语三曰政事四曰文学此四科之目也在四科内列十哲名德行科则有颜渊闵子骞冉伯牛仲弓言语科则有宰我子贡政事科则有冉有季路文学科则有子游子夏此十哲之名也四科六义之名数今已区别四科六义之旨义今合辨明请以法师本教佛法中比方即言下晓然可见何者即如毛诗有六义亦犹佛法之义例有十二部分也佛经千万卷其义例不出十二部中毛诗三百篇其旨要亦不出六义内故以六义可比十二部经又如孔门之有四科亦犹释门之有六度六度者六波罗密六波罗密者即檀波罗密尸波罗密羼提波罗密毗梨耶波罗密禅定波罗密般若波罗密以唐言译之即布施持戒忍辱精进禅定智慧是也故以四科可比六度又如仲尼之有十哲亦犹如来之有十大弟子即迦叶阿难须菩提舍利弗迦旃延目乾连阿那律优波离罗?罗是也故以十哲可比十大弟子夫儒门释教虽名数则有异同约义立宗彼此亦无差别所谓同出而异名殊途而同归者也所对若此以为何如更有所疑请以重难

难

法师所难十哲四科先标德行然则曾参至孝孝者百行之先何故曾参独不列於四科者

对

曾参不列四科者非为德行才业不及诸人也盖系於一时之事耳请为终始言之昔者仲尼有圣人之德无圣人之位栖栖应聘七十余国与时竟不偶知道终不行感凤泣麟慨然有吾已矣夫之叹然後自卫反鲁删诗书定礼乐修春秋立一王之法为万代之教其次则叙十哲伦四科以垂示将来当此之时颜闵游夏之徒适在左右前後目击指顾列入四科亦一时也孝经云仲尼居曾子侍此言仲尼闲居之时曾参则多侍从曾参至孝不忍一日离其亲及仲尼旅游历聘自卫反鲁之时曾参或归养於家不从门人之列伦拟之际偶独见遗由此明之非曾参德行才业不及诸门人也所以不列四科者盖一时之阙耳因一时之阙为万代之疑从此辨之又可无疑矣

问僧

儒书奥义既已讨论释典微言亦宜发问

问

维摩经不可思议品中云芥子纳须弥须弥至大至高芥子至微至小岂可芥子之内入得须弥山乎假如入得云何得见假如却出如何得知其义难明请言要旨【僧答不录】

难

法師所云芥子納須彌是諸佛菩薩解脫神通之力所致也敢問諸佛菩薩以何因緣証此解脫修何智力得此神通必有所因願聞其說【僧答不錄】

問道士

儒典佛經討論既畢請回余論移問道門臣居易言我太和皇帝祖玄元之教挹清淨之風儒素緇黃鼎足列座若不講論玄義將何啓迪皇情道門楊弘元法師道心精微真學奧秘為仙列上首與儒爭衡居易竊覽道經粗知玄理欲有所問冀垂發蒙

問

黃庭經中有養氣存神長生久視之道常聞此語未究其由其義如何請陳大畧【道士答不錄】

難

法師所答養氣存神長生久視之大畧則聞命矣敢問黃者何義庭者何物氣養何氣神存何神誰為此經誰得此道將明事驗幸為指陳【道士答不錄】

道士問

法師所問孝經云敬一人則千萬人悅其義如何者

對

謹按孝經廣要道章云敬者禮之本也敬其君則臣悅敬一人則千萬人悅所敬者寡而悅者衆此之謂要道也夫敬者謂忠敬盡禮之義也悅者謂悅懌歡心之義也要道者謂施少報多簡要之義也如此之義明白各見於經文其間別有所疑即請更難

難

法師所難云凡敬一人則合一人悅敬二人則合二人悅何故敬一人而千萬人悅又問所悅者何義所敬者何人

對

孝經所云一人者謂帝王也王者無二故曰一人非謂臣下衆庶中之一人也若臣下敬一人則一人悅敬二人則二人悅若敬君上雖一人即千萬人悅何以明之設如人有盡忠於國盡敬於君天下見之何人不悅豈止千萬人乎設如有人不忠於國不敬於君天下見之何人不

怒亦岂止千万人乎然敬即礼也礼即敬也故传云见有礼於其君者事之如孝子之养父母也如此则岂独空悦乎亦将事而养之也见无礼於其君者诛之如鹰鷂之逐鸟雀也如此则岂独空不悦乎亦将逐而诛之也由此而言则敬不敬之义悦不悦之理了然可见复何疑哉

退

臣伏惟三教谈论承前旧例朝臣因对?之次多自叙不能及平生志业臣素无志业又乏才能恐烦圣聪不敢自叙谨退

沃洲山禅院记

沃洲山在剡县南三十里禅院在沃洲山之阳天姥岑之陰南对天台而华顶赤城列焉北对四明而金庭石鼓介焉西北有支遁岭而养马坡放鹤峯次焉东南有石桥溪溪出天台石桥因名焉其余卑岩小泉如子孙之从父母者不可胜数东南山水越为首剡为面沃洲天姥为眉目夫有非常之境然後有非常之人栖焉晋宋以来因山洞开厥初有罗汉僧西天竺人白道猷居焉次有高僧竺法潜支道林居焉次又有乾兴洲支遁开威蘊崇实光识裴藏济度逞印凡十八僧居焉高士名人有戴逵王洽刘恢许玄度殷融郗超孙绰桓彦表王敬仁何次道王文度谢长霞袁彦伯王蒙卫玠谢万石蔡叔子王羲之凡十八人或游焉或止焉故道猷诗云连峯数千里修林带平津茆茨隐不见鸡鸣知有人谢灵运诗云暝投剡中宿明登天姥岑高高入云霓还期安可寻盖人与山相得於一时也自齐至唐兹山寢荒灵境寂寥罕有人游故词人朱放诗云月在沃洲山上人归剡县江边刘长卿诗云何人住沃洲此皆爱而不到者也太和二年春有头陀僧白寂然来游兹山见道猷支竺遗蹟泉石尽在依依然如归故乡恋不能去时浙东廉使元相国闻之始为卜筑次廉使陆中丞知之助其缮完三年而禅院成五年而佛事立正殿若干间斋堂若干间僧舍若干间夏腊之僧岁不下八九十安居游观之外日与寂然讨论心要振起禅风白黑之徒附而化者甚衆嗟乎支竺歿而佛声寢灵山废而法不作後数百岁而寂然继之岂非时有待而化有缘耶六年夏寂然遣门徒僧常贄自剡抵洛持书与图诣从叔乐天乞为禅院记云

昔道猷肇开兹山後寂然嗣兴兹山今日乐天又垂文兹山异乎哉沃洲山与白氏其世有缘乎

修香山寺记

洛都四野山水之胜龙门首焉龙门十寺观游之胜香山首焉香山之坏久矣楼亭蹇崩佛僧暴露士君子惜之予亦惜之佛弟子耻之予亦耻之顷予为庶子宾客分司东都时性好闲游灵迹胜概靡不周览每至兹寺慨然有葺完之愿焉迨今七八年幸为山水主是偿初心复始愿之秋也似有缘会果成就之噫予早与故元相国微之定交於生死之间冥心於因果之际去年秋微之将薨以墓志文见托既而元氏之老状其臧获輿马绶帛泊银鞍玉带之物价当六七十万为谢文之贄来致於予予念平生分文不当辞贄不当纳自秦至洛往返再三乞不

得已回施兹寺因请悲知僧清闲主张之命谨干将士复掌治之始自寺前亭一所登寺桥一所连桥廊七间次至石楼一所连廊六间次东佛龕大屋十一间次南宾院堂一所大小屋共七间凡支坏补缺垒隤覆漏朽壤之功必精赅至之饰必良虽一日必葺越三月而就譬如长者坏宅郁为导师化城於是龕像无燥湿陟泐之危寺僧有经行宴坐之安游者得息肩观者得寓目关塞之气色龙潭之景象香山之泉石石楼之风月与往来者耳目一时而新士君子佛弟子豁然如释憾刷耻之为清闲上人与予及微之皆夙旧也交情愿力尽得知之憾往念来欢且赞曰凡此利益皆名功德而是功德应归微之必有以灭宿殃荐冥福也予应曰呜呼乘此功德安知他劫不与微之结後缘於兹土乎因此行愿安知他生不与微之复同游於兹寺乎言及於斯涟而涕下唐大和六年八月一日河南尹太原白居易记

荐李宴韦楚状

朝议大夫前使持节海州诸军事守海州刺史上柱国李宴

右前件官比任海州刺史被本道节度使配诸州税麦一例加估徵钱宴频申奏恐损百姓本使称用军事切不得已而从之及被人论朝廷勘覆责不闻奏除替削阶在法诚合举行於宴即为独屈况宴累为宰牧皆着良能清白公勤颇闻於衆自经停罢已涉三年退居洛阳穷饿至甚身典三郡家无一金据此清廉别堪优獎又建中初李正己与纳连反汴河阻絶转输不通宴先父洧即正己堂弟为徐州刺史当畔乱之时洧以一郡七城归国効顺弃一家百口任贼诛夷开运路之咽喉断凶渠之右臂遂使逆谋大挫妖寇竟消从此徐州埭桥至今永为内地如洧之子实可念之臣以洧之忠功不可忘宴之吏材不可弃伏希圣念量授一官庶使廉吏忠臣闻之有所激劝

伊阙山平泉处士韦楚

右件人隐居乐道独行善身敛迹市朝息机名利况家传簪组兄在班行而楚独栖山卧云练气絶粒滋味不接於口尘埃不染其心二十余年不改其乐志齐箕颍节类顔原搢绅之间多所称叹臣为尹正合具荐论虽飞鸿入冥自忘饮啄而白驹在谷亦贵繫维傥蒙寘彼周行麋之好爵降羔鴈之礼命助鸛鹭之羽仪足以厚贞退之风遏躁进之俗兹亦盛事有裨圣朝

以前件如前臣伏以念功振滞前王之令猷贡士推能长吏之本职其李宴韦楚并居府界不践公门臣实谙知辄敢论荐有涉尘瀆无任兢惶谨具奏闻伏听勅旨太和六年六月二十六日河南尹臣白居易状奏

与刘苏州书

梦得阁下前者枉手札数幅兼惠答忆春草报白君以下五六章发函披文而後喜可知也又覆视书中有攘臂痛拳之戏笑与拚会甚乐甚乐谁复知之因有所云续前言之戏耳试为留听与阁下在长安时合所着诗数百首题为刘白唱和集卷上下【事具集解中】去年冬梦

得由礼部郎中集贤学士迁苏州刺史冰雪塞路自秦徂吴仆方守三川得为东道主阁下为仆税驾十五日朝觴夕咏颇极平生之欢各赋数篇视草而别岁月易迈行复周星一往一来忽又盈篋诚知老丑冗长为少年者所嗤然吴苑洛城相去二三千里舍此何以啓齿而解颐哉嗟乎微之先我去矣诗敌之勍者非梦得而谁前後相答彼此非一彼虽无虚可击此亦非利不行但止交綏未尝失律然得雋之句警策之篇多因彼唱此和中得之他人未尝能发也所以辄自爱重今复编而次焉以附前集合前三卷题此卷为下迁前下为中命曰刘白吴洛寄和卷自太和六年冬送梦得之任之作始居易顿首

白氏长庆集卷六十八

卷六十九

<集部,别集类,汉至五代,白氏长庆集>

钦定四库全书

白氏长庆集卷六十九

唐白居易撰

碑序解祭文记【凡十二首】

故饶州刺史吴府君神道碑铭【并序】

汨市朝溺妻子非达也困山林摈血属亦非达也若有人与羣动处一代间彼为我我为我不自洁不自污不巢许不伊吕水其心云其身浮沉消息无往而不自得者非达人乎吾友吴君从事於斯矣君讳丹字真存太子通事舍人览之曾孙睦州司马庶之孙太子宫门郎赠工部尚书铨之长子以进士第入官官历正字协律郎大理评事监察殿中侍御史太子舍人水部库部员外郎都官驾部郎中谏议大夫大理少卿饶州刺史职历义成军节度推官浙西道节度判官潼关防御判官镇州宣慰副使匭函使阶至中大夫勳至上柱国读书数千卷着文数万言宝历元年六月某日薨於饶州官次其年十月某日葬于常州晋陵县仁和乡北原从遗志也君生四五岁弄泥沙时所作戏辄象道家法事八九岁弄笔砚时所出言辄类诗家篇章不自知其然盖宿集儒玄之业明矣既冠喜道书奉真籙每专气入静不粒食者累岁颢气充而丹田泽飘然有出世心既壮在家为长属有三幼弟八稚侄磬磬栗栗不忍见其饥寒慨然有干禄意乃曰肥遁不可以立训吾将业儒以驰名名竞不可以恬神吾将体玄以育德冻馁不可以安道吾将强学以徇禄禄位不可以多取吾将知足而守中由是去江湖来京师求名得名求禄得禄身荣家给之外无长物无越思素琴在左黄庭在右澹乎自处与天和始终历仕途二十七年享壽命八十二岁无室家累无子孙忧屈伸宠辱委任而已未尝一日戚戚其心至于归全反真故予所谓达人之徒与信矣仲弟湖州长史某以兄辱与其兄游既为同门生又为同舍郎周知初终托为碑记噫先生之道吾能引古以明之铭曰

汉中大夫东方曼倩夏侯湛高之作庙貌讚唐中大夫真存先生白乐天知之作神道铭呜呼二大夫异代而同途其皆达者乎

苏州重玄寺法华院石壁经碑文

碑在石壁东次石壁在广德法华院西南隅院在重玄寺西若干步寺在苏州城北若干里以

华言唐文译刻释氏经典自经品衆佛号以降字加金焉夫开士悟入诸佛知见以了义度无边以圆教垂无穷莫尊于妙法莲华经凡六万九千五百五言证无生忍造不二门住不可思议解脱莫极於维摩经凡二万七千九十二言摄四生九类入无余涅槃实无得度者莫先於金刚般若波罗密经凡九千二百八十七言坏罪集福净一切恶道莫急於佛顶尊胜陀罗尼经凡三千二十言应念顺愿愿生极乐土莫疾於阿弥陀经凡一千八百言用正见观真相莫出於观音普贤菩萨法行经凡六千九百九十言诠自性认本觉莫深於实相法密经凡三千一百五言空法尘依佛智莫过於般若波罗密多心经凡二百五十八言是八种经具十二部合一十一万六千八百五十七言三乘之要旨万佛之秘藏尽矣是石壁积四重高三寻长十有五常厚尺有咫有石莲敷覆其上下有石神固护其前後水火不能烧漂风日不能摇消所谓施无上法尽未来际者也唐长庆二年冬作太和三年春成律德沙门清晃矢厥谋清海继厥志门弟子南容成之道则终之寺僧契元舍艺而书之郡守居易施词而讚之讚曰

佛涅槃後世界空虚惟是经典与衆生俱说有人书贝叶上藏檀龕中非坚非久如蜡印空假使人刺血为墨剥肤为纸即坏即灭如画水噫画水不若文石印蜡不若字金其功不朽其义甚深故吾谓石经功德契如来付嘱之心

池上篇【并序】

都城风土水木之胜在东南偏东南之胜在履道里里之胜在西北隅西閤北垣第一第即白氏叟乐天退老之地地方十七亩屋室三之一水五之一竹九之一而岛树桥道间之初乐天既为主喜且曰虽有台无粟不能守也乃作池东粟廩又曰虽有子弟无书不能训也乃作池北书库又曰虽有宾朋无琴酒不能娛也乃作池西琴亭加石樽焉乐天罢杭州刺史时得天竺石一华亭鹤二以归始作西平桥开环池路罢苏州刺史时得太湖石白莲折腰菱青板舫以归又作中高桥通三岛迺罢刑部侍郎时有粟千斛书一车泊臧获之习箠磬弦歌者指百以归先是颍川陈孝山与酿法酒味甚佳博陵崔晦叔与琴韵甚清蜀客姜发授秋思声甚淡弘农杨贞一与青石三方长平滑可以坐卧太和三年夏乐天始得请为太子宾客分秩於洛下息躬於池上凡三任所得四人所与泊吾不才身今率为池中物矣每至池风春池月秋水香莲开之旦露清鹤唳之夕拂杨石举陈酒援崔琴弹姜秋思颓然自适不知其他酒酣琴罢又命乐童登中岛亭合奏霓裳散序声随风飘或凝或散悠扬於竹烟波月之际者久之曲未竟而乐天陶然已醉睡於石上矣睡起偶咏非诗非赋阿龟握笔因题石间视其粗成韵章命为池上篇云尔

十亩之宅五亩之园有水一池有竹千竿勿谓土狭勿谓地偏足以容膝足以息肩有堂有亭有桥有船有书有酒有歌有弦有叟在中白须飘然识分知足外无求焉如鸟择木姑务巢安如龟居坎不知海寛灵鹤怪石紫菱白莲皆吾所好尽在吾前时饮一杯或吟一篇妻孥熙熙鸡犬闲闲优哉游哉吾将终老乎其间

因继集重序

去年微之取予长庆集中诗未对答者五十七首追和之合一百一十四首寄来题为因继集卷之一【因继之解具微之前序中】今年予复以近诗五十首寄去微之不踰月依韵尽和合一百首又寄来题为因继集卷之二卷末批云更拣好者寄来盖示余勇摩砺以须我耳予不敢退舍即日又收拾新作格律共五十首寄去虽不得好且以供命夫文犹战也一鼓作气再而衰三而竭微之转战迨兹三矣即不知百胜之术多多益办耶抑又不知鼓衰气竭自此为迁延之役耶进退惟命微之微之走与足下和答之多从古未有足下虽少我六七年然俱已白头矣竟不能舍章句抛笔砚何癖习如此之甚欤而又未忘少年时心每因唱酬或相侮谑忽忽自哂况他人乎因继集卷且止於三可也忽恐足下懒发不能成就至三前言戏之者姑为巾幗之挑耳然此一战後师亦老矣宜囊弓匣刃彼此与心休息乎和晨兴一章录在别纸语尽於此亦不修书二年十月十五日乐天重序

刘白唱和集解

彭城刘梦得诗豪者也其锋森然少敢当者予不量力往往犯之夫合应者声同交争者力敌一往一复欲罢不能由是每制一篇先相视草视竟则兴作兴作则文成一二年来日寻笔砚同和赠答不觉滋多至太和三年春以前纸墨所存者凡一百三十八首其余乘兴扶醉率然口号者不在此数因命小侄龟儿编录勒成两卷仍写二本一付龟儿一授梦得小儿伧郎各令收藏附两家集予顷以元微之唱和颇多或在人口常戏微之云仆与足下二十年来为文友诗敌幸也亦不幸也吟咏情性播扬名声其适遗形其乐忘老幸也然江南士女语才子者多云元白以子之故使仆不得独步於吴越间亦不幸也今垂老复遇梦得得非重不幸耶梦得梦得文之神妙莫先於诗若妙与神则吾岂敢如梦得雪里高山头白早海中仙果子生迟沉舟侧畔千帆过病树前头万木春之句之类真谓神妙在在处处应当有灵物护之岂惟两家子侄秘藏而已已酉岁三月五日乐天解

祭中书韦相公文

维太和三年岁次己酉六月己酉朔三十日戊寅中大夫守太子宾客分司东都上柱国晋阳县开国男食邑三百户赐紫金鱼袋白居易谨以茶果之奠致祭于故中书侍郎平章事赠司空韦公德载维公忠贞大节辅弼嘉谟倚注深恩哀荣盛礼伏见册赠制中已详惟公世禄官业家行士风茂学清词冲襟宏度伏见碑志文中已详此不重书但申夙愿公佩服世教栖心空门外为君子儒内修菩萨行常接余论许追高踪元和中出守开忠二郡日公先以喻金鑪偈相问往复再三由是法要心期始相会合长庆初俱为中书舍人日寻诣普济寺宗律师所同受八戒各持十斋由是香火因缘渐相亲近及公居相位走在班行公府私家时一相见佛乘之外言不及他誓趋菩提交相度脱去年臈月胜业宅中公云必结佛缘无如愿力因自开经篋出大方广佛华严经中十愿品一通合掌焚香口读手授云自持护始传一人曾未经旬公即捐馆追思覆视似不偶然今即日於道场斋心持念一愿一力如公在前以至他生不敢废坠若与公同科第联官寮奉笑言蒙推獎穷通荣悴之感离合存歿之悲尽成虚空何足言叹今兹荐奠不设荤腥庶几降临鉴察精意噫浮生是幻真谛非空灵鹫山中既同前会兜率天上岂无後期呜呼韦君先後间耳伏惟尚飨

祭弟文

维太和二年岁次戊申十二月壬子朔三十日辛巳二十二哥居易以清酌庶羞之奠致祭于郎中二十三郎知退之灵日月不居新妇龟儿等衅酷如昨俯及岁暮奄过大祥礼制云终追号永远哀纏手足悲裂肝心痛深痛深孤苦孤苦呜呼自尔去来再周星岁前事後事两不相知今因奠设之时粗表一二吾去年春授秘书监赐紫今年春除刑部侍郎孤苦零丁又加衰疾殆无生意岂有宦情所以僂俛至今待终龟儿服制今已请长告或求分司即拟移家尽居洛下亦是夙意今方决行养病抚孤聊以终老合家除苏苏外普正通健龟儿颇有文性吾每自教诗书二三年间必堪应举阿罗日渐成长亦胜小时吾竟无儿穷独而已茶郎叔母以下并在郑滑职事依前薪薪卿娘卢八等同寄苏州免至饥冻遥怜在符离庄上亦未取归宅相得彭泽塲官各知平善骨兜竹石香钿等三人久经驱使昨大斋祥日各放从良寻收膳娘新妇看养下邳杨琳庄今年买了并造院堂已成往日亦曾商量他时身後甚要新昌西宅今亦买讫尔前後所着文章吾自检寻编次勒成二十卷题为白郎中集呜呼词意书迹无不宛然惟是?神不知去处每开一卷刀搅肺肠每读一篇血滴文字拟凭崔二十四舍人譔序他日及吾文集同付龟罗收传前年以来合家所造斋供功德皆领得否朔望晨夕飧奠复尝来无不论音容潜歿已久乃至梦寐相见全稀岂幽冥道殊莫有拘碍将精爽迁散杳无觉知不然何一去三年而茫昧若此吾今头白眼闇筋力日衰黄壤之期亦应不远但恐前後乖隔不知得见尔无下邳北村尔莹之东是吾他日归全之位神纵不合骨且相依岂恋余生愿毕此志呜呼奠筵将彻帟帟欲收此生之间岂有见日未死之际应无忘期仰天一号心骨破碎犹冀万一闻吾此言痛心痛心千万千万尚飨

祭李司徒文

维太和四年岁次戊戌七月癸酉朔十九日辛卯中大夫守太子宾客分司东都上柱国赐紫金鱼袋白居易内从表弟朝请大夫守少府监上柱国李翱谨以清酌庶羞之奠致祭于故相国兴元节度赠司徒李公惟公之生树名制节忠贞谅直天下所仰惟公之歿遭罹祸乱冤愤痛酷天下所知虽千万其言终不能尽故兹奠次但写私诚居易应进士时以鄙劣之文蒙公称獎在翰林日以拙直之道蒙公扶持公虽徇公愚则受賜或中或外或合或离契濶绸繆三十余载至於豆觴之会轩盖之游多奉光尘最承欢惠眷遇既深於常等痛愤实倍於衆情永诀奈何长恸而已翱情兼中外分辱眷知绵以岁时积成交旧敢申薄奠庶鉴微忠呜呼哀哉伏惟尚飨

祭微之文

维太和五年岁次己亥十月乙丑朔十日辛巳中大夫守河南尹上柱国晋陵县开国男食邑三百户赐紫金鱼袋白居易以清酌庶羞之奠敬祭于故相国鄂岳节度使赠尚书右仆射元相微之惟公家积善庆天鍾粹和生为国禎出为人瑞行业志略政术文华四科全才一时独步虽历将相未尽暮猷故风华但树於藩方功利不周於夷夏噫此苍生之不遇也在公岂有所不足耶诗云淑人君子胡不万年又云如可赎兮人百其身此古人哀惜贤良之悬辞也若

情理愤痛过於斯者则号呼抑郁之不暇又安可胜言哉呜呼微之贞元季年始定交分行止通塞靡所不同金石胶漆未足为喻死生契濶者三十载歌诗唱和者九百章播於人间今不复叙至於爵禄患难之际寤寐忧思之间誓心同归交感非一布在文翰今不重云唯近者公拜左丞自越过洛醉别愁泪投我二诗云君应怪我留连久我欲与君辞别难白头徒侣渐稀少明日恐君无此欢又曰自识君来三度别这回白尽老髭须恋君不去君须会知得後回相见无吟罢涕零执手而去私揣其故中心惕然及公捐馆於鄂悲讵忽至一恸之後万感交怀覆视前篇词意若此得非?兆先知之乎无以继寄悲情作哀词二首今载於是以附奠文其一云八月凉风吹白幕寝门廊下哭微之妻孥亲友来相吊唯道皇天无所知其二云文章卓犖生无敌风骨精灵歿有神哭送咸阳北原上可能随例作埃尘呜呼微之始以诗交终以诗诀弦笔而絶其今日乎呜呼微之三界之间谁不生死四海之内谁无交朋然以我尔之身为终天之别既往者已矣未死者如何呜呼微之六十衰翁灰心血泪引酒再奠抚棺一呼佛经云凡有业结无非因集与公缘会岂是偶然多生以来几离几合既有今别宁无後期公虽不归我应继往安有形去而影在皮亡而毛存者乎呜呼微之言尽於此尚殯

唐故湖州长城县令赠户部侍郎博陵崔府君神道碑铭【并序】

公讳孚字某古太岳胤也今博陵人也唐虞之际因生为姜姓暨周封齐分类曰崔氏长源远派大族清门珪组贤俊準绳济美斯崔氏所以绵千祀而甲百族也隋散骑常侍讳洽六代祖也唐冀州武强令讳绍曾祖也监察御史讳预王父也常州江陰令育皇考也公幼以门?子补太庙斋郎初调授汝州叶县尉再调改宋州单父尉时天宝末盗起燕蓟毒流梁宋屠城杀吏如火燎原单父之民将坠涂炭公感激奋发仗顺兴兵挫败贼徒保全乡县拳勇之旅归之如云方欲纠合貔虎毆诛蛇豕京观羣盗金汤一方本道节度使奇之将议上间会有同事者争功陰相倾夺公超然脱屣遂以族行东游江淮安时侯命属吴王出合领镇求才抚人常闻公名试以吏事遂表请为宋城尉事举移假涟水令赏绯鱼袋县政修转常州録事参军纠察课赋浙东采访使闻之奏授越州余姚令吏畏人悦岁未满浙西采访使知之奏改湖州长城令长城之理又加於前二邑焉政成秩满解印罢去优游自得独善其身兴元元年疾歿於宋太和五年迁葬於洛享年若干诏赠尚书户部侍郎夫人陇西李氏追封岐国夫人皆从子贵也公为人仪表魁梧气概倜傥负不羈之才慕非常之功始发轫於单父志立而功不就终税驾於长城道行而位不达善庆所积实生司空司空讳弘礼公之幼子也以学发身以文饰吏以干蛊克家以忠壮许国典十郡领二镇再厘东土追命上公虽天与之位亦由公义方之训辅而成焉大丈夫贮蓄财术树置功利鎡鋸富贵焯燿邦家不当其身而得於後父析子荷相去几何呜呼崔公何不足之有按国典官五品以上墓庙得立碑又按丧葬令凡诸赠官得同正官之制其孙彦防彦佐等奉父命述祖德揭石于墓勒铭于碑铭曰

天无全功贤无全福既享天爵难兼世禄矫矫崔公道积厥躬大志长畧卷于怀中黄绶遏寇思奋奇功铜印字人躬行古风才高位下步濶途穷竟戢羽翮不展心胸天道有知善积庆终昭哉报施其在司空

大唐泗洲开元寺临坛律德徐泗濠三州僧正明远大师塔碑铭【并序】

婆娑世界中有释迦如来出为上首如来灭後像法中或罗汉僧或菩萨僧在在处处出为上首佛道未丧间生其人故泗州开元寺临坛律德大师实一方上首也大师醮郡鄆人世姓?氏僧号明远七岁依本郡需禅师出家十九从泗洲灵穆律师受具戒五夏通四分律俱舍论乃升讲座乃登戒坛元和元年衆请充当寺上座明年官补为本州僧正统十二部开元寺北地二百步作讲堂七间僧院六所又淮泗间地卑多雨潦岁有水害师与郡守苏遇等谋於沙湖西隙地创避水僧坊建门廊厅堂厨厩二百间植松杉楠桧桧一万本由是僧与民无垫溺患旋属灾焚本寺寺殍像灭僧溃者数年师与徐州节度使王侍中有缘【侍中名智兴】遂合愿叶力再造寺宇乃请师为三郡僧正奏乞连置戒坛因其施利廓其规度侍中又以家财万计助而成之自殿阁堂亭廊庖廩藏泊僧徒臧获佣保马牛之舍凡二千若干百十间其中像设之仪器用之具一无阙者长庆五年春作太和元年秋成轮奂庄严星环綦布如自地踊若从天降供施无虚日钟梵有常声四衆知归万人改观於是增上慢者起敬种善根者发心利喜饶益巨能具举若非大师於福智僧中而得第一若非侍中於敬信人中亦为第一则安能大作佛事而中兴像教者乎故如来所谓我灭後我法传授於弟子嘱於大臣斯言信矣师以太和八年十二月十九日斋时终於本寺本院是月二十九日道俗衆万辈恭敬悲泣备涅槃威仪迁全身归于湖西塲塔遵本教而奉先志也报年七十僧腊五十有一始出家乞于迁化志业行愿道力化缘引而伸之随日广大前後临戒坛者八登律座者十有五僧尼得度者三万衆江淮行化者四十年或疑是人如来所使罗汉菩萨吾焉知之初大师以功德为心既成而化侍中以撰録见托未就而薨今按弟子僧僧亮元素行状序而铭之呜呼所以满大师之愿终侍中之志也铭曰

平地踊塔多宝示现险路化城导师方便翳我大师亦有大愿像法是弘塔庙是建佛人交接两得相见法有毗尼象有僧尼承教於佛得度於师宣传戒藏振起律尼四十余载勤而行之福德如空不可思议缘合而来功成而去知性不动色身无住示有迁化非实灭度表塔勒铭门人恋慕

东都十律大德长圣善寺鉢塔院主智如和尚茶毗幢记

浮图教有茶毗威仪事具涅槃经阇罗尼门有佛顶呪功德事具尊胜经经文甚详此记不载今但载大师僧行佛事兴建幢义趣而已大师姓吉号智如绦郡正平人自孩及童不饮酒不茹葷不食肉不儿戏年十二授经於僧皎二十二受具戒於僧晤学四分律於昙【徒含切】濬律师通楞伽思益心要於法凝大师贞元中寺举省选累补昭成敬爱等五寺开法临坛大德由是行寢高名寢重僧尼辈请以圣善寺勅置法宝严持院处之居十年而法供无虚日律讲无虚月使疑者信堕者勤增上慢者退僧风骤变佛事勃兴实我师传授诱诲之力也太和八年十二月二十三日终於本院报年八十六僧夏六十五明年正月十五日合都城道俗万数具涅槃仪移窆於龙门祖师塔陂又明年某月某日用闍维法迁附于奉先寺祖师塔西而建幢焉噫大师自出家至即世前後讲毗尼三十会度苾【覓笔切】芻百千人乘律登坛施法行化者五十五载而身相长大面相端严心不放逸口无戏论四部瞻仰敬而畏之矧又以直心坐道场以密行传法藏为东王城十大德首为南赡部八关戒师名冠万僧利及百衆所谓提智慧剑破烦恼贼挝【庄加切】无畏鼓降内外魔凜乎佛庭之直臣郁乎僧坛之大将

者也初师之将迁化也无病无恼宴坐斋心领一童诣诸寺遇像致敬逢僧与游口虽不言心若默别後数日而化识者异之及临尽灭也告弟子言我歿後当依本院先师遗法勿塔勿坟唯造佛项尊胜陀罗尼经一幢置吾茶毗之所吾形之化吾愿常在愿依幢之尘之影利益一切衆生吾愿足矣今院主上首弟子振公洎传法受遗侍者弟子某等若干人合力建幢以毕师志振辈以居易辱为是院门徒者有年矣又十年以还蒙师授八关斋戒见托为记附于真言盖欲以奉本教而满先愿寻往因而集来果也欲重宣此义以一偈赞之偈云

幢功德甚大师行愿甚深孰见如是幢不发菩提心

白氏长庆集卷六十九

卷七十

钦定四库全书

白氏长庆集卷七十

唐白居易撰

铭志赞序祭文记辞传【凡十八首】

酒功赞【并序】

晋建威将军刘伯伦嗜酒有酒德颂传於世唐太子宾客白乐天亦嗜酒作酒功赞以继之其词云

麦麴之英米泉之精作合为酒孕和产灵孕和者何浊醪一樽霜天雪夜变寒为温产灵者何清醕一酌离人迁客转忧为乐纳诸喉舌之内淳淳泄泄醅【他礼切】醕【洪孤切】沆【何党切】漉【何戒切】沃诸心胷之中熙熙融融膏泽和风百虑齐息时乃之德万缘皆空时乃之功吾尝终日不食终夜不寝以思无益不如且饮

唐故武昌军节度处置等使正议大夫检校户部尚书鄂州刺史兼御史大夫赐紫金鱼袋尚书右仆射河南元公墓志铭【并序】

公讳稹字微之河南人六代祖岩隋兵部尚书封昌平公五代祖弘隋北平太守高祖义端魏州刺史曾祖延景岐州参军祖讳悱南顿县丞赠兵部员外考讳宽比部郎中舒王府长史赠尚书右仆射妣荥阳郑氏追封陈留郡太夫人公即仆射府君第四子後魏昭成皇帝十五代孙也公受天地粹灵生而岐然孩而嶷然九岁能属文十五明经及第二十四试判入四等署秘省校书二十八应制策入三等拜左拾遗即日献教本书数月闲上封事六七宪宗召对言及时政执政者疑忌出公为河南尉丁陈留太夫人忧哀毁过礼杖不能起服除之明日授监察御史使平蜀按任敬仲犹得情又劾奏东川帅违诏条过籍税又奏平涂山甫等八十八家冤事名动三川三川人慕之其後多以公姓字名其子朝廷病东诸侯不奉法东御史府不治事命公分台而董之时有河南尉离局从军职尹不能止监察使死其柩乘传入邮邮吏不敢诘内园司械系人踰年登府不得知飞龙使匿赵氏亡命奴为养子主不敢言浙右帅封杖杖安吉令至死子不敢愬凡此者数十事或奏或劾或移岁余皆举正之内外权宠臣无奈何咸不快意会河南尹有不如法事公引故事奏而摄之甚急先是不快者乘其便相噪噉坐公专逞作威黜为江陵士曹掾居四年徙通州司马又四年移虢州长史长庆初穆宗嗣位旧闻公名以膳部员外郎徵用既至转祠部郎中赐绯鱼袋知制诰制诰王言也近代相沿多失於巧

俗自公下笔俗一变至於雅三变至於典谟时谓得上嘉之数召与语知其有辅弼才擢授中书舍人赐紫金鱼袋翰林学士承旨寻拜工部侍郎旋守本官同中书门下平章事公既得位方将行已志答君知无何有憊人以飞语构同位诏下按验无状上知其诬全大体与同位两罢之出为同州刺史始至急吏缓民省事节用岁收羡财千万以补亡户逋租其余因弊制事贍上利下者甚多二年改御史大夫浙东观察使将去同同之耆幼鰥独泣恋如别慈父母遮道不可通诏使导呵挥鞭有见血者路辟而後得行先是明州岁进海物其淡蚶【呼甘切】非礼之味尤速坏课其程日驰数百里公至越未下车趋奏罢自越抵京师邮夫获息肩者万计道路歌舞之明年辨沃瘠察贫富均劳逸以定税籍越人便之无流庸无逋赋又明年命吏课七郡人各筑陂塘春贮水雨夏溉旱苗农人赖之无饿殍在越八载政成课高上知之就加礼部尚书降玺书慰谕之示旌宠又以尚书左丞徵还旋改户部尚书鄂岳节度使在鄂三载其政如越太和五年七月二十二日遇暴疾一日薨于位春秋五十三上闻之轸悼不视朝赠尚书右仆射加赠焉前夫人京兆韦氏懿淑有闻无禄早世生一女曰保子适校书郎韦绚今夫人河东裴氏贤明知礼有辅佐君子之劳封河东郡君生三女曰小迎未笄道卫道扶韶【田聊切】龀【初谨切】一子曰道护三岁仲兄司农少卿积侄御史台主簿某等衔哀襄事裴夫人韦氏长女暨诸孤等号护廕【慈良切】嬖【即涉切】以六年七月十二日祔葬於咸阳县奉贤乡洪渎原从先宅兆也公着文一百卷题为元氏长庆集又集古今刑政之书三百卷号类集并行於代公凡为文无不臻极尤工诗在翰林时穆宗前後索诗数百篇命左右讽咏宫中呼为元才子自六宫两都八方至南蛮东夷国皆写传之每一章一句出无脛而走疾于珠玉又观其述作编纂之旨岂止於文章刀笔哉实有心在于安人治国致君尧舜致身伊皋耳抑天不与耶将人不幸耶予尝悲公始以直躬律人勤而行之则坎壈而不偶谪瘴乡凡十年发斑白而归来次以权道济世变而通之又齟齬而不安居相位仅三月席不煖而罢去通介进退卒不获心是以法理之用止于举一职不布于庶官仁义之泽止于惠一方不周于四海故公之心不足也逢时与不逢时同得位与不得位富贵与浮云同何者时行而道未行身遇而心不遇也执友居易独知其心以泣濡翰书铭于墓曰呜呼微之年过知命不谓之夭位兼将相不谓之少然未康吾民未尽吾道在公之心则为不了嗟乎哉道广而俗隘时矣夫心长而运短命矣夫呜呼微之已矣夫唐故虢州刺史赠礼部尚书崔公墓志铭

唐有通四科达三教者曰惟崔公公讳玄亮字晦叔其先出於炎帝至裔孙穆伯受封于崔因而命氏汉初始分为清河博陵二祖故其後称博陵人曾祖悦洛州司户参军赠太子少保祖光迪赠赞善大夫考杭扬州司马兼通事舍人赠太子少师妣太原王氏赠晋阳郡太夫人公即少师季子解褐补秘书省校书郎宣越二府奏授协律郎大理评事朝廷知其才徵授监察转殿中历侍御史膳部驾部员外郎洛阳令密州刺史公既至密密民之冻馁者赈恤之疾疫者救疗之胔骼【各额切】未殓者命葬藏之男女过时者趋【读曰促】嫁娶之三月而政立二年而化行密人悦之发于謡咏换歙州刺史其政如密先是歙民畜马牛而生驹犊者官书其数吏缘为奸公既下车尽焚其籍孳息货易一无所问先是歙民居山险而输税米者担负跋涉勤苦不支公许其计斛纳缗贱入贵出官且获利人皆忘劳农人便之归如流水朝廷闻其政徵拜刑部郎中谢病不就俄改湖州刺史政如密歙加之以聚羡财而代逋租则人不困谨茶法以防黠吏则人不苦修堤塘以备旱岁则人不饥罢氓赖之如依父母入为秘书少监改曹州刺史兼御史中丞谢病不就拜太常少卿迁谏议大夫屡上封章言行职举上召对

加金紫以獎之假貂蟬以寵之未几朝有大狱人心惴骇势连中外衆以为冤百辟在廷无敢言者公独进及溜【力救切】危言触鳞天威赫然连叱不去遂置笏伏陛极言是非血泪盈襟词竟不屈上意稍悟容而听之卒使罪疑惟轻实公之力既而真拜因旌忠臣由是正气直声震耀朝右搢绅者贺皆曰国有人焉国有人焉公以为名不可多取退不必待年决就长告径遵归路朝廷不得已已在途拜太子宾客分司东都公济源有田洛下有宅劝海子弟招邀宾朋以山水琴酒自娱有终焉之志无何又除虢州刺史盖执政者惜其去将欲驯?而复用之太和七年七月十一日遇疾薨于虢州廨舍天子废朝一日赠礼部尚书周行士林闻者相吊宗族交友靡不出涕遗直遗爱公兼有焉呜呼公之将终也遗诫诸子其书大畧云吾年六十六不为无壽官至三品不为不达死生定分何足过哀自天宝已还山东士人皆改葬两京利於便近唯吾一族至今不迁我歿宜归全于濫【扶古切】阳先茔正首邱之义也送终之事务从俭薄保家之道无忘孝悌吾玉磬琴留别乐天请为墓志云尔夫人范阳卢氏先公而歿有子九人长曰煜【於云切】通事舍人次曰刍言罕言举进士次曰缓中牟尉其下皆幼稚煜等哀毁孝敬号护輻【乳充切】嚬【即涉切】以九年四月二十八日用大葬之礼归窆于磁州昭义县磁邑乡北原迁卢夫人而合祔焉遵理命也公之丁少师忧也退居高邮其地卑湿泣血卧苦者三载因病痺其两股焉逮于终身竟不能趋拜从祖弟仁亮窜谪巴南歿而後归公先命长男煜护丧归葬後命幼子听继絶承祧自宗族及朋执间有死无所归孤无所依者公或葬之祭之或衣之食之或?之嫁之侯齐二家之类是也故闺门称其孝羣从仰其仁交游服其义可不谓德行乎公幼嗜学长善属文以词赋举进士登甲科以书判调天官入上等前後文集凡若干卷尤工五言七言诗警策之篇多在人口其余着述作者许之可不谓文学乎公之典密歛湖也理化如彼可不谓政事乎居大諫骑省也忠谏如此可不谓言语乎公夙慕黄老之术斋心受籙伏气链形暑不流汗冬不挟纊肤体顔色冰清玉温未识者望之如神仙中人也湖三岁修三元道斋辄有彩云灵鹤回翔坛上久之而去前後致斋七八而鹤来仪者凡三百六十其内修外感也如此可不谓通於大道乎公之晚年又师六祖以无相为心地以不二为法門每遇僧徒辄论真谛虽耆年宿德皆心伏之及易簀之夕大怖将至如入三昧恬然自安仍於遗疏之末手笔题云暂荣暂悴敲石火即空即色眼生花许时为客今归去大历元年是我家解空得证也又如此可不谓达于佛性乎总而言之故曰通四科达三教者也居易不佞辱与公游者三十余年年老分深定为执友况奉遗札托为斯文且慙鄙陋不敢辞让铭曰

濫山之阳鼓山之下吉日吉土载封载树呜呼博陵崔君之墓

唐故溧水县令太原白府君墓志铭【并序】

公讳季康字某太原人秦武安君起之裔胄北齐五兵尚书建之五代孙也曾祖讳士通皇朝利州都督祖讳志善尚衣奉御父讳鑄【离珍切】扬州录事参军公即录事府君次子历华州下邳尉怀州河内丞徐州彭城令江州浔阳令宿州虹县令宣州溧水令没于官舍明年某月某日归葬于华州下邳县某乡某原享年若干呜呼公为人温恭信厚为官贞白严重友于兄弟慈于子侄乡党推其行交游让其才自尉下邳至宰溧水皆以洁廉通济见知郡守流誉於朋寮才不偶时道屈於位而徒劳於州县竟不致于青云命矣夫哀哉公前夫人河东薛氏

先公若干年而没生二子一女女号鉴虚未笄出家长子某杭州於潜尉次子某睦州遂安尉後夫人高阳敬氏父讳某某官生一子二女女皆早夭子曰敏中进士出身前试大理评事历河东郑滑邠宁三府掌记夫人在室以孝敬奉亲为淑女既嫁以柔和从夫为顺妇及主家以慈正训子为贤母故敏中遵其教饬其身升名甲科历聘公府以文行称於衆以禄养荣於亲虽自有兼才然亦由夫人训导之所致也夫人以太和七年正月某日寢疾终于下邳别墅享年若干明年某月某日啓漂水府君薛夫人宅兆而合祔焉礼也时诸子尽歿独敏中号泣襄事托从祖兄居易铭于墓石铭曰

繫我叔父漂水府君治本於家事施政於县民繫我叔母高阳夫人德修於室家庆积於闺门训着趋庭善彰卜邻故其嗣子休有令闻

序洛诗

序洛诗白乐天自序在洛之乐也予历览古今歌咏自风骚之後苏李以还【李陵苏武始为五言诗】次及鲍谢徒迄于李杜辈其间词人闻知者累百诗章流传者钜万观其所自多因谗冤谴逐征戍行旅冻馁病老存歿别离情发於中文行於外故愤忧怨伤之作通计今古什八九焉世所谓文士多数奇诗人尤命薄於斯见矣又有以知理安之世少离乱之时多亦明矣予不佞喜文嗜诗自幼及老着诗数千首以其多矣故章句在人口姓氏落诗流虽才不逮古人然所作不啻数千首以其多矣作一数奇命薄之士亦有余矣今壽过耳顺幸无病苦官至三品免罹饥寒此一乐也太和二年诏授刑部侍郎明年病免归洛旋授太子宾客分司东都居二年就领河南尹事又三年病免归履道里第再授宾客分司自三年春至八年夏在洛凡五周岁作诗四百三十二首除丧明哭子十数篇外其他皆寄怀於酒或取意於琴闲适有余酣乐不暇苦词无一字忧叹无一声岂牵强所能致耶盖亦发中而形外耳斯乐也实本之於省分知足济之以家给身闲文之以觴咏弦歌饰之以山水风月此而不适何往而适哉兹又以重吾乐也予尝云治世之音安以乐闲居之诗泰以适苟非理世安得闲居故集洛诗别为序引不独记东都履道里有闲居泰适之叟亦欲知皇唐太和岁有理世安乐之音集而序之以俟夫采诗者甲寅岁七月十日云尔

画弥勒上生幀【侧进切】赞【并序】

南赡部州大唐国东都城长壽寺大苾刍道嵩存一惠【阙】等六十人与优婆塞士良惟俭等八十人以太和八年夏受八戒修十善设法供舍净财画兜率陀天宫弥勒上生内衆一铺眷属围绕相好庄严於是嵩等曲躬合拳焚香作礼发大誓愿愿生内宫劫劫生生亲近供养按本经云可以除九十九亿劫生死之罪也有弥勒弟子乐天同生愿遇是缘尔时稽首当来下生慈氏世尊足下致敬无量而说赞曰

百四十心合为一诚百四十口发同一声仰慈氏名愿我来世一时上生

绣西方幀赞【并序】

西方阿弥陀佛与阎浮提有愿此土衆生与彼佛有缘故受一切苦者先念我名祈一切福者多图我像至於应诚来感随愿往生神速变通与三世十方诸佛不侔噫佛无若干而愿与缘有若干也有女弟子弘农郡君姓杨号莲花性发弘愿舍淨财绣西方阿弥陀佛像及本国土眷属一部奉为故李氏长姊杨夫人灭宿殃追冥佑也夫范铜设绘不若刺绣文之精勤也想形念号不若覩相好之亲近也即造之者诚不得不着感不得不通受之者罪不得不灭福不得不集尔时莲花性焚香合掌跪唱赞云

金方刹金色身资圣力福幽?造者谁弘农君受者谁杨夫人

祭崔相公文

维太和六年岁次壬子十月庚申朔二十四日癸未中大夫守河南尹上柱国晋阳县开国男食邑三百户赐紫金鱼袋白居易谨以清酌庶羞之奠敬祭于故相国吏部尚书赠司空崔公敦诗惟公德望事业识度操履为时而生作国之纪岩廊匡辅藩部政治父母黎元股肱天子斯皆谈在人口播於人耳今所叙者眷知而已呜呼自古及今实重知音故诗美伐木易称断金始愚与公同入翰林因官识面因事知心献纳合章对扬联襟以忠相勉以义相箴朝案同食夜牀并衾绸缪五年情与时深及公登庸累分阃镇愚亦去国出领符印徐宣远部忠杭遐郡鴈去寄书潮来传信无由会合祇望音问未卜後期但敦前分余太和之初连徵归朝公长夏司愚贰秋曹玉德弥温松心不凋南宫多暇屡接游遨竹寺雪夜杏园花朝杜曲春晚潘亭月高前对青山後携浊醪微之梦得慕巢师皋或徵雅言酣咏陶陶或命俗乐丝管嘈嘈藉草?松枕麴舖糟曾未周岁索然分鑣【卑遥切】公又授钺南抚荆蛮报政入覲复总天官愚因谢病东归涧瀍方从四皓旅守三川时蒙问讯日奉周旋岂无要约良有由缘洛城东隅履道西偏修篁回合流水潺湲与公居第门巷相连与公齿发甲子同年两心相期三径之间优游携手而终老焉呜呼易失者时难忱者天既夺我志又歼我贤邱园未归馆舍先捐百身莫赎一梦不还郁郁佳城茫茫九原凄凄箫鼓惨淡风烟祖奠迟迟泣涕涟涟平生亲友罗拜柩前贤人已矣天地苍然呜呼哀哉敦诗尚飨

祭崔常侍文

维太和元年岁次乙卯二月丙午朔七日壬子中大夫守太子宾客分司东都上柱国赐紫金鱼袋白居易谨以清酌庶羞之奠敬祭于故秘书监赠礼部尚书崔公惟公之世禄家行文华政事播於时论此不复云今但叙旧好写衷诚而已呜呼居易弟兄与公伯仲前後科第同登者四五属为僚友三十余年又膳部房与公同声尘之游定胶漆之分两家不幸十年以来哀壘所鍾零落殆尽我老君病惟余二人天不憖【鱼覲切】遗公又即世不登大位不享永年夙志莫伸幽愤何极居易方属疾恙不遂执紼遣侄阿龟往展情礼此如不祭永痛奈何呜呼重易平生知我寝门一恸可得而闻乎呜呼重易平生嗜酒奠筵一酌可得而歆乎呜呼哀哉伏惟尚飨

磐石铭【并序】

太和九年夏有山客贈余磐石轉寘于履道里第時屬炎暑坐卧其上愛而銘之云尔

客从山來遺我磐石圓平膩滑廣袤六尺質凝云白文拆烟碧莓苔有斑麋鹿其迹置之竹下
風扫露滴坐待禪僧眠留醉客清冷可愛支體甚适便是白家夏天床席

東林寺白氏文集記

昔余為江州司馬時常與廬山長老於東林寺經藏中披閱遠大師與諸文士唱和集卷時諸
長老請予文集亦置經藏唯然心許他日致之迨茲余二十年矣今余前後所着文大小合二
千九百六十四首勒成六十卷編次既畢納于藏中且欲與二林結他生之緣復曩歲之志也
故自忘其鄙拙焉仍請本寺長老及主藏僧依遠公文集例不借外客不出寺門幸甚太和九
年夏太子賓客晉陽縣開國男太原白居易樂天記

聖善寺白氏文集記

中大夫守太子少傅馮翊縣開國侯上柱國賜紫金魚袋太原白居易字樂天與東都聖善寺
鉢塔院故長老如滿大師有齋戒之因與今長老振大士為香火之社樂天曰吾老矣將尋前
好且結後緣故以斯文寘於是院其集也帙六十五卷凡三千二百五十五首【元相公先作
集序并目錄一卷在外】題為白氏文集納于律疏庫樓仍請不出院門不借官客有好事者
任就觀之開成元年五月十三日樂天記

看題文集石記因成四韻以美之

中散大夫守河南尹賜紫金魚袋李紳

寄玉蓮花藏緘珠貝叶扃院閑容客讀講倦許僧听部列雕金榜題存刻石銘永添鴻寶集莫
雜小乘經唐銀青光祿大夫太子少保安定皇甫公墓志銘【并序】

公姓皇甫諱鏞【以中切】字𪚗【戶戈切】卿始封祖微子也周克殷封于宋九代至戴公
戴公之子曰皇父因字命族為皇父氏至秦徙茂林改父為甫及漢遷安定期那其後為朝那
人五代祖珍義資建二州刺史曾祖文房高陵令祖鄰几賜汝州刺史考愉累贈尚書左仆射
太子太保妣洛陽賈氏贈姑臧郡太夫人公由進士出身補夏陽主簿試左武衛兵曹充宣歙
觀察推官轉大理評事詔徵授監察御史改秘書郎殿中侍御史內供奉始賜朱紱銀印充鳳
翔節度判官營田副使旋又徵還真拜殿內改比部員外郎河南令都官郎中河南少尹歷太
子左右庶子并分司東都俄又徵拜國子祭酒未几謝疾改太子賓客轉秘書監分司又就拜
檢校左散騎常侍兼太子賓客轉秘書監分司始加命服正三品又遷太子少保分司封安定
縣開國男食邑三百戶始立家廟享三世公先娶博陵崔氏後娶范陽盧氏二夫人皆有淑德
先公而歿有二子曰璲【居影切】曰珣【余招切】一女適太原王諲【伊真切】以開成
元年七月十日寢疾薨于東都宣教里第享年七十七皇帝廢朝一日是歲十月三日用大葬

之礼归全于河陰县广武原从太保府君先茔以卢夫人合祔焉公自将仕郎累阶至银青光禄大夫自武骑尉累勲至上柱国自布衣而佩服金紫自旅食而庙飨祖考封爵被乎身褒赠及乎先官品?乎後大其门肥其家儒者之荣无阙焉皆求已稽古之力自致耳公为人器宇甚宏衣冠甚伟寡言正色人望而敬之至於燕游觴咏之间则其貌温然如春其心油然如云也初元和中公始因郎官分司东洛由是得伊嵩趣嚮吏隐心故前後历官八九凡二十有五年优游洛中笑哂无意得丧穷达与道始终澹然不动其心以至于考终命闻者慕之谓为达人当宪宗朝公之仲居相位操利权也从而附离者有之公独超然虽贵介之势不能及及仲之失宠得罪也从而缘坐者有之公独皦【吉了切】然虽骨肉之亲不能累识者心伏号为伟人公好学善属文尤工五言七言诗有集十八卷又着性言十四篇居易辱与公游迨二纪矣自左右庶子历宾客讫于少保傅皆同官东朝分务东周在寮友间闻知最熟故得以实录志而铭曰

贤哉少保令闻令仪金璧其操鸾凰其姿德如斯壽如斯位如斯呜呼人爵天爵实兼有之广武之原大河之湄龟告筮从吉土良时封于兹树于兹呜呼少保之墓百代可知

唐故银青光禄大夫秘书监曲江县开国伯赠礼部尚书范阳张公墓志铭【并序】

公讳仲芳字靖之其先范阳人晋司空茂先之後永嘉南迁始徙居于韶之曲江县後嗣因家焉唐朝赠太常卿讳弘愈公之曾祖也岭南节度使广州刺史殿中监讳九皋公之王父也赠尚书右仆射讳抗公之皇考也赠颍川郡夫人陈氏公之皇妣也都昌令仲端以下四人公之兄也监察御史仲孚以下二人公之弟也博陵郡夫人崔氏公之夫人也右清道率府曹曹景宣进士茂玄明经智周公之子也监察御史里行杨灝校书郎陆宾虞公之壻也公即仆射府君第五子贞元中进士举及第博学选登科补集贤院校书郎丁内忧丧除复补正字选授咸阳尉鄜坊节度使辟为判官奏授监察御史里行俄而真拜历殿中转侍御史仓部员外郎金州刺史度支郎中驳宰相事议出为遂州司马移复州司马俄迁刺史改曹州刺史河南少尹郑州刺史入为谏议大夫福建观察使兼御史中丞徵还为太子宾客再为左散骑常侍京兆尹华州刺史兼御史大夫秘书监勲至上柱国阶至银青光禄大夫封至曲江县开国伯食邑七百户开成二年四月某日薨于上都新昌里第诏赠礼部尚书以某年八月某日归葬于河南府某县某乡某村仆射府君之封域焉公幼好学长善属文俯取科第如拾地芥着文集三十卷藏於家纂制诏一百卷行於代尤工五言章句诗家流称之尝譔先仆射府君神道碑及丞相文献始兴公庙碑由文得礼秉笔者许之文献始兴公九龄即公之伯祖开元中以儒学诗赋独步一时及辅弼明皇帝号为贤相余庆济美宜在于公公治其业袭其文而不嗣其位惜哉况公为人温良冲淡恬然有君子德立朝直清贞谅肃然有正人风在官宽重易简绰然有长吏体为子弟孝敬为伯父慈和与朋友信宠辱不惊其心喜愠不形於色入仕四十载历官二十五享年七十二才如是禄如是壽如是宜哉居易与公少同官老同游结交慕德久而弥笃故景宣等以论譔先德见托为文式序且铭勒于墓石铭曰

在唐张氏世为儒宗文献既没郁生我公我公颯颯【符中切】学奥词雄缘情体物有文献风庆集于家道积厥躬骏足逸翮天骥冥鸿始自筮仕迄于达官六刺藩部再珥貂蝉大谏选

重尹京才难宾于望苑宠在蓬山凡所践历皆有可观终然允臧已矣归全呜呼洛郊北阡邙阜西原佳城一闭陵谷推迁所不泯者令名蔼然

齿落辞【并序】

开成二年予春秋六十六瘠黑衰白老状具矣而双齿又堕慨然感叹者久之因为齿落辞以自广其辞曰嗟嗟乎双齿自吾有之而俾尔嚼肉咀蔬衔盃漱水丰吾肤革滋吾骨髓从幼逮老勤亦至矣幸有辅车非无断【鱼巾切】齟【逆各切】胡然舍我一旦双落齿虽无情吾岂无情老与齿别齿随涕零我老日来尔去不回嗟嗟乎双齿孰谓而来哉孰谓而去哉齿不能言请以意宣为口中之物忽乎六十余年昔君之壮也血刚齿坚今君之老矣血衰齿寒辅车断齟日削月朘上参差而下 曾何足以少安噫君其听哉女长辞姥【莫补切】臣老辞主发衰辞头叶衰辞树物无细大功成者去君何嗟嗟独不闻诸道经我身非我有也盖天地之委形君何嗟嗟又不闻诸佛说是身如浮云须臾变灭由是而言君何有焉所宜委百骸而顺万化胡为乎嗟嗟於一牙一齿之间吾应曰吾过矣尔之言然

醉吟先生传

醉吟先生者忘其姓字乡里官爵忽忽不知吾为谁也宦游三十载将老退居洛下所居有池五六亩竹数千竿乔木数十株台榭舟桥具体而微先生安焉家虽贫不至寒馁年虽老未及耄性嗜酒耽琴淫诗凡酒徒琴侣诗客多与之游游之外栖心释氏通学小中大乘法与嵩山僧如满为空门友平泉客韦楚为山水友彭城刘梦得为诗友安定皇甫朗之为酒友每一相见欣然忘归洛城内外六七十里间凡观寺邱墅有泉石花竹者靡不游人家有美酒鸣琴者靡不过有图书歌舞者靡不观自居守洛川韦布衣家以宴游召者亦时时往每良辰美景或雪朝月夕好事者相过必为之先拂酒罍次开篋诗酒既酣乃自援琴操宫声弄秋思一遍若兴发命家僮调法部丝竹合奏霓裳羽衣一曲若欢甚又命小妓歌杨柳枝新词十数章放情自娱酩酊而后已往往乘兴履及邻杖於乡骑游都邑肩舁【云俱切】适野舁中置一琴一枕陶谢诗数卷舁竿左右悬双酒壶寻水望山率情便去抱琴引酌兴尽而返如此者凡十年其间日赋诗约千余首岁酿酒约数百斛而十年前後赋酿者不与焉妻孥弟侄虑其过也或讥之不应至於再三乃曰凡人之性鲜得中必有所偏好吾非中者也设不幸吾好利而货殖焉以至於多藏润屋贾祸危身奈吾何设不幸吾好博奕一掷数万倾财破产以致于妻子冻馁奈吾何设不幸吾好药损衣削食链铅烧汞【胡孔切】以至於无所成有所误奈吾何今吾幸不好彼而自适于杯觞讽咏之间放则放矣庸何伤乎不犹愈於好彼三者乎此刘伯伦所以闻妇言而不听王无功所以游醉乡而不还也遂率子弟入酒房环酿瓮箕踞仰面长吁太息曰吾生天地间才与行不逮於古人远矣而富於黔娄壽於顏渊饱於伯夷乐於荣啓期健于卫叔宝幸甚幸甚余何求哉若舍吾所好何以送老因自吟咏怀诗云抱琴荣啓乐纵酒刘伶达放眼看青山任头生白发不知天地内更得几年活从此到终身尽为闲日月吟罢自晒揭瓮拔醕又引数杯兀然而醉既而醉复醒醒复吟吟复饮饮复醉醉吟相仍若循环然繇是得以梦身世云富贵幕席天地瞬息百年陶陶然昏昏然不知老之将至古所谓得全於酒者故自号为醉吟先生于时开成三年先生之齿六十有七须尽白发半秃齿双缺而觴咏之

兴犹未衰顾谓妻子云今之前吾适矣今之後吾不自知其兴何如

苏州南禅院千佛堂转轮经藏石记

千佛堂转轮经藏者先是郡太守居易发心蜀沙门清闲矢谟吴僧常敬弘正神益等偈功商主邓子成梁华等施财院僧法弘惠满元惠雅等藏事太和二年秋作开成元年春成堂之费计缗万藏与经之费计缗三千六百堂之中上盖下藏盖之间轮九层佛千龕彩绘金碧以为饰环盖悬镜六十有二藏八面面二门丹漆铜锴【居谐切】以为固环藏敷座六十有四藏之内转以轮止以梃经函二百五十有六经卷五千五十有八【南阎浮提内大小乘经凡八万四千卷按唐开元经录名数与此经藏同於阎浮大数二千之一也】藏成经具之明年苏之缙白徒聚谋曰今功德如是其尸之宜请有福智僧越之妙喜寺长老元遂禅师为之主宜请初发心人前本郡守白少傅为之记金曰然师既来教行如流僧至如归供施达嚬【初覬切】随日而集堂有美食路无饥僧游者学者得以安给惠利饶益不可思量师又曰与苾刍衆升堂焚香合十指礼千佛然後啓藏发函鸣鞞椎唱伽陀授持读讽十二部经经声洋洋充满虚空上下近远有情识者法音所及无不蒙福法力所摄鲜不归心佻然巽风一变至道所得功德不自觉知由是而言是堂是经是藏之用信有以表旌觉路也脂辖法轮也示火宅长者子之便门也开毛道凡夫生之大窰也亶其然乎又明年院之僧徒三诣雒都请予为记夫记者不惟记年月述作焉亦在乎辨兴废示劝诫也我释迦如来有言一切佛及一切法皆从经出然则法依於经经依於藏藏依於堂若堂坏则藏废藏废则经坠经坠则法隐法隐则无上之道几乎息矣呜呼凡我国土宰官支提上首暨摩摩帝辈得不奉而护念之乎得不保持而增修之乎经有缺必补藏有隙必葺堂有坏必支若然者真佛弟子得福无量反是者非佛弟子得罪如律开成二年二月一日记

苏州南禅院白氏文集记

唐冯翊县开国侯太原白居易字乐天有文集七袞合六十七卷凡三千四百八十七首其间根源五常枝派六义恢王教而弘佛道者多矣然寓兴放言缘情绮语者亦往往有之乐天佛弟子也备闻圣教深信因果惧结来业悟知前非故其集家藏之外别录三本一本寘于东都圣善寺鉢塔院律库中一本寘于庐山东林寺经藏中一本寘于苏州南禅院千佛堂内夫惟悉索弊文归依三藏者其意云何且有本愿愿以今生世俗文字放言绮语之因转为将来世世讚佛乘转法轮之缘也三宝在上实闻斯言开成四年二月二日乐天记

白氏长庆集卷七十

卷七十一

钦定四库全书

白氏长庆集卷七十一

唐白居易撰

碑记铭吟偈【凡九首】

淮南节度使检校尚书右仆射赵郡李公家庙碑铭【并序】

王建侯侯建庙庙有器器有铭所以论譔先德明着後代或书于鼎或文于碑古今之通制也维开成某年某月某日宣武军节度使检校尚书右仆射汴州刺史上柱国赐紫金鱼袋赵郡李公斋沐祗栗拜章上言请立先庙以奉常祀于是得请于天子承式于有司是岁某月某日经始于东都明年某月某日有事于新庙外尽其物内尽其心三献百顺神格礼成其友居易以李氏宗祖世家名爵与仆射志行官业书于丽牲之碑谨按家略九代祖善权後魏譙郡守八代祖延观徐梁二州刺史七代祖续某郡太守六代祖显达隋颍州刺史五代祖迁皇朝某某二州别驾赠德州刺史高祖孝卿右散骑常侍赠邓州刺史曾祖府君讳敬玄总章仪凤间历吏部尚书同中书门下三品中书令弘文馆大学士监修国史封赵国公諡曰文宪才智职业载在国史今祭于第一室以妣蒯国夫人范阳卢氏配焉王父府君讳守一属世难家徙不求闻达避荣乐道与时浮沉终成都府郫【蒲麋切】县令祭于第二室以妣荥阳夫人郑氏配焉先考府君讳晤历金坛乌程晋陵三县令府君为人笃於家行饰以吏事动有常度居无惰容所莅之所有善政辞满之日多遗爱不登贵仕其命矣夫今祭于第三室以先妣上谷夫人范阳卢氏配焉府君累赠至尚书右仆射夫人累赠至上谷郡太夫人前後凡三追命六告身渥泽疊洽自叶流根从子贵也郫县暨晋陵府君咸善积于躬道屈于位储祉流庆而仆射生焉仆射名绅字公垂六岁丁晋陵府君忧孺慕号踊如成人礼九岁终制孝养上谷太夫人年虽幼承顺无违家虽贫甘旨无阙侍亲之疾冠带不解者三载余可知也执亲之丧水浆不入口者五日余可知也先是祖妣考妣【晋陵府君前娶夫人裴氏无子早卒】洎叔父兄妹之殯咸未归祔各处一方公在斩纓中亲护九丧匍匐万里及期襄事礼无阙违至诚感神有灵乌瑞芝之应事动乡里名闻公卿言孝友者以为表率宪宗嗣统三年李錡盗据京口公寓居无锡会擢第东归錡闻公名署职引用初询以谋画结舌不对次强以章檄絶笔不书诱之以厚利不从迫之以淫刑不动将戮辱者数四就幽囚者七旬诚贯神明有死无二言名节者以为準程朝廷嘉之为右拾遗岁余穆宗知公忠孝文行召入翰林特授司封员外郎知制诰迁中书舍人承顔造膝知无不言献替啓沃如石投水俄拜御史中丞户部侍郎既而望属台衡朝当宴驾时移世变遂出掾高要佐浔阳旋为滁壽二州刺史大凡公之为政也应用无方所居必化卧理二郡以去害为先故有盗奔兽依之感廉察浙右以分忧为功故有恤邻活殍

之惠尹正河洛以革弊为急故有摘奸抉蠹之威文宗知公全才知汴难理乃授鉞钺俾镇绥之初宣武师人骄强狠悍徧乱徼利积习生常公既下车尽知情伪刑赏信惠合以为用一年而下惩劝二年而下服畏三年而下耻格肃然丕变薰然太和抚之五年人俗归厚至于扞大患御大灾却飞蝗遏洪水致岁於丰稔免人於垫溺噫微公之力汴之民其为殍乎其为鱼乎殊绩尤课不可具举天下征镇淮海为大非公作帅不足以长东诸侯制加银青光禄大夫扬州长史淮南诸道节度观察等使余如故诏下之日出次于外军门不击柝里巷无犬吠从容五日按节而东百姓三军挈壶浆捧簞醪遮道攀饯者动以万辈皆呜咽流涕如婴儿之别慈母焉噫若非襦袴之惠及其幼鸡豚之养及其老又推赤心置人腹中者则安能化暴戾之俗一至於此乎西人泣送东人歌迎梁楚千里风变化移膏雨景星所至蒙福于时开成会昌之际上方致理公未登庸顒顒苍生环望而已盛矣哉大丈夫生於世也以忠贞奉于君以义利惠乎人以黻冕贵乎身以宗庙显乎亲以孝敬交乎神宜其荷百禄辅一德为有唐之宗臣者欤君子谓李氏之庙也休哉公之祭也顺哉然曰有孙如此有子如此可谓孝也故其碑铭云

祭祀从贵爵土有秩诸侯之庙一宫三室皇皇西室皇祖中书孝孙追远昭穆有初显显中室王父郾令顺孙祇享尽懃尽敬肃肃东室先考晋陵嗣子奉荐孝思蒸蒸嗣子其谁仆射公垂公垂翼翼斋严谅直为子为臣有典有则载膺休命载践右职以孝肥家以忠肥国乃授侯伯纛钺旗戟乃飨祖祢牲牢黍稷家声振耀国典褒饰六命徽章三世血食光大遗训显扬祖德子孙承之垂裕无极

白苹洲五亭记

湖州城东南二百步抵霅【直甲切】溪连汀洲一名白苹梁吴兴守柳惲於此赋诗云汀洲采白苹因以为名也前不知几千万年後又数百载有名无亭鞠为荒泽至大历十一年顔鲁公真卿为刺史始剪榛导流作八角亭以游息焉旋属灾潦荐至沼堙台圯後又数十载萋芜隙地至开成三年弘农杨君为刺史乃疏四渠濬二池树三园构五亭卉木荷竹舟桥廊室泊游宴息宿之具靡不备焉观其架大溪跨长汀者谓之白苹亭介二园阅百卉者谓之集芳亭面广池目列岫者谓之山光亭翫晨曦者谓之朝霞亭狎清涟者谓之碧波亭五亭间开万象迭入向背俯仰胜无遁形每至汀风春溪月秋花繁鸟啼之旦莲开水香之夕宾友集歌吹作舟棹徐动觴咏半酣飘然恍然游者相顾咸曰此不知方外也人间也又不知蓬瀛崑阆复何如哉时予守官在洛阳杨君纸书賫图请予为记予按图握笔心存目想覩【郎何切】缕梗槩十不得其二三大凡地有胜境得人而後发人有心匠得物而後开境心相遇固有时耶盖是境也实柳守濫觴之顔公椎轮之杨君绘素之三贤始终能毕事矣杨君前牧舒舒人治今牧湖湖人康康之由革弊兴利若改茶法变税书之类是也利兴故府有羨财政成故居多暇日是以余力济高情成胜槩三者旋相为用岂偶然哉昔谢柳为郡乐山水多高情不闻善政龚黄为郡忧黎庶有善政不闻胜槩兼而有者其吾友杨君乎君名汉公字用又恐年祀久远来者不知故名而字之时开成四年十月十五日记

画西方帧记【开成五年三月十五日】

我本师释迦如来说言从是西方过十万亿佛土有世界号极乐以无八苦四恶道故也其国号净土以无三毒五浊业故也其佛号阿弥陁以寿无量愿无量功德相好光明无量故也谛观此娑婆世界微尘衆生无贤愚无贵贱无幼艾有起心归佛者举手合掌必西向西方怖厄苦恼者开口发声先念阿弥陁佛又范金合土刻石织文乃至印水聚沙童子戏者莫不率以阿弥陁佛为上首不知其然而然由是而观是彼如来有大誓愿於此衆生此衆生有大因缘於彼国土明矣不然者东南北方过去见在未来佛多矣何独如是哉唐中大夫太子少傅上柱国冯翊县开国侯赐紫金鱼袋白居易当衰暮之岁中风痺之疾乃舍俸钱三万命工人杜宗敬按阿弥陁无量寿二经画西方世界一部高九尺广丈有三尺阿弥陁佛坐中央观音势至二大士侍左右天人瞻仰眷属围绕楼台妓乐水树花鸟七宝严饰五彩彰施烂烂煌煌功德成就弟子居易焚香稽首跪於佛前起慈悲心发弘誓愿愿此功德回施一切衆生一切衆生有如我老者如我病者愿皆离苦得乐断恶修善不越南部便覩西方白毫大光应念来感青莲上品随愿往生从见在身尽未来际常得亲近而供养也欲重宣此愿而偈赞云

极乐世界清净土无诸恶道及诸苦愿如老身病苦者同生无量壽佛所

画弥勒上生幀记

南赡部洲大唐国东都香山寺居士太原人白乐天年老病风因身有苦遍念一切恶趣衆生愿同我身离苦得乐由是命绘事按经文仰兜率天宫想弥勒内衆以丹素金碧形容之以香火花果供养之一礼一赞所生功德若我老病苦者皆得如本愿焉本愿云何先是乐天归三宝持十斋受八戒者有年岁矣常日日焚香佛前稽首发愿愿当来世与一切衆生同弥勒上生随慈氏下降生生刼刼与慈氏俱永离生死流终成无上道今因老病重此证明所以表不忘初心而必果本愿也慈氏在上实闻此言言讫作礼自为此记时开成五年三月日记

香山寺新修经藏堂记

先是乐天发愿修香山寺既就【事具前记】迨今七八年寺有佛像有僧徒而无经典寂寥精舍不闻法音三宝阙一我愿未满足乃於诸寺藏外杂散经中得遗编坠轴者数百卷帙以开元经录按而按之於是絶者续之亡者补之稽诸藏目名数乃足合是新旧大小乘经律论集凡五千二百七十卷乃作六藏分而护焉寺西北隅有隙屋三间土木将坏乃增修改饰为经藏堂堂东西间辟四窗置六藏藏二门启闭有时出纳有籍堂中间置高广佛座一座上列金色像五百像後设西方极乐世界图一菩萨影二环座悬大幡二十有四榻席巾几泊供养之器咸具焉合为道场简俭严净开成五年九月二十五日堂成藏成道场成以香火衅之以饮食乐之以管磬歌舞供养之与闲振源济钊操洲畅八长老及比邱衆百二十人围绕赞叹之又别募清淨七人日日供斋粥给香烛十二部经次第讽读俾夫经梵之音昼夜相续洋洋乎盈耳哉忻忻乎满愿哉尔时道场主佛弟子香山居士乐天欲使浮图之徒游者归依居者护持故刻石以记之

香山寺白氏洛中集记

白氏洛中集者乐天在洛所着书也太和三年春乐天始以太子宾客分司东都及兹十有二年矣其间赋格律诗凡八百首合为十卷今纳于龙门香山寺经藏堂夫以狂简斐然之文而归依支提法宝藏者于意云何我有本愿愿以今生世俗文字之业狂言绮语之过转为将来世世赞佛乘之因转法轮之缘也十方三世诸佛应知噫经堂未灭记石未泯之间乘此愿力安知我他生不复游是寺复覩斯文得宿命通省今日事如智大师记灵山於前会羊叔子识金环於後身者欤於戏垂老之年絶笔於此有知我者亦无隐焉大唐开成五年十一月二日中大夫守太子少傅冯翊县开国侯上柱国赐紫金鱼袋白居易乐天记

唐东都奉国寺禅德大师照公塔铭【并序】

大师号神照姓张氏蜀州青城人也始出家於智凝法师受具戒於惠萼律师学心法於惟忠禅师忠一名南印即第六祖之法曾孙也大师祖达摩宗神会而父事印其教之大旨以如然不动为体以妙然不空为用示真寂而说不说断灭破计着而不坏假名师既得之揭以行化出蜀入洛与俗人有缘用开六坛仅三十载随根说法言下多悟由是裂疑网拔惑箭渐离我人相者日日有焉起正信见本觉顿发菩提心者时时有焉其余退恶进善随分而增上者不可胜纪夫如是可不谓烦恼病中师为医王乎生死海中师为船师乎呜呼病未尽而医去海方涉而船失粤以开成三年冬十二月示灭于奉国寺禅院以是日迁葬于龙门山报年六十三僧夏四十四明年传教主院上首弟子沙门清闲紉门徒合财施与服勤弟子志行等营度襄事卜兆於宝应寺荷泽祖师塔东若干步窆而塔焉示不忘其本也其诸升堂入室得心要口诀者有宗实在襄复俨在洛道益在镇知远在徐建在晋道光在润道威在潞云贞在慈云表在汴归忍在越会幽齐经在蔡智全景玄绍明在秦各於一方分作佛事咸鼓钟鸣吼龙象蹴蹋斯皆吾师之教力也不其盛欤衆以余忝闻法门人结菩提之缘甚熟请於塔石序而铭曰

伊之北西洛之南东法祖法孙归全於中旧塔会公新塔照公亦如世礼祔于本宗

不能忘情吟【并序】

乐天既老又病风乃录家事会经费去长物妓有樊素者年二十余绰绰有歌舞态善唱杨枝人多以曲名名之由是名闻洛下籍在经费中将放之马有骆者馥【总五切】壮骏稳乘之亦有年籍在经物中将鬻之圉人牵马出门马骧首回顾一鸣声音间似知去而旋恋者素闻马嘶惨然立且拜婉变有辞【辞具下】辞毕泣下予闻素言亦愍然不能对且命回勒反袂饮素酒自饮一杯快吟数十声声成文文无定句句随吟之短长也凡二百五十五言噫予非圣达不能忘情又不至於不及情者事来搅情情动不可柅因自晒题其篇曰不能忘情吟吟曰

鬻骆马兮放杨柳枝掩翠黛兮顿金羈马不能言兮长鸣而却顾杨柳枝再拜长跪而致辞辞曰主乘此骆五年凡千有八百日衔檠之下不惊不逸素事主十年凡三千有六百日巾栉之间无违无失今素貌虽陋未至衰摧骆力犹壮又无虺隤即骆之力尚可以代主一步素之歌亦可以送主一杯一旦双去有去无回故素将去其辞也苦骆将去其鸣也哀此人之情也马

之情也岂主君独无情哉余俯而叹仰而哈且曰骆骆尔勿嘶素素尔勿啼骆反厩素反闺吾疾虽作年虽颓幸未及项籍之将死亦何必一日之内弃雅兮而别虞兮乃目素兮素兮为我歌杨柳枝我姑酌彼金罍我与尔归醉乡去来

六赞偈

乐天常有愿愿以今生世俗文笔之因翻为来世赞佛乘转法轮之缘也今年登七十老矣病矣与来世相去甚远故作六偈跪唱於佛法僧前欲以起因发缘为来世张本也

赞佛偈

十方世界天上天下我今尽知无如佛者堂堂巍巍为天人师故我礼足赞叹归依

赞法偈

过见当来千万亿佛皆因法成法从经出是大法轮是大宝藏故我合掌至心回向

赞僧偈

缘觉声闻诸大沙门漏尽果满衆中之尊假和合力求无上道故我稽首和南僧宝

赞衆生偈

毛道凡夫火宅衆生胎卵湿化一切有情善根苟种佛果终成我不轻汝汝无自轻

忏悔偈

无始劫来所造诸罪若轻若重无小无大我求其相中间内外了不可得是名忏悔

发愿偈

烦恼愿去涅槃愿住十地愿登四生愿度佛出世时愿我得亲最先劝请请转法轮佛灭度时愿我得值最後供养受菩提记

佛光和尚真赞

会昌二年春香山寺居士白乐天命续以写和尚真而赞之和尚姓陆氏号如满居佛光寺东芙蓉山兰若因号焉

我命工人与师写真师年几何九十一春会昌壬戌我师尚存福智壽腊天下一人灵芝无根
寒竹有筠温然言语嶷然风神师身是假师心是真但学师心勿观师身

醉吟先生墓志铭【并序】

先生姓白名居易字乐天其先太原人也秦将武安君起之後高祖讳志善尚衣奉御曾祖讳
温检校都官郎中王父讳鎰侍御史河南府巩县令先大父讳季庾朝奉大夫襄州别驾大理
少卿累赠刑部尚书右仆射先大父夫人陈氏赠颍川郡太夫人妻杨氏弘农郡君兄幼文皇
浮梁县主簿弟行简皇尚書膳部郎中一女适监察御史谈弘謩三侄长曰味道卢州巢县丞
次曰景回淄州司兵参军次曰晦之举进士乐天无子以侄孙阿新为之後乐天幼好学长工
文累进士拔萃制策三科始自校书郎终以少傅致仕前後历官二十任食禄四十年外以儒
行修其身中以释教治其心旁以山水风月歌诗琴酒乐其志前後着文集七十卷合三千七
百二十首传於家又着事类集要三十部合一千一百三十门时人目为白氏六帖行於世凡
平生所慕所感所得所丧所经所逼所通一事一物已上布在文集中开卷而尽可知也故不
备书大历六年正月二十日生於郑州新郑县东郭宅以会昌六年月日终於东都履道里私
第春秋七十有五以某年月日葬于华州下邽县临津里北原祔侍御仆射二先茔也启手足
之夕语其妻与侄曰吾之幸也壽过七十官至二品有名於世无益於人褒优之礼宜自贬损
我歿当敛以衣一袭送以车一乘无用卤簿葬无以血食祭无请太常諡无建神道碑但於墓
前立一石刻吾醉吟先生传一本可矣语讫命笔自铭其墓云乐天乐天生天地中七十有五
年其生也浮云然其死也委蜕然来何因去何缘吾性不动吾行屡迁已焉已焉吾安往而不
可又何足厌恋乎其间

白氏长庆集卷七十一